

იგანე ჯავახიშვილის სახელობის თბილისის სახელმწიფო უნივერსიტეტი
პუმანიტარულ მეცნიერებათა ფაკულტეტი

შპროფესიული დიზაინის ინსტიტუტი

თამარ გეგეშიძე

უსიმოლობიზმი ღია მეცნიერებების რომანებში

ფილოლოგიის დოქტორის (Ph.D.) აკადემიური ხარისხის მოსაპოვებლად წარმოდგენილი

დ ი ს ე რ ტ ა ც ი ა

სამეცნიერო ხელმძღვანელი: ფილოლოგიის დოქტორი
პროფესორი ქახაბერ ლორია
თბილისი

2013



შინაარსი

შესავალი	4
თავი I	
ოთარ ჭილაძის რომანები ქართულ ლიტერატურულ კრიტიკაში	11
თავი II	
ოთარ ჭილაძის პროზა მე-20 საუკუნის ლიტერატურულ ტენდენციათა ფონზე	22
1. ოთარ ჭილაძის სუბიექტური რომანები	22
2. ფსიქოლოგიზმი და მხატვრული ლიტერატურა	28
თავი III	
ფსიქოანალიტიკური თემატიკა ოთარ ჭილაძის პროზაში	38
1. კლასიკური ფსიქოანალიზის ტრანსფორმაცია მხატვრულ ლიტერატურაში	38
2. ფსიქოანალიტიკური თემატიკა ოთარ ჭილაძის რომანებში “ყოველმან ჩემმან გპოვნელმან”, “მარტის მამალი” და “გოდორი”	42
თავი IV	
სიზმრის ფუნქცია ოთარ ჭილაძის რომანებში	54
1. სიზმრის იუნგისეული სტრუქტურა	58
2. მთხოვობელის, აველუმისა და სონიას საერთო სიზმარი რომანიდან “აველუმი”	64
3. ელიზბარის სიზმარი რომანიდან “გოდორი”	69
4. ნიკოს სიზმარი რომანიდან “მარტის მამალი”	78
თავი V	
“ცნობიერების ნაკადი” და ოთარ ჭილაძის პროზა	91

1. “ცნობიერების ნაკადის” ტექნიკა რომანში “გოდორი”	97
2. “ცნობიერების ნაკადის” ტექნიკა რომანში “მარტის მამალი”	109
3. ინდივიდუალური მეხსიერება “ცნობიერების ნაკადის” ტექნიკით შესრულებულ რომანებში (ოთარ ჭილაძის პროზის მაგალითზე)	116
4. ოთარ ჭილაძის პროზის მიმართება უილიამ ფოლკნერის პროზასთან	127
ა) მთხოვობელის ფუნქცია ფოლკნერისა და ჭილაძის რომანებში	136
 დასტგნები	143
 დამოწმებანი	154

შესაგალი

მე-20 საუკუნე მრავალმხრივ საინტერესო პერიოდია ლიტერატურასა და ხელოვნებაში, რადგან ეს არის ღირებულებათა გადაფასებების საუკუნე, რასაც არაერთი სიახლე მოაქვს. საუკუნის დასაწყისშივე ჩნდება ახალი რევოლუციური თეორიები, მოძღვრებები თუ მიმართულებები, რაც შემდგომ განსაზღვრავს ლიტერატურულ პროცესს. ჭეშმარიტების ძიება და ადამიანის სულიერი სამყაროს ფარული შრეების წვდომა ამ ეპოქის მთავარი პრობლემებია, რამაც, ფაქტობრივად, ყველა მნიშვნელოვანი ავტორის შემოქმედებაში იჩინა თავი. საუკუნის დასაწყისში მოდერნიზმი დასვამს საკითხს ჭეშმარიტების რაობისა და ადამიანის ფუნქციის შესახებ, რის ამოხსნასაც ცდილობს თითქმის ყველა პუმანიტარული დისციპლინა, მათ შორის ლიტერატურა, ფსიქოლოგია თუ ფილოსოფია. შესაბამისად, ბერგსონი, ფროიდი თუ ჯოისი ერთდროულად მიდიან იმ დასკვნამდე, რომ მე-20 საუკუნის სულიერ კრიზისში მყოფი ადამიანის პრობლემების ამოხსნის ერთადერთი საშუალება მის შინაგან სამყაროში ჩაღრმავება, მისი “შიგნიდან” გახსნაა, რაც საბოლოოდ ყველა ამ სფეროს კვლევის საგანი ხდება.

ამგვარი საკითხები ყველა ქვეყნის ლიტერატურაში თავისებურად წარმოაჩინა. ეპოქის დასაწყისში ქართული ლიტერატურული სივრცისთვის მოდერნიზმი და მისი ტენდენციები ორგანული აღმოჩნდა. საბჭოთა პერიოდში შექმნილ ნაწარმოებებში მეტ-ნაკლებად იგრძნობა ჩაკეტილი სივრცე, ხოლო ე.წ. პოსტსაბჭოთა პერიოდის ლიტერატურაში ისევ გაუხსნა კარი ევროპულ თუ მსოფლიო პროზის ტენდენციებს და დააკმაყოფილა მკითხველის ინტერესი.

სწორედ ამ პრიორის მწერალია ოთარ ჭილაძეც, რომელიც მე-20 საუკუნის მეორე ნახევრის ქართულ ლიტერატურაში თავისი პროზის თემატიკით, სტილითა და წერის ტექნიკით, უდავოდ გამოკვეთილი ფიგურაა. მწერალი, პოეტი და დრამატურგი 1933 წელს დაიბადა, სკოლაში ჯერ ბათუმში, შემდეგ კი თბილისში სწავლობდა. 1956 წელს დაამთავრა თბილისის სახელმწიფო უნივერსიტეტის ფილოლოგიის ფაკულტეტი. პირველი პოეტური კრებული 1959 წელს, ხოლო

პირველი პროზაული ნაწარმოები – 1973 წელს გამოაქვეყნა. სულ თერთმეტი პოეტური კრებულის, ექვსი რომანისა და ერთი პიესის ავტორია. მიღებული აქვს არაერთი პრემია, 1998 წელს კი პროზაიკოსი ლიტერატურის დარგში ნობელის პრემიაზე იყო ნომინირებული მსოფლიოს ხუთ სხვა მწერალთან ერთად.

საკვლევი პრობლემის აქტუალობა. ოთარ ჭილაძე იმ ქართველ მწერალთა რიცხვს განეკუთვნება, რომლებმაც მე-20 საუკუნის ინტერდისციპლინარულ გარემოში, ლიტერატურული ნაწარმოების რეალობის, პერსონაჟების ხასიათებისა და საკუთარი მსოფლმხედველობის უკეთ წარმოსაჩენად, თავიანთი პროზა არაერთ აქტუალურ თეორიასა თუ მოძღვრებზე დაყრდნობით განავითარებს. შესაბამისად, ჭილაძის რომანებში ჩანს მე-20 საუკუნის ლიტერატურისთვის დამახასიათებელი თითქმის ყველა ძირითადი ტენდენცია, იქნება ეს მკვეთრად გამოხატული მითოლოგიზმი თუ რემითოლოგიზაცია, ლათინო-ამერიკული პროზისთვის ნიშანდობლივი “მაგიური რეალიზმის” კლემენტები, დრმა ფსიქოლოგიზმი - ადამიანის სულიერ სამყაროს ამოცნობის მცდელობა, რის წარმოჩენასაც მწერალი ზიგმუნდ ფროიდისა და კარლ გუსტავ იუნგის სიდრმის ფსიქოლოგიის თეორიების გათვალისწინებით ახერხებს თუ ახალი ისტორული პროზის უანრში მუშაობა. აქვე უნდა დავასახელოთ წერის მანერის თავისებურებაც – თხრობა სუბიექტური პერსაექტივიდან და პერიოდულად “ცნობიერების ნაკადის” ტექნიკის მეშვეობით პერსონაჟის არა მხოლოდ ცნობიერში, არამედ არაცნობიერში ჩაღრმავების მცდელობაც. სწორედ ამიტომაა ოთარ ჭილაძის პროზა მრავალფეროვანი, მრავალმხრივ საინტერესო და კვლევისას არაერთი საკითხის განხილვის შესაძლებლობას იძლევა.

ოთარ ჭილაძის შემოქმედება უხვი მასალაა მკვლევრებისა და ლიტერატურის კრიტიკოსებისთვის, ამიტომ, მიუხედავად იმისა, რომ მის რომანებზე ბევრი დაწერილა და არაერთი საკითხი განხილულა, მწერლის პროზა ბოლომდე შესწავლილი მაინც არ არის, განსაკუთრებით კი მე-20 საუკუნის ის ტენდენციები და თეორიები, რომელთაც, შესაძლოა, პროზაიკოსი წერის პროცესში ეყრდნობოდეს და იყენებდეს. ამ შემთხვევაში ნაშრომში ყურადღება გამახვილებულია ოთარ ჭილაძის პროზის ფსიქოლოგიზმზე, ანუ მწერლის მიერ ადამიანის ფსიქოლოგიური ბუნების ამოხსნის ხერხებზე, რასაც, ვფიქრობ, თეორიული გამყარებაც აქვს – ზიგმუნდ ფროიდისა და კარლ გუსტავ იუნგის

თეორიები პიროვნების შინაგან სტრუქტურასა და ინდივიდუალიზაციის პროცესზე. გარდა ამისა, ნაშრომში საუბარია მწერლის წერის მანერასა და ტექნიკაზე, აღნიშნულია, რომ პერიოდულად ის მიმართავს “ცნობიერების ნაკადის” ტექნიკას და თხზავს შინაგან მონოლოგებს, რისი მიზანიც ასევე პერსონაჟების შინაგანი სამყაროს, მათი ცნობიერისა და არაცნობიერის წვდომის მცდელობაა.

ოთარ ჭილაძე სწორედ ფსიქოლოგიური და სუბიექტური მიდგომის შედეგად აყალიბებს თავისი პერსონაჟების ხასიათებს. მწერლის რა ტიპის ნაწარმოებთანაც არ უნდა გვქონდეს საქმე, იქნება ეს ტრადიციული რეალისტური, მოდერნისტული თუ ისტორიული რომანი, ის პერსონაჟების ხასიათებს “შიგნიდან” ხატავს. ამგვარი თხრობის მანერა კი ეხმიანება ავტორის მიერ შერჩეულ ტექნიკასაც – “ცნობიერების ნაკადსა” თუ შინაგან მონოლოგს, რაც, თავის მხრივ, გმირის არაცნობიერის ამოხსნას ისახავს მიზნად.

პრობლემის მეცნიერული შესწავლის დონე. ოთარ ჭილაძის პროზამ თავიდანვე, პირველი რომანის გამოჩენისთანავე, დადგებითი შეფასებები მიიღო, დაიწერა არაერთი გამოხმაურება, პერიოდულ გამოცემებში გამოქვეყნდა სტატიები მისი შემოქმედების სხვადასხვა საკითხის შესახებ. შესაბამიასად, მისი რომანები შესწავლილი და განხილულია, თუმცა კიდევ არაერთი პრობლემატური საკითხი ყურადღების მიღმა დარჩა. ოთარ ჭილაძის შესახებ არსებულ ლიტერატურულ კრიტიკაში დასმულია, მაგრამ შესწავლილი არ არის ზოგიერთი ის საკითხიც, რომელიც წინამდებარე ნაშრომის კვლევის საგანს წარმოადგენს.

კვლევის საგანი, მიზნები და ამოცანები. კვლევის საგანს წარმოადგენს ოთარ ჭილაძის რომანები: “ყოველმან ჩემმან მპოვნელმან”, “მარტის მამალი”, “აველუმი” და “გოდორი”, რადგან სწორედ ეს ნაწარმოებები ეხმიანება იმ საკითხებსა და პრობლემებს, რომლებიც ნაშრომშია განხილული.

ნაშრომის მიზანია ოთარ ჭილაძის ტექსტებსა და საკვლევი საკითხების ირგვლივ არსებულ სამეცნიერო ლიტერატურაზე დაყრდნობით, მწერლის პროზაში მხატვრული ფსიქოლოგიზმის საფუძვლების აღმოჩენა და, შესაბამისად, მისი ანალიზი, რაც ამ ავტორის პროზაული ნაწარმოებების მსოფლიო ლიტერატურული ტენდენციების კონტექსტში განხილვის საშუალებას მოგვცემს. გარდა ამისა, მისი

რამდენიმე რომანის, როგორც “ცნობიერების ნაკადის” ტექნიკით შესრულებული ნაწარმოებების წარმოჩენა.

ოთარ ჭილაძის მხატვრული ფსიქოლოგიზმი ფრთიდისა და იუნგის თეორიებს, შესაბამისად, ფსიქოანალიტიკურ თემატიკას, არაცნობიერს, სიზმრების ინტერპრეტაციასა და ადამიანის ინდივიდუალიზაციის პროცესს ეყრდნობა. გმირის ხასიათის ფსიქოლოგიურ წვდომას რიგ შემთხვევაში ხელს უწყობს ავტორის მიერ შერჩეული ტექნიკაც, “ცნობიერების ნაკადი” და შინაგანი მონოლოგების სიმრავლე, რაც, თავის მხრივ, გმირის არაცნობიერის წვდომასაც ისახავს მიზნად. არაცნობიერის წარმოჩენაში მწერალს ეხმარება სიზმრები, რომლებიც ყოველთვის შეიცავენ გმირისა თუ მკითხველისთვის საჭირო და აუცილებელ ინფორმაციას. აუცილებელია აღინიშნოს, რომ ჭილაძე არ არის “ცნობიერების ნაკადის” ავტორი ამ ტერმინის კლასიკური გაგებით, ის იყენებს ამ მეთოდის ტექნიკას, როგორც ეფექტურ მხატვრულ ხერხს, რათა უკეთ წარმოაჩინოს თავისი გმირების სულიერი მდგომარეობა.

ოთარ ჭილაძე საყურადღებო მწერალია სწორედ იმით, რომ მის ნაწარმოებებში ჩანს მისი ეპოქის ყველა მნიშვნელოვანი პრობლემა და იგრძნობა არაერთი იმ დროისთვის აქტუალური თეორიისა და ტენდენციის კვალი, რაც მის პროზას ქართული ლიტერატურისთვის უნიკალურს ხდის. ამას მწერალი პერსონაჟების ხასიათების, მათი შინაგანი სამყაროს, სუბიექტური პერსპექტივის უკეთ წარმოსაჩენად მიმართავს. ნაშრომში ჩანს, რომ ჭილაძის გმირები ლრმა, რთული და ხშირად ტრაგიკული შინაგანი ბუნების მქონე პიროვნებები არიან და, როგორც წესი, მათი პრობლემები მათივე შინაგანი კონფლიქტიდან იღებს სათავეს.

კვლევის პროცესში გამოჩნდა, რომ ოთარ ჭილაზე მსოფლიო ლიტერატურულ ტენდენციებს პირველივე რომანიდან ეხმიანება, მაგრამ დროსთან ერთად მისი ნაწარმოებები უფრო მრავალფეროვანი ხდება, მწერალი გმირების ხატვისას ამატებს ახალ კომპონენტებს, ცდილობს, უფრო ფართოდ და ლრმად წარმოაჩინოს პერსონაჟების შინაგანი სამყარო და ართულებს წერის ტექნიკასა და თხრობის ფორმებსაც –მწერალი ხან “უოვლისმცოდნე ავტორის” როლში გამოდის და თავად მართავს თხრობას, ხანაც თხრობის პროცესს მთლიანად პერსონაჟს მიანდობს, გვხვდება ამგვარი თხრობის ტიპების სინთეზიც.

კვლევის პროცესში ცხადი გახდა, რომ ამგვარ ტენდენციათა სიმრავლიდან გამომდინარე, ოთარ ჭილაძე მე-20 საუკუნის მეორე ნახევრის ქართულ ლიტერატურაში ერთ-ერთი ყველაზე მასშტაბური მწერალია.

კვლევის თეორიული საფუძვლები. არსებობს არაერთი თეორიული მოდელი, რომელიც მხატვრული ტექსტის რთული და მრავალმხრივი ფენომენის ამოსახსნელად, მისი სტრუქტურის გასაგებად და მხატვრული ანალიზისთვის გამოიყენება. შესაბამისად, წინამდებარე ნაშრომიც რამდენიმე ასეთ თეორიულ საფუძველს ემყარება. მხატვრული ფსიქოლოგიზმი ოთარ ჭილაძის რომანებში ზიგმუნდ ფროიდისა და კარლ გუსტავ იუნგის თეორიული დეტულებებისა და ჯეიმს ჯოისის მიერ შემუშავებული “ცნობიერების ნაკადის” კონცეფციის ფონზე გამოვლინდა. შესაბამისად, მწერლის რომანებში პიროვნების ინდივიდუალიზაციის პროცესის წარმოჩენისას, სადისერტაციო ნაშრომში გამოყენებულია ფროიდის კლასიკური ფსიქოანალიზის თეორია, ხოლო ნაწარმოებებში სიზმრების ფუნქციაზე საუბრისას, იუნგის სიზმრის ინტერპრეტაციის ფსიქოლოგიური მოდელი. ასევე ჯეიმს ჯოისის მიერ შემუშავებული “ცნობიერების ნაკადის” კონცეფცია.

მხატვრული ფსიქოლოგიზმი პერსონაჟის შინაგანი სამყაროს აღწერას გულისხმობს, თუმცა რთულია ამ ცნების ადგილის განსაზღვრა თანამედროვე თეორიულ სისტემებში, რადგან აშკარაა განსხვავება თეორიულ მიდგომებში, ისტორიულ-ტიპოლოგიური ხასიათების ნაშრომების არარსებობა და ამ საკითხისადმი აგტორების ინდივიდუალური დამოკიდებულება. ამიტომ მხატვრული ფსიქოლოგიზმი მეტწილად ცაკლეული ავტორების ნაწარმოებების ანალიზის შედეგად განისაზღვრა. ლიტერატურულმა ფსიქოლოგიზმმა შედარებით ჩამოყალიბებული სახე მე-19 საუკუნის რეალისტურ პროზაში მიიღო, ხოლო მე-20 საუკუნეში ის ახალ საფეხურზე გადავიდა, გახდა მრავალფუნქციური და საკუთარი გამომსახველობითი ფორმები და ხერხებიც დასჭირდა, როგორიცაა, მაგალითად, “ცნობიერების ნაკადი” და შინაგანი მონოლოგი.

ფსიქოლოგიზმი მე-20 საუკუნეში აღარ არის მხოლოდ პერსონაჟის შინაგანი სამყაროსა და გრძნობების ამსახველი, არამედ ტექსტის სიუჟეტისა და სტრუქტურის განმსაზღვრელიც. ამგვარი “ახლებური ფსიქოლოგიზმის” საფუძველს

ქმნის ახალი ფსიქოლოგიური თეორიები და მიმდინარეობები, რომლებიც ლიტერატურამ ფსიქოლოგიისგან ისესხა, უპირველეს ყოვლისა კი ზიგმუნდ ფროიდისა და კარლ გუსტავ იუნგის თეორიები ადამიანის შინაგან სტრუქტურაზე, მის ცნობიერსა თუ ქვეცნობიერზე. ფროიდის თეორია პიროვნების შესახებ უამრავ ასპექტს მოიცავს, დაწყებული ადამიანის განვითარების სხვადასხვა ეტაპების პლევიდან, დასრულებული პიროვნების სტრუქტურის მოდელის შექმნით, მაგრამ ერთ-ერთი ყველაზე მნიშვნელოვანი საკითხი ცნობიერისა და არაცნობიერის ურთიერთობაა. იუნგის თეორიაც არაცნობიერ სამყაროს დასტრიალებს თავს, თუმცა ეს ფსიქოლოგი მის წვდომას სიზრებითა და არქეტიპული სახეებით ცდილობს.

რაც შეეხება “ცნობიერების ნაკადის” ლიტერატურულ მეთოდს, ის ისევე, როგორც თავად “ცნობიერების ნაკადის” პროზა, მოდერნიზმის ფარგლებში ინგლისურ და ამერიკულ ლიტერატურაში აღმოცენდა და განვითარდა, რასაც ხელი შეუწყო ჯეიმს ჯოისის რომანმა “ულისემ”, სადაც მან ამ მეთოდის კონცეფცია ჩამოაყალიბა. “ცნობიერების ნაკადის” ლიტერატურულმა მეთოდმა უწყვეტი, მუდმივად დენადი არაცნობიერი მოტივების გამოხატვა და აზრის გაჩენის პროცესის ჩვენება დაისახა მიზნად, რომლის დროსაც აქცენტირებულია ცნობიერების მეტყველებამდელი დონე. შესაბამისად, მისი ფუნქცია არაცნობიერის წვდომაა.

ნაშრომი სწორედ ამ რამდენიმე, ლიტერატურათმცოდნეობით და სიღრმის ფსიქოლოგიის თეორიებს ეყრდნობა.

კვლევის მეთოდები. წარმოდგენილ კვლევაში ოთარ ჭილაძის მსატვრული პროზის ანალიზისთვის გამოყენებულია ისტორიულ – შედარებითი, დესკრიპტიული, შეპირისპირებითი მეთოდები და მოცემულია ამ ტრადიციული ლიტერატურული მეთოდების სინთეზი. პერიოდულად მიმდინარეობს ტექსტის გარკვეული მონაკვეთების ნარატოლოგიური ანალიზი, ხოლო ტექსტისა და მკითხველის დამოკიდებულების წარმოჩენისათვის ერთვება რეცეზციული ესთეტიკის მეთოდოლოგია.

ნაშრომში გამოყენებული ძირითადი ცნებები და ტერმინები

არასაკუთრივ-პირდაპირი დისკურსი – დისკურსი, სადაც მთხოვბელი თხრობას, თხრობის აქტს პერსონაჟს უთმობს.

არქეტიპი – კოლექტიური არაცნობიერის შემადგენელი ფსიქიკური სტრუქტურა, ფსიქიკური შინაარსების კლასები, რომლებიც შეიცავენ ისეთ შინაარსებს, რომლებიც არ არის შეძენილი პიროვნების ინდივიდუალური გამოცდილებით.

აქტუალიზაცია – ნაწარმოების დეტალის ან ეპიზოდის გაცოცხლება.

განუსაზღვრელი ადგილი – ასახული საგნის ის მხარე ან ადგილი, რომლის შესახებ ტექსტის საფუძველზე ზუსტად ვერ ვიტყვით, როგორ არის ეს საგანი განსაზღვრული ამ თვალსაზრისით (Ingarden 1994: 44).

ინდივიდუალიზაცია – პიროვნების ფორმირების, ჩამოყალიბების პროცესი, არსებული პოტენციალისა და რესურსების მაქსიმალური რეალიზების შედეგად.

კონკრეტიზაცია - განუსაზღვრელი ადგილების შევსება მკითხველის ფანტაზიით.

ლიბიდო – სექსუალური ენერგია

მოლოდინის პორიზონტი – მკითხველის მოლოდინი ახალი ნაწარმოების აღქმასთან დაკავშირებით.

რეცეზიული ესთეტიკა – აღქმის ესთეტიკა, ჰანს გეორგ გადამერის, რომან ინგარდენის, ჰანს რობერტ იაუსისა და ვოლფგანგ იზერის მიერ შემუშავებული ლიტერატურათმცოდნეობითი მიმდინარეობა, რომელიც მჭიდროდ უკავშირდება ჰერმენევტიკას.

რეციპიენტი – მკითხველი, მსმენელი, დამკვირვებელი

სუბლიმაცია - გაკეთილშობილება

ტრადიციული ნარატივი - თხრობა I პირის გარეშე, ნაწარმოების რეალობის აღწერა.

ნაშრომის მეცნიერული სიახლე. როგორც უკვე აღინიშნა, ოთარ ჭილაძე მრავალმხრივ შესწავლილი ავტორია. რამდენიმე ნაშრომში დასმულია წინამდებარე პლევისთვის მნიშვნელოვანი საკითხებიც, კრიტიკოსები ოთარ ჭილაძის ნაწარმოებებს მოიხსენიებენ, როგორც “ფსიქოლოგიურ პროზას”, აღნიშნავენ, რომ მწერლის რომანებში ჩანს “ცნობიერების ნაკადის” ტექნიკა და იგრძნობა კლასიკური ფსიქოანალიზის კვალი, მაგრამ ეს საკითხები აქამდე შესწავლილი არ ყოფილა. ამიტომ, შეიძლება ითქვას, რომ წარმოდგენილი სადისერტაციო ნაშრომი არის ოთარ ჭილაძის პროზის ფსიქოლოგიზმისა და მისი რამდენიმე რომანის, როგორც “ცნობიერების ნაკადის” ტექნიკით შესრულებული ნაწარმოებების, წარმოჩენის პირველი მცდელობა. ასევე პირველადაა საუბარი მწერლის პროზაში არსებულ ფროიდისეულ ფსიქოანალიტიკურ თემატიკასა და სიზმრის სტრუქტურაზე, რომელიც იუნგის თეორიულ მოდელს ეყრდნობა.

თავი I

ოთარ ჭილაძე ქართულ ლიტერატურულ პრიზიკაში

მას შემდეგ, რაც სამწერლო ასპარეზზე ოთარ ჭილაძე გამოჩნდა, მის პროზაულ ნაწარმოებებზე არაერთი მოსაზრება გამოითქვა და მე-20 საუკუნის მეორე ნახევრიდან პერიოდულ გამოცემებში გამოქვეყნებულმა რეცენზიებმა და სტატიებმა საკმაოდ დიდ რიცხვს მიაღწია. მწერლის პირველი რომანის გამოსვლიდან (1973 წ.) მისი პროზა გამუდმებით მსჯელობის საგანია და თავისი სტილისა თუ სიუჟეტის მრავალფეროვნების წყალობით, ამოუწურავი მასალაა კრიტიკოსებისთვის. მოულოდნელი აღმოჩნდა ის ფაქტიც, რომ უკვე წარმატებული პოეტი, კარგი პროზაიკოსიც აღმოჩნდა. უფრო მეტიც, შეიძლება ითქვას, რომ ოთარ ჭილაძე მე-20 საუკუნის ქართული პროზის ერთ-ერთი გამორჩეული ფიგურაა.

ოთარ ჭილაძე ექვსი რომანის ავტორია: “გზაზე ერთი კაცი მიდიოდა” (1973), “უოველმან ჩემმან მპოვნელმან” (1976), “რკინის თეატრი” (1981), “მარტის მამალი” (1987), “აველუმი” (1995) და “გოდორი” (2002). მაგრამ ამ შემთხვევაში ნაშრომში წარმოდგენილია მხოლოდ იმ რომანებზე დაწერილი სტატიების მიმოხილვა, რომლებიც კვლევის საგანს წარმოადგენს, ესენია: “უოველმან ჩემმან მპოვნელმან”, “რკინის თეატრი”, “მარტის მამალი”, “აველუმი” და “გოდორი”.

მწერლის რომანებზე საკუთარი მოსაზრებები, რომლებიც, ძირითადად, დადებითი ხასიათისაა, არაერთმა კრიტიკოსმა გამოთქვა. მათ შორის შეიძლება გამოვყოთ გურამ ასათიანი, რომელმაც ოთარ ჭილაძის რომანებს რამდენიმე სტატია მიუძღვნა, კობა იმედაშვილი, ლია არჩვაძე, ანდრო უვანია, კონსტანტინე მამაცაშვილი, ეთერ ყამბეგაშვილი, მაია ჯალიაშვილი და სხვები. უფრო გვიან პერიოდში კი აღსანიშნავია მანანა კვაჭანტირაძის, ნაზი ხელაიას, გია ბერაძის, ნანა ცანავას, ადა ნემსაძისა და სხვათა წერილები. მათ შორის მანანა კვაჭანტირაძე და ადა ნემსაძე ოთარ ჭილაძის პროზის ცნობილი მკვლევრები არიან.

როგორც უკვე აღინიშნა, ოთარ ჭილაძე ქართულ ლიტერატურულ კრიტიკაში თავიდანვე დადებითად შეფასდა. 1983 წელს, გაზეთ „კომუნისტი“ მწერლის

მოდგაწეობისა და ნაწარმოებების შესახებ აზრი რამდენიმე კრიტიკოსმა გამოთქვა. დასახელებულ წერილში კრიტიკოსი ირაკლი აბაშიძე მიიჩნევს, რომ ჭილაძე ქართულ და საბჭოთა პროზაში ნამდვილად განსხვავებულ სიტყვას ამბობს და, შესაბამისად, ხელს უწყობს ქართული პროზის წინსვლას (გვერწითელი 1983: 3). ოთარ თაქთაქიშვილის აზრით „ოთარ ჭილაძემ ქართულ მწერლობაში მართლაც მოიტანა, როგორც თვითონ ამბობს ერთ თავის ლექსში, „რაღაც ახალი, სულმთლად ახალი“. ფილოსოფიურ სიღრმეებთან ერთად კი მისი ნაწარმოებები საოცარი რიტმითა და შინაგანი მუსიკალობითაც გვხიბლავს (გვერწითელი 1983: 3). ვიქტორ შკლოვსკი იმავე სტატიაში საუბრობს მწერლის სიმპათიებზე, რომელსაც ის მითოლოგიის მიმართ იჩენს და თვლის, რომ ჭილაძემ მითოლოგიას გააზრებულად და მაღალი დანიშნულებისთვის მოუხმო, რადგან თავად მითოლოგია რთული თემაა, ის ბრძოლოს ველია და არა გასასერნებელი ადგილი (გვერწითელი 1983: 3).

გ. გვერწითელის აზრით, რომელსაც ის 1979 წელს გამოქვეყნებულ სტატიაში გამოთქვამს, სწორედ მითია ჭილაძის პროზის ერთ-ერთი მნიშვნელოვანი დეტალი, რადგან მითის ფონზე განსაკუთრებით კარგად იხატება თანამედროვე პრობლემები, ვნებები თუ ტრაგედიები. “ოთარ ჭილაძემ მითს იმისთვის მიმართა, რომ დაპირისპირებოდა მას, მოქსენა მისთვის შარავანდედი, გაეშიშვლებინა და მიწიერი გაეხადა იგი. ოთარ ჭილაძე სამყაროს მითოსურ მოდელს ანგრევს, ყველაფრის მიზეზსა და შედეგს რეალობაში ეძებს და პოულობს” (გვერწითელი 1979: 2).

არაერთი კრიტიკოსის აზრით, ოთარ ჭილაძის პროზა იმსახურებს ფართო ასპარეზზე გასვლას. უნდა აღინიშნოს, რომ რომ მწერლის რომანები მართლაც არაერთ ენაზეა თარგმნილი, მათ შორის ინგლისურად, გერმანულად, დანიურად და რუსულად.

ქვემოთ წარმოდგენილია მნიშვნელოვანი სტატიები და გამოხმაურებები, რომლებიც ნაშრომში განხილულ რომანებზე დაიწერა.

“ყოველმან ჩემმან მპოვნელმან” მწერლის რიგით მეორე რომანია, რომელმაც განსაკუთრებული ყურადღება გამოიწვია, რადგან განსხვავდებოდა პირველი ნაწარმოებისგან. რომანს განსაკუთრებულად დადებითი გამოხმაურება მოჰყვა.

ერთ-ერთი პირველი კრიტიკოსი, ვინც ამ რომანს რამდენიმე სტატია მიუმდგნა, იყო გურამ ასათიანი. კრიტიკოსმა ნაწარმოებს მაღალი შეფასება მისცა და როგორც ტიპოლოგიურად, ასევე წერის ტექნიკით, ის უილიამ ფოლკნერის რომანს “ხმაურსა და მძვინვარებას” შეადარა (დასახელებულ სტატიებს უფრო დაწვრილებით ქვემოთ განვიხილავ) (ასათიანი 1977: 21-22).

კრიტიკოსი აპოლონ ცანავა ნაწარმოების მთავარ დირსებად მწერლის მიერ დაყენებულ ზოგადსაკაცობრიო საკითხებსა და მასთან დაკავშირებული ქვეტექსტებისა და პარადიგმა-სიმბოლოების გამოყენებას მიიჩნევს (ცანავა 1986: 114). ამ პარადიგმა-სიმბოლოებს რომანში უდიდესი ფუნქცია აკისრიათ, მაგალითად კრიტიკოსს მოჰყავს ცოდვის ზღვევისა და გალავნიანი ურუქის პარადიგმა, რომელიც ბიბლიიდან მომდინარეობს, მარადიული დედის პარადიგმა, მამლისა და ესკულაპეს პარადიგმა, გიორგას ჩიტად და ირმად ქცევის პარადიგმა და სხვა. საბოლოოდ კი განახლებისა და უკეთესი მომავლის პარადიგმა, კრიტიკოსის აზრით, ბავშვის სახეში პოულობს დეკოდირებას (ცანავა 1986: 114).

სიმბოლოებზე საუბრობს თავის სტატიაში “ოთარ ჭილაძის, როგორც რომანისტის, ზოგიერთი თავისებურების შესახებ” თინანო თევზაბეც და მაგალითად მოჰყავს რამდენიმე მნიშვნელოვანი სიმბოლო: დიდი საათი, რომლის დაქოქვაც მხოლოდ ქაიხოსროს შეუძლია, მისი სიცოცხლის ამთვლელი დროა, თოჯინა ასკლიპიოდოტა ქაიხოსროსთვის ასევე გაყინული დროის სიმბოლოა, ანეტასთვის კი მუდმივი მავშვი. მამლის სიკვდილი გიორგას სიკვდილის ნიშანია, მთავარი სიმბოლო კი თავად ის სამყაროა, რომელშიც გმირები ცხოვრობენ, ანუ ურუქი, რომელიც გროტესკული სახეა და შემორჩენილი აქვს მითოლოგიური პირველსახის ზოგიერთი ნიშანიც (თევზაბე 1989: 83).

რომანში არსებულ მითოსურ ნაკადზე საუბრობს კრიტიკოსი ნოდარ მამაცაშვილი სტატიაში “მითოსური ნაკადი ო. ჭილაძის რომანში” (მამაცაშვილი 1981: 145). კრიტიკოსი თვლის, რომ დრმა სიმბოლური აზრის მატარებელია ქაიხოსრო მაკაბლის მიერ თავის ღმერთად ბიბლიური ნოეს გამოცხადება, რადგან ნოესთვის ოჯახზე ზრუნვა კაცობრიობის გადარჩნის პირობაა, ქაიხოსროსთვის კი ოჯახის ინტერესები არ არსებობს და ის ისეთივე ნიდაბია, როგორც მუნდირი და ეპოლეტები.

კრიტიკოსის აზრით, რომანში პაპის ტირანიის წინააღმდეგ მიმართული პროტესტის გამოხატულება ალექსანდრესა და ნიკოს მიერ საღორის აფეთქებაა. აღსანიშნავია, რომ რომანის ეს პასაჟიც ბიბლიური “მაკაბელთა წიგნის” ერთ-ერთი ეპიზოდის რემინიცენციაა. თავად ალექსანდრე კი – ცალხელა გოლიათი, გილგამეშის ეპოსის გმირს ემსგავსება (მამაცაშვილი 1981: 147).

კრიტიკოს გია ბერაძეს დასმული აქვს საინტერესო საკითხი სტატიაში “მამა და ძე ოთარ ჭილაძის რომანში “ყოველმან ჩემმან მპოვნელმან” (ბერაძე 2005: 32). მისი მოსაზრებით, ნაწარმოებში მამებისა და ძეების მონაცელეობა და მათი ურთიერთობის კრიზისი ოჯახის მზარდ დეგრადირებას იწვევს. მაკაბელების საგა ოთხი თაობის ისტორიაა, დაწყებული ცრუმაკაბელი ქაიხოსროთი და დასრულებული პატარა მართათი, რომელსაც ასევე “ძის” ფუნქცია აქვს. ფაქტობრივად, ცრუმაკაბელები უპირისპირდებიან განსხვავებულ თაობას, პეტრესა და თავადისშვილი ბაბუკას შვილებს – ალექსანდრეს, ნიკოსა და ანეტას (ბერაძე 2005: 35).

კრიტიკოსი თვლის, რომ რომანში ყველაფერი სიმბოლურია - მაკაბელების საგა იგივე კაცობრიობის ისტორიაა ისევე, როგორც მარკესის ბუენდიიების საგა. სოფლის შუმერულ სახელთან, ურუქთან ერთად, სიმბოლურად ქდერს ბიბლიური გვარი მაკაბელიც, რითაც ავტორი ნაწარმოების პეტრესონაჟთა გენიალოგიის არქეტიპულობასაც უსვამს ხაზს (ბერაძე 2005: 36).

ოთარ ჭილაძის შემდეგი რომანი “რკინის თეატრი” საზოგადოებამ პირველად 1981 წელს იხილა. 1983 წელს გამოქვეყნებულ სტატიაში კობა იმედაშვილი წერს: „რომანში ორი ოჯახის ისტორიაა მოთხოვნილი. მაგრამ ეს წიგნი არაა საოჯახო რომანი. არაა არც რომანი ერთ, რომელიმე გამორჩეულ გმირზე, რაღაც ამ რომანს საერთოდ არ ყავს მთავარი გმირი კონკრეტული პეტრესონაჟის სახით. იგი საზოგადოების სულს იკვლევს და დროის ხასიათის განმსაზღვრელი ხდება. ეპოქის სულია მისი მთავარი მოქმედი გმირი”. კრიტიკოსი თვლის, რომ ნაწარმოების გასაგებად საჭიროა, მაქსიმალურად ვენდოთ ავტორს, რომელიც ერთადერთი გზამგვლევია ამ ქაოტურ თეატრსა თუ რეალობაში. მისივე აზრით, მკითხველისთვის დამაბნეველია რომანის პოლიფონიურობა, რაღაც ტექსტში ოთხი ხმა ისმია - „ნიღბის”, ჭეშმარიტი მე-ს, არაცნობიერისა და ავტორის. ამ

ყველაფერში კი მკითხველი თავად უნდა გაერკვეს. მიუხედავად ყველაფრისა კობა იმედაშვილი ამტკიცებს, რომ „რკინის თეატრი” ოპტიმისტური ტრაგედიაა: „ოპტიმისტური იმიტომ, რომ გმირი, რომელსაც ელიან და ველით ჩვენც, მოდის, ტრაგედია იმიტომ, რომ მონაწილეთა ბედს, მათ გარეშე მყოფი ძალები განსაზღვრავენ და თვით ისინი უძლურნი არიან რაიმე შეცვალონ თავის ტრაგიკულ ხვედრში” (იმედაშვილი 1983: 8).

1998 წელს, „ლიტერატურულ საქრთველოში” გამოქვეყნებულ სტატიაში ეთერ ყამბეგაშვილი „რკინის თეატრზე” საუბრობს. მისი აზრით “რომანში დროსივრცობა და ფაქტები არ ულია, რადგან ეს არის „ცნობიერებათა ნაკადის” მეთოდით შექმნილი ტიპური რომანი, რომელიც მკითხველს აოცებს ქვეცნობიერი ვნებების ასოციაციებზე აგებული რთული შინაგანი მონოლოგებით. ამიტომ რომანში ვხედავთ დროის უკანდაბრუნების პროცესს, დრო საგნებშია შეჭრილი. გმირები კი თავიანთი სუბიექტური დროის გამო განუწყვეტელ წინააღმდეგობაში არიან გარეგან დროსთან და უპირისპირდებიან იმ გმირებს, რომლებიც ობიექტური დროის კანონებით მოქმედებენ (ყამბეგაშვილი 1986: 75).

ინგა მილორავა სტატიაში “ოთარ ჭილაძის “რკინის თეატრის” მხატვრული სივრცე” თვლის, რომ რომანის სივრცე სამი ურთიერთგადაჯაჭვული სიბრტყისგან შედგება – ზღვა, ქალაქი და თოვლისა და უგზოობის ქვეყნა (მილორავა 2010: 88). მილორავას აზრით, ქალაქის სივრცე ჩაკეტილია და ამ სივრცეში მუდმივად ხდება დროის უკან დაბრუნება, რადგან შეკრული წრიდან თავის დაღწევის სხვა საშუალება არ არსებობს. ქალაქი მოქმედების განვითარების ადგილიცაა და სიმბოლურად ქალაქი-თეატრიც, სადაც ცხოვრება სპექტაკლია. ასევე ის ქვეყნის შეკუმშული სახეა.

რაც შეეხება მეორე სივრცულ მოდელს – ზღვას, ის წარმოდგენილია, როგორც პირველქმნილი საწყისი, ზედროული რეალობა, მასში შესვლა შეუცნობელ სამყაროში გადასვლის ტოლფასია. ზღვაში გადიან პერსონაჟები შვებისა და სიმშვიდის მოსაპოვებლად. ზღვის მსგავსად, თოვლისა და უგზოობის ქვეყანაც ჩაკეტილი სივრცეა, თუმცა ის უფრო ფანტასმაგორიული და შეუზღუდავია (მილორავა 2010: 91-92).

მწერლის რომანი “მარტის მამალი” ათწლიანი შუალედის შემდეგ დაიწერა, ამიტომ საზოგადოება მას ინტერესით შეხვდა და რუსულენოვან სტატიაში, რომელიც იმავე წელს გამოქვეყნდა, ავტორმა რომანს “სინათლესთან დაბრუნება” უწოდა, რადგან, მისი აზრით, ეს იყო ზოგადსაკაცობრიო და ეროვნულ საფუძვლებზე დაფუძნებული რომანი, სადაც სამყარო ისტორიულად თუ პოეტურად უწყვეტია, მთავარი პერსონაჟი კი სინდისის ქენჯის, სინანულის მეშვეობით ახერხებს განახლებას და სინათლისკენ მობრუნებას (სიდოროვი 1991: 4).

სტატიაში “ილია ჭავჭავაძე ქართულ რომანში”, კრიტიკოსი ციალა ბენდელიანი საუბრობს “მარტის მამალში” აღწერილ ილიას მკვლელობაზე, სადაც მოკლული და მკვლელი წყვილია – ორი მკვლელი და ორი მოკლული. მკვლელი უკიდურესაც დაცემული არსებაა, მოკლული ილია კი დმერთამდე ამაღლებული ფიგურა. კრიტიკოსის აზრით, პირველი, ანუ ილიას მკვლელობის მოტივები და სოციალურ-ფსიქოლოგიური მექანიზმი იდენტურია მეორე მკვლელობისა, რაც რომანში ბევრ რამეს ხსნის (ბენდელიანი 1999: 130).

კრიტიკოს კობა იმედაშვილის მოსაზრებით, რომელსაც ის ამ რომანზე გამოთქვამს, “მარტის მამალი” არაა ისტორიული რომანი, მაგრამ აქ მაინც ჩანს ისტორიის ახლებური და “დღევანდელი დღის” შესაფერისი შეფასება. უფრო მეტად კი ყურადღება გამახვილებულია პიროვნებისა და საზოგადოების ზნეობრივ სიმაღლეზე, ამიტომ მთავარი პრობლემა რომანში - პიროვნებისა და ერის თავისუფლება - ზნეობრივად უმწიკვლო ყმაწვილმა, თხუთმეტი წლის ნიკომ უნდა გადაწყვიტოს. კრიტიკოსი ასევე ხაზს უსვამს ნაწარმოებში არსებულ ორ დროსივრცეს – რეალურს ანუ კალენდარულსა და ნიკოს წარმოდგენებში არსებულ მუდამ შექცევად დროსა და უკიდეგანო სივრცეს (იმედაშვილი 1988: 104).

სწორედ დრო და სივრცეა მანანა კვაჭანტირაძის განხილვის მთავარი თემა სტატიაში “მარტის მამალი – დრო და სივრცე”. როგორც კრიტიკოსი წერს, აქ მკითხველი დროის ორი პლანის გამთლიანების მოწმე ხდება: ერთია მოვლენითი დრო, რეალური ფაქტებით, ხოლო მეორე ფსიქოლოგიური დრო, რომელიც პერსონაჟის ცნობიერის სუბიქტური დროა, სადაც თავს იყრიან გმირის აღქმები, განცდები, სიზმრები თუ ფანტაზიები. ამიტომ რომანის მთავარი პრობლემაც ფსიქიკის მეშვეობით ობიექტური პრობლემების გადალახვის მცდელობაა. გმირის

ფსიქოლოგიური პრობლემები გენეტიკურ კოდშია ჩადებული, ხოლო უახლოესი ისტორიული ნიშანსვეტი, ილიას მკვლელობაა (კვაჭანტირაძე 1992: 138).

კრიტიკოსი მარინე ტურავა ილიას მკვლელობას რომანში “მარადიულ მკვლელობას” უწოდებს, რომელიც არა მხოლოდ მკვლელს ანადგურებს სულიერად, არამედ მის შთამომავლობასაც. ეს კარგად ჩანს გოგიას სახეში, რომელიც ბიძის დირსეული მექვიდრე და თავადაც მკვლელია (ტურავა 2008). დასახელებულ სტატიაში, რომლის სათაურია “მამის ძიება ოთარ ჭილაძის პროზაში (“მარტის მამალი”), კრიტიკოსი სწორედ მემკვიდრეობით გადმოცემულ შესაძლებლობებზე ამავილებს ყურადღებას. შესაბამისად, ნიკო თავისი ოჯახის, მამისა და პაპის, მათი დალატისა თუ ერთგულების მატარებელია. კრიტიკოსი თვლის, რომ თუკი მას სურს, საკუთარი თავი იპოვოს, ჯერ მამის პოვნა მოუწევს (როგორც გიუგოლას მამის ცხედრის). ამიტომ უბრუნდება მამაზე მოგონებებს და საბოლოოდ ხვდება, რომ მამის უარყოფა სიყვარულზე ანუ ღმერთზე უარის თქმას ნიშნავს (ტურავა 2008).

რომანი “აველუმი” ასევე მნიშვნელოვანი ნაწარმოებია ოთარ ჭილაძის შემოქმედებაში. კრიტიკოსი ლელა მაისურაძე “აველუმს” “ტკივილიან რომანს” უწოდებს, რადგან ნაწარმოების მთავარი გმირი ბოროტების იმპერიაში დაიბადა, შესაბამისად, ტყვეობისთვისაა განწირული, მიუხედავად იმისა, რომ მითოსური გმირივით აკოწიწებს გასაფრენ ფრთებს. აველუმს ვერ ათავისუფლებს სიყვარული, ერქმევა მას მელანია, ფრანსუაზა თუ სონია, მაგრამ მისი შვილი, ეკაეკატერინეკატო, აველუმის წაბაძვით ცაში აფრენილი თაობის სიმბოლოა (მაისურაძე 1998: 78).

თავისუფლების თემას რომანის წამყვან მოტივად მიიჩნევს ლია არჩვაძეც, რომელიც თვლის, რომ “აველუმში” თავისუფლება დამონებულია და მხოლოდ ეკაეკატერინეკატო ახერხებს მცირე ხნით აფრენას, ანუ თავისუფლების შეგრძნებას. აველუმს კი ამ შეგრძნებას მხოლოდ სიყვარული ანიჭებს, თუმცა მისი სიყვარულის იმპერიაც ინგრევა. კრიტიკოსის აზრით, რომანის ამ და სხვა მოტივებსაც მითოლოგია კვებავს (არჩვაძე 1997: 11).

კრიტიკოსი მაია ჯალიაშვილი თავის წერილში “აველუმის” შესახებ ასევე მიიჩნევს, რომ რომანი მითოლოგიით საზრდოობს, რაც მრავალფეროვანი ნიუანსით

წარმოჩინდება – სინამდვილე მიესადაგება მითოსს, რომანის გმირები იმეორებენ მითის პერსონაჟების გამოვლილ გზას, მითი შემოდის ასოციაციურად, გვხვდება მითოსური სახეები ტროპული მნიშვნელობებითაც და ამ სახეების დკვეროიზება. თუმცა, აქვე დნიშნულია, რომ მწერალი არ ცდილობს მითის ახსნას, არამედ იყენებს მითოლოგიას კონკრეტული მხატვრული ამოცანის გადასაწყვეტად (ჯალიაშვილი 1997: 101).

კრიტიკოსი ადა ნემსაძე თვლის, რომ ოთარ ჭილაძის მხატვრულ სისტემაში ყველაზე მნიშვნელოვანი “სამთა ერთიანობის” პრინციპია, ანუ სამი თაობის ერთიანობა, რაც კარგად გამოჩნდა “აველუმშიც” სამეულით: აველუმი – ეკაეკატერინეკატო – შვილი. აქ კრიტიკოსი მწერლისავე სიტყვებს იშველიებს, რომ ადამიანი, სულ ცოტა, სამი თაობის ჯამია. ნემსაძის აზრით, რომანის მთავარი თემა სწორედ პიროვნული და თაობათა შორისი კრიზისია (ნემსაძე 2010: 161). და რადგან აველუმი “ბოროტების იმპერიაში” ცხოვრობს, სადაც მშობლები გადასახლებულია, და – გაჩუქებული, ხოლო თავად მისი პიროვნება – თავისუფლებაშეზღუდული, პერსონაჟი, ფაქტობრივად, ვერც ახერხებს კრიზისიდან გამოსვლას და ამგვარ სულიერ მდგომარეობას შვილსაც ახვევს თავს (ნემსაძე 2010: 163).

საყურადღებოა “აველუმის” შესახებ გამოქვეყნებული ერთ-ერთი ბოლოდროინდელი სტატია “ტრავმული მესიერება პოსტსაბჭოთა ქართულ ნარატივში”, რომლის ავტორიც მანანა კვაჭანტირაძეა. კრიტიკოსი სამართლიანად მიიჩნევს, რომ ადამიანის მესიერება რთული ტექსტია, რომელიც ტრამვული კვლებით, წარმოდგენებითაა დასერილი. ტრამვული კვლების გადალახვა კი ამ კვლების განუწყვეტლივ გადამუშავებით მიიღწევა (კვაჭანტირაძე 2010: 63). კვაჭანტირაძე თვლის, რომ ტრამვის გადალახვისთვის ცნობიერების მუშაობა, რაც ჩანს კიდეც “აველუმში”, მესიერების დადებით გამოცდილებად უნდა ჩაითვალოს. მთავარი გმირი ცდილობს, ტრამვა მარადიული ლირებულებებითა და მომავალზე პასუხისმგებლობის შეხერხებით გადალახოს. შესაბამისად, გადარჩენა ჭილაძესთან პირდაპირ უკავშირდება მესიერებასა და არდავიწყებას (კვაჭანტირაძე 2010: 65).

ოთარ ჭილაძის რომანი “გოდორი” განსაკუთრებით საყურადღებოა კრიტიკოსებისთვის, რადგან ეს მწერლის ბოლო ნაწარმოებია და, როგორც წერს

კრიტიკოსი ნანა ცანავა, ის ერთგვარად შემაჯამაბელი წიგნია ადრე გამოცემული რომანებისა, რომლებშიც ეპოქის ასახვის მიხედვით შესაძლებელია, გარკვეული თანმიმდევრობა დავინახოთ (ცანავა 2004: 153). შესაბამისად, კრიტიკოსი ნაწარმოებს მოიაზრებს, როგორც ისტორიულ რომანს, რომელშიც მწერალი ასრულებს ქართველთა ზნეობის ისტორიას, დაწყებულს ანტიკური პერიოდიდან (მის თავდაპირველ რომანებში), დასრულებულს მისი თანამედროვეობით. მწერალი რომანის მეტაფორული ხასიათის სათაურს პეპლის მეტამორფოზის პარადიგმით ხსნის (კვერცხი – მატლი - ჭუპრი – პეპლა), რაც, მისი აზრით, კაცთა მოდგმის ქრონიკადაც მოიაზრება და ამის მაგალითად სწორედ კაშელების სისხლიანი მოდგმა მოჰყავს. (ცანავა 2004: 155).

კაშელების მოდგმის სათავეზე, ანუ გოდორზე, მის სიმბოლურ მნიშვნელობაზე საუბრობს ელისო კალანდარიშვილიც სტატიაში “გამქრალი საქართველოს ძიებაში (ოთარ ჭილაძის “გოდორი”)" (კალანდარიშვილი 2004: 5-7). კრიტიკოსის აზრით, კაშელების მოდგმის პარტიარქის, რაუდენ კაშელიდან მოყოლებული, რომანში ასახულ ყველა ეპოქას თავისი კაშელი პყავს – სასტიკი, დაუნდობელი და სისხლისმსმელი, განსხვავებული მხოლოდ ბოლო კაშელი ანტონია, რომელიც ცდილობს წინაპრების წარსულს გაექცეს. აღსანიშნავია, რომ აქაც “გოდორი” აღქმულია, როგორც ისტორიული რომანი, რადგან რამდენიმე ჩანართი ზედიზედ ნოე ჟორდანიასა და ექვთიმე თაყაიშვილს ეძღვნება და დოკუმენტაციების სიცხადითაა აღწერილი საზოგადოების ზნეობა და ქცევის ნორმები (კალანდარიშვილი 2004: 11).

კრიტიკოსი ნაზი ხელაია თვლის, რომ “გოდორის” მიზანი, სწორედ გაუძლებართებული ზნეობის გამო, საქართველოსა და ქართველის გამოფხიზლებაა, რათა ბოლოსდაბოლოს დასრულდეს ეს “მარადიული დუალი”, რომელიც მუდამ ყოფნა-არყოფნის ზღვარზე ამყოფებს ქართველებს (ხელაია 2007: 58).

კრიტიკოსი ცისანა გენძეხაძე სტატიაში “წრეში მოქცეული დრო და სივრცე”, დრო-სივრცეში მოქცეულ კაშელების ცხოვრებაზე ამახვილებს ყურადღებას: “მომნესხველი ოსტატობით შეაქვს მწერალს “გოდორში” მეტატექსტი და აქაც ოთარ ჭილაძის შესაძლებლობები შეუდარებელია, ან რად ლირს გაუცხოებული

ტექსტი, ავტორისეული დისკურსი და თბილისი-ქვიშეთის (სრულიად კონკრეტული მიკროსამყაროს) გააზრება კაშელების დამოკიდებულების თვალსაზრისით გარესამყაროსთან, ანუ (პირობითად აღებული) ერთი ოჯახის ფუნქცია კოსმოლოგიურ მოდელში (გენდეხაძე 2003: 96).

საინტერესო და აღსანიშნავია თათა ცოფურაშვილის სტატია “კოლექტიური ფსიქოანალიზის “ლიტერატურული ანშლაგი”, სადაც ქრიტიკოსი ერთ-ერთი პირველი საუბრობს რომან “გოდორში” გამოვლენილ ფსიქოანალიტიკურ თემატიკაზე და ამ კუთხით განიხილავს მამისა და ძის თუ მამამთილისა და რძლის ურთიერთობას. მისი აზრით, ამ რომანის მეშვეობით მწერალი ერისთვის ერთგვარი “კოლექტიური ფსიქოანალიზისა” თუ ფსიქოთერაპიის ჩატარებას ისახავს მიზნად (ცოფურაშვილი 2004: ბ3).

მაია ჯალიაშვილი სტატიაში “დაკარგული ქვეყნის ძიება ოთარ ჭილაძის “გოდორის” მიხედვით” მიიჩნევს, რომ ეს რომანი ისევე, როგორც ჭილაძის მთელი პროზა, გამოირჩევა ნარატივის მრავალფეროვნებით, ამიტომ “გოდორის” ნარატივი სხვადასხვა თხრობითი სტრატეგიის მონაცემებითაა შექმნილი (ჯალიაშვილი 2010: 206). განსაკუთრებით დიდი ადგილი ეთმობა ტექსტში მთხობელის მეტანარატივს, რომელიც გამოხატულია ვრცელი ასოციაციური მსჯელობით თანამედროვეობის სხვადასხვა საჭირობოროტო საკითხზე, ამიტომ ხშირად რთულია მთხობელისა და პერსონაჟის ნარატივს შორის ხაზის გავლება. კრიტიკოსის აზრით, თხრობის სხვადასხვა პლანი მწერალს სჭირდება იმის წარმოსაჩენად, რომ საქართველო აღარ არსებობს და შესაბამისად, დროც გაჩერებულია (ჯალიაშვილი 2010: 208).

როგორც ვხედავთ, ქართულ ლიტერატურულ ქრიტიკაში ოთარ ჭილაძეს არაერთი წერილი მიეძღვნა, რომელთაგან ზოგიერთი მართლაც წარმოადგენს მწერლის ცალკეული ნაწარმოებისა თუ მთელი შემოქმედების საინტერესო ანალიზს. აქედან გამომდინარე შეიძლება ითქვას, რომ მწერლის პროზა მეტნაკლებად შესწავლილია და დასმულია მნიშვნელოვანი საკითხები. მაგრამ ეს მაინც მცირედია იმ მასალასთან შედარებით, რასაც ავტორი გვთავაზობს. ამიტომ უნდა აღინიშნოს, რომ ოთარ ჭილაძის რომანები კიდევ მრავალმხრივ შესწავლას საჭიროებს.

თავი II

ოთარ ჰილამის პროზა მე-20 საუკუნის ლიტერატურულ ტექნიკისათვის ფრთხილი

1. ოთარ ჰილამის სუბიექტური რომანები

მე-20 საუკუნის მოდერნისტული რომანის ერთ-ერთი თავისებურება არა რეალისტური და ობიექტური, არამედ სუბიექტური სამყაროსა და, შესაბამისად, სუბიექტური თხრობის მანერის წარმოჩენაა. მოდერნისტული ნაწარმოებები უღრმავდება პერსონაჟების შინაგან სფეროს, ცნობიერებას, ზოგჯერ არაცნობიერსაც კი და წარმოგვიდგენს გმირის თვალით დანახულ სამყაროს, რაც, ცხადია, სუბიექტურობასაც გულისხმობს. დიმიტრი ზატინსკი ბალზაკისეული „ცენტრიდანული“ რომანის საპირისპიროდ მეოცე საუკუნის რომანს „ცენტრისკენულს“ უწოდებდა” (ცნება „ცენტრისკენული“ დოსტოევსკიდან მოდის, რომელიც ცდილობდა ეჩვენებინა, თუ როგორ უკავშირდებოდა მის მიერ აღწერილი ამბები მისსავე სულიერ მდგომარეობასა და ემოციებს), თომას მანი კი თავად მოვლენას – შინაგანი ცხოვრების წინ წამოწევას, თხრობის „ჩაშინაგნებას“ (Verinnerlichung) (Затонский 1973: 384). ამგვარ რომანებში „მოქმედება, როგორც წესი, იწურება და მჭიდროვდება, ხდება რამდენიმე დღესა და შესაძლებელია, რამდენიმე საათშიც კი. იგი კი არ იშლება, პირიქით იკუმშება იმ გადამწყვეტი მომენტის გარშემო, რომელშიც გმირი იმყოფება და თხრობის ადამიანური ცენტრისკენ იბმება რეფლექსის მიხვეულ-მოხვეული, ნაწყვეტ-ნაწყვეტ ძაფები. ავტორები მკითხველს ზოგჯერ წარმოუდგენენ გმირის თითქმის მთელ ცხოვრებას, მაგრამ მის ემპირიულ მიმდინარეობაში კი არა, არამედ იმ შინაგანი აუცილებლობის შესაბამისად, რომელსაც განსაზღვრავს კონფლიქტის დერმისადმი ამ ცხოვრების მიმართება» (Затонский 1973: 384).

მოდერნიზმის ფარგლებში ტრადიციული რეალისტური რომანის ფორმისა და შინაარსის, თემატიკისა და კონცეფციების რღვევა საუკუნის დასაწყისიდანვე დაიწყო. ერთ-ერთი ნოვატორი ამ მხრივ სწორედ თეოდორ დოსტოევსკია, რომელმაც თავისი ინტერესი პერსონაჟის სუბიექტური სამყაროსკენ მიმართა.

მიხეილ ბახტინის აზრით ის ერთ-ერთი პირველია იმ მწერალთაგან, რომლებმაც დაარღვიეს ტრადიციული თხრობის მანერა და ახალი ფორმა, რეალობის აღქმის ახალი კონცეფცია შესთავაზეს მკითხველს. ბახტინი თვლის, რომ დოსტოევსკის შემოქმედებაში მთავარა ის, რომ ავტორი აღარ აღწერს სამყაროს მხოლოდ ერთი პერსპექტივიდან და შემოქმედებაში განსჯისა და აღქმის ახალი ტიპი, რომელსაც უწოდებს “პოლიფონიურს” (Бахтин 1972: 34).

ტერმინი “სუბიექტური თხრობა” თავის თავში სწორედ სუბიექტურ პერსპექტივას გულისხმობს და ის სხვადასხვა სტილისა თუ ჟანრის ნაწარმოებებს მიესადაგება, მაგალითად, მარსელ პრუსტის რომანების ციკლს “დაკარგულის დროის ძიებაში”, რომელიც გმირის შინაგან სამყაროს, მის წარმოდგენებსა და პოეტურ სახე-ხატებს წარმოგვიდგენს; ორმას მანისა თუ ფრანც კაფკას ეწ. “ჰერმეტულ რომანებს”, რომლის მიზანი ჩაკეტილ სივრცეში პიროვნების განწმენდისა და ამაღლების ჩვენებაა, რის ხარჯზეც ნაწარმოები წყდება ემპირიულ სინამდვილეს და ჩაკეტილ, ფანტასტიკურ თუ ჯადოსნურ სივრცეში თავსდება; ასევე “ცნობიერების ნაკადის” მეთოდითა და ტექნიკით შესრულებულ რომანებს, სადაც პერსონაჟის ცნობიერისა და არაცნობიერის წარმოჩენის ხარჯზე, პერიოდულად მხრობელიც კი ქრება და თხრობის პროცესის წარმართვას გმირს ანდობს (ჩიხლაძე 2007: 19-36). ამგვარი სუბიექტური რომანები თხრობის არაერთ ფორმასა და ტექნიკას იყენებენ, იქნება ეს შინაგანი მონოლოგი, ცნობიერების ნაკადი, კინემატოგრაფიული მონტაჟის ხერხები, ბიბლიური და მითოლოგიური მოტივები, უფრო მოგვიანებით “ეკლექტური” საერთო სტილი, ანტითხოვბა თუ სხვა ექსპერიმენტული საშუალებები. აქვე უნდა აღინიშნოს, რომ რომანის სუბიექტურობა მაინც გულისხმობს სუბიექტურისა და ობიექტურის ერთიანობას, რადგან ეს არის პერსონაჟის მე-სა და რეალობას შორის ურთიერთმიმართება (Mauter 2009: 12-15).

სუბიექტურ რომანში, რომლის რეალობასაც პერსონაჟი განსაზღვრავს, ეს რეალობა უსასრულოა ისევე, როგორც გმირის ცნობიერებაში ფიქრთა დინება. ობიექტურ რომანში კი რელობა “სრულდება”, ის სრულდება მაშინვე, როგორც კი პროტაგონისტი შეძლებს მოცემული მნიშვნელობის შესრულებას, მიზნის მიღწევას (Gessner-Utsch 1994: 19-25).

სუბიექტური თხრობა, რაც თავის თავში ამბის რამდენიმე პერსონაჟის თვალსაზრისის მიხედვით წარმოჩენას გულისხმობს, ოთარ ჭილაძის რომანებშიც შეინიშნება. მის ტექსტებში ნიშვნელოვანია არა იმდენად სიუჟეტი და მისი განვითარება, არამედ ის, თუ როგორ აისახება სიუჟეტური განვითარება გმირის ცნობიერზე, როგორ აღიქმება ემპირული მოვლენები მის გონებაში და, შედეგად, როგორ შეიცვლება პერსონაჟის ემოცია თუ დამოკიდებულება. ამიტომ თხრობაც ყოველთვის რომელიმე კონკრეტული პერსონაჟის პერსპექტივას მიჰყება. დაწყებული პირველი რომანებიდან, რომლებიც უფრო ტრადიციული რეალისტური სტილითაა შესრულებული (“ყოველმან ჩემმან მპოვნელმან”, “რკინის თეატრი”), დასრულებული “ცნობიერების ნაკადის” ტექნიკის გამოყენებით შესრულებული ნაწარმოებებით (“მარტის მამალი”, “გოდორი”). უან პოლ სარტრმა ამ მოვლენას “სუბიექტური რეალიზმი” უწოდა, რაც რომანში აღიარებს მხოლოდ ერთი ხმის – პერსონაჟის ხმის არსებობას.

ვფიქრობ, ოთარ ჭილაძის მთხრობელი ყოველთვის ცდილობს ერთი კონკრეტულ გმირის პოზიცია დაიკავოს და მისი შინაგანი სამყაროს მეშვეობით აღწეროს ემპირიული გარემო, ან სულაც, ერთი და იგივე მოვლენა რამდენიმე განსხვავებული პერსპექტივით წარმოაჩინოს. შეიძლება ითქვას, რომ პერსონაჟის შიდა სამყარო ეხმარება ავტორს რეალური მოვლენების წარმოდგენაში. ამის კარგი მაგალითია რომანში „ყოველმან ჩემმან მპოვნელმან“ ერთ-ერთი საკანძო მოვლენის – ნიკოსა და ალექსანდრეს მიერ მოწყობილი აფეთქებისა და ალექსანდრეს მიერ ხელის დაკარგვის აღქმა. გარეგნულად ეს ფაქტი ნამდვილად დამთრგუნველია – ახალგაზრდამ ხელი დაკარგა და დაინვალიდდა, მაგრამ სულ სხვაგვარია რეალობა, რომელსაც ავტორი გვიხატავს ალექსანდრეს თვალით. აქ ჩვენ წინაშე წარსდგება არა საცოდავი და საბრალო გმირი, რომელიც ტრაგიკულად განიცდის დაინვალიდებას და უჭირს მომავალზე ფიქრი, არამედ აგრესიული და ყველას მოწინააღმდეგე ალექსანდრე, რომელის უარს ამბობს ოჯახის წევრებთან კონტაქტზე, ეკედლება პირველსავე შემხვედრ ქალს – კოჭლსა და შეუხედავს, და საერთოდ არ ფიქრობს მომავალზე. ალექსანდრეს თვალით დანახული სამყარო საშიში და შემაძრწუნებელია – გმირს აღარ აინტერესებს ახლობელი ადამიანების ბედი, მტრულად განეწყობა მმის მიმართ, რომელიც ყველაზე მეტად უყვარს, საკუთარი თავისთვის ნიშნის მოგების მიზნით კი

ურთიერთობას ამყარებს ჭკუასუსტ მაროსთან. მაგრამ საქმე ისაა, რომ სწორედ ეს სუბიექტური რეალობაა ნაწარმოების ნამდვილი რეალობა, რომელსაც უნდა მისდიოს მკითხველმა. ამ შემთხვევაში სწორედ ალექსანდრეს სამყაროა მართალი და თვითმყოფადი, რადგან ისეთ ოჯახში, სადაც მამა შვილს ემტერება და ბაბუა-შვილიშვილებს, ალექსანდრეს სიძულვილი და მტრობა გამართლებული და მისაღებია. ავტორმა გმირების ამგვარი კონდიციის საჩვენებლად შეგნებულად ალექსანდრეს პერსპექტივა აირჩია. და ვისაც ირჩევს ავტორი, იმ კონკრეტულ შემთხვევაში ის გმირია ყველაზე ემპირული. ასეთ დროს მკითხველს არ აქვს სხვა არჩევანი გარდა იმისა, რომ გაიზიაროს ეს სუბიექტური პოზიცია, საკუთარი წარმოდგენების გააქტიურება და კონკრეტიზაციაც სწორედ ამგვარი რეალობიდან გამომდინარე უნდა მოახდინოს და არ შეთხას სხვა, შესაძლო “ობიექტური რეალობა”. სუბიექტურ რომანებში ნაწარმოების რეალობა პერსონაჟის სუბიექტურ წარმოდგენებს ექვემდებარება და მკითხველიც პერსონაჟთან ერთად მართავს მას, მიუხედავად იმისა, მართლდება თუ არა მისი მოლოდინის პორიზონტი.

როდესაც იმავე რომანში (“ყოველმან ჩემმან მპოვნელმან”) ავტორს იმედსა და მომავალზე სურს საუბარი, სიკეთესა და მადლიერებაზე ფიქრობს, მაშინ ალექსანდრეს ძმის, ნიკოს პერსპექტივას მიმართავს. ნიკო გარკვეული დროით ნაწარმოებში, თითქოს, იკარგება და მივიწყებულია, მის შესახებ აღარაფერი ისმის, მაგრამ ეს დროებითია, რადგან მხოლოდ სიმართლისა და სიკეთისთვის ციმბირში გადახვეწილ პერსონაჟს შეეძლო ნაწარმოებში იმედის შემოტანა და რწმენის გაღვივება. დანარჩენ პერსონაჟთაგან მხოლოდ მას უნდა პყოლოდა მართასნაირი ქალიშვილი, რომელსაც სამშობლოს, სახლის, ოჯახისა და საკუთარი თავის რწმენით გაზრდიდა. ამიტომაც ამგვარი თვალსაზრისის გამოხატვისას, მწერლისთვის ნიკოს ცნობიერებიდან დანახული რეალობაა რეალურიც და სასურველიც. ნაწარმოების სიუჟეტიდან ჩანს, რომ ნიკომ შეძლო ალექსანდრეს კრიზისული მდგომარეობიდან გამოყვანა, მოახერხა მისი გადარჩენა, ხელი შეუწყო ძმის გარდაქმნას.

იგივე შეიძლება ითქვას კიდევ ერთ რომანზე “რკინის თეატრი”, სადაც რეალობასა და სიუჟეტის მსვლელობას ასევე რამდენიმე პერსონაჟის სუბიექტური პოზიციიდან გვებულობთ, იქნება ეს დიმიტრი, რომელიც კეთილი და მოწესრიგებული, მაგრამ ფრთხილი, შეიძლება ითქვს, მშიშარა პერსონაჟიცაა და

ამიტომ, ეჭვის თვალით უყურებს ნებისმიერ მოვლენას. იქნება ეს თბილისელი მსახიობი, რომელიც ვერც ნაწარმოების რეალობას ეგუება და ვერც – წარმოსახულს, თეატრის სცენაზე გათამაშებულს. თუ ეს ეხება ნატას, რომელიც, გელას წასვლის შემდეგ, ფაქტობრივად, მხოლოდ თავისი ჩაკეტილი რეალობით ცხოვრობს და სხვა არაფერი აინტერესებს. ამ მხრივ ცოტა განსხვავებულია ჭილაძის რომანი “მარტის მამალი”, რომელიც მხოლოდ ერთი პერსონაჟის შინაგანი სამყაროს წარმოჩენას ემსახურება, მაგრამ ეს მაინც არ არის ყოვლისმცოდნე ავტორის მიერ მოთხოვილი ტექსტი, არამედ თავად გმირის ჩაღრმავება საკუთარ თავში. გარდა ამისა ნიკოს “სუბიექტურ რეალობაში” არსებულ პერსონაჟებსაც, რომლებიც, ფაქტობრივად, ნიკოს წარმოსახვაში მოქმედებენ, საკუთარი პერსექტივა გააჩნიათ და მკითხველი ნაწარმოების რეალობის შესახებ შთაბეჭდილებას მაინც რამდენიმე ადამიანის თვალსაზრისიდა გამომდინარე იქმნის, მაგალითად, ნიკოს დეიდის, ვანო მასწავლებლის, გოგიას ბიძის, გიუკოლას და ასე შემდეგ.

ოთარ ჭილაძის ბოლო რომანში “გოდორი” კი სიუჟეტი გმირების პირით მეტყველებს და გმირის სუბიექტური თვალთახედვის გარეშე მკითხველი მის განვითარებასაც ვერ გაიგებს. თუმცა „გოდორში“ სიტუაცია უფრო გართულებულია, რადგან ერთი და იგივე მოვლენა სხვადასხვა პერსონაჟის მიერაა წარმოდგენილი, რაც იმის მანიშნებელია, რომ თავად ავტორიც აღარ განარჩევს რომელია მათგან “სწორი” პოზიცია, სინამდვილისდამი სწორი დამოკიდებულება და რომელი – მცდარი. შედეგად, ნაწარმოების ემპირიული რეალობის შესახებ აზრი მკითხველმა უნდა გამოიტანოს. მაგალითად, ნაწარმოებში სიუჟეტის გაგების პროცესში ქმნის სხვადასხვა პერსონაჟის პოზიციიდან წარმოდგენილი რაჯდენ კაშელის მკვლელობის სცენა: რაჯდენის შვილის, ანტონის სუბიექტური წარმოსახვით, სწორედ ისაა მამის მკვლელი. ანტონი ცხადად ხედავს მამის გვამს, ესმის ცულის ხმა, რომლითაც მამას თავი გაუჩეხა, ამტკიცებს ამ ფაქტს პოლიციის განყოფილებაში, მაგრამ მკითხველი მოგვიანებით იგებს, რომ მკვლელობა ანტონს არ ჩაუდენია. მეორე, ანტონის ცოლის, ლიზიკოს, თვალთახედვით, რაჯდენი ცოლმა – ფეფემ - მოკლა და შემდეგ ლიზიკოს დახმარებით გვამი წყალში გადააგდო. ნაწარმოებში ჩანს კიდევ ერთი პოზიცია, რომლის მიხედვითაც რაჯდენს არაფერი მოსვლია და მმიმე საგნის დარტყმის

შემდეგ, მალევე მოვიდა გონს. ვფიქრობ, ეს ის მომენტია, როდესაც მკითხველი აქტიურად უნდა ჩაერთოს ნაწარმოებში და ესთეტიკური ადქმისას სწორი არჩევანი გააკეთოს. თუმცა აქვე უნდა აღინიშნოს ისიც, რომ რომანის კონცეფციიდან თუ თემატიკიდან გამომდინარე საკვანძო მოვლენაა ის, რომ რაუდენის მოკვლა გადაწყვიტეს ან “იდეურად მოკლეს”, რადგან ეს ბოროტების წინაშე გალაშქრების ტოლფასია და არა მისი ფიზიკური სიკვდილი. ამიტომ რა ხდება რომანის ემპირიულ რეალობაში და მართლა მკვდარია თუ არა რაუდენი, ამას ადარ აქვს გადამწყვეტი მნიშვნელობა, ავტორი ამ ფაქტზე ყურადღებას აღარ ამახვილებს. ეს რომანის ისეთი განუსაზღვრელი ადგილია, რომელიც განუსაზღვრელად შეგნებულადაა დატოვებული და ასევე უნდა დარჩეს. რომან ინგარდენის აზრით, ამგვარი განუსაზღვრელი ადგილების არსებობა შემთხვევითი არ არის და არც კომპოზიციური ნაკლის შედეგია. ზოგიერთი მოვლენის შესახებ ტექსტი დუმს, რადგან ბევრი რამ არა პირდაპირ, არამედ გაშუალებულად გამომდინარეობს ტექსტში მოცემული მნიშვნელობის მქონე განსაზღვრებებიდან (ინგარდენი 2011: 115), როგორც ამ კონკრეტულ შემთხვევაში.

ამ ყველაფრიდან გამომდინარე სუბიექტურ რომანებში ყველაზე მნიშვნელოვანი ელემენტი არა მოქმედება და სივრცე, არამედ გმირის ინდივიდუალობა, მისი სულიერი სამყაროა, რადგან აქ ნამდვილი რეალობა მხოლოდ ისაა, რასაც კონკრეტულ გმირი კონკრეტულ სიტუაციაში ხედავს. სინამდვილეა ის, რაც პერსონაჟის ცნობიერებაში ხდება და არა ემპირული ფაქტები. რაც მთავარია, ამგვარი მიღეობა და სუბიექტური თხრობის მანერაც ავტორის მიერ გამართლებულია, უფრო მეტიც, ავტორისთვის არ არსებობს სხვა, უფრო “ნამდვილი” და “დამაჯერებელი” რეალობა. ეს ასეა ოთარ ჭილაძის პროზაშიც, სადაც, იმის გათვალისწინებით, რომ მისი რომანები ტრადიციულისა და მოდერნისტულის ნაზავია, დროდადრო ერთვება ტრადიციული ნარატივი – აღწერითი, ავტორისეული თხრობა, მაგრამ ნაწარმოებების სიუჟეტი და კონცეფცია მთლიადად “სუბიექტურ რეალიზმს” ეყრდნობა. ზოგჯერ ჭილაძე აღწერს სინამდვილეს ყოვლისმცოდნე ავტორის პოზიციიდან (უფრო მეტად ადრინდელ რომანებში და ნაკლებად ბოლო ნაწარმოებებში), ხან კი საერთოდ უარყოფს მას და მთელ ტექსტს პერსონაჟის პერსპექტივიდან წარმოგვიდგენს (“მარტის მამალი”), ან კითხვის ქვეშ ტოვებს რომანის რეალური ფაქტების ნამდვილობას (“გოდორი”),

ან სულაც უარყოფს სინამდვილეს და მითებს მიმართავს. მითოლოგიზირებული სამყარო, თავისთავად უპირისპირდება რეალურს. აღსანიშნავია, რომ მაშინაც კი, როდესაც ის ყველაზე რეალურ სინამდვლეს – ქვეყნის ისტორიას აღწერს, მთხობელის პოზიცია აშკარად სუბიექტურია – ისტორიული პირებიც განსხვავებული სახით წარმოგვიდგებიან, ყურადღება მცირე დეტალებზეა გამახვილებული და ფაქტებიც თავისებურად აღქმული (ეს სწორედ ისაა, რასაც ახალი ტიპის ისტორიული პროზა ეწოდება, სადაც ასევე სუბიექტური საწყისებია მომძლავრებული).

საბოლოოდ შეიძლება ითქვას, რომ მე-20 საუკუნისთვის დამახასიათებელმა ტენდენციამ – პროზაში სუბიექტური საწყისების მომრავლებამ, აშკარად იჩინა თავი ოთარ ჭილაძის რომანებში, რადგან მის ნაწარმოებებში ემპირიული რეალობა, თითქმის ყოველთვის, პერსონაჟის (პერსონაჟების) სუბიექტური პერსაექტივიდანაა წარმოდგენილი. მწერალი, იმის მიხედვით, თუ რომელი პერსონაჟის თვალთახედვა და პოზიციაა მისთვის მისაღები კონკრეტულ სიტუაციებში, ცვლის რომანის რეალობისადმი დამოკიდებულებას და წარმოადგენს “სუბიექტურ რეალობას”, რომლის არსებობაც ჭილაძის ნაწარმოებებში ყოველთვის გამართლებულია, რადგან მწერალი პერსონაჟების “შიგნიდან” გახსნას, მათ ცნობიერსა თუ არაცნობიერში ჩაღრმავებას ცდილობს. ამიტომ ნაწარმოების “ობიექტური სინამდვილის” სწორად გასაგებად (რაც ხშირად გართულებულია), მკითხველმაც პერსონაჟის პოზიციას უნდა მისდიოს და სიტუაციის კონკრეტიზაციაც მოახდინოს არა საკუთარი, არამედ ავტორის მიერ მოცემული აქცენტებით. იმ შემთხვევაში კი სადაც ერთი და იგივე ფაქტი რამდენიმე გმირის ვერსიითაა წარმოდგენილი, რეციპიენტმა მათგან ყველაზე მართებული უნდა აირჩიოს ან ზოგიერთი განუსაზღვრელი ადგილი, რომელიც დაკონკრეტებას არ საჭიროებს, განუსაზღვრელადვე დატოვოს.

2 ფსიქოლოგიზმი და მხატვრული ლიტერატურა

ლიტერატურისა და ფსიქოლოგიის დამოკიდებულება ყოველთვის წარმოადგენდა ინტერესის საგანს, მაგრამ ის, რასაც ლიტერატურული, ე. წ. “მხატვრული ფსიქოლოგიზმი” ეწოდება, ადამიანის “სულიერი ცხოვრების გამოკვლევა”, სხვადასხვა ლიტერატურული ხერხით პერსონაჟის სიღრმისეული გრძნობებისა და ემოციების გამოხატვა (Гинзбург 1974: 45-67). ლიტერატორები თანხმდებიან იმაზე, რომ ფსიქოლოგიზმი პერსონაჟის შინაგანი სამყაროს მხატვრული აღწერაა, მაგრამ რომელია ამ ცნების ადგილის განსაზღვრა თანამედროვე თეორიების მრავალშრიან სისტემაში. ეს სირთულე სწორედ თეორიულ მიდგომებში განსხვავებამ, ისტორიულ-ტიპოლოგიური ხასიათების ნაშრომების არარსებობამ და ავტორების ინდივიდუალურმა მიდგომებმა შექმნა. ამიტომ ფსიქოლოგიზმი ხშირად ცაკლეული ავტორების ნაწარმოებების მიხედვით განისაზღვრება, თუმცადა მწერლის ეპოქისა და ჟანრის კონტექსტის გათვალისწინებით. აღსანიშნავია, რომ ფსიქოლოგიზმთან მიმართებაში გაჩნდა ტერმინები “ფსიქოლოგიური ანალიზი”, “ფსიქოლოგიური გამოსახულება” და ნაწარმოების ფსიქოლოგიზმი დაუკავშირდა მწერლის, პერსონაჟისა და მკითხველის სამკუთხედს (Золотухина 2009: 6-7).

ზოგიერთი კრიტიკოსის აზრით, ფსიქოლოგიზმის შესწავლა სხვადასხვა კომპონენტების გათვალისწინებით უნდა მოხდეს, ესენია: 1. ფსიქოლოგიური პრობლემის ტიპი, იქნება ეს სოციალურ-ისტორიული, ფილოსოფიური თუ ესთეტიკური პრობლემა; 2. პიროვნების, ხასიათის კონცეფცია, რომელიც იმ კონკრეტულ ეპოქას შეეფერება, რომელსაც ავტორი აღწერს; 3. ნაწარმოების მხატვრული სისტება და მეთოდი; 4. და ნაწარმოების პოეტიკის დონე (Забабуррова 1992: 223).

თუკი მხატვრულ ფსიქოლოგიზმზე ფართო გაგებით ვიმსჯელებთ, მაშინ შეიძლება ითქვას, რომ ის ნებისმიერი ეპოქის ლიტერატურაში არსებობდა, დაწყებული ანტიკური ხელოვნებიდან, დასრულებული თანამედროვე ნაწარმოებებით, მაგრამ კრიტიკოსი და ლიტერატურათმცოდნე ლ. გინზბურგი ფსიქოლოგიური რომანის განვითარების სათავეში ლევ ტოლსტოის შემოქმედებას აყენებს, როგორც ერთადერთ თეორიულ მასალას ლიტერატურულ ნაწარმოებში

ფსიქოლოგიზმის განვითარებისთვის და ამიტომ ტერმინს “ფსიქოლოგიზმი” იყენებს მხოლოდ მე-19 საუკუნის პროზასთან მიმართებაში (Гинзбург 1974: 285). სხვა კრიტიკოსიც წერს - მხატვრული ფსიქოლოგიზმი ეს არის ადამიანის სულიერი სამყაროს მხატვრული კვლევები მე-19 საუკუნის მეორე ნახევარსა და მე-20 საუკუნეში (Проскурин 2008). მართალია, წინა ეპოქაში ადამიანის სულიერ სამყაროს ყველაზე მეტად რომანტიზმი ჩაუდრმავდა, მაგრამ ის უფრო სულიერ ძიებებსა და ფასეულობებზე იყო ორიენტირებული. ხოლო მე-19 საუკუნიდან ფსიქოლოგიზმს საფუძვლად დაედო წარმოდგენა ადამიანის შინაგანი სამყაროს, როგორც მრავალშრიანი სისტემის შესახებ. ლიტერატურის ამგვარმა ფსიქოლოგიზაციამ ეს საუკუნე ფსიქოლოგიზმის, როგორც პოეტიკური პრინციპის ფორმირებამდე მიიყვანა (Проскурин 2008).

ლიტერატურული ფსიქოლოგიზმი იწყება მაშინ, როდესაც გამოჩნდებიან განსხვავებული პერსონაჟები, რაც დაკავშირებულია გმირის გამოკვეთილ ინდივიდუალიზმსა და რთულ, მრავალშრიან შინაგან სამყაროსთან (Проскурин 2008). თუმცა მე-19 საუკუნის ფსიქოლოგიზმის ახლებურად წარმოდგენა არა მხოლოდ ახალი პერსონაჟი-ხასიათის წარმოქმნამ და ამ პერსონაჟის საკუთარ თავში ჩაღრმავებამ, არამედ გმირის დგენეროიზაციამ და გაადამიანურებამაც განაპირობა.

შესაბამისად, ყალიბდება ფსიქოლოგიზმის შემდეგი ტიპები:

2. განმსაზღვრელი და აბსტრაქტული – პირველი განსაზღვრავს პერსონაჟის შინაგან პროცესებს, მეორე კი დაკავშირებულია პერსონაჟის განცდებისა და ვნებების ანალიზთან პიროვნების ხასიათის თავისებურებების გათვალისწინების გარეშე.

3. დედუქციური და ინდუქციური – ფსიქოლოგიზმის დედუქციური ტიპი ორიენტირებულია ფსიქოლოგიური ანალიზის შედეგზე, ხოლო ინდუქციური ფსიქოლოგიზმი გულისხმობს პროგრესულ ანალიზს “შიგნიდან” (Гинзбург 1974, Карельский 1983: 82-122).

ლიტერატურმა ფსიქოლოგიზმა ჩამოყალიბებული და ერთიანი სახე სწორედ მე-19 საუკუნის რეალისტურ პროზაში მიიღო, ხოლო განვითარდა და მრავალფუნქციური მე-20 საუკუნის ლიტერატურაში გახდა, სადაც მას საკუთარი გამომსახველობითი ფორმები და ხერხებიც დასჭირდა. მე-19 საუკუნის

ფსიქოლოგიზმის უმაღლეს მიღწევად ფრანგი გუსტავ ფლობერისა და რუსი ავტორების – ლევ ტოლსტოისა და ფიოდორ დოსტოევსკის პროზა ითვლება. რაც შეეხება ფლობერის პროზას, აქ საქმე საინტერესო ფსიქოლოგიზმთან გვაქვს. მწერალი ყოველთვის ართულებს პერსონაჟის შინაგანი ცხოვრების სურათს გრძნობების, განწყობებისა და უეცარი ემოციების ხარჯზე, თან ისე, რომ ამ ყველაფერს ახსნა-განმარტებებს არ უკეთებს. ასეთ შემთხვევებში მხატვრული ფსიქოლოგიზმის სუბიექტი სწორედ პერსონაჟის მდგომარეობა და ქმედებებია, რაც გამორიცხავს ავტორის განმარტებებს. ფლობერის ფსიქოლოგიზმი წარმოაჩენს ადამიანის შინაგანი სამყაროს დინამიურობას, დინების პროცესს და შინაგანი და გარეგანი სამყაროს რთულ კავშირს. (Реизов 1958: 203).

ტოლსტოიმ და დოსტოევსკიმ გააგრძელეს და უფრო განავითარეს ფსიქოლოგიზმის ეს ხაზი. მათ დამაჯერებლად აღწერეს ადამიანის შინაგანი სამყარო და განცდები, მაგრამ ფსიქოლოგიური ანალიზის სხვადასხვა ფორმას მიმართეს. ტოლსტოიმ ადამიანის აღწერის კომპლექსური მეთოდი აირჩია და გამოიყენა ე.წ. “სულის დიალექტიკა”. დოსტოევსკიმ კი “იდეების დიალექტიკას” მიმართა და უარი თქვა პერსონაჟების დახასიათებაზე (Андреев 1995: 82). ტოლსტოი ერთგვარად აგრძელებს ფლობერის ხაზს, მაგრამ უფრო განსხვავებულად ხატავს პერსონაჟების ხასიათებს, დამოკიდებულებას მათი ქმედებების მოტივებსა და შედეგებს შორის. დოსტოევსკი კიდევ უფრო დრმად იჭრება “ადამიანში” და წარმოაჩენს ერთი ადამიანის, გმირის შინაგანი განვითარების ეტაპებსა და შინაგან წინააღმდეგობებს (ბახტინი 1979: 34). ამასთანავე მწერალი აქცენტს აკეთებს პერსონაჟის ცხოვრებისეულ აღქმასა და მის გაუცხოებაზე.

რაც შეეხება მე-20 საუკუნეს, აქ ფსიქოლოგია, ფილოსოფია თუ უკვე თავად ლიტერატურა იძლევა უამრავ მასალას იმისთვის, რომ მხატვრული ფსიქოლოგიზმი ახალ საფეხურზე გადავიდეს. ლიტერატურული ნაწარმოები კიდევ უფრო უღრმავდება ადამიანს და ფსიქოლოგიზმიც საჭიროა იმისთვის, რომ მწერალმა პერსონაჟის სულიერი მდგომარეობისა და პრობლემების აღვარატური ასახვა შეძლოს. ეს, თავის მხრივ, ითხოვს გამოსახვის ახალ ფორმებს – ახალ ლიტერატურულ მეთოდებსა და ხერხებს, როგორიცაა, მაგალითად, “ცნობიერების ნაკადი” და შინაგანი მონოლოგი, ითხოვს ასევე განსხვავებულ პოეტიკას. გამოყოფენ ფსიქოლოგიური ანალიზის 3 ფორმას:

1. როცა ყოვლისმცოდნე ავტორი თავად საუბრობს პერსონაჟის გრძნობებზე და კომენტარებსაც აკეთებს ირიბი მეტყველების საშუალებით.

2. როცა ფსიქოლოგიზმი არაპირდაპირია და გამოხატავს პერსონაჟის ხასიათის “გარეგნულ” მხარეებს. შესაბამისად, აღწერს ადამიანის ფსიქოლოგიის გარეგნულ მახასიათებლებს – მეტყველების თავისებურებას, უსტს, მიმიკას, მოძრაობას.

3. როდესაც ხდება პერსონაჟის ხასიათის “შიგნიდან” წარმოჩენა, შეინიშნება პერსონაჟის ცნობიერისა და არაცნობიერის წვდომის მცდელობა, რაც გამოიხატება ნაწარმოებში “ცნობიერების ნაკადის” ტექნიკისა თუ შინაგანი მონოლოგის, სიზმრის, დდიურის, აღსარების გამოყენებაში (Гудонене 1998: 12) (ოთარ ჭილაძის შემთხვევაში სწორედ ამგვარ მიდგომასთან გვაქვს საჭმე. თავის რომანებში მწერალი ცდილობს, მაქსიმალურად ჩაუდრმავდეს პერსონაჟების შინაგან სამყაროს და “შიგნიდან” გახსნას ხასიათი).

ამ ყველაფრიდან ჩანს, რომ ფსიქოლოგიზმი მე-20 საუკუნეში აღარ არის მხოლოდ პერსონაჟის შინაგანი სამყაროსა და გრძნობების ამსახველი, არამედ ტექსტის სიუჟეტისა და სტრუქტურის განმსაზღვრელიც. ხდება მთელი რომანის სივრცის ფსიქოლოგიზაცია (Лейтец 1993: 33). ამგვარი “ახლებური ფსიქოლოგიზმის” საფუძველს ქმნის ის ახალი ფსიქოლოგიური თეორიები და მიმდინარეობები, რომლებიც ლიტერატურამ ფსიქოლოგიისგან ისესხა, უპირველეს ყოვლისა კი ზიგმუნდ ფროიდისა და კარლ გუსტავ იუნგის თეორიები ადამიანის შინაგან სტრუქტურაზე, მის ცნობიერსა თუ ქვეცნობიერზე. ფსიქოლოგების თეორიებში აშკარაა ადამიანის შინაგანი სამყაროსა და მისი სტრუქტურისადმი სრულიად განსხვავებული დამოკიდებულება, პიროვნება აღიქმება, როგორც როული, მრავალშრიანი და მრავალკომპონენტიანი არსება, რომელიც დრმა შესწავლას საჭიროებს.

ფროიდის კლასიკური ფსიქოანალიზის მეთოდმა სტიმული მისცა ადამიანის შინაგან სამყაროში ჩაღრმავების მცდელობას და ყურადღება გაამახვილა მისთვის არაერთ საინტერესო საკითხზე როგორიცაა, მაგალითად, პიროვნების შინაგანი ცხოვრების, როგორც ერთიანი, თუმცა მრავალშრიანი მოვლენის გააზრება,

ინდივიდისა და საზოგადოების ურთიერთობა, ინდივიდის ურთიერთობა საკუთარ თავთან. ამ თემებით ლიტერატურა თავისთავად, სხვა დისციპლინის ჩარევის გარეშეც ინტერესდებოდა, მაგრამ ფსიქოლოგიამ და, ამ შემთხვევაში, კონკრეტულად ფროიდმა, შესაძლებელი გახადა, ლიტერატურაში “სულის ანალიზი” “ცნობიერის ანალიზად” ექცია (Реизов 1958: 203-204).

მხატვრული ფსიქოლოგიზმი ლიტერატურაში სამი სახით არსებობს – როგორც უშუალოდ ლიტერატურის თვისება, როგორც ავტორის ფსიქიკის გამოხატულება და როგორც მწერლის მიერ განზრახ შერჩეული ესთეტიკური პრინციპები, რომელიც, თავის მხრივ, განსაზღვრავს მთელ ნაწარმოებს (Золотухина 2009: 43-48). ამ ყველაფერს კარგად მოერგო ფროიდის თეორიაც, რადგან ფსიქოანალიტიკურ კვლევებში ინტერესის საგანია ავტორის ფსიქიკაც, რომელიც, თავის მხრივ, სხვა ადამიანების როლ შინაგან სამყაროსა და ფსიქიკას ქმნის. ფსიქოლოგის სწავლებისა თუ პრაქტიკის მთავარი პრინციპი “შინაგანის გაგარებნება” და შინაგანი სამყაროს მრავალშრიანობის წარმოდგენაა. ამავე ხაზს აგრძელებს კარლ გუსტავ იუნგიც და თავისი თეორიებითა და სწავლებებით, იქნება ეს კოლექტიური მეხსიერების საკითხი თუ ადამიანის არაცნობიერის სიზმრების მეშვეობით წვდომა, გარკვეული წვლილი შეაქვს მხატვრული ფსიქოლოგიზმის განვითარებაში.

რაც შეეხება ოთარ ჭილაძეს, მის პროზაში მხატვრული ფსიქოლოგიზმი, იმ სახით, როგორც ის არსებობს მე-20 საუკუნის ლიტერატურაში, ნამდვილად მწერლის შემოქმედების, მისი მუშაობის ერთ-ერთი მთავარი პრინციპია. თავის რომანებში ჭილაძე ყველაზე დიდ ადგილს სწორედ პერსონაჟების შინაგანი სამყაროს აღწერას, მათი პრობლემების აღმოჩენასა და გადაჭრის გზების დასახვას უთმობს. რა ტიპის ნაწარმოებთანაც არ უნდა გვქონდეს საქმე, იქნება ეს ტრადიციული რეალისტური რომანი თუ ტრადიციულისა და მოდერნისტულის ნაზავი, მწერალი ხასიათებს “შიგნიდან” ხატავს და მაქსიმალურად ცდილობს, გმირის ყველაზე ფარულ შინაგან შრეებს ჩაუდრმავდეს. ჭილაძის გმირები ღრმა, როლი და ხშირად ტრაგიკული შინაგანი ბუნების მქონე პიროვნებები არიან და, როგორც წესი, მათი პრობლემები მათივე შინაგანი კონფლიქტიდან იღებს სათავეს. ისინი გამუდმებით ეძებენ საკუთარ თავს, უღრმავდებიან ცნობიერს, ცდილობენ,

შინაგანი ბრძოლის შედეგად მივიღნენ სწორ დასკვნებამდე, იპოვონ ადგილი ცხოვრებაში, გახდნენ უკეთესები. ზოგიერთი მათგანი ახერხებს თავისი პრობლემების აღმოჩენას და შეძლებს გარდაქმნას (მაგალითად, ნიკო რომანიდან “მარტის მამალი”, ალექსანდრე რომანიდან “ყოველმან ჩემმან მპოვნელმან”, გელა რომანიდან “რკინის თეატრი”). ზოგიერთი ამას ვერ ახერხებს და შინაგან კონფლიქტს ის დაღუპვამდე მიჰყავს (თბილისელი მსახიობი რომანიდან “რკინის თეატრი”, ქაიხოსრო მაკაბელი რომანიდან “ყოველმან ჩემმან მპოვნელმან”), თუმცა არიან ისეთი პერსონაჟებიც, რომლებიც საკუთარ თავთან კონფლიქტში არ არიან (მაგალითად, რაჭდენ კაშელი რომანიდან “გოდორი” და მარო რომანიდან “ყოველმან ჩემმან მპოვნელმან”). ამგვარი ტიპაჟების სულიერ სამყაროში ჩაღრმავება მწერლისთვის ნაკლებად საინტერესოა და ავტორი მათ უფრო “გარედან” აღწერს.

ზოგიერთ რომანში ყოვლისმცოდნე ავტორისა და პერსონაჟის ტექსტი, თხრობა, ერთმანეთს ენაცვლება (“ყოველმან ჩემმან მპოვნელმან”, “რკინის თეატრი”, “აველუმი”, სადაც ძირითადად, მთხოვბელი ყოვლისმცოდნე ავტორის როლს ირგებს). აქ იგულისხმება ფსიქოლოგიური ანალიზის ის ფორმა, როცა მთხოვბელი თავად აკეთებს კომენტარებს გმირის შინაგანი მდგომარეობის შესახებ. თუმცა წამყვანი ყოველთვის პერსონაჟის მთხოვბელად ქცევის მომენტებია. მწერლის რამდენიმე რომანი კი მთლიანად პერსონაჟის (პერსონაჟის) საკუთარ თავში ჩაღრმავებას წარმოადგენს (“მარტის მამალი”, “გოდორი”). ამგვარი თხრობის მანერა ეხმიანება ავტორის მიერ შერჩეულ ტექნიკას – “ცნობიერების ნაკადსა” თუ შინაგან მონოლოგს, რაც, თავის მხრივ, გმირის არაცნობიერის ამოხსნასაც ისახავს მიზნად. ქვეცნობიერის წარმოჩენაში მწერალს ეხმარება სიზმრები, რომლებიც ყოველთვის შეიცავენ გმირისა თუ მკითხველისთვის საჭირო და აუცილებელ ინფორმაციას.

შეიძლება ითქვას, რომ ოთარ ჭილაძის რომანების მსატვრული ფსიქოლოგიზმი, რომელიც გმირების შინაგანი სამყაროს წარმოჩენასა და არაცნობიერში ჩაღრმავებას ისახავს მიზნად, რაც შემდგომ პერსონაჟების პრობლემების გადაჭრას ემსახურება, ფროიდისა და იუნგის თეორიებს ეყრდნობა, რაც მისი პროზის პრაქტიკულ მიღწევებს თეორიულადაც ამართლებს.

დასკვნები

მე-20 საუკუნის პროზის ტენდენციათა ფონზე, ოთარ ჭილაძის პროზა გამოირჩევა სუბიექტურობითა და ფსიქოლოგიზმის მომდლავრებით. შესაბამისად, თავის რომანებში მწერალი უღრმავდება პერსონაჟების შინაგან სამყაროს. ტერმინი “სუბიექტური თხრობაც” თავის თავში სწორედ სუბიექტურ პერსპექტივას გულისხმობს და ის სხვადასხვა სტილისა თუ უანრის ნაწარმოებებს მიესადაგება. სუბიექტურ რომანებში ყველაზე მნიშვნელოვანი ელემენტი გმირის შინაგანი სამყაროა, რადგან აქ ნამდვილი რეალობა ისაა, რაც პერსონაჟის ცნობიერებაში ხდება. ოთარ ჭილაძის მთხოველი ცდილობს, რომ ემპირიული რეალობა პერსონაჟის სუბიექტური წარმოდგენებისგან შექმნას. ამიტომ ზოგჯერ, განსხვავებული გმირები ერთსა და იმავე მოვლენას სხვადასხვაგარად აღიქვამენ. ეს ართულებს ნაწარმოებების სიუჟეტის გაგებას და ზოგიერთ მოვლენას აბუნდოვნებს, მაგალითად, რომანში “ყოველმან ჩემმან მპოვნელმან” მაიორის მიერ თათრის დაჭრის ეპიზოდს სხვადასხვა დროს ოთხი განსხვავებული პერსონაჟი ჰყვება. ავტორის მიერ აქცენტირებული არაა, რომელია “სწორი” ვერსია. ამიტომ ასეთ შემთხვევაში ნაწარმოების სწორი ესთეტიკური აღქმა, განუსაზღვრელი ადგილის შევსება თუ განუსაზღვრელადვე დატოვება მკითხველზეა დამოკიდებული.

ოთარ ჭილაძე ნაწარმოების რეალობას პერსონაჟების თვალით უყურებს და პერიოდულად, სიუჟეტიდან გამომდინარე, ხან ერთი გმირის თვალსაზრისს ანიჭებს უპირატესობას და ხან – მეორეს. სწორედ ეს ქმნის მის რომანებში “სუბიექტურ რეალობას”. ამგვარმა სუბიექტურობამ ოთარ ჭილაძის პროზაში ფსიქოლოგიზმის არსებობაც განაპირობა, რაც სწორედ ადამიანის შინაგან სფეროში ჩაღრმავებას გულისხმობს.

მხატვრული ფსიქოლოგიზმი მე-19 საუკუნის პროზაში იჩენს თავს და მის სათავეებთან ფრანგი გუსტავ ფლობერი და რუსი ავტორები – ლევ ტოლსტოი და ფიოდორ დოსტოევსკი დგანან. ზოგიერთი მკვლევრის აზრით, სწორედ ამ

ავტორებმა შეუქმნეს თეორიული საფუძველი მე-19 საუკუნის რეალისტური პროზის ფსიქოლოგიზმს, რადგან სხვა თეორიული გამყარება მას არ აქვს. ყოველი ავტორი, რომელიც მხატვრულ ფსიქოლოგიზმს მიმართავს, ანუ გმირების შინაგანი სამყაროს იკვლევს, ამას თავისებურად, საკუთარი მწერლური კონცეფციიდან გამომდინარე აკეთებს.

მე-20 საუკუნეში ფსიქოლოგიზმის შესახებ ჩნდება ახლებური წარმოდგენები, რასაც ახალი პერსონაჟი-ხასიათის დეპეროზაცია და “გაადამიანურება” განაპირობებს. ფსიქოლოგიზმი ახალ საფეხურზე გადადის და სხვა დისციპლინების სფეროშიც იჭრება, უფრო ზუტად კი, იყენებს ფსიქოლოგიურ თეორიებს თავისი პრობლემატიკის უკეთ წარმოსაჩენად. ამ მხრივ ლიტერატურისთვის ყველაზე მისაღები “სიღრმის ფსიქოლოგიის” წარმომადგენლების – ზიგმუნდ ფროიდისა და კარლ გუსტავ იუნგის – თეორიები აღმოჩნდა, რომელთა დახმარებითაც შესაძლებელი გახდა ადამიანის სულიერი სამყაროს “პროფესიული” კვლევა, რაც ქვეცნობიერისა და არაცნობიერის სტრუქტურის წარმოჩენასაც გულისხმობს.

ამგვარი მიდგომა ლიტერატურაში, თავის მხრივ, ახალ გამოსახვის ფორმებს ითხოვს – ახალ ლიტერატურულ მეთოდებსა და ხერხებს, როგორიცაა, მაგალითად, “ცნობიერების ნაკადის” ტექნიკა და შინაგანი მონოლოგი, ითხოვს განსხვავებულ პოეტიკას, რაც ხელს შეუწყობს პერსონაჟების სულიერი სიღრმეების უკეთ წვდომას. ოთარ ჭილაძეც სწორედ ფსიქოლოგიური და სუბიექტური მიდგომის შედეგად აყალიბებს თავისი პერსონაჟების ხასიათებს. ხოლო რიგ შემთხვევაში “ცნობიერების ნაკადის” ტექნიკას პერსონაჟის შინაგანი კრიზისის წარმოსაჩენად მიმართავს.

შეიძლება ითქვას, რომ ოთარ ჭილაძის რომანების მხატვრული ფსიქოლოგიზმი, რომელიც გმირების შინაგანი სამყაროს ჩვენებასა და მათ არაცნობიერში ჩაღრმავებას ისახავს მიზნად, ფროიდისა და იუნგის თეორიებს ეყრდნობა.

თავი III

ფსიქოანალიტიკური თემატიკა ოთარ ჭილაძის პროზაში

1. კლასიკური ფსიქოანალიზის ტრანსფორმაცია მხატვრულ ლიტერატურაში

ოთარ ჭილაძე იმ ქართველ მწერალთა რიცხვს მიეკუთვნება, რომლებმაც მე-20 საუკუნის ინტერდისციპლინარულ გარემოში, ლიტერატურული ნაწარმოების რეალობისა და პერსონაჟების უკეთ წარმოსახენად, არაერთ მეცნიერებასა თუ მიმდინარეობას მიმართეს. მათ შორის ფსიქოლოგიას და კონკრეტულად ზიგმუნდ ფროიდის ფსიქოანალიზს. იმ დროს, როცა ლიტერატურულ ასპარეზზე ოთარ ჭილაძე გამოდის, ფროიდის მეთოდი სიახლეს აღარ წარმოადგენს. ამ პერიოდისთვის არსებობს კარლგ გუსტავ იუნგის მოძღვრებაც კოლექტიურ არაცნობიერზე და ჩამოყალიბებულია ნეოფროიდისტული მიმართულებაც, მაგრამ ფროიდი მაინც რჩება წამყვან ფიგურად არაცნობიერის კვლევის დარგში. შესაბამისად, როდესაც ოთარ ჭილაძე თავის რომანებში ცდილობს, მოგონებებისა თუ ასოციაციების საშუალებით გააანალიზოს თავისი გმირების საქციელი, გაარკვიოს ურთიერთობა მამებსა და შვილებს შორის ან რომელიმე პერსონაჟის ცხოვრების წარმმართველ ფაქტორად დაასახელოს სექსუალური ენერგია, აქ, ცხადია, აშკარად იგრძნობა კლასიკური ფსიქოანალიზის გავლენა.

ფროიდის თეორია პიროვნების შესახებ უამრავ ასპექტს მოიცავს, დაწყებული ადამიანის განვითარების სხვადასხვა ეტაპების კვლევიდან, დასრულებული პიროვნების სტრუქტურის მოდელის შექმნით, მაგრამ ერთ-ერთი ყველაზე მნიშვნელოვანი საკითხი ცნობიერისა და არცნობიერის ურთიერთობაა. სიღრმის ფსიქოლოგია, უფრო ზუსტად კი, ფროიდის კლასიკური ფსიქოანალიზი ადამიანის ნებისმიერი მოქმედებისა და შეგრძნების ამოსავალ წერტილად, მისი სურვილებისა და ვნებების წარმმართველად, სწორედ არაცნობიერს მიიჩნევს (Rühling 2008: 538). ფროიდის მტკიცებით, არაცნობიერში დაგროვილია განდევნილი, ტრავმატული ან საზოგადოებისთვის მიუღებელი შინაარსები (სურვილები), რომლებიც ხშირად სექსუალურ ხასიათს ატარებს. ამ შინაარსების გამჟღავნება პიროვნებისთვის

საფრთხის შემცველია, ამიტომ ცნობიერი აკონტროლებს ამ პროცესს და ახდენს ამგვარი სურვილების სუბლიმაციას, გაკეთილშობილებას. ნორმალურ, ჯანმრთელ ადამიანში “კონტროლი” ძლიერია. მაგრამ ზოგ შემთხვევაში არაცნობიერი შინაარსების მუდმივად განდევნა შეუძლებელი ხდება და ეს უარყოფითად აისახება ადამიანის მენტალურ თუ ფიზიკურ ჯანმრთელობაზე. ასეთ დროს გამოსავალი ერთია – არაცნობიერი მისაწვდომი უნდა გახდეს ცნობიერისთვის და მოხდეს პრობლემის არსის გაცნობიერება (Фрейд 10).

ფროიდი აღნიშნავდა, რომ მას ხელოვნების არსის შესახებ არაფრის თქმა არ შეეძლო და ფსიქოანალიტიკური კვლევის საგანი შეიძლებოდა გამხდარიყო მხოლოდ ნაწარმოების შექმნის პროცესი, ავტორის ფსიქიკური თავისებურებები. შესაბამისად, ის დაინტერესებული იყო ავტორის პიროვნების ანალიზით და ასევე ნაწარმოების ანალიზით, სადაც ავტორი წარმოადგენს ნიჭიერ ფსიქოლოგს. ამიტომ ლიტერატურული ინტერპერეტაციის ნებისმიერი მეთოდიკა, რომელიც ფსიქოანალიტიკურ მიდგომას ემყარება, გარკვეულწილად დამოკიდებულია ავტორის პიროვნებაზეც (Карвасарский 2000). თუმცა ლიტერატურაში ფროიდის მოძღვრება ნაწარმოებების პერსონაჟების ფსიქიკისა და არაცნობიერის ამოსახსნელადაც გამოიყენა, რომლებიც, ცხადია, რეალური ადამიანის ფსიქიკის ანალოგიითაა შექმნილი (ბრეგაძე 2008: 71-81).

ეს ყველაფერი ეხმიანებოდა მე-20 საუკუნის ლიტერატურის ზოგად ტენდენციებს – ადამიანების გაუცხოებას, ეჭვებში ჩავარდნას, ფასეულობების რდვევას, ახალი იდეალებისა თუ საკუთარი თავის ძიებას, საკუთარ სულში ჩაღრმავებას. ამიტომ ფსიქოანალიტიკური თემატიკა თუ ფროიდის თეორიის გავლენა ლიტერატურულ ნაწარმოებებში აშკარა გახდა, უფრო ზუსტად კი, ფროიდის შემდეგ, ფაქტობრივად, ვერც ერთმა მნიშვნელოვანმა ავტორმა გვერდი გერ აუარა მის მოსაზრებებს და ნებით თუ უნებურად განიცადა ფროიდის გავლენა, მიუხედავად იმისა, მოსწონდათ ავტორებს მისი იდეები თუ არა. მაგალითად, ვლადიმერ ნაბოკოვი არასოდეს იწონებდა ფროიდის მოსაზრებებს, მაგრამ მის ნაწარმოებში “ლოლიტა”, მწერლისეული აღმოჩენები ახლოს დგას ფროიდის თეორიასთან. ფსიქოანალიზისა და ლიტერატურის ურთიერთობის ერთგვარი სახეა თომას მანის “ჯადოსნური მთაც”, სადაც ფსიქოანალიტიკოსი

რომანის პერსონაჟია და ასე ავითარებს თავის იდეებს. ფროიდის გავლენა იგრძნობა პერმან პესეს, რობერტ მუზილისა თუ პერმან ბრონის ნაწარმოებებშიც, რაც სრულიად ბუნებრივია. მაგრამ ყველაზე მეტად ფსიქოანალიტიკურმა მიღობამ განვითარება ფრანც კაფკას ნაწარმოებებში პპოვა, სადაც განსაკუთრებით კარგად ჩანს ავტორის ფსიქიკური თავისებურებები.

ადსანიშნავია, რომ ფრანც კაფკამ, როგორც დახვეწილმა და დაკვირვებულმა წერალმა, საკუთარი მსოფლმხედველობიდან გამომდინარე, თავის ნაწარმოებებში წარმოაჩინა ტრადიციული ბურჟუაზიული ოჯახის “არარსებული” მორალი. შესაბამისად, შეეხო საზოგადოებისა და ინდივიდის დამოკიდებულებასაც. მწერლის წინააღმდეგობა და აგრესია მამის მიმართ, რომელიც კაფკას შემოქმედებაში განსაკუთრებით თვალსაჩინოა, სწორედ ფროიდის ფსიქოანალიზიდან იდებს სათავეს, რასაც კაფკას წერის მანერაც შეესაბამება. ნახევრად ფანგასტიკური სიზმრისეული რეალობა და აბსურდულობა პერსონაჟის ქცევის ნორმებში გადმოიცემა. ამ ნორმებს კი გარკვეულწილად განსაზღვრავს მე-20 საუკუნის ახალი მორალი – ფროიდისეული “ლიბიდო”, უმართავი და ადამინის ცნობიერზე ძლიერი ლტოლვა სიამოვნებისკენ, რომელსაც დედ-მამასთან ურთიერთობა და ბავშვობაში ჩამოყალიბებული კომპლექსები განსაზღვრავს. ამგვარ კონფლიქტს კაფკა ხედავს ბურჟუაზიულ ოჯახში, სადაც თავისუფლება, რომელსაც ლიბიდო “გვპირდება”, ფაქტობრივად, არ არსებობს, ამიტომ მისკენ სწრაფვაც აბსურდულია ისევე, როგორც ლიბიდოს მორალი, რომელიც ასევე არ არსებობს. ბრძა სწრაფვას სიამოვნებისკენ კი რეალობაში მხოლოდ ტანჯვის გაძლიებამდე მივყავართ, საიდანაც გამოსავალი სიკვდილის გარდა არაფერია. კაფკა სწორედ ამგვარი საკამათო მორალური სიტუაციიდან ემებს გამოსავალს (Karinhberg 2000).

თუკი ადრე ლიტერატურულ ნაწარმოებებში სიყვარულისა და მიზიდულობის თემა უფრო ხელშეუხებელი და წმინდა იყო, მე-20 საუკუნეში, როცა სრულად შეიცვალა დამოკიდებულება ჭეშმარიტების არსთან დაკავშირებით, და საერთოდაც, ეჭვებელ დადგა ჭეშმარიტების არსებობის საკითხი, მხატვრულმა ნაწარმოებებმა სააშკარაოზე გამოიტანეს ქალისა და მამაკაცის ურთიერთობის ინტიმური დეტალები, დაუფარავად გამოვლინდა პერსონაჟის ლტოლვები და ვნებები, სიყვარული კი სექსუალურ მოთხოვნილებას გაუთანაბრდა.

ეს ტენდენცია მე-20 საუკუნის დასაწყისში ქართულ პროზაშიც გაჩნდა და სქესთა ურთიერთობაზე საუბარი პირველად შიო არაგვისპირელმა დაიწყო. თუმცა მწერალმა ყველაფერში მხოლოდ სიბილწე და გარევნილება დაინახა და, შესაბამისად, დაგმო ურთიერთობის ეს ფორმა. მოგვიანებით კი უკვე მიხეილ ჯავახიშვილი იწყებს წერას ხორციელ ლტოლვაზე, მაგრამ აქ უკვე არა საკუთარი მწერლური კონცეფციიდან გამომდინარე, არამედ ზიგმუნდ ფროიდის შეხედულებებზე დაყრდნობით, რომელიც ამ დროს მთელს მსოფლიოშია პოპულარული. მწერალი ზედმიწევნით კარგად იცნობს “ფსიქოანალიზს” და ეს კარგად ჩანს მის მოთხოვნებში: “ოქროს კბილი”, “კურდღელი” და “პატარა დედაკაცი”, სადაც ჯავახიშვილმა ფსიქოანალიზის მთავარი პრობლემები დასვა – არაცნობიერისა და ცნობიერის კონფლიქტის საკითხი და ამის ნიადაგზე ჩამოყალიბებული არასრულფასოვანი პიროვნების ფსიქოლოგიური მდგომარეობა, სექსუალური ურთიერთობის მნიშვნელობა, “კურდღელში” კი თავად ფსიქოანალიტიკური მკურნალობის მეთოდიც წარმოადგინა. მიხეილ ჯავახიშვილის ფროიდთან მიმართებაზე ამომწურავად საუბრობს თეიმურაზ დოიაშვილი სტატიაში: “მიხეილ ჯავახიშვილი და ფსიქოანალიზი”. კრიტიკოსი წერს: „რომელი “მეცნიერული დებულების” თანახმად ცდილობს მწერალი სქესის პრობლემის გადაჭრას? ვფიქრობ, პასუხი ფროიდიზმის სასარგებლოდ უნდა გადაწყდეს – სწორედ ზ. ფროიდი ცდილობს დაამტკიცოს სქესობრივი ლტოლვის პრიორიტეტი პიროვნების ჩამოყალიბებაში სხვა ფაქტორებთან შედარებით“ (დოიაშვილი 2005: 374).

რაც შეეხება ოთარ ჭილაძის ტექსტებს, ვფიქრობ, აქ შეგვიძლია, ვისაუბროთ ფროდის თეორიის აშკარა გამოძახილზე, მაგრამ ის პრობლემები, რომლებიც ფროიდის თეორიის გავლენის შედეგადაა დასმული, ყოველთვის მრავალფუნქციური და მნიშვნელოვანია, ამიტომ განსაკუთრებულ როლს თამაშობს რომანის სიუჟეტის განვითარებისას თუ პერსონაჟის შინაგანი სამყაროს ძერწვისას. წარმოდგენილ ნაშრომში შევეხები ოთარ ჭილაძის პროზაში არსებულ ფსიქოანალიტიკურ თემატიკას, იქნება ეს მამისა და ძის ურთიერთობა თუ სექსუალური ენერგიის, ლიბიდოს აქტივობის საკითხი პიროვნების ფორმირებისას და ამ კუთხით განვიხილავ სამ რომანს: “ყოველმან ჩემმან მპოვნელმან”, “მარტის მამალი” და “გოდორი”.

ქართულ ლიტერატურულ კრიტიკაში ოთარ ჭილაძის ფრონდისადმი მიმართების საკითხი სიღრმისეულად შესწავლილი არ არის, თუმცა ეს პრობლემა რამდენიმე კრიტიკოსმა დასვა. თათა ცოფურაშვილი სტატიაში “კოლექტიური ფსიქოანალიზის ლიტერატურული ანშლაგი” ამტკიცებს, რომ რომანის, “გოდორის” არსი და კონფლიქტის საფუძველი ცალსახად ფრონდისტულია (ცოფურაშვილი 2004: ბ3). კაშელების მთელი საგვარეულო ხომ იმ ორი წლის ბიჭიდან დაიწყო, რომელიც დიდი ინტერესით უთვალთვალებდა დედამისისა და მისი საყვარლის ალერსს გოდორიდან (ფრონდს თუ მოვიშველიებთ, პიროვნების ლტოლვები და ინსტინქტები ასეთ პატარა ასაკში იწყებს ჩამოყალიბებას და ხწორედ გარემო ფაქტორები განაპირობებენ განვითარების ამა თუ იმ სტადიის კონკრეტულ შედეგს (Фрейд 18-22). “ასეთი მიგნება ფრონდსაც შეშურდებოდა უდავოდ. ... ფსიქოანალიზის ქართული მხატვრული ინტერპრეტაციით, გოდორში ჩაგდებული ორი წლის რაჟდენ კაშელის სექსუალურმა შთაბეჭდილებებმა მთელი მოდგმა დაამახინჯა საუკუნოდ. მოკლედ, ისლა დაგვრჩნია, ამაშიც სიმბოლიზმი დავინახოთ და არა ფრონდზე, უფრო ფრონდის მიერ ერისთვის ჩატარებული ფსიქოანალიზი” (ცოფურაშვილი 2004: ბ3), ამიტომ კრიტიკოსის თქმით, თაობათა ამ სიმბოლური თავგადასავლის პრობლემა, იუნგის სიტყვებით, კოლექტიურ არაცნობიერშია მოსამებნი.

კრიტიკოსი ზეინაბ კიკვიძე სტატიაში “ცნობიერების ნაკადის” ტექნიკა ო. ჭილაძის რომანში “გოდორი” წერს, რომ ამ რომანში დარღვეულია ტრადიციული, ფრონდისეული გაგება მამა-ძის ურთიერთობისა (სადაც შვილი ცდილობს დაიკავოს მამის ადგილი, რათა შემდეგ თავად იყოს უარყოფილი საკუთარი შვილის მიერ) და ოთარ ჭილაძეს შემოაქვს ახალი პიპოსტასი, რომლის დროსაც შვილია მამის მიერ უარყოფილი: “ყალიბდება “ოდიპოსის კომპლექსის” ახალი ინცესტური სახე: ზიზღი საკუთარი შვილის მიმართ და სექსუალური ლტოლვა რძლის მიმართ” (კიკვიძე 2005: 27). ეს მოსაზრება, შესაძლოა, არ გავიზიაროთ, მაგრამ ის მაინც საინტერესოა ჭილაძის პროზის ამ კუთხით შესწავლისას.

2. ფსიქოანალიტიკური თემატიკა ოთარ ჭილაძის რომანებში “ყოველმან ჩემმან მპოვნელმან”, “მარტის მამალი” და “გოდორი”

ფროიდის მიხედვით, ყველა ადამიანი დამუხტულია სხვადასხვა სწრაფვით, რომელთა შორის უმნიშვნელოვანესია სექსუალური სწრაფვა. არაცნობიერის მოქმედებას წარმართავს სიამოვნების პრინციპი. მაგრამ სიამოვნება თავის გზაზე ხვდება დაბრკოლებებს, რაც იმაში გამოიხატება, რომ ყოველთვის მოსალოდნელია დაპირისპირება სიამოვნებასა და რეალობას შორის (დოიაშვილი 2005: 374-375). ამ კონფლიქტის ნიადაგზე ყალიბდება ადამიანის ხასიათი, რაც მნიშვნელოვანწილად იქმნება სექსუალური აგზების მასალისგან და შედგება ბავშვობაშივე ფიქსირებული ლტოლვებისგან. მსგავს ლტოლვებზე შეგვიძლია ვისაუბროთ, თუკი ოთარ ჭილაძის ერთ-ერთი გმირის, ალექსანდრე მაკაბელის (რომანიდან “ყოველმან ჩემმან მპოვნელმან”) ცხოვრებას დავაკვირდებით.

ალექსანდრე და მისი ძმა ნიკო მოზარდი ბიჭები იყვნენ, როდესაც ქალთან ურთიერთობის სურვილი გაუჩნდათ: „იმ დღეს, ნიკო და ალექსანდრე... შინ დარჩნენ და დუხაბორის ქალს დაუწყეს ბდლარძუნი. ლეკვებივით ფეხებში უგორდებოდნენ ტაშტზე გადმოხრილ ქალს, კაბის კალთას უწევდნენ და ცდილობდნენ როგორმე შეეხდათ ქვეშ. ... ბავშვებს აღარაფერი ქსმოდათ, დუხაბორი ქალის ხითხითის მეტი, ვერაფერს ხედავდნენ მრგვალი, აღაუდაჟებული, სულელურად მომდიმარი სახის გარდა, და ერთი სული ჰქონდათ, ... სადმე მაინც მოეკიდათ ხელი აკონწილებული კაბისთვის. ... ამ დროს ოთახში ქაიხოსრო შემოვიდა. ... არავის დაუნახავს, როდის შეისნა ქამარი, მხოლოდ მაშინ მოეგნენ გონს, როცა ჯერ კიდევ მოუტეხავმა ტყავმა პაერი წიგილით გახია და იატაკზე დაყრილ ბავშვებს მდუღარესავით გადაესხათ” (ჭილაძე 1986: 161-162). ვფიქრობ, ეს მომენტი მნიშვნელოვან როლს თამაშობს ბავშვების შემდგომ ცხოვრებაში. ამ მოვლენამ, როცა მათ პირველი სექსუალური მისწრაფებები გამოავლინეს, ყველაფერი შეცვალა. ისინი ბუნებრივად იქცეოდნენ, მაგრამ ქაიხოსრო ამ „თამაშისთვის“ დასაჯა, რისთვისაც მას თავისი მიზეზები ჰქონდა - არ უნდოდა ელიარებინა, რომ ბიჭების ზრდასთან ერთად, თავადაც ემატებოდა წლები, რაც უფრო და უფრო აახლოვებდა სიკვდილს.

„თამაშის“ შეწყვეტამ ბიჭებში უსაზღვრო აგრესია გამოიწვია, რისგანაც დიდი ხნის განმავლობაში ვერ განთავისუფლდნენ. ისინი ჯერ ხელებში ეცნენ ქაიხოსროს და ქამარს სტაცებდნენ, შემდეგ კი ბმებმა პაპას შეთქმულება მოუწყვეს და საღორე ააფეთქეს, რის შედეგადაც ალექსანდრემ მარცხენა ხელი დაკარგა: „იმდამინდელი ელდა, ტკივილი და საკუთარი უსუსურობის შეგრძნება გამოუთქმელ ბოლმად, გამოურწყავ ბალრამად ჩაიღექა სამუდამოდ ორი პატარა ბიჭის სულში, სადაც ჯერ კიდევ არ შექმნილიყო სამყარო, ჯერ კიდევ უღმერთო ქაოსი და წყვდიადი სუფევდა. ცხადია, ბიჭებმა შური იძიეს პაპაზე, უფრო სწორად, შურისძიება უნდოდათ და ამიტომ აირჩიეს ასაფეთქებლად საღორე, რომელშიაც მათი პაპა ყოველ წელიწადს ღორს ასუქებდა“ (ჭილაძე 1986: 166). ამის შემდეგ ნიკო განიკურნა აგრესიისგან, თუმცა სამუდამოდ გაუუცხოვდა ოჯახს და დატოვა სახლი, მაგრამ ალექსანდრემ ბოლმა უფრო ღრმად ჩაიდო გულში, გრძნობას განვითარების საშუალება მისცა და კიდევ არაერთი წელი შესწირა ბავშვობისდროინდელ აგრესიას, რომელიც სიძულვილად ჩამოყალიბდა: სიძულვილად პაპისადმი, სახლისადმი, საკუთარი თავისადმიც. ამან კი მისი პიროვნება შეცვალა, გააუხეშა, გახადა გულგრილი გარშემომყოფების მიმართ. სხვა შემთხვევაში, ის, შესაძლოა, სრულიად სხვაგვარ ადამიანად ჩამოყალიბებულიყო. ეს სწორედ პაპის ჩარევამ გამოიწვია. როგორც ვხედავთ, „ფროიდისტულმა კონფლიქტმა სიამოვნებისკენ მისწრაფებასა და რეალობას შორის თავისი დადასტურება ჰპოვა“ (დოიაშვილი 2005: 375). სწორედ აქ შეიძლება გავიხსენოთ მიხეილ ჯავახიშვილის მოთხოვნა „ოქროს კბილი“ და მისი გმირი თომა, რომელსაც ათი წლის ასაკში მეზობელ გოგოსთან „ცუდლუტობისას“ გოგოს მამამ მიუსწრო და გაწკეპლა. მაგრამ თომას შემთხვევაში ეროტიზმის განვითარების გარკვეულ ფაზაში შეფერხებამ წარმოშვა კომპლექსები - სირცხვილი, შიში, პედანტობა, მორალური განცდები, ალექსანდრეს შემთხვევაში კი პირიქით - სრული აღვირასხნილობა, თავშეუკავებლობა, აგრესია და სიძულვილი. მაგრამ ეს ყველაფერი მაინც ქაიხოსროს საქციელის გამოძახილია, რაც რადიკალურად ცვლის ალექსანდრეს პიროვნებას და განსაზღვრავს მის შემდგომ ცხოვრებას.

გამოსაჯანმრთელებლად მონასტერში გაგზავნილი ალექსანდრე მაროს გაიცნობს, რომელიც, ჩემი აზრით, ასევე კლასიკური ფსიქოანალიზის გავლენით

შექმნილი ტიპაჟია. მაროს ცხოვრებაც ბავშვობაში, თხუთმეტი წლის ასაკში, მომხდარმა ფაქტმა განსაზღვა - მარო მესაფლავე იაგორამ გააუპატიურა. ამის შემდეგ ისედაც კოჭლი და შეუხედავი მარო, თავს კარგად მხოლოდ ავადმყოფებსა და მომაკვდავებს შორის გრძნობს. ჩვეულებრივი ადამიანის გონებაში მოქმედებს „გონების ცენზურა”, რაც ბევრ რამეს კრძალავს, მაგრამ ანომალურ პირებში ლიბიდოს მოქმედება ადემატება სუბლიმაციის (გაკეთილშობილების) ძალას, ამიტომ არაცნობიერი სურვილები მეტად მჟღავნდება (Фрейд 43-55). ანომალური პერსონაჟია მაროც: „უხეში, უშნო, მოურიდებელი, დაუზარელი და გამგები, მოწყალების და კი არა, ტანჯულთა და მახინჯთა მოწყალების ცოლი, თავადაც ტანჯული და მახინჯი” (ჭილაძე 1986: 175). უკვე მისი პირველი ურთიერთობა მამკაცთან – იაგორასთან – ანომალურია. მესაფლავე იაგორა საფლავში დაეუფლა მაროს, მკვდართა გვერდით, ცივ სამარეში. თავიდანვე მარო საფლავებთან და მიცვალებულებთანაა დაკავშირებული (ფროიდი თავს ნაშრომებში ორ ინსტინქტზე საუბრობს, მისთვის განმსაზღვრელია სიცოცხლის ინსტინქტი – ეროსი და სიკვდილის ინსტინქტი – თანატოსი (Холл ... 1997: 20-40)).

თხუთმეტი წლის მარო უცხო ადამიანების საფლავებთან ჩამოჯდებოდა და მოთქმით ტიროდა, დიდ ქალებს ბაძავდა, ამიტომ მისი პიროვნება სიკვდილსა და სქესობრივ ინსტინქტს შორის აღმოცენდა, სასაფლაოზე და მესაფლავე იაგორას „წყალობით”. და მაროსთვის, რომელიც გონებრივად შედარებით ნაკლებადაა განვითარებული, აღარ მოქმედებს „გონების ცენზურა”. მას არ სჭირდება თამაში არც საზოგადოებისა და არც საკუთარი თავის წინაშე. და რაც უგელაზე საოცარია, მარო ახერხებს თვითრეალიზებას იმ სამყაროში, რომელშიც ცხვრობს. ის ლაზარეთში მუშაობს და ავადმყოფებს უგლის, მათ გვერდით კი აღარც განსხვავებული ჩანს და აღარც - დაჩაგრული (მაროს გააზრებული აქვს, რომ დაჩაგრულია). ამიტომ შეუზიზღებლად უვლის თითოეულ ავადმყოფს, წმენდს ჩირქება და დამპალ სისხლს, ჭამს მათ მონარჩენ საჭმელს და მაინც ბედნიერია, რადგან იცის, რომ ქვეყნად მასზე უბედური ხალხიც არსებობს. „ის, რაც იაგორამ ასწავლა, ავადმყოფებმაც იცოდნენ, სიცხიანები, ტკივილისგან აღმუვლებულები იწვენენ ლოგინში, გაშმაგებულნი კოცნიდნენ, მკლავებს ულოკავდნენ, აქებდნენ და ადიდებდნენ, და ბავშვებივით მშვიდად იძინებდნენ მის მკერდზე, დროებით ტკივილჩამცხალნი, დროებით განკურნებულნი” (ჭილაძე 1986: 174). მაროს ამგვარი

ცხოვრება მოსწონს, აქ კომფორტულადაც კია, რადგან თავის ნაკლს ვერ გრძნობს – კოჭლობას და სიმახინჯეს. აქ მაროსთვის სქესობრივი ინსტინქტის გამოაშკარავებაც ისევე მისაღებია, როგორც სიკვდილის ინსტინქტის შეგრძნება, ამიტომ მის სამყაროში არ არსებობს კონფლიქტი საზოგადოებრივ მორალსა და სქესობრივ ინსტინქტს შორის.

მაროსთან მცხოვრები ალექსანდრეც დროებით მის სამყაროს ეკედლება, ივიწყებს ყველაფერს და „ბედნიერად“ ცხოვრობს მაროსთან. სქესობრივ ინსტინქტებსაც აღარ ფარავს (როგორც ფარავს ნორმალური ადამიანი ნორმალურ გარემოში), არც სიკვდილის ეშინია. ერთგვარად თავდავიწყებაში ეშვება, უფრო სწორად, დავიწყებაში. პგონია, რომ მხოლოდ მან შეიცნო ჭეშმარიტება – არსებობის არარაობა და ამიტომ დასაშვებია, დაივიწყოს “გონების ცეზურა”. დარწმუნებული საკუთარ სიმართლეში, უფრო და უფრო ღრმად შეტოპავს – მაროს ცოლად მოიყვანს, და ოცნებობს იმაზე, თუ როგორ შესვამს მკვდარ ქაიხოსროს ვირზე და მიცვალებულს მთელ სოფელს შემოატარებს. თუმცა, მისი ადგილი მაროს გვერდით არ არის, რადგან მარო ამ სამყაროში იშვა და მისი ბუნებრივი ნაწილია, ალექსანდრესთვის კი ეს გარემო ხელოვნურადაა შექმნილი, რადგან ის ჩვეულებრივი, გაწონასწორებული ცნობიერების მქონე გმირია, რომლის ცნობიერსაც შეხვევს ძალა, გააკონტროლოს არაცნობიერი. მაროსთან ურთიერთობა კი მისი პროტესტია და მას აუცილებლად ექნება დასასრული. ასეც ხდება, რომანის ბოლოს ალექსანდრე ნორმალურ ყოფას უბრუნდება.

მეორე საკითხი, რომელსაც ოთარ ჭილაძე რომანებში განსცუთრებულ მნიშვნელობას ანიჭებს, არის მამისა და ძის დამოკიდებულების შესწავლა. ფროიდი პიროვნების საბოლოო ფორმირების პროცესში ერთ-ერთ უმნიშვნელოვანეს ფაქტორად მიიჩნევს ე.წ. “ოიდიპოსის კომპლექსი” - ვაჟის გაუცნობიერებელ და დათრგუნული სურვილს, გაანადგუროს მამა, როგორც მეტოქე დედასთან ურთიერთობაში. ფროიდის აზრით, გარკვეულ ეტაპზე, ეს კონფლიქტი ყველა ვაჟის არაცნობიერში ხდება, მაგრამ პიროვნება, რომელიც ნორმალურად გადის ფსიქოსექსუალური განვითარების “ოიდიპოსის ფაზას”, გადალახავს ამ პრობლემას, შეძლებს იდენტიფიკაციას მამასთან, როგორც თავისივე სქესის წარმომადგენელთან, ამ კომპლექსით გამოწვეული დაძაბულობა რედუცირდება და ამას სამუდამოდ, გაუცნობიერებლადვე ივიწყებს (Nye 1975: 40-52). ვფიქრობ, ამ

მოვლენის შორეული გამოძახილია ის, რომ ოთარ ჭილაძეს ყოველთვის აინტერესებს მამებისა და ვაჟების ურთიერთობა და დიდი სიფრთხილით წარმოაჩენს მას. ცხადია, ყველა რომანში მამა-შვილის დამოკიდებულებაზე ფროიდის გავლენა არ ვრცელდება, მაგრამ დაპირისპირება მათ შორის, შეუთავსებლობა, ჩუმი ან აშკარა აგრესია, გვხვდება თითქმის ყველა ნაწარმოებში. თითქმის არსადაა მამა და ძე, რომლებიც პარმონიაში არიან ერთმანეთთან. რომანში “ყოველმან ჩემმან მპოვნელმან”, ალექსანდრესა და ნიკოს დამოკიდებულება მამასთან - პეტრესთან, ასევე პეტრეს დამოკიდებულება ქაიხოსროსთან, მხოლოდ აუცილებლობით შემოიფარგლება და შემდეგ უკვე წინააღმდეგობის გრძნობით, აგრესით მედავნდება. ასევე რომანში “რკინის თეატრი”, როცა ერთ-ერთი გმირი გელა, მამაზე – თბილისელ მსახიობზე ფიქრობს, ყოველთვის პროტესტის გრძნობა უჩნდება და არ სურს მამას დაემსგავსოს, მაგრამ ჩვენთვის უფრო საინტერესოა თხუთმეტი წლის ნიკოს დამოკიდებულება მამასთან რომანიდან “მარტის მამალი” და ანტონის შეხედულებები მამაზე – რაჟდენ კაშელზე რომანში “გოდორი”.

მამა-ძის ურთიერთობის მოტივი საინტერესოდაა წარმოდგენილი რომანში “მარტის მამალი”. ნაწარმოებში მოქმედება ბათუმიდან იწყება. ომის შედეგად ქალაქში არეულობა და შიმშილია, მოზარდი ნიკოს მამა კი მძიმედ დაავადდა და საწოლს მიეჯაჭვა. ამიტომ დედა ნიკოს თავის მშობლებთან, სიღნაღში გზავნის. ნიკო წყენის, ბოლმის, მიუსაფრობის შეგრძნებისა და მომავლისადმი შიშის დაფარვას ერთდროულად ცდილობს. სიღნაღში კი მკვლელობას შეესწრება, რაც საბოლოოდ დათრგუნავს და ამავდროულად დააფიქრებს. ერთი თვის განმავლობაში ის გაუნდრევლად წევს და საკუთარ თავს უდრმავდება. სწორედ ნიკოს მოგონებებიდან ჩანს, რომ მისი მამა ოდესაც სახელოვანი, წარმოსადეგი კაცი იყო, ახსოვს მასთან ბედნიერად გატარებული წლები, კონკრეტული დღეებიც, მაგრამ ავადმყოფობის შემდეგ ყველაფერი შეიცვალა – ნიკომ მამასთან ერთად დედაც დაკარგა, რადგან დედა “უბედურებაში ძუ მგელივით შეუპოვარი აღმოჩნდა: შვილი მაშინვე მშობლებთან გამოხიზნა, თვითონ კი, ხელებდაკაპიწებული, ქმრის საწოლს მკერდით აეფარა და აი, აქამდე უქშევს უბედურების ყვავ-ყორნებს” (ჭილაძე 1987: 31).

სწორედ აქ გაჩნდა მამა, როგორც კონკურენტი, რომელიც დედის ყურადღებასა და მზრუნველობას ართმევს ნიკოს. ამიტომაც ის ცდილობს, არ იფიქროს დედაზე და ადიზიანებს დედაზე ლაპარაკიც კი, რადგან მას: ”უდედოდ დარჩენილს, დედისაგან, თუნდაც დროებით, თუნდაც იძულებით მიტოვებულს, რცხვენია, ესიკვდილება, თითქოს მისი უსუსურობის, უვარგისობის ბრალია მათი გათიშვა. სიბრაზისგან ბრმავდება, ყრუვდება, როგორც ნადალატევი ქმარი” (ჭილაძე 1987: 90). “არც დედას გაემტყუნება, ქმარი თუ ურჩევნია შვლს, იმიტომ, რომ პირველად იყო ქმარი, შვილი კი მერე გაჩნდა. დედამაც პირველი აირჩია.. მთავარი.” (ჭილაძე 1987: 26). ნიკოს მამა დადებითი გმირია, რომელიც, სანამ შეუძლია, შვილზე ზრუნავს, სწორედ შვილის გამო უარს ამბობს თვითმკვლელობაზე და შიმშილის დროს სასიცოცხლო მნიშვნელობის კატლეტს აძლევს ნიკოს (ანუ ყველაფერს, რაც გააჩნია), მაგრამ ნიკოსთვის ის უკვე უცხოა, შორეულია. მამის სიყვარულზე ბევრად მნიშვნელოვანია ის, რომ დედას მისთვის აღარ სცალია და თავიდან იშორებს. სწორედ ესაა რომანში კონფლიქტის არსი – “მიტოვებული”, თითქოს დედისგან მამის გამო უარყოფილი ნიკო ებრძვის გარშემომყოფებს, დედას და საკუთარ თავსაც, სანამ არ იპოვის ძალას მამის დანიშნულების გასააზრებლად და ეჭვებისგან გასათავისუფლებლად. “დეიდას თუ დაეჯერება, ნიკოს ყველა უბედურების მიზეზი ეჭვიანობა ყოფილა – დედაზე ეჭვიანობს თურმე, და იმიტომ აუცრუებია სწავლაზე გული, იმიტომ გატყიურებულა... იმიტომ გავარდნილა ყაჩადად... და, რასაკვირველია, იმიტომ წევს ახლაც ასე, მკვდარივით, გულხელდაკრეფილი...” (ჭილაძე 1987: 25). მაგრამ აღსანიშნავია, რომ “მარტის მამალში” ნიკოს პრობლემა გარემო პირობებმა წარმოშვა – ომმა, მამის ავადმყოფობამ, დედის სასიათმა, სხვა შემთხვევაში, შესაძლოა, მამასთან კონკურენციის საკითხი არც დამდგარიყო. “ფროიდის ვაჟებში” ეს პრობლემა, როგორც წესი, შიგნიდან იწყება, ნიკოს შემთხვევაში კი მოვლენას ბიძგი გარე ფაქტორებმა მისცა. ამიტომ ამ შემთხვევაში ფროიდის თეორია მხოლოდ ალუზიურია.

მამა-შვილს შორის კონფლიქტი მწვერვალს აღწევს მწერლის ბოლო რომანში “გოდორი”, რომლის ჩახლართულ სიუჟეტს გმირების მონათხრობიდან ვიგებთ. რთული სიუჟეტის ფონზე საინტერესოა მამისა და ვაჟის, რაუდენისა და ანტონის ურთიერთობის განხილვა, თითქმის ინცესტის – მამამთილისა და რძლის

ურთიერთობის ფონზე. ანტონი თავიდანვე სუსტ პიროვნებად წარმოგვიდგება, რაც ერთგვარად გამაღიზიანებელიც არის მამისთვის და სასიამოვნოც, რადგან ასე ადვილად შეუძლია შვილის ნაცვლად გადაწყვეტილებების მიღება. “მამის სიტყვას ყოველთვის კანონის ძალა პქონდა ანტონისთვის. კანონისა კი არა, თილისმისა, შელოცვისა, ჯადოსი... მამა რომ იტყოდა, ტყუილად ტირიო, არაფერი ადარ გტკივაო, მაშინვე ჩაწყნარდებოდა, კბილი იყო თუ მუცელი... მამას რომ ეთქვა, ადექი და გადავარდი ფანჯრიდანო, ადგებოდა და გადავარდებოდა... დღითიდღე უფრო მეტად სჯეროდა მამისა და კიდევ უფრო ნაკლებად ენდობოდა თავს” (ჭილაძე 2006: 209).

მიუხედავად ამგვარი დამოკიდებულებისა, ანტონი თავისი შეხედულებებით რადიკალურად განსხვავდება რაუდენისგან, გარკვეულ ეტაპზე კი მამის ბატონობა შეუძლებელი ხდება. სამზარეულოს სცენის შემდეგ, სადაც ის მამასა და ცოლს შეუხსრებს, ანტონი დებულობს მტკიცე გადაწყვეტილებას და მამას ცულით თავს უჩეხავს. მიუხედავად იმისა, რომ ეს მოქმედება მხოლოდ მის ცნობიერებაში ხდება და არა სინამდვილეში, ანტონს მოქნეული ცულის ხმაც ესმის, გვამის სუნსაც გრძნობს და სისხლში ამოთხვრილ მამასაც ხედავს. ამიტომ აქ მნიშვნელობა ადარ აქვს რა ხდება რეალობაში. მამის წარმოსახული მკვლელობა ეს იგივე ავტორიტეტის, უფრო ძლიერისა და დამთრუნველის მკვლელობაა, რაც ცალსახად ფროიდისტული მოვლენაა. შემთხვევითი არ არის, რომ ყველა დროის უდიდესი ქმნილებების მთავარი მოტივი მამისმკვლელობაა – წერს ფროიდი (შარია 1970: 100).

წარმოსახული მკვლელობა ანტონისთვის საბოლოო შურისძიებაა ყველაფერ იმის გამო, რაც მამისგან მიუღია, ცუდიც და კარგიც: “ამ აკვიატებულ აზრში მწერლის მიერ გარკვეული მორალისტური საზრისიცაა ჩადებული...: დაანგრიეთ თქვენი კეთილდღეობისა და ქვიშეთის აგარაგზე გატარებული ლამაზი დღეების წყაროს – მამის კერპი, რათა თქვენ ჭეშმარიტად დმერთს და მორალურ სამყაროს დაუბრუნდეთ” (ცოფურაშვილი 2004: ბ3). შესაძლოა, ამას ახერხებს კიდეც ანტონი, მაგრამ პერსონაჟს ესეც ვერ გადაარჩენს, რადგან თუნდაც წარმოსახული მკვლელობა, ისევ “კაშელობის”, თვისი მოდგმის ცოდვის გავლენით ჩაიდინა, ანუ მამას მიემსგავსა. რა ხდება ემპირიულ სამყაროში ამის შემდეგ, სად მიდის გმირი და სად კვდება ფიზიკურად, ადარ არის მნიშვნელოვანი. ანტონმა დაამსხვრია

მამის კერპი, მაგრამ ვერ შეძლო საკუთარი თავის გადარჩენა. ავტორი წერს:

“არათუ თავის ადგილს ვერ მიაგნო ანტონმა ცხოვრებაში, არამედ ვერ მიაგნო თავად ცხოვრებას, სადაც ალბათ მისთვისაც აუცილებლად იქნებოდა გათვალისწინებული, თუნდაც, სულ უმნიშვნელო ადგილი, როგორც, ვთქვათ, მის თვალწინ მოკლული ციყვისთვის, ანდა მისგან გადარჩენილი მატლისთვის... არადა... მისგან გადარჩენილი მატლივით, ისიც მორჩილად ასრულებს ბუნების წესს, ანუ, ფრენით ამთავრებს წინა სამი თაობის მიერ ხოხვით გამოვლილ გზას” (ჭილაძე 2006: 173-174). ეველაფერი სწორედ ისე ხდება, როგორც ფროიდი აღწერს – შვილი კლავს მკვლელ მამას (მამის კერპს), რათა თავადაც მკვლელი გახდეს. ხოლო ის, რომ მწერალი ანტონს სინამდვილეში არ აკვლევინებს მამას და გმირს ომში დუპავს, უკვე ავტორის ინტერპრეტაციაა.

დაბოლოს შეიძლება ითქვას, რომ ოთარ ჭილაძემ თავის რომანებში ფროიდის მოძღვრების გათვალისწინებით რამდენიმე საკითხი წამოჭრა: 1. სქესობრივი ინსტინქტის მნიშვნელობა ადამიანის განვითარებისას, რაც გამოიხატა ალექსანდრესა და მაროს პიროვნებების ფორმირებისას, 2. ადრეულ ასაგში მიღებული სექსუალური შთაბეჭდილებების მნიშვნელობა - რაც საფუძვლად დაედო რომანს “გოდორი” და მიმართულება მისცა სიუჟეტის განვითარებას და 3. მამა-შვილის (ძირითადად არაცნობიერი) დაპირისპირების საკითხი, რომელიც, ცხადია, სახეცვლილია, მაგრამ სათავეს ფროიდის ნაშრომებში იღებს. ამგვარი თემატიკის გამოყენებით ოთარ ჭილაძემ გაამდიდრა და გაამრავალფეროვნა თავისი პროზა და უკვე წარმოაჩინა ადამიანის სულიერი სამყაროს ფარული შრეები.

დასკვნები

მე-20 საუკუნეში არსებულ ფსიქოლოგიურ თეორიათაგან, სწორედ ზიგმუნდ ფროიდის კლასიკურმა ფსიქოანალიზმა შეძლო მხატვრულ ლიტერატურაში ტრანსფორმაცია და ჩამოყალიბდა, როგორც ლიტერატურულ-თეორიული მეთოდი. ფროიდის მტკიცებით, კლასიკური ფსიქოანალიზის მიზანი არასოდეს ყოფილა ხელოვნებისა და ლიტერატურის კვლევა, მაგრამ ფსიქოანალიზიკური კვლევის საგანი შეიძლებოდა გამხდარიყო მხოლოდ ნაწარმოების შექმნის პროცესი, ავტორის ფსიქიკური თავისებურებები. ლიტერატურულ ნაწარმოებში ავტორი წარმოადგენს ნიჭიერ ფსიქოლოგს, რომელიც ქმნის სხვა ადამიანების ხასიათებს და აკონტროლებს მათ ემოციებს. ეს ყოველივე კი ხელს უწყობს ავტორის პიროვნების ანალიზს. თუმცა ლიტერატურათმცოდნეობამ ფროიდის თეორია ნაწარმოებების პერსონაჟების ფსიქიკის ანალიზისა და არაცნობიერის წარმოსაჩენადაც გამოიყენა.

ფროიდის თეორია პიროვნების კვლევის არაერთ ასპექტს გულისხმობს, იქნება ეს, ადამიანის განვითარების სხვადასხვა ეტაპების კვლევა, პიროვნების სტრუქტურის მოდელის შექმნა თუ არაცნობიერის წვდომის მცდელობა. ფროიდის კლასიკური ფსიქოანალიზი ადამიანის ნებისმიერი მოქმედებისა და შეგრძნების ამოსავალ წერტილად, მისი სურვილებისა და ვნებების წარმმართველად, სწორედ არაცნობიერს მიიჩნევს, რომელში დაგროვილი განდევნილი და საზოგადოებისთვის მიუღებელი სურვილები, ხშირად სექსუალურ ხასიათს ატარებს. (Rühling 2008: 538). ფროიდის მტკიცებით, სწორედ ამგვარი სურვილები აკონტროლებენ და განსაზღვრავენ ცნობიერის მოქმედებას. ჯანმრთელი ადამიანის ცნობიერი ახერხებს ამ სურვილების სუბლიმაციას, გაკეთილ შობილებას, ანომალურ სიტუაციებში კი ცნობიერის კონტროლი უარყოფითად აისახება ადამიანის მენტალურ თუ ფიზიკურ ჯანმრთელობაზე. ასეთ შემთხვევაში აუცილებელია, რომ არაცნობიერი მისაწვდომი გახდეს ცნობიერისთვის და მოხდეს პრობლემის არსის გაცნობიერება (Фрейд 10).

ამგვარი საკითხები აქტიურად დაისვა მე-20 საუკუნის მსოფლიო და ასევე ქართულ ლიტერატურაში. შიო არაგვისპირელთან პირველად ვხვდებით თემებს სქესთა ურთიერთობის შესახებ. აქვე უნდა აღინიშნოს მიხეილ ჯავახიშვილის მოთხრობები, სადაც მწერალმა არაცნობიერსა და ფიზიკურ ლტოლვებზე საუბარი სწორედ ფროიდის თეორიაზე დაყრდნობით დაიწყო და დახატა ანომალური, რიგ შემთხვევაში, ფსიქიკურად გაუწონასწორებელი ტიპაჟები.

სწორედ ჯავახიშვილის ხაზს აგრძელებს და ავითარებს ოთარ ჭილაძე რომანებში “ყოველმან ჩემმან მპოვნელმან”, “მარტის მამალი” და “გოდორი”. მწერლის პროზაში ფსიქოანალიტიკური თემატიკა რამდენიმე საკითხს გულისხმობს: სექსუალური ენერგიის მნიშვნელობას პიროვნების ფორმირებისას, რაც გამოიკვეთა ალექსანდრე მაკაბელისა და მაროს პერსონაჟების ქცევებში.

ოთარ ჭილაძის პროზაში საყურადღებოა ასევე მამებისა და ვაჟების ურთიერთობა, რაც რიგ შემთხვევაში ამ საკითხთან დაკავშირებით ფროიდის მოსაზრებებს მოგვაგონებს. ფსიქოლოგის მტკიცებით, მამა-შვილის დამოკიდებულებას განაპირობებს ვაჟის გაუცნობიერებელი და დათრგუნული სურვილი, გაანადგუროს მამა, როგორც მეტოქე დედასთან ურთიერთობაში. რომანში “მარტის მამალი”, თხუთმეტი წლის ნიკოს ეჭვიანობა დედაზე, რომელიც ავადმყოფ მამას უვლის და ამის გამო შვილისთვის არ სცალია, ფროიდის მოსაზრების მხოლოდ გამოძახილია, ისევე, როგორც ანტონისა და რაჟდენის, ალექსანდრესა და პეტრეს (ასევე სხვა მამა-შვილების) დაძაბული და აგრესიული ურთიერთობა. ამ ყველაფერს ერთვის კიდევ ერთი საკითხი – მამისმკვლელობა (ანტონის მიერ მამის მოკვლის მცდელობა, სურვილი), რაც, ფროიდის აზრით, ყველა დროის საუკეთესო ლიტერატურული ქმნილების მთავარი მოტივია.

თავი IV

სიზმრის ფუნქცია ოთარ ჰილაბის რომანებში

ლიტერატურა, განაკუთრებით კი პროზაული ქმნილებები, დაწყებული ანტიკური პერიოდიდან, დასრულებული თანამედროვე ნაწარმოებებით, მდიდარია სიზმრებითა და ჩვენებებით, რომელთაც სხვადასხვა უანრსა თუ ეპოქაში განსხვავებული ფუნქცია აქვთ. ზოგჯერ სიზმარი ნაწარმოებს სამკაულის სახით ერთვის და მისი ინტერპრეტაციაც მარტივია, ხან ხილვას წარმოადგენს, ხან – წინასწარმეტყველებას, ხანაც მხატვრულ ხერხს. მაგრამ აღსანიშნავია, რომ მე-20 საუკუნის დასაწყისიდან, როცა ფსიქოლოგიაში სიზმრის კვლევა მეცნიერულ დონეზე ავიდა და სიზმრის ინტერპრეტაციის საკითხით თითქმის ყველა მნიშვნელოვანი ფსიქოლოგი დაინტერესდა, მისდამი დამოკიდებულება ლიტერატურამაც შეცვალა და ამ პერიოდის შემდეგ დაწერილ ნაწარმოებებში წარმოდგენილ სიზმრებს აშკარად დაეტყო ამა თუ იმ ფსიქოლოგიური მოძღვრების გავლენა. ამიტომ სიზმრის ფუნქციაც გაიზარდა, მისი შინაარსი გართულდა, სიუკეტი – დაიძაბა და ისევე, როგორც ფროიდის, ადლერისა თუ იუნგის თეორიებში, სიზმარი არაცნობიერის ერთგვარი გამოხატულება გახდა, რომელსაც პერსონაჟის ინდივიდუალიზაციის პროცესის ახსნაში შეაქვს წვლილი.

სიზმრის მოტივი ლიტერატურაში საკმაოდ ძველია. ანტიკურ ლიტერატურაში სიზმრის პოეტიკა ძალიან ახლოს დგას ფოლკლორსა თუ მითოლოგიაში ფორმირებულ სიზმრის გაგებასთან. ეპოსის გმირებს დმერთები სწორედ სიზმრის მეშვეობით ეკონტაქტებიან და აცნობენ თავიანთ სურვილებს, თუმცა სიზმარს არ გამოჰყავს ადამიანი ჩვეული “ნამდვილი” ცხოვრებიდან და ის არ აღიქმება, როგორც ალტერნატიული, “სხვა ცხოვრება”. პომეროსთან ვხვდებით ორგვარ სიზმარს: “მატყუარა სიმზარს”, რომელიც არ ასრულდება და “ჭეშმარიტ სიზმარს”, რომელიც ყოველთვის ახდება (Калина... 1997 10-13). აღსანიშნავია, რომ ანტიკურ ლიტერატურაში სიზმრებს სიმბოლური ხასიათიც აქვთ. მაგალითად, ესქილეს ტრაგედიებში წარმოდგენილი წინასწარმეტყველური სიზმარი მოქმედების

დრამატიზირებას უწყობს ხელს და ბედის გარდაუვალობის იდეასთანაა დაკავშირებული. ასევეა რომაულ ნაწარმოებებშიც, სადაც სიზმრები გმირებს მინიშნებებს აძლევენ და გარკვეული მოქმედებისკენ, აქტიურობისკენ უბიძგებენ. რომაელი ფილოსოფოსი და პოეტი ლუკრეცია კარა თავის პოემაში “საგანთა ბუნება” წერს, რომ თავდაპირველად ღმერთები ადამინებს მხოლოდ სიზმრებში ევლინებოდნენ და ამგვარად ამყარებდნენ მათთან კონტაქტს. აქვე ფილოსოფოსი ცდილობს გააანალიზოს სიზმარში წარმოჩენილი სახეები და აღნიშნავს, რომ სიზმრები ასახავს ადამიანის ჩვეულებრივ, ყოველდღიურ ყოფასა და განცდებს (Калина... 1997: 10-13).

სიზმრები მრავლადაა ბიბლიაშიც, სადაც გამოიყოფა მათი ორგვარი ტიპი – ჩვეულებრივი სიზმარი და ღვთის მოვლენილი სიზმარი. ამ უკანასკნელით უფალი ადამიანებს თავის სურვილებს ამცნობდა. აღსანიშნავია, რომ ღმერთი ადამინებს სიზმრის ახსნის ნიჭსაც აძლევდა, მაგალითად, როგორც იოსებს, რომელმაც შეძლო ნაბუქოდონოსორისთვის სიზმარი სწორად განემარტა. თუმცადა ქრისტიანულ კულტურაში სიზმრისადმი უარყოფითი დამოკიდებულებაც შეინიშნება, რადგან ღმერთის ნება სრულად მხოლოდ სახარებაშია გაცხადებული.

შუასაუკუნეებსა და რენესანსის პერიოდში, სიზმარს აღეგორიული, ან სულაც, სიმბოლური ხასიათი აქვს, როგორც, მაგალითად, დანტე ალიგიერის “ღვთაებრივ კომედიაში”. ხოლო რაც შეეხება შუასაუკუნეების ევროპულ ლიტერატურას, აქ დამკვიდრებულია ხილვების ჟანრი. კანონიკურ რელიგიურ ხილვებში კი აღინიშნება დიდაქტიკური მოტივები, რომელთა მიზანიც ცოდვილების ჯოჯოხეთით შეშინება, ხოლო მართალი ადამინების სამოთხით მოხიბლვაა. რაც შეეხება გვიან შუასაუკუნეებსა და ბაროკოს ეპოქას, აქ ლიტერატურული სიზმარი სრულად იცვლის მნიშვნელობას და უკავშირდება სიყვარულს, პოეზიას, ხელოვნებას, ანუ თავად ცხოვრებას. სიზმარი ასოცირდება სიცოცხლესთან. ამის თვალსაჩინო მაგალითია შექსპირის შემოქმედება და განსაკუთრებით პიესა “ზაფხულის დამის სიზმარი” (Калина... 1997: 12).

“შედიოდა რა სიზმრების სამყაროში, არქაული, ჯერ კიდევ დამწერლობის გარეშე მყოფი ადამიანი, რეალობის მსგავსი თუ არარეალური სივრცის წინაშე აღმოჩნდებოდა. ცხადია, ამ სამყაროს პქონდა გარკვეული, მაგრამ მისთვის უცნობი

მნიშვნელობა. ეს იყო ნიშნები რაღაცის შესახებ, მათი მნიშვნელობა კი – განუსაზღვრელი. ამიტომ საჭირო იყო მათი განსაზღვრა” – წერდა იური ლოტმანი (Лотман 1992). მართლაც, სიზმარი ერთ-ერთი ყველაზე იდუმალი და რთულად ამოსაცნობი მოვლენაა მეცნიერებისთვის თავისი არალოგიკურობით, პარადოქსულობით, საჭკვო მორალითა თუ საშიში სახე-ხატებით, მაგრამ ის მაინც არ არის უაზრო და შემთხვევით ასოციაციების უწესრიგო გროვა, არამედ ფსიქიკური მნიშვნელობის მქონე პროდუქტი. სიზმრის სიმბოლოებიც ადამიანის ფსიქიკის ამბივალენტურ ბუნებას შეესაბამება და მის იდუმალ, ფარულ სიღრმეებს გამოხატავს.

ყველაზე ადრეული წარმოდგენებით სიზმარი სულის თავგადასავალს წარმოადგენდა, რომელმაც სხეული დატოვა, ამიტომ სიზმარში მომხდარი მოვლენები აღიქმებოდა, როგორც რეალური. თუმცა ამ მოვლენების მონაწილე მხოლოდ წმინდა სული იყო. შემდეგ სიზმარი რწმენას დაუკავშირდა და იყო მცდელობა, მისი მეშვეობით რეალობა ეწინასწარმეტყველათ – ყველაფერი მოხდებოდა ან ისე როგორც სიზმარში წარმოჩნდა, ან – საპირისპიროდ. სიზმრის სიმბოლურად გააზრების პირველი შემთხვევები კი ადრეულ საბერძნეთში დაფიქსირდა. თუმცა, უნდა აღინიშნოს, რომ ძალიან დიდი ხნის განმავლობაში, მანამ, სანამ სიზმრები მეცნიერული კვლევის საგანი გახდებოდა, ის ეზოთერული, უფრო ზუსტად კი, პერმენევტული ტრადიციის ობიექტი იყო, რაც ფილოსოფიის ისტორიის ნაწილს წარმოადგენდა. სიზმრის ახსნაც, გარკვეულწილად ფილოსოფიას ემყარებოდა, რადგან მას უშუალო კავშირი აქვს ცნობიერისა და არაცნობიერის შესწავლასთან. საბოლოოდ, სიზმრის ახსნა და მისი ფუნქციის დადგენა მეცნიერებას დაევალა, რადგან მისი სწორი ინტერპრეტაცია საკმაოდ დიდ ცოდნას მოითხოვს – ფიზიოლოგიური ძილის, არაცნობიერის ფსიქოლოგიის, ასევე სიზმრის მხილველის პირადი ისტორიისა და ცხოვრებისეული სიტუაციის. სიზმრის ინტერპრეტაცია რთული პროცესია, რომელიც კვლევასა და ხანგრძლივ მუშაობას გულისხმობს (Калина... 1997: 10-13).

ერთ-ერთი ყველაზე მნიშვნელოვანი სიზმრის კვლევის მეთოდი ზიგმუნდ ფროიდმა წარმოადგინა. აღსანიშნავია, რომ ფროიდი ხაზს უსვამდა სიზმრების სუბიექტურ ხასიათს და უარყოფდა გარე რეალობას შიდა რეალობის ხარჯზე. მან

უკვე იცოდა, რომ სიზმარი, ეს იყო გზავნილი არაცნობიერიდან, ამიტომ ფსიქოანალიზს, სულიერი პროცესების გარდა, ჯანმრთელი, გაწონასწორებული ადამიანის სიზმრების კვლევაც დაუსახა მიზნად, რადგან, ფსიქოლოგის აზრით, სწორედ სიზმრებში იყო შესაძლებელი დაფარული თუ აკრძალული სურვილების გამოაშკარავება. სიზმარი სუბიექტის ფსიქოლოგიური წარსულის შედეგია. გარკვეული ობიექტი, რომელიც ამ სუბიექტს განსაკუთრებულად ანტერესებს, იწვევს უამრავ ასოციაციასა და ემოციას, რაც სიზმრის მეშვეობით აღწევს ცნობიერებას. სიზმრის ფარული და ემოციური შინაარსის მიკვლევა შესაძლებელია თავისუფალი ასოციაციების მეთოდით, რომლის საშუალებითაც შესაძლებელია პიროვნებისთვის ყველაზე მნიშვნელოვანი და შენიდბული სურვილების იდენტიფიცირება (კალია 1997: 17-30).

თავისებურად აქვს გააზრებული სიზმრის არსი ალფრედ ადლერსაც თავის ინდივიდუალურ ფსიქოლოგიაში, სადაც მან, ფროიდისგან განსხვავებით, ადამიანის მთავარ მისწრაფებად მიიჩნია სწრაფვა უპირატესობისა და ძალაუფლებისკენ. სიზმარი კი, ადლერის აზრით, ეს არის სიზმრის მხილველის მიერ ორგანიზებული მოქმედება, რომელიც მას საშუალებას აძლევს, მიაღწიოს იმას, რაც არა აქვს რეალურ ცხოვრებაში. მაშინაც კი, როცა ფხიზელი გონება გამოოთშეულია, სიზმრის მეშვეობით, გაუცნობიერებლად, ადამიანი ახერხებს კონცენტრირებას მისი ცხოვრების მთავარ მიზნებზე. სიზმრები არა მხოლოდ სურვილის ასრულებას წარმოადგენენ, არამედ წარმოუდგენელი, ნებისმიერი სურვილის შესაძლო ახდენის ილუზიასაც ქმნიან, უფრო სწორად, წინასწარმეტყველებენ. ადლერისეული თერაპიაც ადამიანს არასრულფასოვნების კომპლექსის დაძლევასა და სოციალური ინტერესის გაძლიერებაში ეხმარება (კალია 1997: 38-46).

საინტერესოა სიზმრებზე ონტოფსიქოლოგიის, იგივე “არსებობის ფსიქოლოგიის” შეხედულებაც, რომელიც ადამიანს განიხილავს, როგორც ცხოვრების აქტიურ სუბიექტს და აინტერესებს ხელოვანი ინდივიდის ფორმირების პროცესი, თანმხლები სულიერი სამყაროთი, მისწრაფებებით, ღირებულებებითა და წარმოდგენებით საკუთარ თავზე. ონტოფსიქოლოგიის ფუძემდებლის, ანტონიო მენეგეტის აზრით, სიზმარი ფსიქოლოგიური მდგომარეობის, შინაგანი ორგანოების და ორგანიზმის სისტემის ფუნქციონირების პირდაპირი გამოძახილია. სიზმარი

არის სიმართლე იმის შესახებ, თუ რა მდგომარეობაშია რეალობა, ხოლო სიზმრისა და შინაგანი სამყაროს რეალობა იდენტურია, რაც ავტოკომუნიკაციას გულისხმობს. შეიძლება ითქვას, რომ სიზმარი პიროვნების მოთხოვნილებებზე საპასუხო რეაქციაა და სწორედ იმას ასახავს, რაც სუბიექტს სჭირდება, გამოხატავს მისი ცხოვრების სინამდვილეს (Калина 1997: 46-57).

1. სიზმრის იუნგისეული სტრუქტურა

ყველაზე მნიშვნელოვანი წვლილი სიზმრის ფუნქციისა და მნიშვნელობის შესწავლაში ანალიტიკური ფსიქოლოგიის ერთ-ერთმა ფუძემდებელმა, კარლ გუსტავ იუნგმა შეიტანა. ამიტომ ოთარ ჭილაძის პროზაში სიზმრის ფუნქციის პლავისას, მეტწილად სწორედ მის თეორიულ მოსაზრებებს დავეყრდნობი.

იუნგმა, როგორც სიდრმის ფსიქოლოგიის წარმომადგენელმა, შექმნა ადამიანის შინაგანი სამყაროს რთული სტრუქტურა და ყურადღება გაამახვილა ცნობიერ და არაცნობიერ ფსიქიკაზე, სადაც ცნობიერი მხოლოდ ფსიქიკის მცირე ნაწილს წარმოადგენს, არაცნობიერს კი უზარმაზარი ადგილი უკავია. არაცნობიერი თავის მხრივ კიდევ ორ დონეს გამოყოფს – პირადსა და კოლექტიურს, სადაც პირადი არაცნობიერი არაცნობიერის ზედა ფენაა და დავიწყებულ აზრებსა და განდევნილ სურვილებს მოიცავს. შესაბამისად, ის კონკრეტული ადამიანის პირადი გამოცდილებაა. კოლექტიური არაცნობიერი კი კაცობრიობის წარსულისა და მეხსიერების მითოლოგიურ-რელიგიურ შინაარსებს შეიცავს, რომელიც შემდეგნაირად შეიძლება განიმარტოს: “ესაა ჩვენი წინაპრების გონება, ხერხი, რომლითაც ისინი ფიქრობდნენ და გრძნობდნენ, საშუალება, რომლითაც ისინი წვდებოდნენ ცხოვრებასა და სამყაროს, დმერთებსა და ადამანებს” (Юнг 1967: 109). ამიტომ შეიძლება ითქვას, რომ არქეტიპი – კოლექტიური არაცნობიერის სტრუქტურული შინაარსი - თანდაყოლილი ეკოლუციური და ისტორიული ფსიქიკური გამოცდილებაა და ის, როგორც წესი, სიმბოლურად მითოლოგიური ფიგურის სახითაა მოცემული (Юнг 1967: 109).

არქეტიპები ძალიან ბევრია, მაგრამ მათ შორის იუნგი გამოყოფს რამდენიმეს, რომლებსაც უმთავრესი მნიშვნელობა აქვს პიროვნების ფორმირებისას, ესენია: პერსონა – ნიღაბი, რომელსაც ადამიანი იყენებს საზოგადოებასთან ურთიერთობისას, ჩრდილი – სოციალურად მიუდებელი აზრები და ცხოველური ინსტინქტები, ანიმა და ანიმუსი – ქალური ნიშნები და საწყისები მამაკაცის ფსიქიკაში (ანიმა) და მამაკაცური საწყისები ქალის ფსიქიკაში (ანიმუსი) და თვითობა – არქეტიპი, რომლის ფუნქციაც ფსიქიკური ცხოვრების ყველა ასპექტისა და ნაწილის გაერთიანება-მოწესრიგებაა. აქვე უნდა აღინიშნოს ისეთი მნიშვნელოვანი ცნება, როგორიცაა ინდივიდუალიზაცია, რაც ადამიანში მთელის წარმოქმნის, საკუთარ თვითობად გახდომის პროცესია (იმედაძე 2004: 45-46).

იუნგის ამგვარ რთულ სისტემაში უმნიშვნელოვანების ადგილს იკავებს სიზმრები. ფსიქოლოგის აზრით, პირადი თუ კოლექტიური არაცნობიერის წვდომის ერთ-ერთ უმთავრეს წყაროს სწორედ სიზმრების ანალიზი წარმოადგენს. ამიტომ იუნგი სერიოზულად უდგებოდა სიზმრების ანალიზისა და ინტერპრეტაციის საკითხებს და ადასტურებდა ტიპური სიზმრებისა და სიმბოლოების არსებობასაც, თუმცა, მისივე მტკიცებით, სიზმარის განხილვა წარმოუდგენელია სიზმრის მხილველის მონაწილეობისა და კონტაქტის გარეშე (იმედაძე 2004: 47). სიზმრის განსაკუთრებულობა კი იმაში მდგომარეობს, რომ ის ცნობიერში შემოდის არა მხოლოდ ცხადში ნანახიდან, არა მხოლოდ განცდილისა და ნანახის ლოგიკური და ემოციური შედეგია, არამედ ხანდახან სრულიად ეწინააღმდეგება შეგნებულ აზროვნებას (Холл 1996: 11-12).

იუნგის აზრით, სიზმარი სულიერი ცხოვრების მნიშვნელოვანი ფაქტია, რადგან ეს პროცესი, შეიძლება ითქვას, ტრანსცენდენტურ ფუნქციაში, ფსიქიკურ მოვლენებში ჩარევის ერთგვარი ფორმაა. სწორედ სიზმარი წარმოაჩენს ცნობიერისა და არცნობიერის ურთიერთობას, მათ პარმონიასა თუ დაპირისპირებას. სიზმრის არსი დამოკიდებულია იმაზე, თუ რამდენად საჭიროებს ადამიანის ცნობიერი კომპენსირებას (შევსებას, აღდგენას). თუ ცნობიერი არაცნობიერს რადიკალურად უპირისპირდება, მაშინ სიზმარი ცნობიერის საპირისპირო პოზიციას დაიკავებს. თუკი ცნობიერის პოზიცია შუალედურია, ამ შემთხვევაში სიზმარი დაკმაყოფილდება იმით, რომ აღწეროს რეალური სიტუაციები, ხოლო თუ ცნობიერსა და არაცნობიერს შორის კონფლიქტი

მინიმუმამდეა დასული, მაშინ სიზმარი ცდილობს, არ დაკარგოს ავტონომია. ამიტომ სიზმრის არსის გაგება შესაძლებელია მხოლოდ იმ შემთხვევაში, თუკი გვაქვს ინფორმაცია მისი მხილველის ცხოვრებისეულ სიტუაციასა და გამოცდილებაზე (Холл 1996: 12-23).

მიუხედავად იმისა, რომ სიზმრებს შეაქვთ თავისი წვლილი არცნობიერის ფსიქიკურ თვითრეგულაციაში და უბრუნებენ ცნობიერს ყველა უარყოფილ, იგნორირებულ ფიქრსა თუ სურვილს, სიზმრის სიმბოლოკის მნიშვნელობა, რისი საშუალებითაც ამგვარი კომპენსაცია ხორციელდება, ხშირად სცდება ერთი კონკრეტული ადამიანის ბეჭს. ზოგიერთ ფსიქოლოგიურ კომპენსაციას ძალიან შორს მივყავართ. სწორედ აქ სიზმრის კვლევაში ერთვება არქეტიპის ცნება, რომელიც არა ინდივიდუალური, არამედ კოლექტიური არაცნობიერის ნაწილია. ყოველი ადამიანი, გარკვეული თვალსაზრისით, მთელი კაცობრიობისა და მისი ისტორიის რეპრეზენტაციას ახდენს, ამიტომ სიზმრის სიმბოლიკაც ბევრ ზოგადსაკაცობრიო მოტივს შეიცავს. ხოლო ის, რაც სჭირდება კაცობრიობას, სჭირდება ცალკეულ ადამიანებსაც. სწორედ ამიტომ სიზმრის იუნგისეულ ანალიზე დაკვირვებისას, აუცილებელია მითოლოგიისა და რელიგიის ისტორიის ცოდნა, რაც კოლექტიური არაცნობიერის კომპენსირების ყველაზე გავრცელებულ ფორმას წარმოადგენს (აღსანიშნავია, რომ ამგვარ ცოდნასა და მის რეალიზაციას აშკარად ვხედავთ ჭილაძის რომანებში) (Холл 1996: 28-31).

იუნგის ანალიზურ ფსიქოლოგიაში სიზმარს რამდენიმე ფუნქცია აქვს: 1. უმთავრესი ფსიქოლოგისთვის არის ის, რომ შეძლოს პაციენტის პრობლემების გადაჭრა და მისი განკურნება, 2. ზოგ შემთხვევაში სიზმარს პერსპექტიული ფუნქციაც აქვს, რაც გულისხმობს სიზმრის ე. წ. წინასწარმეტყველურ მინიშნებებს. თუმცა, ფსიქოლოგის თქმით, არ დირს მას წინასწარმეტყველური ეწოდოს, რადგან აქ მხოლოდ შესაძლო პროგნოზებზეა საუბარი, 3. არსებობს ასევე რეაქტიული სიზმარიც, რომლის ფუნქციაც, პერსპექტიულის საპირისპიროდ, განმეორება, რეალურ ცხოვრებაში მომხდარი რაიმე მნიშვნელოვანი და ეფექტური განცდის რეპროდუქციაა. თუმცა ამ დროსაც არ ხდება ზუსტი განმეორება, რადგან არაცნობიერი მოვლენის იმ სიმბოლურ ნაწილზე ამახვილებს ყურადღებას, რომელიც ცნობიერს გამორჩა, ან რომელსაც შეგნებულად გაექცა. რეაქტიული

სიზმარი ასევე ახდენს განდევნილი ტრაგმის და მასთან დაკავშირებული პრობლემების აქცენტირებას და ამ პრობლემის დაძლევის საშუალებებზე მინიჭნებასაც იძლევა. (Холл 1996: 27-40).

ყველაზე მნიშვნელოვანი იუნგის ფსიქოლოგიაში სიზმრების ინტერპრეტაციის საკითხია, რაც წინამდებარე ნაშრომისთვისაც საყურადღებოა და ჭილაძის პერსონაჟების სიზმრების ინტერპრეტაციაში გვეხმარება. უპირველს ყოვლისა უნდა აღინიშნოს, რომ სიზმრები ფასდება ყველა იმ კომპონენტის გათვალისწინებით, რაზეც ზემოთ იყო საუბარი – არაცნობიერისა და ცნობიერის დამოკიდებულება, ინდივიდუალური და კოლექტიური არაცნობიერი, არქეტიკები, მინიჭნებები, მითოლოგიური თუ რელიგიური ფონი, ინდივიდუალიზაციის პროცესი და სხვა. მაგრამ მიუხედავად იმისა, რომ არსებობს ტიპური სიზმრები და სიმბოლოები, იუნგს მაინც შეუძლებლად მიაჩნდა “სიზმრების განმარტებითი ლექსიკონის” შექმნა, რადგან თითოეული სიზმარი და მისი სიმბოლოკა ინდივიდუალურ მიდგომას მოითხოვს. თვით კოლექტიური არაცნობიერიდან მომდინარე შინაარსებიც კი, რომელთაც უნივერსალური ხასიათი აქვთ, თავისებურად აისახება და ვლინდება ინდივიდუალურ ფსიქიკაში (Холл 1996:27-43). ამიტომ სიზმრის ინტერპრეტაცია ერთგვარი კომპლექსური პროცესია, ის მოითხოვს როგორც რელიგიურ-მითოლოგიური ასპექტების, ასევე სიზმრის “მხილველის” ინდივიდუალური ფსიქიკის, მისი პირადი გამოცდილებისა და რეალური ცხოვრებისეული სიტუაციების ცოდნას. აქედან გამომდინარე სიზმრის ახსნის იუნგისეულ მეთოდში საინტერესოა სამი მოქნეტი: 1. სიზმრის დეტალების, როგორც ასეთის, სწორად ინტერპრეტირება, 2. განსაზღვრა იმისა, თუ რა დონეზე უნდა გავიგოთ სიზმარი – პირადულ, კულტურულ თუ არქეტიკულ დონეზე და 3. სიზმრის მოთავსება მისი მხილველის ცხოვრებისეულ სიტუაციასა და ინდივიდუალიზაციის პროცესის კონტექსტში (Холл 1996: 121-131).

იუნგის მიმდევარი ჯონსონი გამოყოფს რამდენიმე კრიტერიუმს, რომლითაც ფასდება სიზმრის ინტერპრეტაცია: 1. საუკეთესო ინტრპრეტაცია არის ის, რომელიც შეიცავს ახალ ინფორმაციას. არაცნობიერი არ გაიმეორებს იმას, რაც ცნობიერისთვის ისედაც ნაცნობია, ამიტომ აქ აქცენტირებულია ის საკითხი, რომელიც ახლებურად წარმოაჩენს სიზმრის მხილველის დირებულებებსა და

ცხოვრებისეულ პრობლემებს. 2. არასწორია ის ინტერპრეტაცია, რომელიც შეიცავს რაიმე მამებელს, რადგან სიზმრებს არ აინტერესებს ქება, წარმატება ან სიხარული, არამედ მხოლოდ პრობლემები. 3. ასევე საინტერესოა სიზმრის იმგვარი ინტერპრეტაცია, რომელიც უკავშირდება სიზმრის მხილველის არ მხოლოდ იმ პერიოდის აქტუალურ მოვლენებს, არამედ მთელ ცხოვრებისეულ გზას, რადგან ხშირად სიზმარი მთელ ინდივიდუალიზაციის პროცესს აირეკლავს (Холл 1996: 27-43).

სწორედ ამგვარად განმარტავს სიზმრის არსესა და ფუნქციას კარლ გუსტავ იუნგი, რომელმაც, სხვა თეორიულ მოსაზრებებს შორის, სიზმრის ყველაზე გლობალური ახსნა-განმარტება მოგვცა. ამიტომ ჭილაძის რომანების პერსონაჟების სიზმრების ინტერპრეტაციისას თუ ნაწარმოებში სიზმრის ფუნქციის დადგენისას, ძირითადად, იუნგის თეორიით ვიხელმძღვანელებ. სიზმრის არსის კვლევა კი რომანების მთავარი სათქმელისა თუ კონცეფციის წარმოჩენას შეუწყობს ხელს.

— — —

მიუხედავად იმისა, რომ სიზმრის ინტერპრეტაციისა და მისი არსის საკითხი ყველაზე უკეთ ფსიქოლოგიამ განიხილა, ლიტერატორები საკუთრივ ლიტერატურულ სიზმარს, ფსიქოლოგიის მიღწევების გათვალისწინებით, მაგრამ მაინც განსხვავებულად უდგებიან. თავისთავად ცხადია, რომ სხვაა რეალური ადამიანის სიზმარი და სხვა - ლიტერატურული ფიქცია. რეალურ სიზმარს ყოველთვის ახლავს კონტექსტი, რეალური ადამიანის ცხოვრების ისტორია და მას თავად ცხოვრება ბადებს, ლიტერატურული სიზმრის სიუჟეტს კი ავტორი ქმნის. აქედან გამომდინარე, ფსიქოლოგის მიზანი სიზმრის მაქსიმალურად სწორი ინტერპრეტაცია და ცხოვრებისეული სიტუაციის შეცვლაა, ლიტერატორისა კი - ავტორის ჩანაფიქრის შეფასება, თუმცა ესეც ლიტერატურული პერსონაჟის ცნობიერსა თუ არაცნობიერზე გავლით ხდება (ანუ აქაც იგულისხმება გმირის სულიერი ცხოვრებისა და ლიტერატურული რეალობის არსებობა, რომლისთვისაც ეს სიზმარი ორგანული იქნება) (Теперник 2007: 47-55). თუკი ფსიქოლოგი სიზმრის შესწავლის შემდეგ მოქმედებას იწყებს, ლიტერატორი ანალიზს აკეთებს. აქედან გამომდინარე, ის მეტად თავისუფალია ინტერპრეტაციისას და მეტი მასალაც აქვს, რადგან მხატვრულ ტექსტში სიზმრის თხრობა შეუძლია არა მხოლოდ იმ გმირს,

რომელმაც სიზმარი ნახა, არამედ სხვა პერსონაჟსაც, ნარატორს ან სულაც ავტორს. მაგრამ არსებობს სირთულეებიც - რეალური სიზმრის განხილვისას ერთ-ერთი მთავარი პირობა სიზმრის მხილველის ჩართულობაა, რაც მეტ-ნაკლებად სწორი ინტერპრეტაციის გარანტია, ლიტერატურული სიზმრის შემთხვევაში კი ამგვარი შესაძლებლობა არ არსებობს. თუმცა, მკითხველი, ამ შემთხვევაში ლიტერატორი, კარგად უნდა იცნობდეს პერსონაჟის სულიერ სამყაროს და მის ცხოვრებისეულ სიტუაციას, დასკვნებიც ამის შესაბამისად გაკეთდება (Теперник 2007: 47-55).

აღსანიშნავია, რომ ლიტერატურულ ნაწარმოებებში გვხვდება ე.წ. “მარტივი” სიზმრებიც, რომლებიც განსაკუთრებულ ახსნასა და ფსიქოლოგიურ ჩადრმავებას არ საჭიროებენ. ამგვარი სიზმარი ერთგვარი მხატვრული ხერხია, რომელიც წინ წამოსწევს ან გადაწყვეტას მოუძებნის ნაწარმოებისთვის მნიშვნელოვან ამა თუ იმ მოვლენას. სიზმრის ეს ფუნქცია ყოველთვის კონტექსტიდან გამომდინარეობს.

ის, რასაც ლიტერატურაში ფსიქოლოგიური მოვლენა ეწოდება, შეისწავლება კიდეც ფსიქოლოგიური მეთოდებით, შესაბამისად, სიზმრის არსის ინტერპრეტაცია ხდება ფსიქოლოგიური მეთოდოლოგიით. ამის სანიმუშო მაგალითია თუნდაც ის, რომ ზიგმუნდ ფროიდი თავის ნაშრომში სიზმრების შესახებ, ისევე აკეთებს ლიტერატურული სიზმრის ინტერპრეტაციას, როგორც რეალურისას. ამიტომ, ლოგიკურია, რომ ლიტერატურა ფსიქოლოგიის მეთოდებს ითვალისწინებს, თუმცა მხოლოდ მას არ ეყრდნობა, რადგან სიზმრის ინტერპრეტაციისას ლიტერატორისთვის მთავარი მიზანი ავტორის ჩანაფიქრის ამოცნობაა და შესაბამისად, მთელი მხატვრული ტექსტის სწორი ანალიზი, და არა მხოლოდ სიზმრის ფსიქოლოგიური ანალიზი, რაც უნდა რეალურად იყოს ის ტექსტში აღწერილი. შესაბამისად, სიზმრის ლიტერატურული ინტერპრეტაცია მრავალმხრივია. ყურადღება უნდა მიექცეს იმ ფაქტსაც, რომ ლიტერატურული სიზმარი წერილობითი ფორმითაა გადმოცემული და ანალიზისას მნიშვნელოვანია ნარაციაც, თხრობის მანერა, არა მხოლოდ მისი ავთენტური შინაარსი. სწორედ ამიტომ თანამედროვე ლიტერატურაში სიზმარს განსაკუთრებული მნიშვნელობა ენიჭება – მას შეიძლება პქონდეს როგორც ფსიქოლოგიური, ასევე პოეტური მნიშვნელობა (Fromm... 2004). ლიტერატურული სიზმრის მნიშვნელობა არ

ამოიწურება იმით, რომ მისი არაცნობიერი წასაკითხადაა შექმნილი (ფსიქოლოგიური ფუნქცია), ის ხშირად ნაწარმოების მნიშვნელოვან ასპექტებს შეიცავს და გმირის თვითდამკვიდრების ან მისი კათარზისის მაჩვენებელია (პოეტური ფუნქცია).

მიუხედავად იმისა, რომ ლიტერატურული სიზმარი რეალური არ არის, ის მაინც რთული ანალიზის ობიექტია, რადგან თუკი ფსიქოლოგია სიზმრის სახეების სწორ ინტერპრეტაციას ისახავს მიზნად, ლიტარატურისთვის მნიშვნელოვანია თუ როგორ და რატომ იქმნება ეს სახეები და რა როლს თამაშობენ ისინი მთელ მხატვრულ ტექსტში. აქედან გამომდინარე, სხვადასხვა ეპოქასა თუ ჟანრში, თუ უბრალოდ სხვადასხვა ავტორთან, სიზმარს განსხვავებული ფუნქცია აქვს. თუ რა როლს ითამაშებს ნაწარმოების სტრუქტურაში სიზმარი, ცალკეული ავტორების გადასაწყვეტია. ოთარ ჭილაძის პროზაში სიზმარს მნიშვნელოვანი ადგილი უჭირავს, რადგან სიზმარში, თუკი მას ტექსტში ვხვდებით, ნაწარმოების ყველაზე მნიშვნელოვანი საკითხებია აქცენტირებული და ხშირად კვანძის გახსნაც სიზმრის მეშვეობით ხდება.

2. მთხოვობელის, აველუმისა და სონიას საერთო სიზმარი რომანიდან

“აველუმი”

რომანი “აველუმი” ოთარ ჭილაძემ 1995 წელს გამოაქვეყნა და ის ახალგაზრდა მწერალზე მოგვითხოვთ, რომელიც ცხოვრებაში საკუთარ დანიშნულების გააზრებას ცდილობს. რომანის სიუჟეტი აველუმის ცხოვრების, მისი ურთიერთობების ისტორიაა სამ ქალთან – მელანიასთან, რომლიც აველუმის მეუღლე და მუდმივი სიყვარულია, ფრანსუაზასთან, ფრანგ საყვარელთან, რომელიც გამუდმებით რისკზე მიდის, რათა აველუმთან შეხვედრა მოახერხოს (საბოლოოდ ორსული ფრანსუაზა საფრანგეთში ბრუნდება) და სონიასთან, მის ბოლო საყვარელთან, რომელიც აველუმს მოულოდნელად მიატოვებს და სხვას გაყვება ცოლად. საინტერესო განვითარება აქვს აველუმის ოჯახურ ცხოვრებას და

დამოკიდებულებას ქალიშვილთან, რომელიც ნაწარმოების მეორე ნაწილში წინაპლანზე გადმოდის.

ამ რთული და დაძაბული ურთიერთობების ფონზე, როდესაც აველუმი გამუდმებით იტანჯება, რადგან ცხოვრებაში საკუთარი ადგილი ვერ უპოვია და ამასთან ყველა ქალი, იქნება ეს სახლში დარჩენილი მელანია, საფრანგეთში გადახვეწილი ფრანსუაზა თუ დაუმორჩილებელი სონია, საოცარი გრძნობით უყვარს, ნაწარმოების ერთ მონკვეთში მთხოვბელი ნახულობს სიზმარს, რომელიც აველუმისა და სონიას ურთიერთობას ეხმიანება. აღსანიშნავია, რომ სიზმარს ნახულობს არა კონკრეტული პერსონაჟი კონკრეტულ მომენტში, არამედ მთხოვბელი, რომელიც, ცხადია, ავტორის პირით საუბრობს. ამ შემთხვევაში მთხოვბელი, ალბათ, რეალურ ავტორთან უნდა გავაიგივოთ და არა ლიტერატურულ პერსონაჟთან, რადგან, მისივე თქმით, ეს სიზმარი საერთოა მისთვის, აველუმისა და სონიასთვის: “უაღრესად ნათელი სიზმარი იყო და მეც, შეძლებისდაგვარად, შეგეცდები ისევე ცხადად გადმოვცე, როგორც ვნახე, ანუ როგორც აველუმმა ნახა, რადგან სინამდვილეში, მე კი არ ვნახე რაც ვნახე, არამედ – აველუმმა (შეიძლება სონიამაც). ანდა აველუმის სიზმარი ვნახე მე, მაგრამ ეს სრულებით არ ნიშნავს იმას, რომ სიზმარში მე მე ვიყავი. სიზმარი, რა თქმა უნდა, მე ვნახე, მაგრამ იმავე სიზმარში მე მე კი არ ვიყავი, უბრალოდ, ვანსახიერებდი ყველას, გარდა საკუთარი თავისა – აველუმსაც, სონიასაც და, თქვენ წარმოიდგინეთ, დანიასაც” (დანია სონიას ძალია - თ.გ.) (ჭილაძე 2007: 59).

აქვე აუცილებელია წარმოჩნდეს აველუმისა და სონიას რეალური ცხოვრებისეული კონტექსტიც – მათ მრავალწლიან ურთიერთობაში ბევრი იყო სიხარულიც და ტანჯვაც, განშორებაც და ლტოლვაც, მაგრამ ისინი ისევ და ისევ უბრუნდებოდნენ ერთმანეთს, სანამ სონიამ საბოლოო გადაწყვეტილება არ მიიღო და არ გათხოვდა. მან მოულოდნელად დაურეკა აველუმს და თავისი გადაწყვეტილების შესახებ აცნობა, რამაც აველუმი გააოცა და გაანადგურა.

სიზმრის სიუჟეტი კი შემდეგია: ერთ მშვენიერ დღეს სონიას საკუთარ საწოლში გამოედვიმა, დანიამაც სახეზე ენა აუსვა და სონიამ ის იყო გამოფხიზლება დააპირა, რომ უეცრად ვიდაცის დაუინებული მზერა იგრძნო, თუმცა ოთახში არათუ არავინ იყო, არაფერი ადარ იყო, ყველა ნივთი სადღაც

გამქრალიყო. სონიამ აველუმის სურათის ძებნა დაიწყო და იპოვა კიდეც, მაგრამ სურათი ორივე მხრიდან თეთრი აღმოჩნდა და მასზე გამოსახულება აღარ ჩანდა. მაშინ სონიამ “იმას” დაურეკა – “მოხარშული ვირის ყური მაცივარში დევს, მე კი თბილისში მივფრინავ, რადგან ორს რომ ერთი გამოვაკლოთ ერთი კი დარჩება, მაგრამ ის ერთი მე ვარ თუ ის (“ის” – ე.ი. აველუმი) ძნელი დასადგენიაო” (ჭილაძე 2007: 61). შემდეგ აველუმს ტელეფონზე ეძახიან და ისიც აეროპორტში გარბის სონიას დასახვედრად. თუმცა თავადაც არ იცი, დახვდება თუ არა საერთოდ ვინმე, ამიტომ ტაქსის მდგოლთან აღიარებს, გიჟი ვარო. აველუმი თან მანქანაში ზის და თან სონიასთან ერთად კარუსელზე ტრიალებს, თუმცა ბოლოს, როცა ტაქსიდან გადმოდის, უკაცურ გზაზე აღმოჩნდება, სადაც უკვე აველუმი კი არა, პატარა უპატრონო დანიაა, რომელიც მარტობისგან ყმუის.

ამ სიზმარს ვერც პერსპექტიულს ვუწოდებთ და ვერც – რეაქტიულს, რადგან არც “წინასწარმეტყველურ” მინიშნებებს შეიცავს და არც უკვე მომხდარის რეპროდუქციას ახდენს. ამის განსაზღვრა შეუძლებელიცაა, რადგან არ ვიცით როდის ნახა მთხრობელმა, აველუმმა თუ სონიამ სიზმარი – აველუმისა და სონიას განშორებამდე თუ სონიას გათხოვების შემდეგ. თუმცა რაკი ავტორი ამგვარ ქრონოლოგიაზე ყურადღებას არ ამახვილებს, ჩანს, სიზმრის გარკვეულ დროით მონაკვეთში მოთავსება მნიშვნელოვანიც არ არის.

აშკარაა, რომ სიზმარი პირადულ დონეზე უნდა განვიხილოთ და პერსონაჟების პირადი კონფლიქტური სიტუაციებიდან ამოვიდეთ, რადგან პულტურული და არქეტიპული ნიშნები მასში ცოტაა. თუმცა გვხვდება მითოლოგიური, ზღაპრული ელემენტიც – ადამიანის ცხოველად, ძაღლად გარდასახვა. იუნგის აზრით, ასეთ დროს არაცნობიერს სურს, მისი შინაარსი ცნობიერი გახდეს, რაც ინდივიდუალიზაციის პროცესის წარმატებით წარმართვას შეუწყობს ხელს (იმედაძე 2004: 46). ამ შემთხვევაში საინტერესოა, რისი გაცხადება სურს სონიასა და აველუმის არაცნობიერს, რა არის ახალი ინფორმაცია მათი ცნობიერისთვის (ვსაუბრობ მრავლობით რიცხვში, რადგან სიზმარი ორივესთვის საერთოა). საქმე ისაა, რომ სონია საკუთარი ნებით ამბობს უარს აველუმთან ურთიერთობაზე და ცოლად მიჰყვება, მისი აზრით, “უკეთეს” მამაკაცს, რომელთანაც მშვიდი ოჯახური ცხოვრება და უზრუნველყოფილი მომავალი ექნება: “სონიამაც მისთვის უკეთესი აირჩია ორ “ბედაურს” შორის და თუნდაც,

მხოლოდ და მხოლოდ პრაქტიკული თვალსაზრისით – აირჩია ის, ვისაც უფრო გამოიყენებდა, ვინც უფრო გამოადგებოდა, არა მარტო უფრო ახალგაზრდა, არამედ უფრო თვინიერიც, უფრო იოლად სატარებელი შენს ჭკუაზე. ბოლოს და ბოლოს აირჩია ის, რომელიც უფრო ახლოს ეყოლებოდა, ყოველთვის საძებარი არ გაუხდებოდა და ადარც კავკასიონის გადაფრენ-გადმოფრენა დასჭირდებოდა ერთი კოცნის გულისთვის” (ჭილაძე 2007: 54). მაგრამ სონია მაინც ვერ ახერხებს აველუმისგან “გათავისუფლებას” და მაინც აველუმზე დამოკიდებული. ამიტომაც ეძებს და ვერ პოულობს აველუმს სიზმარში. საქმე ისაა, რომ ვერც განშორებამდე პოულობდა და ამიტომ მასთან ურთიერთობისას სიხარულზე მეტად ტკივილს გრძნობდა. ამას მოწმობს სიზმარში სონიას ოთახიდან გამქრალი ნივთების ნუსხა, რომელსაც თავისი განმარტებები მოჰყვება: “ასკილის ეკლიანი ტოტიც (შურიანი მოწმე), კახურ-იმერული კერამიკაც (ცარიელი სიტყვები), უნიკალური ავტოგრაფებით შემკობილი წიგნებიც (ბრიფვის აღსარება), ხევსურული პაჭიჭებიც (მორიგი “საქორწილო” მარშრუტი), კვებერას მწვანე კრამიტის ნამტვრევიც (უმაქნისი წარსული)... ყველაფერი, რაც თავს გადახდენიათ, უგრძვნიათ, განუცდიათ” (ჭილაძე 2007: 61). სონია, მიუხედავად ყველაფრისა, ისევ აველუმისკენ ისწრაფვის, ამიტომ მნიშვნელობა არ აქვს ფოტოზე იქნება თუ არა აველუმის გამოსახულება, სონიას ყოველთვის თბილისისკენ ექნება გეზი. ხოლო ფორმულა “ორს გამოკლებული ერთი, ერთია”, ორივესთვის მისაღებია, სონიაც ერთია, ცალკეა და აველუმიც, მათი ჯამი კი ორი არ არის, რადგან მათი კავშირი დარღვეულია.

რაც შეეხება აველუმს, ამ სიზმრით მისთვის კიდევ ერთხელ ხდება ცხადი, რომ ის მარტოსულია. პერსონაჟი მარტო გრძნობს თავს ისევე, როგორც მელანიასთან, ფრანსუაზასთან და ახლაც, სონიათან განშორების შემდეგ. მისი ფიზიკური თუ სულიერი მდგრმარეობაც ამ ყველაფრის ადეკვატურია: “ყელი ჩახერგილი მქონდა სიბრაზისგან, სინანულისგან, სევდისგან, სირცხვილისგან, სიყვარულისგან, სიძულვილისგან, სიკეთისგან, სიბოროტისგან, რაღა თქმა უნდა, სიმარტოვისგან” (ჭილაძე 2007: 63). და რაკი ის ჯერ კიდევ სონიასთან ურთიერთობის შთაბეჭდილების ქვეშა, სიზმრის დასასრულს გადაიქცევა სონიას ძაღლად, დანიად. ძაღლი, ზოგადად, ერთგულებისა და ნდობის სიმბოლოა, თუმცა ეს აველუმსა და სონიაზე არ ითქმის. აქ მნიშვნელოვანია ის, რომ უკაცრიელ

გზაზე დარჩენილი აველუმი-ძაღლი ყმუილს, ტირილს იწყებს. შეიძლება ის აველუმისა და სონიას დასრულებულ ურთიერთობასაც გლოვობს, მაგრამ უფრო სარწმუნოა აზრი, რომ საკუთარ სიმარტოვეს, მიუსაფრობასა და უიმედობას დასტირის.

შესაძლოა, სონიას სწორედ იმის გახსენება არ სურს, რომ ისევ აველუმზეა მიჯაჭვული, ხოლო აველუმს იმაზე ფიქრი, რომ, მიუხედავად იმისა, ეყოლება თუ არა სონია, მაინც მარტოსულია. ამ შემთხვევაში სონიასთან განშორება კიდევ ერთი ეტაპია მისი მარტოობისა. და სწორედ ამას ახსენებს მათ სიზმარი, არაცნობიერი ცდილობს ცნობიერამდე მიიტანოს ეს ინფორმაცია, რათა ორივემ შეძლოს საკუთარი მდგომარეობის გააზრება და ავად თუ კარგად გადასვლა ცხოვრების ახალ ეტაპზე. თუმცა უნდა აღინიშნოს, რომ არაცნობიერის გზავნილი არ არის რადიკალურად საწინააღმდეგო ცნობიერში არსებული აზრებისა, შინაგანად ორივე გმირმა იცის სიმართლე და ამიტომ სიზმრის ფუნქციაც როგორც პერსონაჟებისთვის (ასევე მკითხველისთვის) ამ ყველაფრის შეხსენებაა.

ამ შემთხვევაში ავტორი–მთხოვნელი ნახულობს სიზმარს, რომელიც საერთოა მისთვის, აველუმისა და სონიასთვის, ამიტომ ის, რაც სიზმრის მეშვეობით უნდა გაიგოს და იცოდეს სიზმრის მნახველმა, ანუ პერსონაჟმა, უნდა გაიგოს მთხოვნელმაც. რეალური ავტორი, თითქოს, განყენებულად წარმოგვიდგენს ამ “საერთო” სიზმარს და მისი მეშვეობით იჭრება ტექსტში, ამიტომ, შეიძლება ითქვას, რომ აქ ავტორი არა შუალედურ, არამედ პირდაპირ კავშირს ამყარებს მკითხველთან, რადგან სწორედ მკითხველმა უნდა ამოიცნოს სიზმრის ფარული შინაარსი და განსაზღვროს მისი მნიშვნელობა ტექსტის განვითარებისას. ეს სიზმარი არ არის მხოლოდ აველუმის ან სონიასკენ მიმართული და არ წარმოადგენს მარტო მათი არაცნობიერის გზავნილს, არამედ ეს არის ავტორის გზავნილიც (ამის თქმის უფლების მთხოვნელი გვაძლევს), რომელიც მკითხველს მიემართება, რათა მან აველუმისა და სონიას ურთიერთობის განვითარება და დეტალები შეაფასოს. ამგვარი “საერთო” სიზმრის არსებობა, რაც ლიტერატურულ ნაწარმოებში იშვიათი მოვლენაა, მნიშვნელოვანია ტექსტის რეცეფციისას, რადგან ის, ყოველგვარი განუსაზღვრელი ადგილის გარეშე, როგორც ავტორი–მთხოვნელის გზავნილი, რეციპიენტისთვისაა გათვლილი.

ნაწარმოებისთვის სიზმარს კონკრეტული ფუნქცია აქვს – ის არ შეიცავს სასიცოცხლო მნიშვნელობის ინფორმაციას, რომელიც გმირებს ან მკითხველს რაიმეს ახლებურად დანახვას შეუწყობს ხელს, მაგრამ შეიძლება ითქვს, რომ ეს სიზმარი პერსონაჟებსა და მკითხველს აველუმისა და სონიას ურთიერთობის დეტალებს ახსენებს, ხსნის მათი დამოკიდებულებისა და ურთიერთობის განვითერების მიზეზებს და კიდევ ერთხელ უსვამს ხაზს ნაწარმოების მთავარ საკითხს – აველუმის მარტობასა და მიუსაფრობას.

3. ელიზბარის სიზმარი რომანიდან “გოდორი”

რომანში “გოდორი” წარმოდგენილია საინტერესო და საყურადღებო სიზმარი, რომელსაც ნაწარმოების ერთ-ერთი მთავარი პერსონაჟი, ელიზბარი ნახულობს. ამ სიზმარში ელიზბარის ცხოვრების არაერთი მოვლენაა გაანალიზებული და რაკი ის რომანის ერთ-ერთი საკვანძო ფიგურაა, მისი შინაგანი სამყაროს წარმოჩენა მნიშვნელოვანია მთელი ნაწარმოებისთვის. გარდა ამისა, სიზმარში ჩანს ყველა მთავარი გმირის ერთმანეთისადმი დამოკიდებულება და ის ამ რთული ოჯახური ურთიერთობების ერთგვარი შეჯამებაა.

სიზმრის გაანალიზებისას უპირველეს ყოვლისა მნიშვნელოვანია, ვიცოდეთ ელიზბარის ცხოვრების ისტორია. იმ დროს, როცა პერსონაჟი მოცემულ სიზმარს ნახულობს, ის რთულ ემოციურ სიტუაციაშია. ელიზბარმა ეს-ეს არის გაიგო, რომ მის ქალიშვილს სექსუალური ურთიერთობა აქვს მამამთილთან, რაუდენთან, რომელსაც რომანში ელიზბარი თავიდანვე უპირისპირდება თავისი მრწამსით, მსოფლედგელობითა თუ უბრალოდ ადამიანური ბუნებით. მან ერთადერთმა იცის როგორია სინამდვილეში რაუდენ ქაშელი, იცის, რომ წინაპრების ცოდვასა და სისხლში გაზრდილი რაუდენი თავადაც ამ ცოდვას ატარებს და თავისი ცხოვრებით, ძალაუფლების სიყვარულით, გადაჭარბებული თავისუფლებითა თუ ადამიანებისადმი დამოკიდებულებით, “დირსეულად” აგრძელებს წინაპრების გზას. ამიტომ ელიზბარს თავიდანვე არ მოსწონს რაუდენისა და მისი ქალიშვილის, ლიზიკოს “დამეგობრება”, ჯერ კიდევ იმ დროიდან, როცა ლიზიკო პატარა გოგონა

იყო და რაჟდენი მას თოჯინებს ჩუქნიდა. ხოლო მოზარდობაში მომავალ ქმარზე, ანტონზე სალაპარაკოდ ხვდებოდა. თუმცა ელიზბარს საკუთარი სადარდებელი და საფიქრალი პქონდა და შვილისთვის რჩევის მისაცემად არ ეცალა, ის მეტისმეტად დრმად იყო ჩაფლული თავის შემოქმედებით საქმიანობაში. ამ ყველაფერმა კი ლიზიკოს შინაგანი პროტესტი და ოჯახისადმი გაუცხოება გამოიწვია. განსაკუთრებით მას შემდეგ, რაც მამამ დედინაცვალი მოუყვანა (მიუხედავად იმისა, რომ ელისოს საკუთარი შვილისვით უყვარს ლიზიკო).

ელიზბარმა საქმაოდ გვიან გააანალიზა, რომ ის იყო დამნაშავე შვილის გაუცხოებში, იმაში, რომ ლიზიკო რაჟდენს მიუკედლა და, შეიძლება ითქვას, რაჟდენისავე ჩანაფიქრი განახორციელა, როცა ცოლად მის შვილს, ანტონს გაჰყვა. ანტონსა და ლიზოკოს თითქოს, უყვართ ერთმანეთი, მაგრამ ცხადია, რომ ეს სიყვარულიც რაჟდენის მიერაა ნაკარნახევი, რადგან რაჟდენს ყველაფრის განკარგვა შეუძლია. მისი გადაწყვეტილებით კი ლიზიკო ჯერ უნდა დაიმეგობროს, შემდეგ შემოიჩიოს, ანტონს დაუკავშიროს და საბოლოოდ თავისად დაიგულოს.

მიუხედავად იმისა, რომ ანტონი მოძულე მტრის, რაჟდენის შვილია, ელიზბარს მასთან განსაკუთრებულად თბილი ურთიერთობა აქვს, რადგან იცის, რამდენად არ პგავს ანტონი მამას და უფრო საკუთარ თავს აგონებს – კეთილშობილი, შემოქმედებითი, ინტელიგენტი, მაგრამ სუსტი, უძლური და გაუბედავი. ნაწილობრივ ანტონისადმი დამოკიდებულების გამოც არ აპროტესტებს მისი შვილის კაშელების ოჯახში შესვლას, მაგრამ ისიც იცის, რომ ლიზიკო “ნადირთა ბუნაგში” პყოფს თავს. ელიზბარს ურჩევნია პრობლემებს გაექცეს, ამიტომ არაფერში ერევა, თითქოს, არც აინტერესებს შვილის მომავალი. მაგრამ მაშინ, როცა კაშელების ოჯახში არსებული სიტუაციის შესახებ გაიგებს, მიხვდება, რომ მისმა უმოქმედობამ ნაყოფი გამოდო, ლიზიკოზეც იმოქმედა და მოსვენებას კარგავს. ელიზბარი ლიზიკოს უბედურებაში საკუთარ თავს ადანაშაულებს, რაც მის სიზმარშიც კარგად გამოჩნდება.

მიუხედავად იმისა, რომ სიზმარს ელიზბარი ნახულობს და მოვლენებიც მისი პოზიციიდანაა დანახული, სიზმრის სიუჟეტში ყველა მთავარი პერსონაჟი მონაწილეობს და აქცენტირდება თითოეული მათგანის შინაგანი ბუნება და მდგომარეობა. მართალია ელიზბარის მიერ აღქმული, მაგრამ სწორედ ელიზბარის

მსოფლიმედველობა ყველაზე ახლოს დგას რეალური ავტორის თვალთახედვასთან. ამიტომ, შეიძლება ითქვას, ეს სიზმარი ავტორის მიერ ამ ჩახლართული ოჯახური ურთიერთობების შეფასების ერთგვარი მცდელობაა.

სიზმარი, პირობითად შეიძლება, ორ ნაწილად დავყოთ – პირველი ეს არის ელიზბარისა და მისი ოჯახის წევრების თითქოს ყოფითი, მაგრამ ამავდროულად არარეალური საუბრები წარმოსახულ ემიგრაციაში ყოფნის დროს, ხოლო მეორე ნაწილი ელიზბარის ტურნირზე გასვლა და ხართან – რაუდენთან შერკინებაა.

სიზმარის შინაარსი შემდეგია: ელიზბარი, ელისო და ლიზიკო ემიგრაციაში მიემგზავრებიან თვითმფრინავით, სადაც მხოლოდ ისინი სხედან და მხოლოდ მათი ბარგი აწყვია. სამივე კმაყოფილი და ბედნიერია, ტკბილად საუბრობენ და აკვირდებიან ღრუბლებს, სადაც ელიზბარის გარდაცვლილი თანამოკლამები დგანან. მოულოდნელად თვითმფრინავის ილუმინატორთან რაჟდენ კაშელიც გამოჩნდება, რომელიც პაერში შარვალჩახდილი ტივტივებს, მაგრამ გამცილებელი მას “ტურისტების გასართობ მირაჟს უწოდებს”. ლიზიკო, ელისო და ელიზბარი კამათს იწყებენ, ლიზიკო მამას ადანაშაულებს, ეუბნება, ბრმა ოიდიპოსივით უმწეო ხარო, ელიზბარი ბრაზობს, ელისო და ლიზიკო კინკლაობენ. გაცხარებული ელისო ელიზბარს აიძულებს კუპრში ჩაყოს ხელები, რის შემდეგაც ელიზბარს ხელებზე ხორცი გასძვრება და მხოლოდ ძვლები დარჩება. ლიზიკოს და ელისოს გაცხოველებული კამათის ფონზე ელიზბარი ტურნირისთვის ემზადება. აქვე შემოდის დიდყურა გრიგოლა, რომელიც მას ტურნირის დაწყებას ამცნობს.

ელიზბარი დაღმართზე აღმოჩნდება, შემდეგ კი ხალხში გამოსასვლელად ემზადება და წარსდგება კიდეც მათ წინაშე გრძელი სიტყვით, ძირითადად, ანტონის შესახებ, რომელიც, მისი აზრით, მამას ვერ მოერევა, რადგან წესიერი და პატიოსანი ადამიანია. ელიზბარი ემზადება ტახთან შესარკინებლად და მალე ტახსაც, ანუ რაჟდენს გამოუშვებენ. გაცეცხლებული ცხოველი, რომელიც რამდენჯერმე დაჭრის ელიზბარს, საზარელი სანახავია. დაჭრილი ელიზბარი რატომაღაც ტკივილასაც განიცდის და სიამოგნებასაც. ელისო ელიზბარს ურჩევს, ბალახი მოისვი და ჭრილობა გამრთელდებაო, ასეც ხდება, ლიზიკო კი ტახს აძლევს რჩევას, "მაღლა კი ნუ სცემ სპილოსა, დაბლა შემოჰკარ რბილოსაო". ელიზბარმა იცის ამ სიტყვების მნიშვნელობა და ელის კიდეც მათ, მაგრამ მაინც

ყურადღებას მოადუნებს და გამწარებული ტახი რქებს შეარჭობს. ელიზბარი უძრავად წევს და სიამოვნებს ტკივილის განცდა, თან პატივით მოტივტივე ანტონსაც ხედავს, რომელსაც ლიზიკო უყვირის, ჩამოდი, სირცხვილია ცაში ახვიდე და იქაც დაგაბანო. საბოლოო შეტაკების დროს, ლიზიკოს გამამხნევებული შეძახილების ფონზე (მიუხედავად იმისა, რომ ელიზბარი დარწმუნებულია, კაცის მოკვლა არ შემიძლია), ელიზბარი ტახს შუბს გაუყრის და ახერხებს მის დამარცხებას. ბედნიერი და გათავისუფლებული ლიზიკო მამას ეხვევა და კოცნის. სიზმარი ლიზიკოს სიტყვებით სრულდება: "არც მამაჩემია რომაელი გლადიატორი და არც ეგ იყო ბავარიის ჭალებში გაზრდილი ტახი, ორივენი ბედკრული საქართველოს შვილები არიანო". ამ დროს ელიზბარს ელისო გააღვიძებს და შეატყობინებს, რომ ლიზიკომ ვენები გადაიჭრა.

სიზმარი საკმაოდ რთული და მრავალპლანიანია როგორც პირადი, ასევე არქეტიპული სახე-ხატების გამო. ისმის რამდენიმე კითხვა – რისი თქმა სურს ელიზბარის არაცნობიერს მისი ცნობიერისთვის, ანუ რა უნდა გაიგოს ან გაიხსენოს სიზმრის მნახველმა? რისი თქმა სურს ავტორს ამ ვრცელი სიზმრით? და რა როლს ასრულებს ეს სიზმარი ნაწარმოებში?

იუნგის აზრით, სიზმარს ისეთივე სტრუქტურა აქვს, როგორც დრამას და ეს კარგად ჩანს ელიზბარის სიზმარშიც, სადაც პირველი ნაწილი, ფაქტობრივად, ექსპოზიციას წარმოადგენს. მოქმედების დრო და ადგილი ამ შემთხვევაში უცხო ქვეყანა და ემიგრაციაში გამგზავრებისა და ყოფნის პერიოდია. კვანძი იკვრება იქ, სადაც დიდყურა გრიგოლა ელიზბარს ტურნირის შესახებ ახსენებს. კამთში კი სიტუაცია იძაბება და იკვეთება მთავარი პრობლემები – ელიზბარის უმოქმედობა და უმწეობა, ლიზიკოსა და ელისოს კონფლიქტი, ლიზიკოს გაუცხოება. ტურნირს კი უპვე კულმინაციისკენ მივყავართ. დაძაბული ორთაბრძოლის ბოლო ეტაპი სწორედ კულმინაციაა. ვინ გაიმარჯვებს? შეძლებს თუ არა ელიზბარი ტახის მოკვლას? კვანძი იქ იხსენება, სადაც ტახი კვდება, ლიზიკო კი გათავისუფლებული და ბედნიერია.

სიზმარში გამოკვეთილი პირადული და არქეტიპული სახე-ხატები, რომლებიც, ცხადია, მინიშნებებს წარმოადგენს, სიზმრის მნიშვნელობის სწორი ინტერპრეტაციასა და ელიზბარის ცხოვრებისეული სიტუაციის უკეთ

განსაზღვრაში გვეხმარება. ელიზბარის, ელისოსა და ლიზიკოს დიალოგებში ის ძირითადი პრობლემებია დასმული, რომელიც ელიზბარს აწუხებს და რომელიც, სიზმრის ნახვის პერიოდში, თითქმის გაანალიზებული აქვს. მაგალითად ის ფაქტი, რომ თავადაა დამნაშავე შვილის უბედურებაში, რადგან თავიდანავე ვერ შეძლო ლიზიკოსთვის საჭირო რჩევების მიცემა და მისი ცხოვრების სწორად წარმართვა.

ამიტომ სიზმარში ლიზიკო გამუდმებით ადანაშაულებს მამას, მას ხან თიდიპოსს ადარებს, ხან უმწეოსა და მშიშარას უწოდებს, ხანაც თავის მოკვლით იმუქრება. როგორც ზემოთ აღვნიშნე, ეს ფაქტი ელიზბარს ნაწილობრივ გაანალიზებული აქვს, მაგრამ სიზმარის მეშვეობით არაცნობიერი ისევ და ისევ ამ პრობლემის წინაშე აყენებს და უბრუნებს ცნობიერს უარყოფილ და იგნორირებულ ფიქრებს. ელიზბარი წლების განმავლობაში თავის ოთახში გამოკეტილი ცდილობდა, გაქცეოდა ყოველივე ამის გააზრებას. სიზმარში გამოიკვეთა რომანის მთავარი საყრდენი, რომელსაც შემდგომ ეფუძნება სიზმრისა და ელიზბარის რეალური ცხოვრების განვითარებაც – ყველაფერის მიზეზი ელიზბარის უმოქმედობა და ლიზიკოს გაუცხოებაა, რის შედეგადაც ის რაუდენ კაშელს დაუახლოვდა. რაც შეეხება ლიზიკოსა და ელისოს კონფლიქტს, ეს რელობის ანარეკლია, რადგან ყველაფერი ზუსტად ისევე მეორდება, როგორც სინამდვილეში ხდება. და ელიზბარიც, როგორც ყოველთვის, თავს არიდებს კონფლიქტში ჩართვას.

სიზმარში ემიგრაციაში წასვლის ფაქტი რეალურ ცხოვრებაში ელიზბარის ყველასგან გარიდების, გაქცევისა და დამალვის სურვილია, თუმცა აქაც ის ვერ ახერხებს თავის ოჯახის წევრებთან ერთად გადახვეწას და ისევ უწევს ნაცნობებთან შეხვერდა, რადგან ამ შემთხვევაში გარიდება არ არის გამოსავალი და სიზმარი ამის დაფიქსირებასაც ცდილობს. თვითმფრინავში მსხდომები ჯერ დრუბლებზე მდგომ მწერლებს ხედავენ, რაც ელიზბარის საქმიანობის სიმბოლური სახეა, შემდეგ შარვალჩახდილ რაუდენ კაშელს, რაც პირდაპირი მინიშნებაა მისი და ლიზიკოს ურთიერთობაზე, შემდეგ კი დიდყურა გრიგოლაც შემოდის და ტურნირზე იწყებს საუბარს. ტურნირი – ეს არის გარდაუვალი შერკინება რაუდენ კაშელთან, რეალურ და სიმბოლურ მტერთან, რომელსაც ელიზბარი მოელი ცხოვრება გაურბის, მაგრამ სიზმარში მას ამის საშუალება არ აქვს. არაცნობიერი აიძულებს, გაიაროს ეს რთული და მტკიცნეული გზა, რადგან სხვაგვარად

შეუძლებელია მისი ინდივიდუალიზაციის პროცესის სწორად წარმართვა. იმისთვის, რომ ელიზბარმა მამად, ქმრად, მწერლად თუ უბრალოდ ადამიანად იგრძნოს თავსი, მას სჭირდება ამ ეტაპის გავლა – შერკინება რაჟდენთან, რამაც შემდგომ რეალურ ცხოვრებაში უნდა შეისხას ხორცი. მართალია სიზმარი დარჩება ერთადერთ ფორმად, რითიც ის რაჟდენს დაუპირისპირდება (საბოლოოდ რომანში ყველა პერსონაჟი უპირისპირდება რაჟდენს, რაც სიმბოლურად ბოროტების წინააღმდეგ ბრძოლის გამოხატულებაა), მაგრამ ელიზბარისთვის ეს უკვე წარმატებაა და როგორც პიროვნება ის სიზმარში მაინც ახერხებს თვითრეალიზაციას. შეიძლება ითქვას, რომ აღნიშნული სიზმარი ელიზბარს ერთდროულად მტკიცნეული საკითხების წინაშეც აყენებს, ცხოვრებისუულ ემოციურ ფაქტებსაც ახსენებს და აუხდენელი სურვილის კომპენსირებასაც ახდენს.

განსაკუთრებით საინტერესოა სიზმრის მეორე ნაწილი, ანუ ტურნირი, სადაც ლიზიკოს შეძახილებისა და კომენტარების ფონზე, წარმოდგენილია ელიზბარისა და რაჟდენის შერკინება. სწორედ აქ შემოდის სიზმარში არქეტიპული სახეები, რადგან შერკინება, ბრძოლა, ასპარეზზე გასვლა, უკვე ზოგადსაკაცობრიო მოტივია – გმირმა, ამ შემთხვევაში ელიზბარმა, უნდა დაამარცხოს ბოროტი ტახი – რაჟდენ კაშელი. აქვე მინიშნებაა ქართულ ხალხურ ზღაპარზე: “შინ ვერაფერი დამაკელი, ვერც შენი ჯადოსნური საგარცხლით, ვერც შენი ჯადოსნური სარკით, ვერც შენი სალი ქვით, და ახლა ამათი ხელით მისწორდები არა, შე სუკის აგენტო — ღვარძლიანად შეუდრინა (ხარმა) ელიზბარს” (ჭილაძე 2006: 163). ჯადოსნური საგარცხელი, სარკე და სალი ქვა წიქარას ზღაპრის ელემენტებია, რისი დახმარებითაც ზღაპრის გმირი ბოროტებას გაურბის. ჩანს, რაჟდენი გრძნობს, რომ ელიზბარი “ტურნირამდეც” უპირისპირდებოდა მას თავისი მრწამსით.

ტახთან ბრძოლის ფაქტი კი უნდა გავიგოთ, როგორც გმირის ბრძოლა ბოროტების წინააღმდეგ. სწორედ ამ როლში სურს ელიზბარს საკუთარი თავის დანახვა. თუმცა ის ერთდროულად გმირიც არის (სხვისი განმათავისუფლებელი) და გლადიატორიც, ანუ მონა (“ავე, ცეზარ, მორუტური ტე სალუტანტ!”) – შესძახებს ელიზბარი გამოსვლის წინ). ელიზბარი არა მხოლოდ ბოროტების დასამარცხებლად და ლიზიკოს გადასარჩენად იბრძვის, არამედ, საკუთარი თავის გასათავისუფლებლადაც. მან აუცილებლად უნდა დააღწიოს თავი რაჟდენის

უარყოფით ზემოქმედებას, მის გარემოცვას, მის ცოდვას, რომელიც უკვე ლიზიკოზეცაა გადმოსული. სწორედ ეს ბრძოლა გადაწყვეტს, შეძლებს თუ არა ელიზბარი რაჟდენის, ანუ ბოროტების აღმოფხვრას. სიზმრიდან ჩანს, რომ ამის გაკეთება სწორედ ელიზბარს ევალება, როგორც რაჟდენის ანტიპოდს და არა ანტონს, ლიზიკომ თუ ფეფემ, რომლებიც რაჟდენის ძალაუფლების მსხვერპლი არიან.

ბრძოლის დროს ხალხი აშკარად ელიზბარის მხარესაა და ეს ლოგიკურიცაა – ხალხი მხარს უჭერს ბოროტების წინააღმდეგ ბრძოლას, მაგრამ ყველაზე მნიშვნელოვანი ელისოსა და ლიზიკოს მხარდაჭერა და მათი შეძახილებია. მაშინ, როდესაც ტახი ელიზბარს პირველად დაჭრის, ელისო ურჩევს ქმარს, ჭრილობაზე ბალახი მოისვას, რაც ასევე ქართული ხალხური ზღაპრის მოტივია (ბერძნულ მითოლოგიაშიც მედეა ბალახებით მკურნალობის ოსტატია). მნიშვნელოვანია, რომ სწორედ ქალი, ცოლი აძლევს ამ რჩევას. მაგრამ მცირე ხნის შემდეგ ლიზიკო ეძახის რაჟდენს: "მაღლა კი ნუ სცემ სპილოსა, დაბლა შემოჰკარ რბილოსაო", რაც პირდაპირი ციტირებაა ყამარის სიტყვებისა "ამირანიანის" ეპოსიდან, სადაც ყამარი ამირანს მამამისთან, დრუბელთ ბატონთან ბრძოლაში ეხმარება. "ელიზბარი მზად იყო საამისოდ. ძველი ქართული ტექსტების მიხედვით, მამასა და საყვარელს შორის, ქალიშვილს აუცილებლად საყვარლის მხარე უნდა დაეჭირა. მაგრამ მაინც გაკვირვებულმა და, ცოტა არ იყოს, გულნატკენმაც გახედა შვილს, სულ ერთი წამით, მაგრამ ტახისთვის ესეც საკმარისი აღმოჩნდა, ყუმბარასავით რომ დასძგერებოდა გულმუცელში და პირალმა გადაექცია ატალახებულ მინდორზე" (ჭილაძე 2006: 164).

ამირანიანში ეს მართლაც ასეა, ყამარი მამას გასწირავს და საყვარელ კაცს ეხმარება ისევე, როგორც არგონავტების მითში მედეა გასწირავს აიეტს და იასონს ოქროს საწმისის გატაცებაში მიეშველება, ამიტომ აქ ინტერტექსტუალურ მიმართებაზე შეიძლება საუბარი. თუმცა ამ შემთხვევაში ეს ფაქტი პირიქითაა წარმოდგენილი, დამცინავი ინტონაციითაა მოთხრობილი, რადგან ლიზიკო არ ცდილობს რაჟდენის დახმარებას, მას სძულს რაჟდენი, თუმცა არც მამას ეხმარება. ის არც მედეასავით შეყვარებული ქალია და არც ყამარივით მამის მიერ კოშგში გამომწყვდებული მზეთუნახავი. ავტორი დასცნის ელიზბარს, რომელიც შეურაცხყოფილია შვილის სიტყვებით, და რაჟდენისა და ლიზიკოს

ურთიერთობასაც, რადგან ეს არ არის სიყვარულითა და დახმარების სურვილით ნათქვამი სიტყვები, პირიქით, ეპოსისა და მითის იდეალის მსხვრევა და ყველაფრის გაუფასურებაა (რაც ჭილაძის არაერთ რომანში შეიმჩნევა), მამა-შვილური, ცოლ-ქმრული თუ ზოგადად ოჯახური ურთიერთობების დამცირება.

მნიშვნელოვანია ის ფაქტი, რომ ელიზბარი ტახის მიერ მიყენებული ჭრილობებისა და ტკივილისგან მხოლოდ სიამოვნებას განიცდის: "დმერთ, დმერთ, რა კარგიათ — ფიქრობდა სანახევროდ გონდაკარგული". ყოველი ახალი ჭრილობა თუ ცხოველის ამაზრზენი შარდის სუნი სიამოვნების შეგრძნებას უფრო აძლიერებს, რისი მიზეზიც, ალბათ, მისი აშკარად გამოხატული მსხვერპლშეწირვის სურვილია. ელიზბარი ამაყია, თავს გმირად გრძნობს იმის გამო, რომ ტახთან შერკინება და ბოროტებას წინააღმდეგ გალაშქრება გაბედა, ამიტომ თავად ამ ფაქტისგან დებულობს სიამოვნებას. სიმბოლურად მას სიამოვნებს არა მიყენებული ტკივილი, არამედ იმ მიზეზის გახსენება, რის გამოც ტკივა – სურვილი, დაიხსნას შვილი რაუდენისგან. ამიტომ სისხლის გუბე, ახეული ყური და ჩანგრეული ნეკნები მისთვის განცხომაა.

საინტერესო სახეა ასევე ჰაერში მოლივლივე ანტონი, რომელიც ფრანია და ბავშვებს თოკით უჭირავთ. ლიზიკო ანტონს მიმართავს: "ჩამოდი ძირს, შე დებილო! ცაში ავფრინდე და, იქაც დამაბან?!?", მაგრამ აქ ანტონი უმოქმედო პერსონაჟია და ის ზემოდან დასცექრის მიმდინარე მოვლენებს. ხოლო ის ფაქტი, რომ ანტონი ჰაერშია, ცაზეა, დაბლა მყოფებს არ ეკონტაქტება და წამით ელიზბარის შურს იწვევს, ერთგვარი მინიშნებაა მის მომავალზე – სიკვდილზე. ანტონი უკვე განრიდებულია ამ ყველაფერს და მიუხედავად იმისა, რომ ჰგონია, საკუთარი მამა მოკლა, ყველაზე ნაკლებადაა დამნაშავე მომხდარში.

სიზმრის დასასრულს ელიზბარი ხალხის, ლიზიკოსა და საკუთარი გამამხნევებელი შეძახილების შედეგად, ახერხებს ტახის მოკვლას, თუმცა წუწუნებს, რომ ადამიანის მოკვლა არ შეუძლია. გახარებული და განთავისუფლებული ლიზიკო მამას ეხვევა და კოცნის, ელიზბარიც ბედნიერია. სხვაგვარად სიზმარი ვერც დასრულდებოდა, რადგან ის ელიზბარის ყველაზე სასურველი ოცნების – რაუდენზე გამარჯვებისა და ლიზიკოს შემორიგების – კომპანიასაციაა. ამგვარი ოცნება კი სიზმარში უნდა ახდეს, რათა მისმა მხილველმა

თავი რეალიზებულად იგრძნოს. ლიზიკოს ფრაზა: "არც მამაჩემია რომაელი გლადიატორი და არც ეგ იყო გარეული, ბავარიის ჭალებში გაზრდილი ტახი, ორივენი ბედკრულ საქართველოს შვილები არიანო" ისევ ინტერტექსტუალური მიმართებაა კარგად ნაცნობ ქართულ ტექსტთან, უიარადოს "მამლუქთან", თუმცა აქაც ამ ტექსტის იდეა გაუფასურებული და დაკნინებულია.

საბოლოოდ შეიძლება ითქვას, რომ სიზმარს რომანში მნიშველოვანი ფუნქცია აკისრია როგორც პერსონაჟისთვის, ასევე მკითხველისთვის. ელიზბარის მივიწყებული და განდევნილი სურვილებიდან კარგად ჩანს ამ გმირის ხასიათი. გმირი ცდილობს, არ იფიქროს წარსულსა და საკუთარ უმოქმედობაზე, მაგრამ თავს დამნაშავედ გრძნობს მომხდარში (იგულისხმება ლიზიკოსა და რაუდენის ურთიერთობა), რადგან შვილს კარგი მამაობა ვერ გაუწია, მისთვის ვერ მოიცალა, თავი მწერლობას შესწირა. სწორედ ამას ახსენებს არაცნობიერი მის ცნობიერს. ეს ელიზბარის მთავარი პრობლემაა. ამავდროულად სიზმარში გმირი განუხორციელებელი სურვილების კომპენსირებასაც ცდილობს – ტურნირზე, სადაც ელიზბარი სახალხო გმირია, ამარცხებს ბოროტ ტახს – რაუდენს და მოიპოვებს ლიზიკოს სიყვარულსა და თავისუფლებას. საქმე ისაა, რომ ელიზბარი ამას ვერ ახერხებს ნაწარმოების რეალურ პლანში, ამიტომ რეალიზებას მხოლოდ სიზმრის მეშვეობით შეძლებს. შესაბამისად, სიზმარი მნიშველოვანი და გარდამტეხი ეტაპია მის ცხოვრებაში.

ავტორმა ამ სიზმრის დახმარებით წარმოაჩინა ყველა მთავარი პერონაჟის ნამდვილი სახე და ერთგვარად შეაჯამა მათი რთული ურთიერთობები - ელიზბარი დამნაშავეა ლიზიკოს უბედურებაში და ის ამას განიცდის; ოჯახს გაუცხოებული ლიზიკო გამუდმებით დედინაცვალს, ელისოს ეკამათება, რომელიც თავის მხრივ, ასევე თვლის, რომ ვერ აღზარდა გერი. რაუდენი ბოროტების სათავეა და საჭიროა მისი განადგურება. ამის გაკეთება ელიზბარმა უნდა აიდოს თავზე, მაგრამ ის საამისოდ სუსტია. ლიზკოს სძულს რაუდენი, რომელსაც, თავის მხრივ, არ აინტერესებს ლიზიკოს მომავალი. ანტონი კი ამ ყველაფერზე მაღლა დგას, რადგან მამისგან განსხვავებით, პატიოსანი ადამიანია, თუმცა ისიც ვერასდროს მოახერხებს რაუდენის დამარცხებას, რადგან ასეთი ფესვგამდგარი ბოროტების მოსპობას მტკიცე გმირი სჭირდება. თუმცა ელიზბარის, ანტონის, ლიზიკოსა თუ

ხალხის რაჭდენთან დაპირისპირება ნიშნავს, რომ პოროტების წინააღმდეგ ბრძოლა დაწყებულია.

შესაბამისად, ელიზბარის სიზმარი ნაწარმოებში არაერთ საკითხს ჰქონის ნათელს და ელიზბარის, სიზმრის მხილველის გარდა, სხვა პერსონაჟების ხასიათების გახსნაშიც გვეხმარება.

2. ნიკოს სიზმარი რომანიდან “მარტის მამალი”

რომანში “მარტის მამალი” მთავარი პერსონაჟი ნიკო, მას შემდეგ, რაც ნაცნობი ყაჩაღის მკვლელობას შეესწრება, საწოლიდან არ დგება და დღეებს თვალდახუჭული ატარებს. ნაწარმოების მოქმედება, რომელიც ნიკოს პერსპექტივიდანაა წარმოდგენილი, ფაქტობრივად, მის გონებაში მიმდინარეობს – ის იხსენებს მისი ცხოვრების სხვადასხვა მოვლენას, ადამიანებს, განცდებს და ასოციაციურად აკავშირებს მათ ერთმანეთთან. ამიტომ, შეიძლება ითქვას, ნიკო სულ ძილ-დვილის მდგომარეობაშია - ის ხან წარსულს უღრმავდება, ხან წარმოსახულ მოვლენებს აცოცხლებს, ხან სხვა ადამიანად გარდაისახება, ხანაც ნახევრად გამოფხიზდებული, მაგრამ თავლდახუჭული ბებიისა და ექიმის დიალოგებს ისმენს. რთულია გაარჩიო, როდის არის ნიკო ფხიზელი და როდის - ძილისაგან თუ საკუთარი წარმოსახვისგან გაბრუებული. პერიოდულად ირკვევა, რომ ზოგიერთი მოვლენა, რომელსაც ნიკო აღწერს (და რომელზეც ფიქრობს) ნაწარმოების რეალობაში საერთოდ არ ყოფილა. მაგალითად, ნიკო დეტალურად აღწერს თუ როგორ აჩუქა ვანო მასწავლებელმა ლიმონის ხე, როგორ განიცდიდა ამ ფაქტს, რადგან ეშინოდა, ვაითუ ქარგად ვერ მოვუარო და როგორ დასტრიალებდა ხეს ბებია, მაგრამ მოგვიანებით ირკვევა, რომ ეს ფაქტი არ მომხდარა. თუმცა რთული გასარკვევია ნიკოს ეს ამბავი დაესიზმრა თუ უბრალოდ წარმოიდგინა. ამიტომ, შეიძლება ითქვას, რომ ნაწარმოების რეალობა მთავარი პერსონაჟის სიზმრებითა და წარმოდგენებითაა გაბუნდოვანებული.

რომანში მხოლოდ ორი სიზმრის გამოყოფა შეიძლება, რომელთაც შეიძლება, საკუთრივ სიზმრები ეწოდოს და არა მხოლოდ გმირის ფანტაზიის ნაყოფი. ერთი

ეს არის, როგორც მას ავტორი უწოდებს, “ცხოვრებისეული სიზმარი” და მისი მინიშნებების ინტერპრეტაციაც მარტივია, რადგან აქ ავტორი მკვლელი გოგიას ფაქტორზე ამახვილებს ყურადღებას. ნიკო ვერ ივიწყებს გოგიას მიერ ჩადენილ მკვლელობას, მაგრამ უფრო მეტად გოგიას მკვლელობისადმი დამოკიდებულება აძრწუნებს, ამიტომ ეს შეგრძნება და მკვლელობის ფაქტი, ავტომატურად გადადის სიზმარში.

სიზმარის შინაარსი შემდეგია: გოგიამ ნავთი მიასხა ვანო მასწავლებლის ხეს (ანუ სიმბოლურად მის ქალიშვილს) და ცეცხლი წაუკიდა (კიდევ ერთი მკვლელობა ჩაიდინა) თავად კი თოვით ხელში ხის გარშემო დარბოდა და გაჰყვიროდა, აი, თუ არ არის შესაძლებელი ქელებში დათრობაო (ესეც ნაწარმოების რეალობის ანალოგია – გოგია არათუ ნანობს, არამედ ამაყობს ჩადენილი საქციელით). მაგრამ ხემ ამოფეთქა და ცას მიაშურა (მოკლული მკვლელზე მაღლა დგას). ნიკოს ამ დროს სიზმარში ვანო მასწავლებლის შვილი ეცხადება და ისიც ამშვიდებს - “კარგად არის შენი მაგიერიო” (ნიკო თავს იმშვიდებს). შემდეგ მას ანგელოზი ეკითხება, პირჯვრის წერა თუ იციო და ნიკოც გულმოდგინედ იწერს პირჯვარს, შემდეგ გამოჩნდება სინათლე და ისმის ზარების რეკა (ნიკო ამას მიცვალებულს უკავშირებს).

მოულოდნელი ამ სიზმარში არაფერია, რადგან ეს არის ნაწარმოებში მომხდარი მნიშვნელოვანი რეალური ფაქტისა და მისგან გამოწვეული განცდის განმეორება. ავტორი ამ რეაქტიული სიზმრის მეშვეობით კიდევ ერთხელ გვახსენებს, რამდენად დიდი შთაბეჭდილება მოახდინა ნიკოზე გოგიას მიერ ყაჩალის დაუნანებლად და უსამართლოდ მოკვლამ. თუმცა ასეთ შემთხვევაში სიზმრები ისეთ სიმბოლურ ნაწილს წამოწევენ წინ, რომელიც ცნობიერს ამ მოვლენის აღქმის დროს გამორჩა, მაგალითად იმას, რომ ნიკოს ყაჩალის სიკვდილი არ დაუკავშირებია სინათლესთან, უფალთან, არ ულოცია მასზე და ზოგადად არ უფიქრია ყაჩალზე ასე ამაღლებულად. შესაძლოა, სიზმარი სწორედ ამის შეხსენებას ცდილობს და ამიტომაც ესიზმრება მას ვანო მასწავლებლის გარდაცვლილი თუ უგზო-უკვლოდ დაკარგული გოგონა – სიწმინდის, სიკეთისა და მარადიული სიცოცხლის სიმბოლო.

ეს სიზმარი კიდევ ერთხელ წარმოაჩენს ნიკოს შინაგან ბუნებას, მის დამოკიდებულებას გარე სამყაროსა და მოხდარი ფაქტებისადმი, მაგრამ მას მთლიანი რომანისთვის არ აქვს ისეთი არსებითი მნიშვნელობა, როგორც ნიკოს

მეორე სიზმარს, რომელიც ერთდროულად სიზმარიც არის და წარმოსახვაც. წარმოსახვა იმიტომ, რომ აქ პერიოდულად ნიკოს ფანტაზია ერთვება და თანაც ნიკო ნახევრად მძინარე და ნახევრად ფხიზელ მდგომარეობაში. სიზმარს კი იმიტომ ვარქმევთ, რომ იმგვარი რთული არქეტიპული სახეები და მინიშნებები, როგორიც აქაა წარმოდგენილი, მხოლოდ არაცნობიერის გზავნილი თუ შეიძლება იყოს და არა თხუთმეტი წლის ბიჭის ფანტაზიის ნაყოფი. ჩანს, ეს არის სიზმარი, რომელიც ნიკოს ხანგრძლივი ფიქრისა და ოცნების შედეგია. დასასრულს, ბებია გულმოდგინედ ცდილობს ნიკოს გამოფხიზდებას.

სიზმრის შინაარსი ასეთია: ვანო მასწავლებლის სიტყვებით გაქეზებული ნიკო – ღირსი ხარ თუ არა სიცოცხლისო? – გადაწყვეტს, სულეთში ჩავიდეს, სულთქმის ციხეში მსაჯულების წინაშე წარსდგეს და საკუთარი თავის შესახებ სიმართლე გაიგოს, არის თუ არა სიცოცხლის ღირსი და უნებლიერ დამსმენელია თუ უნებლიერ მკვლელი. სულეთის გზაზე დამდგარს წრიულად მდგარი მიცვალებულები ხვდებიან, რომლებსაც ობისა და შმორის სუნი ასდით, სიძველის ფერი ადევთ და ეუბნებიან იქით ნუ წახვალ, იქით ქვეყანა აღარ არისო, მაგრამ ნიკო მაინც მიდის.

მეორე წამს კი ვიდაც ჩია, მელოტ კაცთან ერთან გზაზე მიაბიჯებს, რომელიც ბათუმსაც გავს და სიღნაღსაც. კაცი ნიკოზე ბევრად დაბალია და ხელზე პატარა ოქროს გასაღები კიდია. ბილიკის ბოლოს მერხები ჩანს, რომელზეც ნიკოსხელა ბიჭები სხედან. ესენი სახელოვანი კაცების შვილები არიანო, გააცნობს კაცი, მაგრამ ისინი ავადმყოფებივით გამოიყურებიან. ნიკო გადაწყვეტს, რომ ეს ქაჯთა სამოთხეა. აქ არავის არაფერს უშლიან, ყველას შეუძლია, თავისი სურვილისამებრ მოიქცეს, თუმცა არავინ არაფერს აკეთებს. დროდადრო ქაჯი თავის სურვილებსა და მოსაზრებებს ხალხს გრამაფონით აცნობს. ისიც არაფერს ამბობს, უაზროდ ისვრის სიტყვებს, მაგრამ მაინც ყველას უყვარს. მალე ნიკოც ქაჯის გავლენის ქვეშ მოექცევა, რაკი ყველაფერი უსრულდება და არაფერი ადარდებს. თუმცა ერთხელაც მშობლები დაესიზმრება: მამა თვალდახუჭული წევს, დედას ტუჩები დაწყლულებია და ამბობს, აი რა მიყო მამაშენის ჯაჭვის ლოკვამ, შენ კი ბოლო კატლეტიც შეუჭამეო.

შემდეგ ნიკო მოულოდნელად წიწამურის ჭალაში აღმოჩნდება და ილიას მკვლელებს უთვალთვალებს, რომლებიც ოთხნი არიან და მათ შორის ერთ-ერთი გოგიას ბიძაა. მკვლელებმა ისიც არ იციან, რატომ კლავენ “ამ პატიოსან კაცს” და ის თავისებურად მოსწონთ კიდეც. ნიკომ იცის, რაც უნდა მოხდეს, მაგრამ ჩაერევა

ან რაიმეს შეცვლა არ შეუძლია, რადგან ამ დროს დაბადებულიც კი არაა. ნიკო თავიდან ბოლომდე უყურებს ილიასა და მისი მეუღლის მკვლელობას, ამ უგულო ავაზაკების შემხედვარე ბოლმა ახრჩობს, საფარიდან გამოდის და ახლოდან ათვალიერებს სისხლის გუბეში ჩაგდებულ მიცვალებულებს. სურს, სიმართლეს თვალი გაუსწოროს. მკვლელები შეამჩნევენ, მაგრამ ყურადღებას არ მიაქცევენ.

შემდეგ ნიკო სანგარში აღმოჩნდება და ჯარს მიჰყება, თან პაპას ეძებს, მაგრამ პასუხობენ პაპა გაიქცაო (ამ დროს მას ბების ხმაც ჩაეხმის, გამოფხიზდიო, მაგრამ ვერ ფხიზდება).

შემდეგ კი ნიკო აღმოაჩნეს, რომ უკვე სულთქმის ციხეშია: “უდუდაბოდ ამოყვანილ კედლებში ქარი თავისუფლად გადი-გამოდის. წიგის. ზუზუნებს. მოულოდნელად ყვავი დაიჩხავლებს ხოლმე, ჭოტი შეჰქივლებს, ტურა გადაიხარხარებს. სხვა მხრივ, სრული სიჩუმეა. აქ დამეული ხმებიც სიჩუმედ ითვლება. რაც არა ჩანს, არც ხმაურობს. ქვის მაგიდასთან ქვის სავარძლები დგას, მსაჯულებისთვის. ქვის შანდლებში ძლივსლა ფეოქავენ ჩამწვარი სანთლები. კედელში დატანებულ ხვრელთან, რომელიც კარის მაგივრობასაც სწევს ალბათ, მახვილიანი ჩონჩხი დგას, უფრო რაღაცის მისანიშნებლად, ვიდრე ვინმეს შესაშინებლად” (ჭილაძე 1987: 334). როცა იდუმალი ხმა ეკითხება, რა ჩაიდინეო, ნიკომ არ იცის რა უპასუხოს, რა ითვლება დანაშაულად, რადგან, როგორც ჩანს, არც ამერიკული უილეტის მითვისება და არც მამის კატლეტის შეჭმა დანაშაული არაა. მაშ, რა არის დანაშაული? - კითხულობს ნიკო - "არასოდეს არ მიითვისო, რისი მითვისებაც არ შეიძლება - ამბობს ცოტა ხნის დუმილის შემდეგ ხმა. - სხვისი აკვანი, ანდა, სხვისი საფლავი; სხვისი წუხილი, ანდა სხვისი სიხარული; სხვისი სალოცავი, ანდა, სხვისი საგოდებელი" (ჭილაძე 1987: 336).

შემდეგ ნიკო მოულოდნელად ნასაყდრალში აღმოჩნდება, იქ, საიდანაც მისი ერთოვიანი “მოგზაურობა” დაიწყო. ნიკო ცეცხლს აღვივებს და შიგ რეზინის ნაკუჭებს ყრის (როგორც ყაჩაღი). ამ დროს ნასაყდრალში ვიდაც შემოდის დააღმოჩნდება, რომ ისიც ნიკოა. შემოსული ნიკო ცეცხლთან გათბობას ცდილობს და ცეცხლში ხელებს ყოფს, შიგ მყოფი კი ისევ ცეცხლს აღვივებს. არ მითხრა ამირანის შვილი ვარო, ეუბნება შიგ მყოფი ნიკო შემოსულს. რატომაც არაო, პასუხობს შემოსული, მამაჩემი მაჯაჭვულია და დედა ჯაჭვს ულოკავსო. მომისმინე, მამასავით ამბობს შემოსული ნიკო, ახლა ერთ-ერთი ჩვენგანი მოკვდება, უარესი უკეთესის გულისთვის: “ქვეყანას ამით არაფერი დააკლდება, ვერც გაიგებს,

რადგან სინამდვილეში, ჩვენთვის მოკვდება მხოლოდ, ჩვენ მოგვიძვდება, ჩვენს სულ ში, ჩვენს სინდისში მოკვდება და მხოლოდ იმიტომ, სიცოცხლის დირსი რომ გახდეს დარჩენილი, გაიზარდოს, გადონიურდეს, დაკაცდეს, ბოლოს და ბოლოს, გაიგოს ამ ქვეყნის ავანჩავანი” (ჭილაძე 1987: 339). შიგნით მყოფი ნიკო აღიარებს, რომ ეშინია და დედა ენატრება და იქიდან გამორბის. ნასაყდრალში დარჩენილ ნიკოს კი, ანუ ნიკოს ბავშვობას, გოგია კლავს. თუმცა მეორე, “დაბადებული” ნიკო მოფრინავს და სიცოცხლის გაგრძელებას აპირებს.

შემდეგ ნიკო სხვა მგზავრებთან ერთად ავტობუსში ზის, სადაც საოცარი სიმშვიდეა და გრძნობს, რომ ჯერ არ დაბადებულა. ავტობუსი, თითქოს დედის საშოა და ისიც უნდა გამოვიდეს იქიდან, გამოშუშდეს, როგორც ამირანი ფურის ფაშვში და ხელმეორედ დაიბადოს. მაგრამ ამ დროს ავტობუსის წინ მგელი გადაირბენს, რომელიც შარშან რომელიდაც ავტობუსმა გაიტანა. ნიკოს ავტობუსი გაეკიდება ცხოველს, სანამ ხელახლა არ გაიტანს, მძღოლი კი გოგია აღმოჩნდება. აღშფოთებული ნიკო შიშს დაძლევს, გოგიას მკვლელობაში ამხელს და ლანძღვს. შემდეგ კი აღმოაჩენს, რომ ავტობუსში მისი ახლობლები სხედან, ყველანი, ვისაც ნიკო იცნობს. ამ დროს მას ბებია აფხიზლებს.

სიზმარი რამდენიმე ეპიზოდისგან შედგება – სულთქმის ციხისკენ სვლა და მსაჯულების წინაშე წარდგომა, ილიას მკვლელობის ხილვა, ნასაყდრალში ორი ნიკოს შეხვედრა და ავტობუსის ეპიზოდი.

პირველი ეპიზოდი მითოლოგიური სახეებითაა დატვირთული და მათ შორის ძირითადი სულეთი და სულთქმის ციხეა. ქართულ მითოლოგიურ წარმოდგენებში სულეთი, იგივე შავეთი, მკვდარი სულების სამყოფელია და ის სამ ნაწილად იყოფა – სამოთხედ, ჯოჯოხეთად და მდუღარე კუპრის ტბად. სულეთში ახალმოსულმა სულმა ჯერ ბეწვის ხიდი უნდა გაიაროს, თუ ცოდვებით ძალიან დამძიმებული არაა და კუპრის ტბაში არ ჩავარდება, შემდეგ ტრიალ მინდორზე აღმოჩნდება და სულეთის ყარაული მას ციხეში შეევანს, სადაც სული სამსჯავროზე ბჭეების წინაშე უნდა წარსდგეს. ბჭეები მის ცოდვასა და მადლს აწონიან და გადაწყვეტენ, სად გაუშვან ის – სამოთხეში, ჯოჯოხეთში თუ ციხის ქვედა სართულზე. აღსანიშნავია, რომ სახელოვან ადამიანებს სულეთში პატივით იღებენ (მითოლოგიური ენციკლოპედია 2006: 82).

სიზმარში სულთქმის ციხე და მისკენ სვლა მინიშნებაა მთავარ პერსონაჟში არსებულ დანაშაულის შეგრძნებაზე – ნიკოს ეჩვენება, რომ ისიც მკვლელობის

თანამონაწილეა და ეს მოსვენებას აკარგვინებს, ამასთან მას მკვლელისაც ეშინია. ეს გრძნობა იმდენად ძლიერია, რომ ის, ცოცხალი ადამიანი, მკვდრების საუფლოში მიდის (ამ მხრივ ნიკო პირველი არ არის, ბერძნულ მითოლოგიაში ჰადების საუფლოში მოგზაურობენ ორფევსი და ჰერაკლე, თუმცა მათი მიზნები სულ სხვაა). ეს ნიშნავს, რომ ნიკო მზადაა დაისაჯოს, მოკვდეს კიდეც, ოდონდ ამ გრძნობისგან განთავისუფლდეს. მაგრამ აქ ის მოულოდმელად ქაჯთა სამოთხეში აღმოჩნდება, სადაც არავინ არაფერს აკეთებს, მაგრამ მაინც ყველა კმაყოფილია. ნიკოსთვის ეს ერთგვარი გამოცდაა, ამოიცნობს ამ სამყაროს არარაობას თუ მოჩვენებითი მადლით დაკმაყოფილდება? ამ ადგილის გავლა ნიკოსთვის დაბრკოლების გადალახვის ტოლფასია.

რაც შეეხება მსაჯულებს, ეს მონაკვეთი ემთხვევა მითოლოგიურ წარმოდგენებში არსებულ მოტივებს – სწორედ მსაჯულები გადაწყვეტენ დამნაშავეა თუ არა ის და იმასაც, რა მიუსაჯონ. თავად ნიკოს მხოლოდ ერთი სურვილი ამოძრავებს – განთავისუფლდეს მტანჯველი დანაშაულის შეგრძნებისგან, ამიტომ ყველაფრისთვის მზადაა. რეალურ ცხოვრებაში ის ამას საკუთარი ძალებით ვერ ახერხებს, ამიტომ სიზმარში ზებუნებრივ ძალებს ანდობს მისი ბედის გადაწყვეტას, მასზე მაღლა მდგომთ, რათა გადაწყვეტილება, რომელიც გაიქმნებს, მისთვის უფრო სარწმუნო იყოს. შეიძლება ითქვას, ნიკოს სურს მისი ცხოვრების შემდგომ განვითარებაზე პასუხისმგებლობა სხვასაც დააკისროს – ზებუნებრივ ძალებს, ღმერთს, რომელიც მის ნაცვლად გადაწყვეტს, დამნაშავეა თუ არა ნიკო. მაგრამ მისდა გასაოცრად აღმოჩნდება, რომ ის არაფერშია დამნაშავე. ამ პრობლემას ნიკოს არაცნობიერი წამოჭრის, რადგან ეს ცნობიერს ძლიერ აღელვებს და თავადვე წყვეტს საკითხს ნიკოს სასარგებლოდ. როგორც წესი, არაცნობიერი იშვიათად წარმოაჩენს ადმიანისთვის მაამებელ მოვლენას ან გადაწყვეტილებას, მაგრამ აქ ნიკო მითოლოგიურ სქემას ემორჩილება და თუ სულეთის შემდეგ გზას აგრძელებს, ესე იგი ჯოჯოხეთში არ მოხვედრილა და, შესაბამისად, არც დამნაშავეა.

შემდეგი ეტაპი ილიას მკვლელობის დროს მოწმის როლში აღმოჩნაა. ეს პირდაპირ კავშირია ნიკოს ცხოვრებისეულ სიტუაციასთან – ნიკო მკვლელობის უნებური მოწმეა, მაგრამ თუ რეალურ ცხოვრებაში ნიკო შეშინებული და დამფრთხალია, სიზმარში ბოლმით ივსება იმის გამო, რომ არაფრის გაკეთება შეუძლია (ისევე, როგორც ყაჩადის მკვლელობის დროს), რადგან დაბადებულიც არ

არის (თავს იმართლებს), მაგრამ ხმას აქაც არ იდებს. ნიკო ორივეგან, ცხადშიც და სიზმარშიც, უსამართლო და უგულო მვლელობის მოწმეა, მაგრამ სიზმარში მას პასუხისმგებლობა მოხსნილი აქვს, წინასწარ იცის, რაც უნდა მოხდეს, მხოლოდ თანაუგრძნობს მოკლულს და განიცის თავად ფაქტს, ცხადში კი თავს დამნაშავედ თვლის ჩაურევლობისა და შიშის გამო.

ძალიან საინტერესოა სიზმრის შემდეგი ეტაპი – პირობითად “ორი ნიკოს” შეხვედრა, სადაც ერთი ნიკო ერთდროულად მოკლული ყაჩადის პროტოტიპიცაა და ნიკოს ბავშვობაც, რომელიც ასევე მოკლულია მომხდარი ფაქტების გამო, ხოლო მეორე ნიკო თავის თავში ნიკოს მამას ატარებს და ამავდროულად ის ნიკოს მომავალიცაა, რომელიც მამიდან ამოდის. ეს ყველაფერი ნიკოს გაორების მაჩვენებელია, მისი ცხოვრების ახალ ეტაპზე გადასვლის. მის ცნობიერსა თუ არაცნობიერში იმდენი ახალი ინფორმაცია და განცდა დაგროვდა (ომი, მამის ლოგინად ჩავარდნა, დედის არჩევანი, ახალი ცხოვრება სიღნაღმი, ვანო მასწვლებელის გავლენა, ყაჩადის მკვლელობა, გოგიას დამოკიდებულება და სხვა) რომ ნიკო ამ ყველაფერს ვეღარ უძლებს და “ავადდება”, რაც მისი სულიერი კრიზისის ნიშანია. ამიტომ საჭიროა, ნიკომ გონებაში ყველაფერი დაალაგოს, შიში დაძლიოს, პასუხისმგებლობა აიღოს, თავისი დამოკიდებულებები მოვლენებისა თუ ადამიანების მიმართ მკვეთრად გამიჯნოს, შესაბამისად – გაიზარდოს.

სწორედ ეს აზრია სიზმარში გატარებული – მას შემდეგ, რაც ნიკო დანაშაულის შეგრძნებისგან განთავისუფლდება, გაიაზრებს მამის, როგორც მისთვის სიცოცხლის მიმცემის და საკუთარი თავის, როგორც სიცოცხლის გამგრძელებლის არსეს, ის ცხოვრების ახალ ეტაპზე გადადის, რასაც ბავშვობის დასრულება და პირობითად “ზრდასრული ცხოვრება” ეწოდება: “მეორე, ბოლნაყლაპი, ხელებგამურული, უკვე სიღნაღისკენ გარბოდა და, ყელში ცრემლგაჩხერილს, უკან მოხედვისაც ეშინოდა, უკანვე რომ არ მიბრუნებულიყო, აღრიალებული, თავის უბედურ, ტანჯულ, გაწბილებულ, უგულებელყოფილ წარსულთან, თავის ბავშვობასთან, რომელიც, ვინ იცის, ნასაყდრალის კარში იდგა და სევდიანად მომდიმარი გასცეკეროდა თავის გამგრძელებელს, თავის მომავალს. ... მისი თხუთმეტწლიანი წარსული კი აყროლებულ ცეცხლთან მიბრუნებულიყო, რომელიც მართლა ვინმეს გასართობად კი არ ენთო, არამედ სიცივესთან შესაგუებლად, მარადიულ სიცივესთან, სიკვდილთან” (ჭილაძე 1987: 340). ეს ეპიზოდიც სწორედ ამისთვის ამზადებს ნიკოს ცნობიერს.

ყველაზე საყურადღებო სიზმრის ბოლო ეპიზოდია, სადაც ნიკო ხელმეორედ უნდა დაიბადოს, განწმენდილი, გაბედული და გაზრდილი. ნიკო ავტობუსში ზის, რომელიც “რომელიდაც პრეისტორული ცხოველისა” თუ დედის საშოს, ფურის ფაშვის განსახიერებაა. “ბენზინის სუნით გაჟდენთილი ავტობუსის წიაღიდან” ხელმეორედ და საბოლოოდ უნდა იშვას, როგორც ამირანი. აქ შემოდის სიზმარში ამირანის ეპოსის მოტივები, რომელსაც ოთარ ჭილაძე არაერთხელ მიმართავს სხვადასხვა რომანში. ეს მოვლენა მიემართება ამირანის ეპოსის ცენტრალურ ეპიზოდს – გველეშაპის მიერ ამირანის შთანთქმა-ამონთხევას ანუ ხელმეორედ შობას (აღსანიშნავია, რომ ეს ნიკოსთვისაც ცენტრალური მოვლენაა).

ამირანის ეპოსში გველეშაპი შთანქავს ანტაგონისტს, რათა მან გველეშაპი შიგნიდან დაამარცხოს, ვინაიდან გარედან მისი დამარცხება შეუძლებელია. შთანთქმა ისეთი მითოლოგება, რომელსაც კოსმოგონიური მნიშვნელობა აქვს – გველეშაპის მუცელში ყოფნა იგივე საშოში დაბრუნებაა, საიდანაც გმირი განახლებული ძალით იბადება (კიკნაძე 2001: 22-25).

ნიკოც, ცხოვრებისეული სიტუაციიდან გამომდინარე, რომელიც მის სულიერ კრიზისს გამოიწვევს, საჭიროებს ხელახლა დაბადებას. სულიერი კრიზისი ამირანსაც განახლების აუცილებლობამდე მიიყვანს. როგორც წერს ზურაბ კიკნაძე, “ამირანიანი” ტრაგიკული ეპოსია, სადაც საგმირო სათავგადასავლო და მითოლოგიური მოტივებით შექმერწილია ადამიანის აღზევებისა და დაცემის დრამა (კიკნაძე 2001: 22-25) ნებისმიერი გმირისთვის, ისევე როგორც ნიკოსთვის, ეს მოვლენა ახალი ზღურბლის, ეტაპის დასაწყისია. ყოველი ზღურბლის გადალახვის შემდეგ ამირანი იცვლება და განსხვავებული თვალით უყურებს მოვლენებს, ისევე, როგორც ნიკო, რომელიც ასევე თავისი ცხოვრების სხვადასხვა ეტაპზე (უფრო ბავშვობის, რადგან ნიკო მხოლოდ თხუთმეტი წლისაა), განსხვავებულია, საბოლოოდ კი სიზმარის მეშვეობით შესაძლებელი ხდება ყველა პრობლემის დაძლევა, რაც ხელს შეუწყობს მის კიდევ ერთხელ და ამჯერად საბოლოოდ გარდასახვას.

ამდენად ნიკოს სიზმარი რომანში ერთ-ერთი ყველაზე მნიშვნელოვანი მონაკვეთია. სწორედ სიზმარში იხსნება კვანძი და ნაწარმოები თავის კულმინაციას აღწევს, რადგან გაანალიზებულია ყველა საკითხი, რომელიც რომანში დგას და მთავარ გმირს აწუხებს. რაკი რომანში მოვლენები ნიკოს გონებაში მიმდინარეობს, მკითხველს გამუდმებით აქვს გარდატეხის, ცვლილების

მოლოდინი, საიდანაც გაირკვევა, რაა მთავარი პერსონაჟის მთავარი პრობლემა, რომლის მოგვარებასაც ის მთელი ნაწარმოების სიუჟეტის მსვლელობისას ცდილობს, რომელია მათგან უპირატესი, საითქენ მიჰყავს ის ავტორს, რისი მომსწრე უნდა გახდეს მკითხველი. “მარტის მამალში” ასეთი გარდატეხა და ავტორისა თუ გმირის სათქმელის თავმოყრა და შეჯამება ნიკოს ვრცელ და მრავალპლანიან სიზმარში ხდება, რომელიც რთულია არა მხოლოდ როგორც არქეტიპული სახე-ხატებით სავსე რამდენიმე ეპიზოდიანი არაცნობიერის გზავნილი, არამედ როგორც ავტორის დასკვნა ნიკოს პიროვნებასთან, ცხოვრებასთან, სიმართლესთან თუ დანაშაულთან მიმართებაში. სიზმარი, ფაქტობრივად, ამ რომანის დასკვინითი ნაწილიცაა, რადგან რაც ხდება სიზმრის შემდეგ, ანუ ნაწარმოების რეალური პლანი, აღარაფერია იმასთან შედარებით, რაც უკვე მოხდა ნიკოს შინაგან სამყაროში.

რაკი ავტორი მთელი რომანის განვითარების მანძილზე ნიკოს სულიერ სფეროში გვახედებს და მას “შიგნიდან” გვაცნობს, ის ნიკოს პრობლემებსაც “შიგნიდან”, არაცნობიერისა და ცნობიერის, სიზმრისა თუ წარმოსახვის, ფიქრის, ოცნების დახმარენით გადაჭრის. მკითხველი ამ პროცესის უშუალო მონაწილეა. ის იმდენად კარგად იცნობ ნიკოს შინაგან სამყაროს, მისი ფიქრის ყოველ მოძრაობას, რომ ავტორს ზედმეტი სიტყვების თქმა, ახსნა-განმარტებების მიცემა თუ სხვაგვარი დასკვენის გაკეთება აღარ სჭირდება. სიზმარში ყველა გაუცემელ კითხვაზე მოიპოვება პასუხი.

საინტერესოა, რატომ გამოიყენა ავტორმა სწორედ სიზმარი კულმინაციისთვის და ნაწარმოების დასვნითი ნაწილისთვის, რატომ აირჩია ეს ფორმა გმირის სულიერი სიღრმების საჩვენებლად? საქმე ისაა, რომ იუნგის თეორიის მიხედვით, სიზმრისა და ასევე მისი ინტერპრეტაციის მთავარი ფუნქცია პიროვნების ცნობიერადე რაიმე მნიშვნელოვანი ინფორმაციის მიტანა, მისი პრობლემის მოგვარება და, შესაბამისად, პაციენტის განკურნებაა. ამ რომანში კი ნიკო ავადაა, ის ერთი თვის განმავლობაში საწოლიდან არ დგება. მართალია მისი პრობლემები არა ფიზიკური, არამედ სულიერი პროცესებიდან მოდის, მაგრამ მას განკურნება სჭირდება. საჭიროა, რომ ნიკომ, რომელიც ჯერ მხოლოდ თხუთმეტი წლისაა, ყველა ამ მოვლენას, რაც თავს გადახდა, თავისი ადგილი მიუჩინოს. სიზმრის მეშვეობით კი ეს შესაძლებელი ხდება, არაცნობიერი თავად აწესრიგებს ნიკოს გონებაში ყველაფერს. მაგალითად მნიშვნელობას ანიჭებს იმ ფაქტს, რომ ნიკო

თავის თავში ატარებს მამას, რომ ნიკოს ტანჯავს დანაშაულის შეგრძნება, რომ ნიკოს ეშინია მკვლელის და საჭიროა ამ შიშის გადალახვა. ამ ყველაფრის გაანალიზების შემდეგ, რაც სიზმრის ფუნქცია და შედეგია, ნიკო განიკურნება. ჩანს, ავტორმა სიზმარი, ნიკოს გამოსაჯანმრთელებლად გამოიყენა.

— — —

საბოლოოდ შეიძლება ითქვას, რომ სიზმარს ოთარ ჭილაძის რომანებში ისეთივე მნიშვნელოვანი ფუნქცია აკისრია, როგორც იუნგის შეხედულებით რეალურ ცხოვრებაში. თუკი ნაწარმოებში არის სიზმარი, სწორედ მასშია გამოხატული რომანის მთავარი აზრი, მიიღწევა პულმინაცია და ავტორი იძლევა დასკვნებს. სიზმრებში, რომლებიც დატვირთულია როგორც სუბიექტური, ასევე არქეტიპული სახე-ხატებით, ყოველთვის იგრძნობა ავტორის ჩართულობაც, რადგან გვხვდება კონკრეტული დასკვნები, პარალელები, შეუფარავად გაკეთებული მინიშნებები ზღაპრის გმირებსა თუ მითოლოგებზე. ეს ავტორის ხელწერისა და მისი ინდივიდუალური მიღგომის გამომხატველია.

ვფიქრობ, ოთარ ჭილაძემ თავისი რომანებში სიზმრები იუნგის თეორიებზე დაყრდნობით შეთხხა. უპირველეს ყოვლისა, ალბათ, იმიტომ, რომ იუნგი სიზმრებს არა სუბიექტური გადასახედიდან, არამედ უფრო მასშტაბურად, გლობალურად უყურებდა. ამის გამოძახილია ის ფაქტი, რომ ჭილაძე სიზმრებში არაერთ ზოგადსაკაცობრიო საკითხს აყენებს და განიხილავს. მეორე მიზეზი კი სიზმრის მითოლოგიურ-რელიგიური თვალსაწიერიდან მისი ინტერპრეტაციის შესაძლებლობაა, რასაც ფსიქოლოგი უდიდეს მნიშვნელობას ანიჭებს და რაც საყვარელი თემაა მწერლისთვისაც. იუნგის მტკიცებით, სიზმრები თითქმის ყოველთვის შეიცავს არქეტიპულ პასაჟებს და ამიტომ მისი ინტერპრეტაციაც დიდ ცოდნასა და გამოცდილებას მოითხოვს. ამგვარი ცოდნა კი კარგად ჩანს ჭილაძის შემოქმედებაში. ცნობილია, რომ მწერლის შემოქმედებისთვის ნიშანდობლივია მითოლოგიური, ბიბლიური თუ ზღაპრული ელემენტები, რამაც სიზმრების შექმნაშიც შეუწყო ხელი. და რადგან იუნგი იყო ის ფსიქოლოგი, ვინც სიზმარს კაცობრიობის წარსულთან, არქეტიპებთან აკავშირებდა, შესაბამისად, ჭილაძის მიმართება მის თეორიასთან აშკარაა.

დასკვნები

ოთარ ჭილაძის პროზაულ ნაწარმოებებში ფსიქოლოგიზმის მეორე გამოხატულება კარლ გუსტავ იუნგის ანალიტიკურ ფსიქოლოგიასთან მიმართებაა. ეს კარგად გამოჩნდა მწერლის მიერ სიზმრების აგების პრინციპში. ჭილაძის ნაწარმოებებში წარმოდგენილი სიზმრები რთული და მრავალპლანიანია, შეიცავს როგორც პირადულ, ასევე არქეტიპულ სახე-ხატებსა და მითოლოგებს, რაც პერსონაჟისა თუ მკითხველისთვის ერთგვარ მინიშნებებს წარმოადგენს. შესაბამისად, მწერლის მიერ შექმნილი მხატვრული სიზმრის სტრუქტურა ახლოს დგას სიზმრის იუნგისეულ მოდელთან. ეს გვაფიქრებინებს, რომ ოთარ ჭილაძემ სიზმრები იუნგის თეორიის გავლენით შეთხვა.

იუნგის აზრით, სიზმარი სულიერი ცხოვრების მნიშვნელოვანი ფაქტია და ის, შეიძლება ითქვას, ფსიქიკურ მოვლენებში ჩარევის ერთგვარი ფორმაა. სწორედ სიზმარი წარმოაჩენს ცნობიერისა და არცნობიერის ურთიერთობას, მათ პარმონიასა თუ დაპირისპირებას. სიზმრის არსი დამოკიდებულია იმაზე, თუ რამდენად საჭიროებს ადამიანის ცნობიერი კომპენსირებას (შევსებას, აღდგენას). ამიტომ სიზმრები ფასდება არაერთი კომპონენტის გათვალისწინებით – როგორია არაცნობიერისა და ცნობიერის დამოკიდებულება, რა როლს ასრულებენ არქეტიპები, მინიშნებები, მითოლოგიური თუ რელიგიური ფონი, რა წვლილი შეაქვს მას ინდივიდუალიზაციის პროცესში და სხვა.

რაც შევხება ლიტერატურულ სიზმარს, ის, ცხადია, არ არის რეალური სიზმრის ანალოგი, რაც მას, გარკვეულწილად ამარტივებს. მაგრამ ის მაინც რთული ანალიზის ობიექტია. თუკი ფსიქოლოგია მიზნად სიზმრის სახეების სწორ ინტერპრეტაციას ისახავს, ლიტერატურისთვის მნიშვნელოვანია თუ როგორ და რატომ იქმნება ეს სახეები და რა როლს თამაშობენ ისინი მთელ მხატვრულ ტექსტში. აქედან გამომდინარე, სხვადასხვა ეპოქასა თუ ქანრში, თუ უბრალოდ სხვადასხვა ავტორთან, სიზმარს განსხვავებული ფუნქცია აქვს. თუ რამდენად მნიშვნელოვანი იქნება ნაწარმოებისთვის სიზმარი, ცალკეული ავტორების გადასაწყვეტია.

როგორც ოთარ ჭილაძის პროზაში გამოჩნდა, მწერალი სიზმარს განსაკუთრებულ მნიშვნელობას ანიჭებს, მას რომანის მთავარი პრობლემების გადაჭრას მიანდობს და დასკვნებით ტვირთავს. მწერალი თითქმის ყველა ნაწარმოებში ცდილობს, რომ პერსონაჟები არა ყოვლისმცოდნე ავტორის პოზიციიდან დახატოს და მათზე მოგვითხროს, არამედ მათი სულიერი სამყარო “შიგნიდან” წარმოაჩინოს. აქედან გამომდინარე, გმირის სულიერი განცდებისა და არაცნობიერი განდევნილი სურვილების საჩვენებლად, სიზმარი საუკეთესო საშუალებაა, რადგან, იუნგის მტკიცებით (ასევე სხვა ფსიქოლოგების მოსაზრებებითაც), სიზმარი არაცნობიერის გზავნილია და ის ცნობიერისთვის საჭირო და აუცილებელ ინფორმაციას შეიცავს.

ნაშრომში განხილული ოთხი სიზმრიდან, ორი – მთხოვბელის, აველუმისა და სონიას საერთო სიზმარი და ნიკოს “ცხოვრებისეული სიზმარი”, შეიძლება ითქვას, ნაწარმოების სამკაულს წარმოადგენს და მათი ფუნქცია პერსონაჟებისა და მკითხველისთვის მხოლოდ წარსული მოვლენების შეხსენებაა. რაც შეეხება ელიზბარის სიზმარს და ნიკოს მეორე “წარმოსახვა-სიზმარს”, აქ საქმე სხვაგვარადაა. ეს სიზმრები რეალური სიზმრის ანალოგითაა შექმნილი და წარმოადგენენ რთულ, მრავალშრიან, მრავალკომპონენტიან, არქეტიპული სახეებითა და მითოლოგებით დატვირთულ არაცნობიერის გზავნილებს, რომელთაც პერსონაჟების ინდივიდუალიზაციის პროცესის სწორად წარმართვაში შეაქვთ წვლილი.

თავი V

“ცნობილების ნაკადი” და ოთარ ჰილაპის პროზა

მე-20 საუკუნის ერთ-ერთი ლიტერატურული ტენდენცია, მეთოდი, რომლის ტექნიკაც ოთარ ჭილაძეს თავისი პროზის პრობლემატიკის დასახვასა და სტილის გამრავალფეროვნებაში დაეხმარა, არის “ცნობიერების ნაკადი”. ეს ტექნიკა მწერლის რამდენიმე რომანში შეიმჩნევა, განსაკუთრებით კი იმ მონაკვეთებში, სადაც გვხვდება შინაგანი მონოლოგები. თავდაპირველად “ცნობიერების ნაკადის” ტექნიკა ოთარ ჭილაძის პროზაში სულ მცირე, თითქმის უმნიშვნელო ადგილს იკავებს, მაგალითად, როგორც ნაწარმოებში “რკინის თეატრი”(1981), ნელ-ნელა ძლიერდება “მარტის მამალში”(1991) და კულმინაციას აღწევს მწერლის ბოლო რომანში “გოდორი”(2002). ადსანიშნავია, რომ “გოდორში” ავტორი, გარდა იმისა, რომ პერიოდულად “ცნობიერების ნაკადის” ტექნიკას მიმართავს, გარეგნულადაც იცავს ამ მეთოდის სტილს – რომანი თითქმის უდიალოგოა და შედგება ცალკეული პერსონაჟების შინაგანი მონოლოგებისგან, რისი მიზანიც თითოეული მათგანის სულიერ სფეროში ჩაღრმავებაა.

“ცნობიერების ნაკადის” ტექნიკის ელემენტები ჯერ კიდევ მე-18 საუკუნის პროზაში - ლორენს სტერნის შემოქმედებაში – გაჩნდა, მაგრამ როგორც ტექნიკა, პირველად ედუარდ დიუქარდენმა გამოიყენა (1887). აქვე უნდა აღინიშნოს კნუტ ჰამსუნის რომანები “შიმშილი”(1890), “მისტერიები”(1892) და ჰენრი ჯეიმსის “ქალის პორტრეტი”(1881), სადაც “ცნობიერების ნაკადის წინაპირობაა შექმნილი (Parsons 2007: 5-17). მეთოდის სახით კი ის მე-20 საუკუნეში გაფორმდა, რასაც ხელი შეუწყო ანრი ბერგსონის ინტუიტურმა ფილოსოფიამ და ფრონდ-იუნგისეულმა ფსიქოლოგიურმა სკოლამ. ბერგსონმა სიცოცხლის წარმმართველ ძალად ცნობიერება მიიჩნია და დაამკვიდრა ცნობიერებასთან დაკავშირებული ისეთი მნიშვნელოვანი ტერმინები, როგორიცაა “გრძლივობა” და “კონტინუუმი”, რაც უწყვეტობასა და დენადობას გამოხატავს. ხოლო თავის ერთ-ერთ ნაშრომში ჩამოაყალიბა მოძღვრება სულიერი მეხსიერების, როგორც წარსულის ჭვრების

შესახებ. ფროიდმა კი, შეიძლება ითქვას, ხელახლა აღმოაჩინა ადამიანის არაცნობიერი, რომელიც, მისი აზრით, ადამიანის ცხოვრებაში განმსაზღვრელ როლს ასრულებს. “ცნობიერების ნაკადის” ლიტერატურულმა მეთოდმა სწორედ უწყვეტი, მუდმივად დენადი არაცნობიერის გამოხატვა დაისახა მიზნად, რისი შედეგიც, პლასიკური ფსიქოანალიზის მეთოდის მსგავსად, ადამიანის პრობლემების აღმოჩენა და მისი გადაჭრის გზის დასახვა უნდა ყოფილიყო (ბერგსონი 1993: 24; Humphrey 1968: 18-22).

“ცნობიერების ნაკადის” პროზა, როგორც ახალი და რევოლუციური ფორმა, მოდერნიზმის ფარგლებში ინგლისურ და ამერიკულ ლიტერატურაში აღმოცენდა და განვითარდა. მოდერნიზმი თავისთავად ნიშნავდა განახლებას და ეს მეტნაკლებად ყველა ქვეყნის ლიტერატურას შეეხო, მაგრამ ინგლისური მოდერნიზმი ამ მხრივ წამყვანი აღმოჩნდა. “ცნობიერების ნაკადის” მეთოდის ჩამოყალიბებამდე ტექსტისადმი, პერსონაჟისადმი თუ ადამიანის შინაგანი სამყაროსადმი ასეთი სუბიექტური მიდგომა, ფაქტობრივად, არ არსებობდა. სიღრმისეული საკითხებით მწერლების დაინტერესებამ გამოიწვია ის, რომ შესაძლებელი გახდა ცნობიერების მოქმედების, აქტივობის წარმოჩენა და ნაწარმოებებში მინიმუმამდე დავიდა ტრადიციული აღწერები და რეალისტური პასაჟები. “ცნობიერების ნაკადის” ნარატიულ დისკურსს კი ქმნის ისეთი შინაგანი რეალობა, რომელიც რეალურ მოვლენებს მხოლოდ აირეკლავს და ფოკუსირებას ახდენს არა თავად მოვლენაზე, არამედ რეაქციაზე, რომელიც ამ მოვლენამ გამოიწვია. აღსანიშნავია, რომ ამგვარი პროზა შეიცავს დიალოგურ, მონოლოგურ და აღწერით ნაწილებს, რომელთა ფუნქციონირებაც უკვე პერსონაჟის შინაგან სამყაროზეა დამოკიდებული, მაგრამ მონოლოგურ ფორმას აშკარად უპირატესობა ენიჭება (Матвеева 2003), ამიტომ აქ პერსონაჟი ხშრად თავად გამოდის მთხოვობების როლში და ნარაციის პროცესში მთხოვობელი, როგორც პერსონაჟისგან გამიჯნული პირობითი სუბიექტი, ტექსტში მხოლოდ პერიოდულად ერთვება.

აღსანიშნავია, რომ თავად ნარატოლოგიას “ცნობიერების ნაკადის” ტექნიკა საფუძვლიანად არ შეუსწავლია. თავდაპირველად ჟერარ ჟენეტმა დააყენა ნარატოლოგიური ლინგვისტიკის ფარგლებში მარსელ პრუსტის რომანის, “დაკარგული დროის ძიებაში”, განხილვის საკითხი, მაგრამ ისიც უფრო

ლიტერატურათმცოდნეობის და არა ლინგვისტიკის კუთხით (Genette 1983: 55). ჯოისისეული ფსიქოლოგიური რეალიზმის ცნობიერების ნაკადში მთხოვბელი განზე დგება, რათა საშუალება მისცეს პერსონაჟს, წარსდგეს დამოუკიდბელ პიროვნებად, რომელიც მიჰყვება რა ასოციაციებს, ცდილობს ახსნას საკუთარი ფიქრის სპეციფიკური ხასიათი (Матвеева: 2003)). შეიძლება ითქვას, რომ კლასიკურ “ცნობიერების ნაკადის” ნაწარმოებში ავტორი ასპარეზს პერსონაჟს უთმობს და თავად მხოლოდ დროდადრო ერთვება რემარკებით, შენიშვნებითა და ნაწარმოების ცენტრალური აზრის გარშემო განვითარებული მსჯელობებისას. მაგრამ დროთა განმავლობაში, როცა თავად “ცნობიერების ნაკადის” მეთოდი ტრანფორმირდა და მისგან მხოლოდ ტექნიკა დარჩა, ეს ტექნიკა ნებისმიერი სტილისა თუ ჟანრის რომანისთვის აღმოჩნდა მისაღები და პერსონაჟის აბსოლუტური უპირატესობა მთხოვბელთან შედარებით, ცხადია, გაქრა.

თავად ტერმინი, “ცნობიერების ნაკადი”, ლიტერატურამ ფსიქოლოგიისგან ისესხა, კერძოდ კი ამერიკელი ფსიქოლოგის უილიამ ჯეიმსისგან, რომელმაც 1880 წელს ნაშრომში “ფსოქოლოგიის საფუძვლები”, პირველად გამოიყენა “ცნობიერების ნაკადი”. ამ ნაშრომს ლიტერატურასთან ვერ დავაკავშირებთ, ამგრამ საკითხი ადამიანის არაცნობიერი ფიქრების უწყვეტად დინებისა და ასოციაციური აზროვნების შესახებ, პირველად სწორედ აქ დადგა. თუმცა უნდა აღინიშნოს, რომ ტერმინი მაინც პირობითია, რადგან ამ ტიპის ლიტერატურას ადამიანის არა ცნობიერი, არამედ უფრო არაცნობიერი აინტერესებს (Джеймс 1991: 56-80).

“ცნობიერების ნაკადის” ლიტერატურული მეთოდის რაობის დასადგენად, მისი ერთ-ერთი ფუძემდებლის, ვირჯინია გულფის სიტყვებს მოვიშველიებთ: ეს არის ატომების, რომლებიც გონებას აწვიმს, აღწერა იმ თანმიმდევრობით, რა თანმიმდევრობითაც “ცვივა” ისინი და თვალის გაყოლება ყოველი ნანახისა თუ განცდილისთვის, რაც კი ცნობიერებაში დაილექტა, რაგინდ დაუკავშირებელ და გაუგებარ ქარგასაც არ უნდა ქმნიდნენ ისინი (ვულფი 1988: 145). “ცნობიერების ნაკადისთვის” არსებითია აზრის გაჩენის პროცესის ჩვენება და ის პროცესები, რომელიც არაცნობიერში კონკრეტული ფიქრის წარმოშობამდე ხდება, რომლის დროსაც აქცენტირებულია ცნობიერების მეტყველებამდელი დონე. შესაბამისად, მისი ფუნქცია არაცნობიერის წვდომაა. ზოგადად, არაცნობიერის გამოხატვა

შეუძლებელია, მას სამეტყველო საფუძველი არ გააჩნია და არ არსებობს ფორმა, რომელიც მას წერილობით მოგვაწოდებს, ამიტომ ის, რასაც ავტორი გვთავაზობს, ფსიქოლოგიური ფენომენის მხოლოდ მიახლოებითი იმიტაციაა (ყიასაშვილი 1983: 5).

შესაბამისად “ცნობიერების ნაკადის” ლიტერატურული მეთოდისა და ტექნიკის ძირითად მახასიათებლებად შეიძლება ჩაითვალოს: ორიენტირება პერსონაჟის შინაგან სამყაროზე, ზოგიერთ შემთხვევაში კი მის არაცნობიერზე; მთხობელის მიერ თხრობის პროცესის პერსონაჟისთვის “გადაცემა”, ანუ პერსონაჟისა და მთხრობელის გაიგივება, რომლის დროსაც თხრობა III პირში მიმდინარეობს; ასოციაციური აზროვნება, რაც იწვევს ქრონოლოგიის აღრევას; სინტაქსისა თუ გრამატიკული და სტილისტური ფორმების უარყოფა.

“ცნობიერების ნაკადის” ტექნიკა, ძირითადად, შინაგან მონოლოგს ეყრდნობა. სწორედ შინაგანი მონოლოგია ის გამომსახველობითი ფორმა, რომელსაც მეტწილად მიმართავს “ცნობიერების ნაკადის” ავტორი. შინაგანი მონოლოგები თავის მხრივ ასოციაციურ აზროვნებას ემყარება. ასოციაციური აზროვნება წარმოდგენილია ერთმანეთთან ალოგიკურად, მხოლოდ ასოციაციური დაკავშირებული ფიქრებითა და მოგონებებით. ეს ფიქრები და მოგონებები კი არაცნობიერშია შენახული და მათ პერსონაჟის გარკვეული ემოციები გამოიხმობს. კლასიკური მაგალითი ამგვარად შესრულებული ნაწარმოებისა არის ჯეიმს ჯოისის ცნობილი რომანი “ულისე”, სადაც ჯოისმა, პირობითად, შეიმუშავა “ცნობიერების ნაკადის” კონცეფცია (მეთოდი თეორიულად არ არის გამყარებული), რომლის მეშვეობითაც მწერალმა ახალი სამწერლობო ენა შემოიტანა ლიტერატურაში.

მაგრამ მოგვიანებით უილიამ ფოლკნერმა დაივიწყა “ცნობიერების ნაკადის” შინაარსობრივი მხარე და გამოიყენა მხოლოდ მისი ტექნიკა მხატვრული ეფექტის მიზნით, რამაც მეთოდს გამოაცალა ფუნქცია – არაცნობიერის წვდომა და დაუტოვა მხოლოდ ფორმა (თოფურიძე 1984: 35-45). – შინაგანი მონოლოგები, ასოციაციური აზროვნება. ამის შემდეგ ამგვარი ტექნიკა აქტიურად გამოიყენება სხვადასხვა პერიოდისა თუ უანრის ნაწარმოებებში და ინტერპრეტირებული სახით დღემდე აგრძელებს ფუნქციონირებას, მაგალითად სილვია პლათის ნაწარმოებში –

“უბედურების ზარი” (“The Bell Jar”, 1963), თომას პინჩონის – “გრავიტაციის ცისარტყელაში” (“Gravity's Rainbow”), რობერტო ბოლანიოს რომანში - “დამით ჩილეში” (“By Night in Chile”, 2000), ამ მხრივ აღსანიშნავია ჰენრი მილერის ტრილოგია – “კირჩხიბის ტროპიკი”, “შავი გაზაფხული”, “თხის რქის ტროპიკი” (“Tropic of Cancer”, “Black Spring”, “Tropic of Capricorn”), სადაც “ცნობიერების ნაკადის” ტექნიკას აშკარად განსხვავებული და ავტორისებული ფორმა აქვს. ამ ნაწარმოებების ტექნიკა, ძირითადად, პირდაპირ შინაგან მონოლოგს ეყრდნობა, მაგრამ გვხვდება მთავარი გმირის მსჯელობებიც, განსჯა ე.წ. “შინაგანი ანალიზი”, პერიოდულად კი ჩანს ყოვლისმცოდნე ავტორიც, რომელიც ნაწარმოების დანარჩენი პერსონაჟების საუბარსა და ფიქრებს გადმოსცემს (Павлищева 2008).

ქართულ ლიტერატურაში “ცნობიერების ნაკადის” მეთოდით (მისი კლასიკური გაგებით) დაწერილი ნაწარმოებები, ფაქტობრივად, არ გვხვდება, თუმცა კრიტიკოსი მაია მიგუა საუბრობს “ცნობიერების ნაკადის” წინაპირობაზე, ქართველი მწერლის, ჭოლა ლომთათიძის 1907-1914 წლებში დაწერილ მოთხოვნებში. საუბარია მოთხოვნებზე: “სახრჩობელას წინაშე”, “საპყრობილები”, “პირველი მაისი”, “ჩემი დღიური”, თეთრი ლამე”. კრიტიკოსის აზრით, ჭოლა ლომთათიძის მოთხოვნებში წინა პლანზეა წამოწეული გმირის ცნობიერის მოძრაობა და ნოველები აგებულია შინაგან მონოლოგებზე, რომელიც, თავის მხრივ “თავისუფალ ასოციაციებს” ეყრდნობა, გარდა ამისა წაშლილია დროის ჩარჩო და პასიურია სიუჟეტი (მიგუა 2005: 80-88). თუმცა, კრიტიკოსისვე განცხადებით, ეს ვერ იქნება უშუალოდ “ცნობიერების ნაკადი”, რადგან ის 7-8 წლით უსწრებს წინ ჯოისის “ულისეს”, სადაც ეს მეთოდი საბოლოოდ ჩამოყალიბდა.

რაც შეეხება ოთარ ჭილაძეს, ქართულ ლიტერატურულ კრიტიკაში მისი პროზის “ცნობიერების ნაკადის” მეთოდისადმი მიმართებაზე რამდენჯერმე გამოითქვა აზრი, მაგრამ თემა შესწავლილი არ არის. გურამ ასათიანი რომანის, “ყოველმან ჩემმან მპოვნელმან” გამოსვლის შემდეგ წერდა, რომ ერის აუერბახი წიგნში “მიმესინი” ვირჯინია ვულფის რომანის განხილვისას განასხვავებს “ინდივიდუალისტურ სუბიექტივიზმს” და “მრავალსუბიექტიან ცნობიერებას”. კრიტიკოსის აზრით, “მრავალსუბიექტიანი ცნობიერება” არის სწორედ ის, რაც

გვხვდება უილიამ ფოლკნერის “ხმაურსა და მძინვარებაში”, ვირჯინია ვულფის რომანში “გასეირნება შუქურისკენ” და, ასევე, ოთარ ჭილაძის ზემოთხევნებულ ნაწამოებში, რადგან ამ რომანებში სინამდვილე რამდენიმე გმირის თვალით არის აღწერილი (ასათიანი, 1977: 21-22). ამის გამო სინამდვილე მკითხველის თვალშინ სხვადასხვა კუთხით იშლება, ზოგჯერ კი ერთი და იგივე მოვლენაც სხვადასხვა თვალსაზრისითაა წარმოდგენილი (მაგალითად მაიორისა და თათრის შეტაკებას სხვადასხვა დროს ოთხი სხვადასხვა პერსონაჟი ყვება). “მთავარი აქ ის არის, რომ რომანის ახალი ტექნიკის ელემენტები ამ ნაწარმოებში მოქმედებენ არა დამოუკიდებლად და არა სრული დატვირთვით, არამედ როგორც მთლიანობის შემადგენელი ნაწილები, როგორც ამ ნაწილთა ერთი რიგი. ეს მთლიანობა კი საბოლოოდ მაინც კლასიკურ წესს ემორჩილება. ოთარ ჭილაძის რომანში კლასიკური ტექნიკა გამდიდრებულია თანამდროვე ტექნიკის ელემენტებით” (ასათიანი, 1977: 23). აშკარაა, რომ გურამ ასათიანი აქ სწორედ “ცნობიერების ნაკადის” ტექნიკაზე საუბრობს და ოთარ ჭილაძის რომანსაც “ცნობიერების ნაკადის” ავტორების ნაწარმოებებს ადარებს. აქვე აღნიშნავს, რომ ჭილაძე ამ ტექნიკის მხოლოდ ელემენტებს იყენებს, თუმცადა ამგვარი “თანამედროვე ტექნიკა” კრიტიკოსს ავტორის სტილის ერთ-ერთ წამყვან ფაქტორად მიაჩნია.

საკითხი რომანში “გოდორი” გამოყენებულ “ცნობიერების ნაკადის” ტექნიკაზე კი კრიტიკოსმა ზეინაბ კიკიძემ დასვა. მისი აზრით ეს ტექნიკა, როგორც ხერხთა და გამოსახვის შესაძლებლობათა ერთიანობა, ზუსტად ესადაგება ოთარ ჭილაძისულ ხელშერას (კიკიძე 2005: 25). “პერსონაჟთა ცნობიერებაში თავისუფალ ასოციაციებს, წარმოსახულს ენაცვლება რეალობა. მოქმედი პირები იხსენებენ წარსულს და თხზავენ შესაძლო მომავალს, ან – წარსულს, რომელიც არ ყოფილა, მაგრამ შესაძლოა, ყოფილიყო” (კიკიძე 2005: 27). ამგვარი მსჯელობის ფონზე კრიტიკოსი განიხილავს მამა-შვილის, რაუდენისა და ანტონის ურთიერთობას.

ზოგადად მინდა აღვნიშნო, რომ ჭილაძე არ არის “ცნობიერების ნაკადის” ავტორი, ამ ტერმინის კლასიკური გაგებით, და ეს ბუნებრივიცაა, რადგან ამ მეთოდს მრავალწლიანი ინტერვალი აშორებს. მწერალი თავის რამდენიმე რომანში მხოლოდ “ცნობიერების ნაკადის” ტექნიკას იყენებს, სადაც ის, დროდადრო, ჯეიმს ჯონსივით, ვირჯინია ვულფივით, გმირის ყველაზე ფარული აზრის, მისი

არაცნობიერის წვდომას ცდილობს. ჭილაძის პროზაში “ცნობიერების ნაკადის” ლიტერატურული მეთოდის მხოლოდ გარეგნული მხარეა აქცენტირებული და ავტორი, უილიამ ფოლკნერის მსგავსად, იყენებს მხოლოდ მის ტექნიკას, როგორც ეფექტურ მხატვრულ ხერხს, რათა უკეთ წარმოაჩინოს თავისი გმირების სულიერი მდგომარეობა.

ამ კუთხით წინამდებარე ნაშრომში განხილულია მწერლის ორი რომანი - “გოდორი” და “მარტის მამალი”.

1. “ცნობიერების ნაკადის” ტექნიკა რომანში “გოდორი”

ოთარ ჭილაძის “გოდორი” მწერლის ბოლო რომანია და, შეიძლება ითქვას, ერთგვარად შემაჯამებელი ნაწარმოებია მის შემოქმედებაში – ავტორს ისევე, როგორც სხვა რომანებში, აქაც გადმოაქვს სამშობლოს, პოსტსაბჭოთა საქართველოს კრიზისის თემა და ამის ფონზე ავითარებს დაძაბულ სიუჟეტს ოჯახურ ურთიერთობებზე, რისი მიზანიც, საბოლოოდ მისი ეპოქის “დაცემული”, “დეპეროზირებული” პერსონაჟების სულიერი სამყარის წვდომაა. ხოლო რაც შეეხება წერის ტექნიკას, ამ რომანში ჭილაძე საგრძნობლად სცილდება ტრადიციულ თხრობის მანერას (რაც მეტნაკლებად დამახასიათებელია მისი წინა რომანებისთვის) და აქტიურად მიმართავს “ცნობიერების ნაკადის” ტექნიკას, შედეგად კი ახერხებს უფრო სიღრმისეულად “შეისწავლოს” თავისი გმირების ხასითი.

რომანის ჩახლართულ სიუჟეტს გმირების მონათხრობიდან ვიგებთ. მამამთილმა, რაჯდენ კაშელმა, სექსუალური ურთიერთობა დაამყარა რძალთან – ლიზიკოსთან (ნებით თუ იძულებით), რასაც ჯერ დედამთილი და საბოლოოდ ქმარი – ანტონიც, გაიგებს. გამწარებული ანტონი კლავს მამას და პოლიციაში მიდის, რათა დანაშაული აღიაროს, მაგრამ მას არ დაუჯერებენ და არც დააპატიმრებენ. საბოლოოდ აღმოჩნდება, რომ შვილს რაუდენი არ მოუკლავს და ის, შესაძლოა, სულაც საკუთარმა ცოლმა, ანტონის დედამ მოკლა, შემდეგ კი თავისი რძლის, ლიზიკოს დახმარებით დამარხა. ან არც არავის მოუკლავს. ამ

მოვლენების შემდეგ ლიზიკო ვენებს გადაიჭრის და ფსიქიატრიულ საავადმყოფოში მოხვდება, ანტონი კი ლიზიკოს მამასთან ერთად აფხაზეთის ომში მიღის და ტყვიას ეწირება.

როგორც აღინიშნა, რომანს არ ჰყავს ერთი მთხოვბელი და ამიტომ სიუჟეტს ცალკეული პერსონაჟების სუბიექტური წარმოდგენებისგან ვგებულობთ. ვრცელი შესავალი სიტყვის შემდეგ, სადაც ავტორი-ნარატორი საქართველოს ისტორიის ფონზე კაშელების თჯახის იტორიას ჰყვება, თხრობა პერსონაჟების ხელში გადადის და რომანის ბოლომდე ავტორი ტექსტში მხოლოდ არაპირდაპირი გზით, რემარკებისა და მინიშნებების საშუალებით ერთვება. მეორე ეპიზოდი ჯერ რაჟდენ კაშელისა და შემდეგ მისი რძლის, ლიზიკოს შინაგან მონოლოგებს ეთმობა, რაც ერთი და იგივე მოვლენის ორ მხარეს გვიჩვენებს. ეს მონოლოგები, ფაქტობრივად, პერსონაჟების ფიქრებია, დროდადრო დატვირთული სიუჟეტითა და ლოგიკური დასკვნებით. შიგადაშიგ ვითარდება სიუჟეტი და აქცენტირებულია რომანის რეალური პლანი. ამ მონაკვეთს კი ასრულებს რაჟდენის ცოლის, ფეფეს, მონოლოგი, რომელიც, ძირითადად მის მოგონებებს და, შესაბამისად, მისი ისტორიის თხრობას წარმოადგენს.

მესამე მონაკვეთი ლიზიკოს დედინაცვლის, ელისოს პოზიციიდანაა წარმოდგენილი. რომანის ემპირიულ რეალობაში ელისოსა და ლიზიკოს საუბარი მიმდინარეობს, ელისოს გონებაში კი უამრავი ფიქრი და მოგონება ტრიალებს, რისი საშუალებითაც ელისოს პიროვნებასაც ვეცნობით. მომდევნო, მეოთხე ეპიზოდი კი ლიზიკოს მამისა და ელისოს ქმრის, ელიზბარის შინაგანი მონოლოგია, სადაც უკვე მინიმუმამდეა დაყვანილი სიუჟეტის რეალური განვითარება, მოგონება მოგონებას ებმის და პერსონაჟის მსჯელობებში აშკარად ერთვება მთხოვბელი, რომელიც თამამად ავითარებს თავის მოსაზრებებს. აქ უკვე ჩანს, რომ სიუჟეტი გამძაფრებულია, ყველა პერსონაჟი - დაძაბული და აღელვებული. რაც უფრო მწვავდება გმირების სულიერი დრამა, მით უფრო შემოდის რომანში “ცნობიერების ნაკადის” ტექნიკა.

რომანის მეორე და მესამე ნაწილი მთლიანად პერსონაჟების შინაგან მონოლოგებს ეთმობა, იკარგება რეალური პლანი (თუ არ ჩავთვლის ერთ ეპიზოდს, როდესაც ერთმანეთს ხვდებიან ელიზბარი და ანტონი) და მოქმედება გმირების

ცნობიერში გადაინაცვლებს. ანტონის შინაგან მონოლოგში მხოლოდ მისი სუბიექტური რეალობაა წარმოდგენილი – მოგონებებით, ასოციაციური აზროვნებით, დრო – სივრცის აღრევითა თუ დიფუზით. მაგრამ შიგადაშიგ იგრძნობა ავტორის, მთხოვნელის არსებობაც და ხდება მისი კონცეფციის შესაბამისი აზრის განვითარებაც (სირთულეს ქმნის მთხოვნელთა მონაცვლეობა, ავტორის გამოჩენა და იმპერსონალიზაცია). დაძაბულობა კულტინაციას აღწევს ბოლო ეპიზოდის – ელიზბარის, ანტონისა და ლიზიკოს - შინაგან მონოლოგებში, სადაც სადაც პერსონაჟების კრიზისული მდგომარეობის და ემოციის სიმძლავრის წარმოჩენა “ცნობიერების ნაკადის” ტექნიკის გამოყენებით ხერხდება. შედეგად, ზედაპირზე ამოდის გმირების სუბიექტური სამყარო.

მხატვრული ხერხი, რომლითაც “ცნობიერების ნაკადის” ეფექტი მიიღწევა, არის შინაგანი მონოლოგი და ის მე-20 საუკუნის ლიტერატურაში მხატვრული ტექსტის მთავარი კომპოზიციური ელემენტია. აღსანიშნავია, რომ შინაგანი მონოლოგი რთული ფსიქოლოგიური ფენომენის – შინაგანი მეტყველების - ლიტერატურულ ანალოგს წარმოადგენს. “შინაგანი მეტყველება ეს არის ისეთი ავტოკომუნიკაციური მეტყველება, რომელსაც არ ჰყავს რეციპიენტი, ე.ი. არ არის განსაზღვრული სხვისი უშუალო აღქმისთვის და რომელშიც მხოლოდ მისი აზრის შინაგანი მოძრაობის პროცესი ხორციელდება”, შინაგანი მეტყველება ეკონომიკურია დროში, კონდენსირებულია გამოხატვაში და უკიდურესად სუბიექტურია (საყვარელიძე 1974: 163). აღსანიშნავია, რომ შინაგანი მეტყველება მის მხატვრულ სახეობაში (იგულისხმება შინაგანი მონოლოგი), ფსიქოლოგიური ფენომენის მხოლოდ მიახლოებითი იმიტაციაა, რაც განპირობებულია იმით, რომ ის ავტოკომუნიკაციური მეტყველებიდან კომუნიკაციური მეტყველების ფორმად იქცევა. მისი მაქსიმალური იმიტაცია შეიძლება გამართლებული იყოს მხოლოდ იმ შემთხვევებში, როდესაც ავტორი ცდილობს, გმირის ფსიქიკური დისტროფიის ან ისეთი ფიზიოლოგიური მდგომარეობის ჩვენებას, როცა თვით მეტყველების პროცეში მყოფი პირისთვის აზრი გაუცნობიერებულია, ასეთი მდგომარეობაა სიმთვრალე, ბოდვა, ძილ-ღვიძილი. სწორედ ასეთ მომენტებში იყენებს “ცნობიერების ნაკადის” გავლენით შინაგან მონოლოგებს პემინგუები (საყვარელიძე 1974: 164). რობერტ ჰამფრი წერს, რომ აბსოლუტური შინაგანი მონოლოგი ლიტერატურაში მხოლოდ ჯოისმა და კ. აიკენმა გამოიყენეს, რისი მაგალითიც

ჯოისის “ულისეს” ფინალია, სადაც პერსონაჟის თხრობა (მის ცნობიერში) უწყვეტად მიმდინარეობს 15 გვერდზე ყოველგვარი სასვენი ნიშნისა და პაუზის გარეშე და სადაც სუბიექტური სამყარო გაცილებით აქტიური და მრავალწახნაგოვანია, ვიდრე ნაწარმოების რეალური პლანი. ამიტომ ამ შემთხვევაში ავტორის როლი მინიმუმამდეა დაყვანილი.

რობერტ პამფრის კლასიფიკაციის მიხედვით, არსებობს პირდაპირი და არაპირდაპირი შინაგანი მონოლოგი. პირდაპირია შინაგანი მონოლოგი, რომელიც არ გულისხმობს მესმენელს, სადაც მთხოვბელის როლს თავად პერსონაჟი ასრულებს და ავტორის როლი უმნიშვნელოა. ამგვარი მონოლოგი მკითხველს პერსონაჟის ცნობიერებას ავტორის ჩარევის გარეშე ან მისი უმნიშვნელო ჩარევით წარმოუდგენს. იგულისხმება, რომ ავტორი ან სრულად არის გამქრალი, ან მინიმალური დოზით ერევა ტექსტში მცირე კომენტარებით ან მსგავსი ფრაზებით: “მან თქვა”, “მან იფიქრა” (Humphrey 1968: 23-25). თუმცა მსმენელი არც აქ იგულისხმება, გმირი არავის ესაუბრება, შეიძლება ითქვას, ის თავადაც არ საუბრობს. ამგვარი პირდაპირი შინაგანი მონოლოგის კლასიკური მაგალითად ისევ ჯოისის “ულისეს” ფინალურ ნაწილს დაგასახელებთ – მოლი ბლუმის შინაგან მონოლოგს, რომელსაც არც შესავალი აქვს, არც – დასასრული, არც იმ ადამიანებისა და მოვლენების შესახებაა რაიმე განმარტებული, რომლებსაც მოლი ასოციაციურად იხსენებს და სადაც ავტორი, ფაქტობრივად, არ არსებობს. აქ ჯოისი ცდილობს, შეძლებისდაგვარად ცნობიერების ნამდვილი სტრუქტურა წარმოაჩინოს (Humphrey 1968: 23-31). იმ შემთხვევებშიც კი, სადაც ავტორი გარკვეული სახით გამოჩენება (როგორც ზემოთ ვისაუბრეთ), ის ცდილობს ტექსტში არ ჩერთოს და არ შეწყვიტოს პერსონაჟის ფიქრთა ნაკადი. ზოგიერთ შემთხვევაში პირდაპირი შინაგანი მონოლოგი კიდევ უფრო რთულ ამოცანას ისახავს მიზნად – წარმოაჩინოს გმირის არაცნობიერი (უნდა აღინიშნოს, რომ ამგვარი რამ მხოლოდ ჯოისმა და კონრად აიკენმა გააკეთეს), რაც ცალსახად ფსიქოანალიტიკური თეორიის გავლენაა.

არაპირდაპირ შინაგან მონოლოგში ავტორის როლი ამდენად შეზღუდული არ არის და ის უფრო ინტენსიურად შემოდის ტექსტში. შეიძლება ითქვას, რომ თავისი კომენტარებითა და აღწერილობებით, ავტორი შუამავლის როლს თამაშობს

გმირის ფსიქიკასა (ცნობიერსა) და მკითხველს შორის. ავტორი აკეთებს შესავალს, შემდეგ რაღაც პერიოდით იკარგება, მერე ისევ შემოდის ტექსტში კომენტარის მეშვეობით და ასე შემდეგ. ამგვარ შინაგან მონოლოგს მიმართა “ცნობიერების ნაკადის” ლიტერატურის მწერალთა უმეტესობამ. ბუნებრივი და ორგანულია არაპირდაპირი და პირდაპირი მონოლოგების კომბინაციაც (Humphrey 1968: 23-31).

ოთარ ჭილაძის პროზაში, რადგანაც ის არ არის “ცნობიერების ნაკადის” ავტორი, პირდაპირი შინაგანი მონოლოგები, ფაქტობრივად, არ გვხვდება. მის პროზასთან უფრო ახლოს დგას არაპირდაპირი შინაგანი მონოლოგი, სადაც ავტორის, მთხოვბელის როლი უფრო თვალშისაცემია, თუმცა აქაც არ შეიძლება ვისაუბროთ იმგვარ არაპირდაპირ შინაგან მონოლოგზე, რომელზეც რობერტ ჰამფრი წერს, რადგან დროთა განმავლობაში, შინაგანი მონოლოგის ამ ფორმამაც ტრანსფორმაცია განიცადა და კიდევ უფრო განსხვავებული სახით დამკვიდრდა ლიტერატურაში (მაგალითად, ოთარ ჭილაძის პროზაში ავტორი ბევრად ღრმადაა შინაგანი მონოლოგის ტექსტში შექრილი, უფრო ინტენსიურად და გაბედულად ერთვება პერსონაჟის ფიქრებში, არ ერიდება ფიქრთა ნაკადის დარღვევას. შესაბამისად, ავტორის გამოჩენა, ჩართვა, იმპერსონალიზაცია თუ პერსონაჟის მთხოვბელად გადაქცევა, მკითხველისთვის დამატებით სირთულეს ქმნის).

შინაგანი მონოლოგი პერსონაჟის სულიერ მდგომარეობას ასახავს, ის წვეულებრივ რეალისტურ ნაწარმოებებშიც გვხვდება და ე. წ. “ცნობიერების ნაკადის” ლიტერატურაშიც, მაგრამ სხვაობა ამ შინაგან მონოლოგებს შორის დიდია, რადგან ტრადიციული რომანისგან განსხვავებით, “ცნობიერების ნაკადის” შინაგანი მონოლოგი არის გმირის შედარებით ხანგრძლივი ავტოკომუნიკაციური მეტყველება და მისი გამოუთქმელი ფიქრთა ნაკადის, აზრის შინაგანი განვითარების პირობითი მხატვრული რეპროდუქცია, რომელიც პერსონაჟის არაცნობიერის წვდომას ისახავს მიზნად (საყვარელიძე 1974: 168; ყიასაშვილი 1983: 15) როგორც წერს ედუარდ დიუჟარდენი, შინაგანი მონოლოგი პერსონაჟის ცნობიერებაში აღმოცენებულ აზრთა უწყვეტ ნაკადს ასახავს, თანაც იმ სახით, რა სახითაც ფორმდება და იმ თანმიმდევრობით, როგორითაც ვითარდება. რეალისტურ რომანში განარჩევენ გმირის სულიერი მდგომარეობის ასახვის ისეთ ტექნიკას, როცა მონაცვლეობს საავტორო ტექსტი, რომელიც ობიექტურად აღვიწერს პერსონაჟის შინაგან მდგომარეობას, თვით გმირის შინაგანი სამეტყველო რეაქცია

და მისი ფიქრების ავტორისეული თავისუფალი ინტერპრეტაცია (მაგალითად, გოლზუორთისა და დრაიზერის პროზა) (Glauser 1948) ამიტომ, თუ რეალისტურ რომანში შინაგანი მონოლოგის მიზანი ფსიქოლოგიური რეალიზმის შექმნაა, “ცნობიერების ნაკადის” ლიტერატურაში ის უფრო ფსიქოლოგიური ნატურალიზმისკენ ისწრაფვის (საყვარელიძე 1974: 169). ასე ხდება ინგლისურ მოდერნისტულ ლიტერატურაში და კონკრეტულად ჯეიმს ჯოისის შემოქმედებაშიც. მაგრამ დროთა განმავლობაში შინაგანმა მონოლოგმა ეს ფუნქცია დაკარგა და მას უკვე მხატვრული ეფექტის მიზნით იყენებენ, როგორც ამას აკეთებს უილიამ ფოლკნერი, “მის რომანებში ეს ტექნიკა, ეს მექანიზმი მაშინ იწყებს მოქმედებას, და სავსებით კანონზომიერადაც, როდესაც გმირის სულიერი დრამა უკიდურესად გამწვავებულია, ტრაგიკულ კონფლიქტამდეა მისული” (თოფურიძე 1984: 35).

ასევე იყენებს “ცნობიერების ნაკადის” ტექნიკას შინაგან მონოლოგებში ოთარ ჭილაძე – მხოლოდ მაშინ, როდესაც ეს გმირის როულ შინაგან მდგომარეობას უსვამს ხაზს. რომანი “გოდორი” თითქმის მთლიანად შინაგანი მონოლოგებისგან შედგება. ამ მონოლოგებს შეიძლება საკუთრივ შინაგანი მონოლოგები დაერქვას და არა “ცნობიერების ნაკადის” შინაგანი მონოლოგები, მაგრამ შიგადაშიგ, უფრო მეტად კულმინაციურ მომენტებში, როცა პერსონაჟი უკიდურესად კრიზისულ მდგომარეობაშია და საკუთარ თავს უდრმავდება, მონოლოგებში ერთვება ასოციაციური აზროვნება, რომელსაც არაცნობიერთან მივყავართ, ირდვევა თხრობის ლოგიკა, ქრონოლოგია, და გმირი იკარგება საკუთარ ტექსტებში. სწორედ ამგვარ ადგილებში იკვეთება “ცნობიერების ნაკადის” ტექნიკა, რაც ლოგიკურადაც გამართლებულია, რადგან სულიერი დრამის პირობებში ალოგიკურად აზროვნება ბუნებრივია.

ყოველივე ეს კარგად ჩანს რომან “გოდორის” ბოლო ნაწილის შინაგან მონოლოგებში (ლიზიკოს, ანტონის, ელიზბარის), სადაც “ცნობიერების ნაკადის” ტექნიკა განსაკუთრებით თვალშისაცემია.

ფსიქიატრიულ საავადმყოფოში მყოფი ვენებგადაჭრილი ლიზიკოს განცდების საჩვენებლად, წარმოდგენილია შინაგანი მონოლოგი, რომელშიც ჩვეულებრივი, გააზრებული მსჯელობებიც გვხვდება, მაგრამ დროდადრო ავტორს მოქმედება პერსონაჟის ცნობიერებაში გადააქვს და ტექსტს აბუნდოვნებს. პერსონაჟის

არეული და გაუფორმებელი ფიქრებიდან ვიგებთ, რომ ის გადარჩა, თუმცა აღარ იცის რა ხდება ობიექტურ სინამდვილეში, ამიტომაც თავის სუბიექტურ სამყაროს ეპედლება: „ღმერთო, მიმანიშნე, მასწავლე, როგორ ვუშველო! აქედან გავალ თუ არა, უნდა დაველაპარაკო, გულწრფელად... აღარაა ამის დრო. დედაზე უფრო დედაო... ვინ თქვა? ვის უთხრა? არ მახსოვეს. არ ვიცი. არაფერი არ ვიცი. რაც არ ვიცი, ის ვიცი მხოლოდ. ორივემ უნდა გავხსნათ ფრჩხილები. სულ კვარცხლბეგზე დოგმა უბედურებაა. ვინმე მაინც გიყურებდეს. ვის რაში სჭირდები?! ვინ რად გაგდებს? ხალხმა უკვე მოიხელა. ახალ-ახალი მსხვერპლი სჭირდება ყოველდღე, ცოცხალი, სისხლით გატიკნული... მოიძრე გვირგვინი, ჩამოიბანე გრიმი და ჩაუჯექი მამამთილს კალთაში... მიყევი ცხოვრების დინებას, იბერიიდან იბერნიამდე და უკან, იბერნიიდან იბერიამდე... ერთი. ორი. სამი. ოთხი. ხუთი. ექვსი. შვიდი. რვა. ცხრა. ათი. თერთმეტი. თორმეტი. ცამეტი. ... უყურეთ ერთი რა ამბით ჩხავის! ეტყობა, მიცნო ... ვერ ვხედავ სად ზის... ვერ ვხედავ, მაგრამ ვგრძნობ. როგორ უნდა დავინახო თვალდახუჭულმა, ჰააა?! დეიდა ლენა... თქვენ გეკითხებით ქალბატონო... რა საერთო აქვს კაჭკაჭს ყვავთან?!” (ჭილაძე 2006: 365).

ან მეორე მაგალითი: “უფალო, გაანათლე მხევალი შენი ლიზიკო... მეშინია. მეშინია? არაფრისაც არ მეშინია. თითქმის აღარც ვარ. ჩიტმა რაღაცა აკენგა ჩემი სკამის ფეხთან და ნისკარტით მშვიდად გაუსვ-გამოუსვა ფილაქანს, ვითომც არაფერი... იმისთვის უკვე აღარ ვარსებობ... შეიძლება მომეჩვენა, წარმოვიდგინე, მაგრამ ამით, განა რამე იცვლება? დამნაშავე უნდა დაისაჯოს. მაგრამ ჩვენ კი არვისჯებით, ვისპობით.” ... (ჭილაძე 2006: 374).

პერსონაჟს გააზრებული აქვს თავისი საქციელის სიმძიმე და ეს მოსვენებას არ აძლევს. გარდა ამისა, ის მუცლით ატარებს ცოდვის ნაყოფს (შესაძლოა, უკვე აღარც ატარებს, მაგრამ ამას თავად ვერ ხვდება). მაგრამ ლიზიკო მთელ დანაშაულს საკუთარ თავზე არ იდებს და პასუხისმგებლობას საზოგადოებასაც აკისრებს, რომელმაც საშუალება მისცა რაედენ კაშელს რძალთან ამგვარი ურთიერთობა დაემყარებინა. ეს ფრაზები, უკიდურესი სასოწარკვეთისა და უბედურების ჟამს, ლიზიკოს სულიერი მდგომარეობის გამოძახილია, ამიტომ მისი ცნობიერის წარმოდგენა ავტორის მიერ, ვფიქრობ, საუკეთესო გამოსავალიცაა, რადგან ამ მდგომარეობაში გმირს არ შეუძლია, ჰქონდეს ჩამოყალიბებული, დალაგებული ფიქრები, დასკვნები, რომლებიც ავტორის მიერ აქცენტირდება და

გეგმები, რომელსაც იგი მომავლისთვის დასახავს. ლიზიკოს მხოლოდ ასე შეუძლია აზროვნება – წყვეტილად, ქაოტურად, ბუნდოვნად, და ავტორსაც არ ერიდება მისი წყვეტილი აზრების პირდაპირ, გაუფორმებლად გადმოცემისა, რადგან მისი სასოწარკვეთილება ერთადერთია, რაც ლიზიკოს გაამართლებს და მკითხველის თვალში თანაგრძნობას გამოიწვევს. ზემოთ მოყვანილი ქვეცნობიერის ამსახველი ფრაზები კი ჩართულია შინაგან მონოლოგში, სადაც ჩვეულებრივი, გააზრებული მსჯელობაც გვხვდება, მაგალითად: “რაც მე ჩავიდინე, თუკი მართლა ჩავიდინე, სასაცილოდაც არ ეყოფათ ხვალინდელ გოგონებს. ჩვენს სკოლაში პირველად შაშუბეშა თეამ გაიხადა და გარიცხეს, მაგრამ მეორე სემესტრში უკვე მასწავლებლებიც იხდიდნენ. ვიდაცის ბნელი მშობელი მოგვივარდა ბენზინის ბალონით, დედაბუდიანად უნდა გადაგწვათო, არადა, სამნეო განყოფილების გამგე უკვე ფულს ადებინებდა შედარებით გამოსულ მშობლებს სტრიპტიზისთვის საჭირო ინვენტარის შესაძენად” (ჭილაძე 2006: 363). თუმცა ასოციაციური გადასვლები ისევ და ისევ აბუნდოვნებს ტექსტს.

“ცნობიერების ნაკადის” ტექნიკისთვის განსაკუთრებით მნიშვნელოვანი და განმსაზღვრელი მოვლენაა ასოციაციური აზროვნება. მისი ამოცანა ცნობიერების მუშაობის ფიქსაციაა, რომელიც უამრავ შთაბეჭდილებას დებულობს, მათგან არჩევს მისთვის ყველაზე მნიშვნელოვან შთაბეჭდილებებს და მათ შორის ასოციაციურ კავშირს ამყარებს. შეიძლება ითქვას, რომ “ცნობიერების ნაკადი” აღწერს ცნობიერის მუშაობის პროცესს და წარმოადგენს მას არა დიალოგებით, არამედ ფიქრთა ნაკადით, შთაბეჭდილებებით, ემოციებითა და პერსონაჟის ასოციაციურად, ალოგიკურად დაკავშირებული მოგონებებით, რომლებიც ხშირად სინტაქსურადაც გაუფორმებელია (современный словарь-справочник по литературе 1999: 369).

ასოციაციური აზროვნება ორგვარი ბუნებისაა: ერთ შემთხვევაში ასოციაცია ეყრდნობა გმირის ან მთხობელის გონებაში არსებულ, თითქოს ერთმანეთთან დაუკავშირებელ მოვლენებს. აქ ნიშანსვეტები ერთმანეთს მიემართებიან და შემდგომ კიდევ ახალ ასოციაციებს წარმოქმნიან. მეორენაირი ასოციაცია კი უკვე ავტორის მიერაა გააზრებული და ერთგვარად მისი კონცეფციის ნაწილია. ასეთ დროს ასოციაცია მიმართულია იქითქენ, რომ აჩვენოს პერსონაჟის ფიზიკური

არსებობის გამომხატველი ფაქტები, იქნება ეს მის სულიერ სამყაროსთან კავშირში თუ არა. ეს უკვე მწერლის კომენტარებია, რომელსაც იგი ურთავს გმირის ნაფიქრში, რათა თავად გმირის გაფანტული ასოციაციები ნაწარმოების მთავარ სათქმელს დაუკავშიროს. ნიკო ყიასაშვილის აზრით, ამის კარგი მაგალითია ჯოისის “ულისეში” სტივენ დედალოსის მიერ ვიკოს ქუჩის ხსენება. სტივენ დედალოსისთვის ვიკო არანაირ ასოციაციურ ნიშანსვეტს არ წარმოადგენს, მაგრამ ეს თავად ავტორისათვის არის მნიშვნელოვანი, რადგანაც ვიკოს პულტუროფილოსოფია მკითხველს რომანის მთავარ სათქმელზე მიანიშნებს – თუ როგორ კრიზისულ მდგომარეობაშია მეოცე საუკუნის ეჭვებით ატანილი ადამიანი. ანუ ხშირად ავტორისა და გმირის ასოციაციები ერთმანეთს გადაკვეთს, ეს კი ყოველთვის რომანის მთავარი კვანძებია (ყიასაშვილი 1983: 21-22).

მაგალითისთვის ისევ “გოდორსა” და ისევ ლიზიკოს მივუბრუნდეთ. არაცნობიერ მეტყველებაში ლიზიკო დედინაცვალზე - ელისოთზე ფიქრობს, მერე კი უნებურად ახსენდება ფრაზა “დედაზე უფრო დედაო” – ეს ნიშნავს, რომ მისი ასოციაცია წავიდა სიტყვის არსზე – დედა და ელისო მოიაზრა, როგორც დედა. დედა, ალბათ, ერთადერთი არსებაა, ვინც შეიძლება ასეთ დროს მხარში დაუდგეს პერსონაჟს. ეს პერსონაჟის უმწეობაზე მიანიშნებს: “არ მახსოვს. არ ვიცი. არაფერი არ ვიცი”. შემდეგ ლიზიკო იწყებს გონებაში თვლას, არეული რიცხვების ფონზე ჩნდება ახალ-ახალი ასოციაციები: დეიდა ლენა – კაჭკაჭი – პეპლები – მე-პეპლა – მომაკვდავ პეპლასთან ჩაცუცქული ბავშვები (ეს, თითქოს კრავს წინა ასოციაციებს) – დაუნდობელი ბავშვები, რომლებიც მწერებს ხოცავენ – მათი გამოცდილება – ეს გამოცდილება ვერ გამოიყენა ანტონმა - პირდაღებული იდგა – აქ შემოდის რაედენის “პირობითი” მკვლელობის სცენა (ისევ შეიკრა ასოციაციები, გამოიკვეთა ახალი თემა) – აქცენტი დედამთილის, ფეფეს დანიშნულებაზე – ლიზიკოს ქორწილის დღე და ასე შემდეგ.

მაგრამ ამავდროულად ლიზიკოს მონოლოგში ჩართულია ისეთი ასოციაციებიც, რომლებიც მხოლოდ პერსონაჟის საკუთრებას არ წარმოადგენს, იგი ავტორსაც ეპუთვნის, ან მხოლოდ ავტორს და, როგორც ზემოთ ვთქვით, მწერალს ეს მთავარ სათქმელთან კავშირის დასამყარებლად დასჭირდა. მაგალითად, ლიზიკოს ფიქრში ელისოთზე (და სხვაზეც), იგი ჩაურთავს ფრაზას: “ვის რაში სჭირდები? ვინ რად გაგდებს? ხალხმა უკვე მოინელა. ახალ-ახალი

გმირი და მსხვერპლი სჭირდება ყოველდღე, ცოცხალი, სისხლით გატიქნული...” (ჭილაძე 2006: 366). ეს ფრაზა, საგარაუდოდ, საერთოა ავტორისა და პერსონაჟისთვის, რადგან ლიზიკო აქ საკუთარ უბედურებას გულისხმობს, ავტორი კი საზოგადოების გულგრილობასა და უყურადღებობაზე, მის უსამართლობაზე აკეთებს აქცენტს, რაც ისედაც ერთ-ერთი მთავარი პრობლემაა მწერლისთვის არა მხოლოდ “გოდორში”, არამედ თითქმის ყველა რომანში.

ამავე მონაკვეთში ლიზიკო ფიქრობს: “მიყევი ცხოვრების დინებას იძერიიდან იძერნიამდე და იძერნიიდან იძერიამდე” (ჭილაძე 2006: 366). ეს კი უკვე მწერლის კუთვნილი ასოციაცია – იძერის ხსენება. საქართველოს, იძერის, სამშობლოს თემა, ერთ-ერთი წამყვანია ოთარ ჭილაძის შემოქმედებაში. ამიტომ ამ შემთხვევაში იძერის ხსენებას გავყავართ ნაწარმოების მთავარ ხაზზე – სამშობლო გასაჭირებია და ერთ დროს იძერიას, ახლა გადაუჭრელი პოლიტიკური და ზნეობრივი პრობლემების წინაშე დამდგარა. სხვა შემთხვევაში ლიზიკოს მდგომარეობაში საქართველოზე ფიქრი ნამდვილად გასაკვირია. მას თითქოს შემთხვევით აგონდება ეს სიტყვა, სინამდვილეში კი “იძერია” რომანის პირველ გვერდზე გვაბრუნებს, სადაც ლუდოვიკო ბოლონიელი საქართველოსკენ მიემართება და სადაც საქართველო ჯერ კიდევ პატივისცემის დირსია – “რაინდული კეთილშობილებითა და მეომრული შემართებით სახელგანთქმული ქვეყანა” (ჭილაძე 2006: 10).

გავიხსნოთ ასევე ანტონის ფიქრები ომში ყოფნისას: “მე ყველაზე ჭორფლიანი გოგო ვარ მთელს სანაპიროზე... მაგრამ სხნა არსებობს. ეტყობა, სიმდაბლის მწვერვალს უნდა მიაღწიო, რათა ხელახლა აღსდგე. სხნა ნამდვილად არსებობს, სადღაც აქვე, ახლომახლო... შეიძლება, ამ სანგარიშიც, ჩვენს შორის... მე თვითონ ვიცნობდი ერთ გამოსწორებულ ნარკომანს” (ჭილაძე 2006: 327). ანტონის ფიქრები აქეთ-იქით დახტის, მაგრამ ფრაზა – “ეტყობა, სიმდაბლის მწვერვალს უნდა მიაღწიო, რათა ხელახლა აღსდგე”, ცხადია, არ შეიძლება მხოლოდ მისი ასოციაცია იყოს, რადგან ეს ოთარ ჭილაძის შემოქმედების – გმირების ძერწვის – ერთ-ერთი პრინციპია. მასთან მხოლოდ უკიდურეს ზღვრამდე მისული, დამდაბლებული, განადგურებული ადამიანები ახერხებენ გარდაქმნას, რადგან მათ ყველაფერი ნახეს, საკუთარ თავზე იწვნიეს, დაეცნენ, მაგრამ გადარჩენა შესძლეს და ხელახლა ამოზრდნენ საკუთარი თავიდან.

ასევე ელიზბარის შინაგან მონოლოგში ერთმანეთს ებმის და განაპირობებს სხვადასხვა ასოციაცია: “ეცადე, მართლა დაიძინო. ანდა ცოტა კარგზეც იფიქრო. კარგი თუ არაფერი გაქვს, რიღასთვის ომობ?! კარგია თუ ავია, ნამდვილი საქართველო ამ სანგარში ზის. ესე იგი ცხოვრება გრძელდება... რაც მთავარია, სწორედ ისეთი დღეა, შენ რომ გიყვარს – ჩაწყნარებულ-ჩამყუდროებულ-დაძაბულ–დაულეველ სიცოცხლით სავსე, ბაყაყის ყიყინით, ჩიტის ჭიკჭიკით, მწერისა და ქვეწარმავლის ფაჩუნით გაბრუებული. ოდონდ, სად? აქ თუ ქვიშეთში?” (ჭილაძე 2006: 332). ქვიშეთი – მწერები – ელიზბარი ჭიანჭველაა, რომლესაც არასდროს სძინავს – ხეებზე ციყვია – ციყვი არ ენდობა ადამიანს – ადამიანს მკვლელის ბუნება აქვს (ეს შეიძლება ავტორისა და გმირის საერთო ასოციაციად ჩაითვალოს) შემდეგი ფიქრი კი, რომელიც იარაღის ხმის ფონზე ჩნდება, უკვე ავტორის კონცეფციის მატარებელია: “თუ რადაც იწვის?! თუ იწვის, კარგი რადაც იწვის. დრანგ. სამშობლო. დრანგ. ყველაფერს დათმობს კაცი ამ სურნელისთვის. დრანგ. სამაგიეროდ, მიწაში ჩამპალ ფესვებს, მშობლიურსაც კი, საშინელი სუნი ჰქონია. მასუნთქეთ ჩემი სამშობლოს სურნელი. სურდა არ მინდა. სიცოცხლეს ვიხდი მთლიანად. რაც არ უნდა პარადოქსულად ჟღერდეს ჩვენს დროში, სამშობლოს სურნელს ვერ გაყიდი” (ჭილაძე 2006: 333). აქ ავტორის მიერ აქცენტირდება საქართველოს რთული პოლიტიკური მდგომარეობა (სამშობლო იწვის) და ადამიანების, ამ შემთხვევაში ელიზბარის მსგავსი ტიპაჟების, დამოკიდებულება მისდამი (ყველაფერს დათმობ, მაგრამ ვერ გაყიდი).

საბოლოოდ შეიძლება ითქვას, რომ “ცნობიერების ნაკადის” ტექნიკამ, რომელიც მეთოდისგან დამოუკიდებლადაც არსებობს, როგორც გამოხატვის ფორმა და მხატვრული ხერხი, რომანში “გოდორი” ყველაზე ცხადად იჩინა თავი. “გოდორი” მთლიანად შინაგან მონოლოგებზეა აგებული, რომელთაგან ზოგი რეალისტური ნაწარმოებების შინაგან მონოლოგს მოგვაგონებს, მაგრამ მაშინ, როდესაც სიუჟეტი მძაფრდება და გმირების დაძაბულობა კულმინაციას აღწევს, შინაგან მონოლოგებში შემოდის “ცნობიერების ნაკადის” ტექნიკა – ასოციაციური აზროვნება, აღრეული ქრონოლოგია, წყვეტილი, ქაოტური აზრები, მარტივი წინადადებები, გამეორებები, სინტაქსური ტავტოლოგია. წინ წამოიწევს პერსონაჟის სუბიექტური სამყარო და მოვლენისადმი მისი სუბიექტური დამოკიდებულება. აქვე მინდა აღვნიშნო, რომ როდესაც ოთარ ჭილაძის პროზაში არსებულ “ცნობიერების

ნაკადის” ტექნიკას ვახსენებთ, არ ვგულისხმობთ ამ ცნების ჯოისისეულ კლასიკურ გაგებას, სადაც “ცნობიერების ნაკადის” მიზანი ზოგადადამიანური, კერძოდ კი, მე-20 საუკუნის კრიზისში მყოფი ადამიანის ფსიქიკის გაშიშვლებაა, არამედ ამ მეთოდის მხოლოდ გარეგნულ, ტექნიკურ მხარეს, რაც მიზანმიმართულად გამოიყენა უილიამ ფოლკნერმა თავის რომანებში. რადგან ამ შემთხვევაში ჭილაძის, ისევე, როგორც ფოლკნერის მიზანი, გმირის ტრაგიკული განცდების წარმოჩენა და მისი ხასითის უკეთ წვდომაა.

როგორც ვხედავთ, ოთარ ჭილაძემ რომანში “გოდორი”, ოსტატურად გამოიყენა “ცნობიერების ნაკადის” ტექნიკა, რამაც ხელი შეუწყო პერსონაჟების ხასიათებისა და ნაწარმოების პრობლემატიკის წარმოჩენას. ამ რომანში: 1. ტრადიციულ შინაგან მონოლოგებში პერიოდულად ერთვება “ცნობიერების ნაკადის” ტექნიკა, შესაბამისად აქ გვხვდება ტრადიციულიც და “ცნობიერების ნაკადისეული” შინაგანი მონოლოგებიც, 2. ამ ტექნიკას მწერალი იყენებს მხატვრული ეფექტისთვის (როგორც უილიამ ფოლკნერი), როცა მისი გმირები კრიზისში არიან და მათი განწყობის გამოსახატავად ასოციაციური აზროვნება საუკეთესო საშუალებაა. 3. ავტორი შინაგან მონოლოგებს სიუჟეტით არ ტვირთავს, ამიტომ შიგადაშიგ ახერხებს არაცნობიერის წვდომას და შედეგად ჯოისისეულ კონცეფციასაც უახლოვდება. 4. ხშირად თხრობა III პირში მიმდინარეობს, მაგრამ შინაგანი მონოლოგი მაინც ინარჩუნებს “ცნობიერების ნაკადისეულ” ფორმას. ეს ყველაფერი ერთად წარმოადგენს “ცნობიერების ნაკადის” ტექნიკის ოთარ ჭილაძისეულ ინტერპრეტაციას.

2. “ცნობიერების ნაკადის” ტექნიკა რომანში “მარტის მამალი”

ოთარ ჭილაძის მეორე რომანი, რომელიც 1987 წელს გამოქვეყნდა და სადაც “ცნობიერების ნაკადის” მეთოდისა თუ ტექნიკის მხოლოდ გავლენაზე შეგვიძლია ვისაუბროთ, არის „მარტის მამალი“. ამ რომანში ტექნიკა ნაკლებად ფუნქციურია, მაგრამ “ცნობიერების ნაკადის” მეთოდის შინაარსობრივი მხარეა აქცენტირებული – შინაგანი მონოლოგების საშუალებით, რომლებიც მთელს რომანს მოიცავს, წარმოჩენილია პერსონაჟის სულიერი სამყარო, მისი გაცნობიერებული თუ გაუცნობიერებული სურვილები, სუბიექტური განცდები, არეულია ფაქტების ქრონოლოგია და მინიმუმამდეა დაყვანილი სიუჟეტი. ნაწარმოები მთავარი გმირის ერთ უზარმაზარ შინაგან მონოლოგს წარმოადგენს, მცირე რეალური პლანი კი მხოლოდ გმირისა და მისი გარშემომყოფების ფიზიკური არსებობის დამადასტურებელია.

ნაწარმოების სიუჟეტი თითქოს მარტივია – თხუთმეტი წლის ნიკო ომისა და მამის ავადმყოფობის გამო, დედამ ბათუმიდან ბებიასთან და პაპასთან, სიღნაღში გამოხიზნა, სადაც ის მკვლელობას შეესწრო. ამ ფაქტმა ისე ძლიერად იმოქმედა მოზარდზე, რომ ის ერთი თვის განმავლობაში “ავადმყოფობს” – ანუ გაუნძრევლად წევს საწოლში და საკუთარ თავს უდრმავდება. რამდენადაც მარტივი და ადგილად აღსაქმელია სიუჟეტი, იმდენად რთულია გმირის შინაგანი სამყარო. სწორედ მისი მოგონებებიდან, წარმოსახვებიდან თუ სიზმრებიდან ვგებულობთ მისი ცხოვრების სხვადასხვა დეტალებსა და ამბებს, მის დამოკიდებულებას სხვა პერსონაჟებთან, რაც განსაზღვრავს მათდამი მკითხველის დამოკიდებულებასაც. ნაწარმოები იმდენად სუბიექტურია, რომ შიგ ჩართული სხვა პერსონაჟების ფიქრებიც ნიკოს მიერაა განცდილი. ნიკო წარმოიდგენს თავს საკუთარ პაპად, რომელიც ომიდან გამორბის, რათა მშობლიურ სახლს დაუბრუნდეს და მასავით ტანჯვით გამოივლის თოვლიან გზას: “თუ შეიძლება ასე ითქვას, იწყება მის მიერ გათავისებული პაპისეული მოგონებები, ანუ – წარმოდგენა უგმიროდ, უფრო ზუსტად კი, წარმოდგენა სხვისი მოგონებებისა, სადაც ყველა მთავარი გმირი თვითონაა, ყველა “საინტერესო” როლს თვითონ

ასრულებს მთელი მონდომებით, ვნებითა და მდელვარებით. და ასე მარტო იმიტომ კი არ იქცევა, რომ თავი გაირთოს, არამედ – გადაირჩინოს კიდევ ხანდახან, კიდევ ერთი, კიდევ ერთხელ მოულოდნელად გამომტყვრალი განსაცდელისგან” (ჭილაძე 1987: 17). ნიკო ესწრება ილია ჭავჭავაძის მკვლელობასაც, ილის ნაცვლადაც განიცდის და მკვლელის მაგივრადაც იტანჯება: “ნიკოს კი, სიბრაზისგან, უმწეობისგან, ლამის გული გაუსკდეს. დაბადებული მაინც იყოს, რამე რომ მოიმოქმედოს... მაგრამ არ არის, არ არსებობს ჯერ და ისევ სხვათა წარსულში გარბის გამწარებული. უფრო სწორად, გამწარებული გამორბის სხვათა წარსულიდან, თესლის ბნელსა და იდუმალ გზას მოჰყვება არარაობიდან სიცოცხლისკენ, რათა იშვას, დაიბადოს, აღმოცენდეს და თავიდან დაიწყოს ყველაფერი” (ჭილაძე 1987: 332). ნიკო ფიქრობს დედის ნაცვლად თავის შვილზე, რომელიც თითქოს “ხელს უშლის” მამის მოვლაში და ამიტომაც გზავნის სიღნაღმი; უიმედოდ შეყვარებულია, როგორც მისი ახალგაზრდა დეიდა, რომელიც ისევ და ისევ ელოდება მისი რჩეულის ომიდან დაბრუნებას და ვანო მასწავლებელივით გლოვობს დაღუპულ თუ დაკარგულ პატარა შვილს. ნიკო საკუთარი თავის გარდა, ყველა ის პერსონაჟია, რომელიც ნაწარმოებში გვხვდება, ამიტომ ასეთი სუბიექტური დამოკიდებულება საშუალებას გვაძლევს, ამ რომანში “ცნობიერების ნაკადის” მეთოდისა და მისი გამომსახველობითი ფორმის გავლენაზე ვიფიქროთ. გარდა ამისა, საკუთარი მოგონებებიცა და წარმოსახული წარსულიც მხოლოდ ასოციაციურად ებმის ერთმანეთს – ილიას მკვლელობის დრამატულ წარმოსახვას მოსდევს ჯარისა და სანგრის აღწერა, შემდეგ მის წარმოსახვაში ნიკო-პაპა სახლისკენ მოემართება, ხედავს მამის დახუჭულ თვალებს, საიდანდაც ესმის ვანო მასწავლებლის ხმა, შემდეგ ნიკო-ყაჩაღი ცეცხლს აჩაღებს და ასე შემდეგ.

თავის შინაგან მონოლოგში ნიკო გამუდმებით ასოციაციური აზროვნების ზღვარზეა, რადგან არა ლოგიკურად, არამედ ასოციაციურად ახსენდება ესა თუ ის ამბავი. ავტორის ტექსტში ჩართულობის მიხედვით, შინაგანი მონოლოგი ხშირად ტრადიციული, რეალისტური ნაწარმოების მონოლოგს ჰგავს, მაგრამ მთავარი ისაა, რომ ნიკოს მონოლოგების მიზანი ავტორთან ერთად არა სწორხაზოვნად ერთი კონკრეტული თემის განვითარებაა (როგორც რეალისტურ ნაწარმოებში), არამედ ისევე, როგორც “ცნობიერების ნაკადის” შინაგან მონოლოგებში, მისი შინაგანის

სამყაროს, მაისი არაცნობიერის წვდომა და იმ პრობლემების აღმოჩენა, რაც ნიკოს „განკურნების”, სულიერი განახლების საწინდარი უნდა გახდეს.

ნაწარმოების ემპირიული რეალობა პასიურია და რაც ხდება, უფრო ზუსტად, რაც უკვე მოხდა, იმას ისევ ნიკოს ფიქრებიდან ვიგებთ. შეიძლება ითქვას, სიუჟეტი წარსულ მოვლენებზე დაყრდნობით არსებობს და წარსული განსაზღვრავს რომანის „აწმყო” მოქმედებას. რომანის დერძი ნიკოს მოგონებების, ასოციაციურად დაკავშირებულ ამბებისა და ფიზიკური უძლეურების ფონზე, ნიკოს მშობლებთან ურთიერთობაა - დედასთან ყოფნის სურვილი, დედაზე ეჭვიანობა და, შესაბამისად, მამისა და საკუთარი დანიშნულების გააზრების მცდელობა. მთავარი ასოციაციური ნიშანსვეტი ნაწარმოებში სწორედ დედ-მამაა და ყველაფერი ამის გარეშემო ტრიალებს. ყოველი ფიქრი, საკუთარი თუ სხვისი მოგონება ნიკოს აბრუნებს იმ აზრთან, რომ მან ვერ მოასწრო “დედის წიაღში გამოშუშება”, ადრე მოხსენდა დედას, და ახსენებს ამის მიზეზს - ავადმყოფ მამას, რომელმაც ნიკოს დედის ყურადღება წაართვა. ეს უნებურად, ქვეცნობიერად აპირისპირებს მამასთან, სანამ ტყეში გავარდნილი უცნობი ყაჩაღის მეშვეობით, რომელიც მამას აგონებს, არ შესძლებს მამის „პატიებას“. საბოლოოდ ნიკო „განიკურნება“, კვანძის გახსნა ხდება ისევ სუბიექტურ სამყაროში - ნიკოს სიზმარში, სადაც მინიშნებებითა და სიმბოლოებით ის ახერხებს თავისი დანიშნულების გააზრებას.

“ცნობიერების ნაკადის” ნაწარმოებს „მარტის მამალი“ რამდენიმე მიზეზით ემსგავსება: 1. რომანი წარმოადგენს ერთ დიდ მონოლოგს, სადაც შერწყმულია სუბიექტური და ობიექტური პლანი, მაგრამ სუბიექტურს აშკარა უპირატესობა ენიჭება; 2. ნაწარმოებში არ გვხვდება მკვეთრად ჩამოყალიბებული სიუჟეტი და რეალურ პლანს ქმნის ლოგინად ჩავარდნილი ნიკო და მის გარეშემო მოტრიალე ადამიანები. 3. რომანი, ძირითადად, ასოციაციურად დაკავშირებულ ფაქტებს და, შესაბამისად, მოგონებებს, წარსულს ეყრდნობა. 4. ეს ყოველივე ემსახურება მთავარი პერსონაჟის შინაგანი სამყაროს ამოხსნას, შესაძლოა, ნაწილობრივ მისი არაცნობიერის წვდმასაც, რაც საბოლოოდ გამოიხატა ნიკოს სიზმარში, რომელიც ნაწარმოების კულმინაციური მომენტია და რომელიც სწორედ არაცნობიერის გზავნილია.

ამ ყველაფრიდან გამომდინარე შეიძლება ითქვას, რომ “მარტის მამალში” აშკარად იგრძნობა “ცნობიერების ნაკადის” მეთოდის გავლენა (რაც, ტექნიკასაც გულისხმობს). რომანს ვერ დავარქმევთ ტრადიციულ რეალისტურ ნაწარმოებს რეალისტური შინაგანი მონოლოგებით, რადგან ამის თქმის საშუალებას ნაწარმოების ფორმა და მიზანი არ იძლევა, მაგრამ ის სრულად არც “ცნობიერების ნაკადის” კონცეფციას ემორჩილება, ამიტომ, ჩემი აზრით, აქ ტრადიციულისა და “ცნობიერების ნაკადისეულის” შერწყმის ავტორისეული ინტერპრეტაციაა წაროდგენილი. ამგვარი რამ ფოლკნერიდან დაწყებული არაერთმა ავტორმა სცადა, რადგან “ცნობიერების ნაკადის” ტექნიკა უამრავ სტილსა და ჟანრს ერგება. ამიტომ ყველა ავტორი, ვინც ამ ტექნიკას მიმართავს, მას თავისებურად იყენებს.

აღსანიშნავია ასევე, რომ რომანში “გოდორი” ჭილაძემ ამგვარ ტექნიკას მაშინ მიმართა, როდესაც გმირების სულიერმა მდელვარებამ უკიდურეს მდგომარეობას მიაღწია, “მარტის მამალში” კი საქმე ცოტა სხვაგვარადაა – ნაწარმოების მთავარი პერსონაჟი სულ ემოციებშია, დაძაბულია და სწორედ ამიტომ სწორხაზოვანი, რადგან ნაწარმოების რეალური პლანისა და მისი მოგონებების ფონზე, ნიკოს სულიერი დრამა არ მწვავდება, დინამიკაში არ ვითარდება და ერთ მომენტზეა დაფიქსირებული – ეს არის პერსონაჟის როლი, ემოციური, და ნაწილობრივ გააზრებული ძიება საკუთარი თავისა. ამიტომ, ვფიქრობ, ამ ნაწარმოებში ავტორმა მხოლოდ იმ დოზით მიმართა “ცნობიერების ნაკადის” გამომსახველობით ფორმას თუ აქცენტი გააკეთა მის შინაარსობრივ მხარეზე, რამდენიც თხრობის ლოგიკამ და პერსონაჟის სასიათმა მოითხოვა. “ცნობიერების ნაკადის” მეთოდი ამგვარად ლავირების საშუალებას ნამდვილად იძლევა.

3. ინდივიდუალური მეხსიერება “ცნობიერების ნაკადის” ტექნიკით

შესრულებულ რომანებში

(ოთარ ჭილაძის პროზის მაგალითზე)

წარსული არის ის, რაც განსაზღვრავს მეხსიერებას, იქნება ეს ინდივიდუალური მეხსიერება თუ კულტურული. ის, რაც მოხდა ერთი წამის წინ, უკვე მეხსიერების ნაწილია, მაგრამ საინტერესოა, მიუბრუნდება თუ არა ვინმე იმ წამს, გაიხსენებს თუ არა მას, ამას კი სუბიექტური დამოკიდებულება, “იმ წამთან” ემოციური კავშირი განაპირობებს. ამიტომ მეხსიერება ემოციასთან და ინდივიდუალურ აღქმასთან თანაარსებობს. დაახლოებით ასევე ფუნქციონირებს მეხსიერება მე-20 საუკუნის ლიტერატურაშიც, სადაც ის ძალიან მნიშვნელოვან როლს თამაშობს, რადგან ლიტერატურული ნაწარმოებები ეყრდნობა მითებს, ზღაპრებს, ბიბლიურ ამბებს (რაც მეხსიერების ნაწილია) და, რაც ყველაზე მნიშვნელოვანია, საკუთრივ პერსონაჟების მეხსიერებას. გმირები სამყაროს აღიქვამენ მოგონებების, ასოციაციურად დაკავშირებული წარსული ფაქტების საშუალებით, ამიტომ ისინი ბევრად სუბიექტურნი არიან, ვიდრე მათი წინამორბედი ლიტერატურული პერსონაჟები, უფრო უღრმავდებიან წარსულს და წარსულის მეშვეობით ცდილობენ მომავლის განსაზღვრასაც. ეს ყველაფერი თავისთავად ააქტიურებს მეხსიერების ფუნქციას. ადამიანის არსებობა წარმოუდგენელია წარსული გამოცდილების გარეშე, მეხსიერების ფუნქცია კი ამ გამოცდილების შეძენაა, წარსულში აღქმულის შენახვა და მომავალ ქცევაში მისი გათვალისწინება. ამიტომ, შეიძლება ითქვას, რომ მეხსიერებას თავისი სირთულითა და მოცულობით, ვერც ერთი სხვა ფსიქიკური ფუნქცია ვერ შეედრება (Нуркова 2006: 35).

კულტურის კვლევებში, ფილოსოფიასა თუ ფსიქოლოგიაში, მრავალმხრივ საინტერესოა თავად მეხსიერების ფენომენი – ვის მიემართება მეხსიერება, ინდივიდს თუ კოლექტივს? რას ნიშნავს “ინდივიდუალური მეხსიერება” და “კოლექტიური მეხსიერება”? ჯერ კიდევ არისტოტელე ამბობდა, რომ მეხსიერება ინდივიდუალური მოვლენაა, რადგან გამოხატავს იმას, რაც გვიგრძნია,

განგვიცდია და გვიფიქრია წარსულში (François-Xavier Lavenne... 1-3). ფილოსოფიასა და ფსიქოლოგიაში აღიარებულია, რომ მეხსიერება სუბიექტური გამოცდილებაა, მოგონება კი -პირადული ცნება და იდენტობის ჩამოყალიბებას უწყობს ხელს. ფრანგი ფილოსოფოსი პოლ რიკიორი აღნიშნავდა, რომ მეხსიერება შინაგან სამყაროს განეკუთვნება, რადგან მოგონებები ჩვენი კუთვნილებაა. თუმცა მეხსიერება თავის თავში “სხვებსაც” გულისხმობს (ანუ იმ ადამიანებს, რომლებიც ჩვენს მოგონებებში მონაწილეობენ) (Ricoeur 2004: 96-120). მეხსიერების თეორიული გააზრება სწორედ ინდივიდუალური მეხსიერების ცნებიდან იწყება და მხოლოდ მოგვიანებით ჩნდება კოლექტიური და კულტურული მეხსიერების ცნება. ამგვარი თეორიები XIX–XX საუკუნეების მიჯნაზე აღმოცენდა და მეხსიერების ფსიქოლოგიური მექანიზმებისა და ფუნქციების გამოკვლევებს დაეფუძნა. მოგონება განიხილებოდა როგორც მხოლოდ ინდივიდუალური მოვლენა. სწორედ ასე ესმოდა ეს საკითხი ინტუიტიური ფილოსოფიის ფუძემდებელს, ანრი ბერგსონს, ამერიკელ ფსიქოლოგს უილიამ ჯეიმსს, რომელმაც მეხსიერებაში “ცნობიერების ნაკადი” დაინახა და კლასიკური ფსიქოანალიზის შემქმნელს, ზიგმუნდ ფროიდს, რომელმაც თავისი თეორია, ფაქტობრივად, ასოციასიურ აზროვნებაზე დაყრდნობით, ანუ მეხსიერების საშუალებით განავითარა (აღსანიშნავია, რომ მოგვიანებით, სწორედ ამ სამი ადამიანის თეორიებსა თუ მოძღვრებებზე დაყრდნობით ქმნის ჯეიმს ჯონსი “ცნობიერების ნაკადის” ლიტერატურულ მეთოდსა და კონცეფციას – თ.გ) (Переходцева 2012: 157).

რაც შეეხება ლიტერატურულ კრიტიკას, აქ მეხსიერება სხვადასხვაგარად ესმით. ზოგიერთი მკვლევარი ხაზს უსვამს თეორიული გააზრების ნაკლებობას მაშინ, როდესაც პრაქტიკაში ეს საკითხი აქტიურად ფუნქციონირებს. ასტრიდ ერლი და ანსგარ ნუნინგი ინტერესდებიან, არსებობს თუ არა მეხსიერების კონცეფცია თუ ნებისმიერი კავშირი მეხსიერებასთან ნიშნავს სხვა დისციპლინის სფეროში გადასვლას, იქნება ეს ფსიქოლოგია, კულტურის პკლევები თუ სოციოლოგია. ამიტომ მეხსიერებისა და ლიტერატურის კავშირი გამოხატეს სამ კონცეფციაში: ლიტერატურის მეხსიერება, მეხსიერება ლიტერატურაში და ლიტერატურა კულტურულ მეხსიერებაში (Erl A...2005: 261–294). ამჟამად ჩვენი ინტერესის საგანია ლიტერატურულ ნაწარმოებებში მეხსიერების მექანიზმის რეპრეზენტაცია. ამ მხრივ განსაკუთრებით საინტერესო

ადმონიდა ფრანგი ავტორის, მარსელ პრუსტის მონუმენტალური რომანი “დაკარგული დროის ძიებაში”, რომლის გამოჩენის შემდეგაც, ლიტერატურაში გაჩნდა დამოუკიდებელი საკითხი - მესეიერების პრობლემა და დაიწყო მისი პვლევა. მარსელ პრუსტის რომანები კი “ცნობიერების ნაკადის” ტექნიკითაა შესრულებული, მიუხედავად იმისა, რომ ამ შემთხვევაში მეთოდს აქ აქვს თავისი ტრადიციული ფუნქცია – არაცნობიერის გამოხატვის მცდელობა (ეს თავისთავად გასაგებია, რადგან პრუსტი რომანებზე მუშაობდა 1913-1927 წლებში, “ცნობიერების ნაკადი” კი სრულყოფილი სახით გამოჩნდა მას შემდეგ, რაც ჯეიმს ჯონსმა თავისი ნაწარმოები, “ულისე” გამოაქვეყნა, ანუ 1922 წელს).

„ცნობიერების ნაკადის“ ტექნიკით შესრულებულ ნაწარმოებებში განსაკუთრებით კარგად არის გამოკვეთილი ინდივიდუალური მესეიერების მნიშვნელობა და ფორმები, რადგან ამ ტიპის რომანები, როგორც წესი, კონკრეტული პერსონაჟების კონკრეტულ მოგონებებს ეყრდნობა. შესაბამისად, გმირების გონებაში, ცნობიერებაში, გამუდმებით ხდება წარსული მოვლენების რეპროდუქცია ასოციაციებისა და, თითქოს, ლოგიკურად დაუკავშირებელი ფიქრების მეშვეობით. აღნიშნული საკითხი კარგად ჩანს ქართველი მწერლის, ოთარ ჭილაძის პროზაში, სადაც აგტორმა ოსტატურად გამოიყენა “ცნობიერების ნაკადის” ტექნიკა თავისი პროზის პრობლემატიკის უკეთ წარმოსაჩენად და მის გასამრავალფეროვნებლად.

“ცნობიერების ნაკადის” პროზა წარსულის, რეტროსპექტივის, ადრეული გამოცდილებისა თუ მითოსის ხარჯზე არსებობს. ამ მეთოდმა აჩვენა, რომ ცნობიერებაში ემოციებით ადდგენილი, პროვოცირებული ფაქტები აწმყოს სწორედ მესეიერების საშუალებით გადმოეცემა, ამიტომ მესეიერება, და კონკრეტულად, ინდივიდუალური მესეიერება, რომელიც ცალკეული გმირების წარსულს მოიცავს, ისევე მნიშვნელოვანია პერსონაჟის ხასიათისა და ფუნქციის ამოსახსნელად, როგორც ნაწარმოების “ახლანდელი” მოქმედება. მესეიერებაში ჩაღრმავებისა და გმირის ქვეცნობიერსა თუ ცნობიერში წვდომის საშუალება კი სწორედ “ცნობიერების ნაკადის” ლიტერატურამ მოგვცა. ასევე იმ ნაწარმოებებმაც, სადაც “ცნობიერების ნაკადის” ტექნიკა გვხვდება, როგორიცაა, მაგალითად, ოთარ ჭილაძის რომანები.

ოთარ ჭილაძეს არ არის „ცნობიერების ნაკადის“ მწერალი ამ სიტყვების კლასიკური გაგებით, განსაკუთრებით, თუ გავითვალისწინებთ, რომ მე-20 საუკუნის მეორე ნახევარში მოდგაწეობს, ამ პერიოდისთვის კი ამგვარი ტიპის მწერლობა აქტუალური აღარ არის. გარდა ამისა, ჭილაძე პროზაულ ნაწარმოებებში, შეძლებისდაგვარად, ტრადიციული პროზის ნორმებსაც იცავს და მე-20 საუკუნის ისეთ ტენდენციას, როგორიცაა, მაგალითად, „ცნობიერების ნაკადის“ ტექნიკა, მხოლოდ პერიოდულად, მხატვრული ეფექტისთვის მიმართავს. ის რომანებში იყენებს „ცნობიერების ნაკადის“ გამომსახველობით ფორმებს, როგორც მხატვრულ ხერხს და, ზოგ შემთხვევაში, თავისებურ ინტერპრეტაციასაც უკეთებს მას („ტრადიციულ“ შინაგან მონოლოგში ჩართავს „ცნობიერების ნაკადის“ ტექნიკას) მწერლის მიზანი მე-20 საუკუნის კრიზისში აღმოჩენილი გმირების სუბიექტური განცდების ჩვენებაა, ეს კი ყველაზე უკეთ ასოციაციურად დაკავშირებული, გაფანტული და ჩამოუყალიბებელი ფიქრების მეშვეობითაა შესაძლებელი, რის საშუალებასაც „ცნობიერების ნაკადის“ ტექნიკა იძლევა. სწორედ ამიტომ, ოთარ ჭილაძის მიერ ამ ტექნიკის პერიოდული გამოყენება ლოგიკურადაც გამართლებულია. ის მხოლოდ მაშინ მიმართავს ამ ხერხს, როცა ამის აუცილებლობას ხედავს, როცა მისი გმირები უკიდურესად დრამატულ მდგომარეობაში არიან. ასეთ დროს მათ მხოლოდ წყვეტილად, ქაოტურად, ასოციაციურად შეუძლიათ აზროვნება. მწერლის ყურადღება კი იქითკენაა მიმართული, რომ გმირის ხასიათი თუ ნაწარმოების არსი სულიერი მოძრაობის მეშვეობით ახსნას.

როგორც წესი, ამ ტიპის ნაწარმოებებში მოქმედება პერსონაჟის გონებაში, წარსულის მოვლენების დროს მიმდინარეობს. გმირების ასოციაციუბსა და აწყო ემოციებით გამოხმობილ წარსულ ფაქტებს უნებურად გადავყავართ მეხსიერების წიაღში. „მოვლენას არსებობის უფლებას მწერალი ანიჭებს მხოლოდ მაშინ, როცა ის უკვე გაივლის, რათა ცნობიერებაში აღიბეჭდოს, ჩარჩეს, მოგონების საგნად იქცეს;“ - წერს უილიამ ფოლკნერის ქართველი მკვლევარი ეთერ თოფურიძე მწერლის კონცეფციაზე (თოფურიძე 1984: 123). კარგად ჩანს, რამდენად მნიშვნელოვანია წარსულის როლი. „ცნობიერების ნაკადის“ მწერლობაში, ფაქტობრივად, მეხსიერებაში აღბეჭდილი წარსული განსაზღვრავს გმირების აწყოსა და მათი ცხოვრების მიმდინარეობას. მაგალითად, ფოლკნერის

პერსონაჟები ვერაფრით ეგუებიან სამოქლაქო ომში ამერიკის სამხრეთ ნაწილის დამარცხებას და საკუთარ სულიერ კრიზისს ამ ისტორიულ მოვლენას უკავშირებენ. სწორედ წარსულისა და აწმყოს შეუთავსებლობის გამო იკლავს თავს “ხმაურისა და მძვინვარების” პერსონაჟი, კვენტინი. ჯოისის “ულისეს” პერსონაჟი სტივენ დედლოსი, მართალია, წარსულს არ მისტირის, მაგრამ მისი ფიქრებიც მხოლოდ გარდასულ მოვლენებს დასტრიალებს თავს – საკუთარ წარსულს, მითებს, ბიბლიურ ამბებს. რაც შეეხება ოთარ ჭილაძეს, მის რომანებში წარსულის გარდა აწმყოც შედარებით ფუნქციურია, მაგრამ ავტორიცა და პერსონაჟებიც უფრო კომფორტულად გრძნობენ თავს, როცა ნარაცია გადაინაცვლებს გმირის ცნობიერში და ხდება წარსული ფაქტების რეპროდუქცია. თხრობა დისტანციიდან ოთარ ჭილაძესთან ბევრად უფრო დინამიურია. ამიტომ, მის ზოგიერთ რომანში წარსული დრო აშკარად დომინირებს, მაგალითად, “მარტის მამალსა” და “გოდორში”.

“მარტის მამალში” მოქმედება, შეიძლება ითქვას, მეხსიერებიდან იმართება, რადგან ამ ნაწარმოების მთავარი მოქმედი გმირი ნიკო, მას შემდეგ რაც ნაცნობი ყაჩაღის მკვლელობას შეესწრება, ერთი თვის განმავლობაში ლოგინიდან არ დგება და იხსენებს მთელ ცხოვრებას, დაწყებული ბაგშვილიდან, როცა მშობლებთან ერთად ბედნიერად ცხოვრობდაბათუმში, დამთავრებული ბოლო წუთებით, როცა უკვე ბებია-პაპასთან ცხოვრობს და დედის ჩამოსვლას ელოდება. მისი მოგონებები ქრონოლოგიურადაც არეულია, ის ხან ბათუმშია და იმისთვის, რომ დედას დაეხმაროს, მთელ დღეს პურის მაღაზიასთან, რიგში ატარებს, ხან დეიდასთან ერთად მატარებლით სიღნაღისკენ მიემართება, ხანაც ტყეში შეხიზნულ ყაჩაღს უსმენს, რადგან ის ძალიან აგონებს მამას. გმირი დაკარგულია თავის მოგონებებში, სიზმრებსა თუ წარმოდგენებებში, ყველაზე ნაკლებად კი აწმყო დრო ახსოვს, ამიტომ აწმყოში მოქმედება ძალიან მწირია. მთელი ნაწარმოები წარსულს დასტრიალებს თავს და აწმყო, თითქოს, მხოლოდ იმისთვის არსებობს, რომ მეხსიერებაში დაგროვილი ეს მოვლენები ერთმანეთთან დააკავშიროს. შეიძლება ითქვას, რომ ამ რომანში წარსული აწმყოზე ბატონობს და აწმყოს ერთადერთი ფუნქცია ის არის, როგორმე ყველა მოგონებას თავისი ადგილი მიუჩინოს. „მარტის მამალში“ “ცნობიერების ნაკადის” ტექნიკა შედარებით ნაკლებად ჩანს, მაგრამ ამ შემთხვევაში მეთოდის შინაარსობრივ მხარეს ექცევა მეტი ყურადღება – შინაგანი

მონოლოგების საშუალებით, წარმოჩენილია პერსონაჟის სულიერი სამყარო, მისი გაცნობიერებული თუ გაუცნობიერებული სურვილები, სუბიექტური განცდები, აღინიშნება ასოციაციური აზროვნება დადრო-სივრცეში მონაცვლეობა: „ნიკო რომ ტუალეტიდან გამოვიდა, ბრძა ტომრებზე იჯდა ტამბურში და ხახვსა და პურს მიირთმევდა. შავი სათვალე შუბლზე აეწია და, შეიძლება, ამიტომაც, ჩამოგდებულ, ტყვედჩავარდნილ მფრინავს უფრო გავდა, ვიდრე ბრძას. „ელენიცა, ელენიცა, მე შენში ვმარხავ მთელ არყოფილ ბედნიერებასო“ - პირმოკუმული უყვირის ნიკო ნაცრისფერ სივრცეში გათქვეფილ სახეს, ჩვეულებისამებრ, გაოცებულსა და დაბნეულს, მაგრამ უკვე აქედან, სიღნაღიდან, თავის საწოლიდან, მკვდარივით გულხელდაკრეფილი და, ყველა სიკეთესთან ერთად, დამურების დასკლინტული...თითქოს, ეს წუთია, საიდანდაც დაბრუნდა, მალიან შორიდან, მალიან სახიფათო მგზავრობიდან - ავტობუსშიც იჯდა მგონი - უაზრო, უმისამართო შიშით დონემიხდილი. ოდონდ, კი არ ახსოვს, გრძნობს, მაგრამ არ იცის რატომ გრძნობს, რასაც გრძნობს, რამდენად სანდო და რამდენად სიმართლისეულია მისი შეგრძნებები“ (ჭილაძე 1987: 37).

მწერლის ბოლო რომანში “გოდორი”, წარსული მეტად ფუნქციურია, რადგან ეს ნაწარმოები მთლიანად მეხსიერებაში აღდგენილ ფაქტებზეა აგებული, თანაც სწორედ ისე, როგორც “ცნობიერების ნაკადის” მწერლობაში - გმირის შინაგან მონოლოგში მყისიერად ენაცვლება ერთმანეთს აწმყო მოვლენა და წარსულიდან გამოხმობილი ფაქტი, ფიქრები ასოციაციურად უკავშირდებიან ერთმანეთს, რაც კიდევ ახალ ასოციაციას იწვევს და ართულებს აწმყო მოქმედების გაგებას, მაგრამ სინამდვილეში ეს ყველაფერი გმირების ხასიათის უკეთ ამოსაცნობად კეთდება.

პერსონაჟებს, ცხადია, ბევრი რამ ახსოვთ, ცხოვრების განმავლობაში დაგროვილი აქვთ დიდი ინფორმაცია და გამოცდილება, მაგრამ ჭილაძესთან, ისევე, როგორც “ცნობიერების ნაკადის” მწერლებთან, ისინი იხსენებენ მოვლენებს ახლანდელი, “აწმყო ემოციების” მეშვეობით. ემოციას აქ მნიშვნელოვანი ადგილი უჭირავს. ემოცია (ლათ: ალელვება, შემვრა, შემრწუნება) წარმოადგენს ფსიქოფიზიოლოგიურ პროცესს, რომელიც გამოწვეულია ობიექტის ან სიტუაციის გაცნობიერებული ან გაუცნობიერებული აღქმითა და ინტერპრეტაციით. იგი ფიზიოლოგიურ ცვლილებებთან, სპეციფიკურ შემეცნებასთან, სუბიექტურ განცდასა და ქცევის (ან პოზიციის) შეცვლისადმი მზადყოფნასთან არის

დაკავშირებული. ფართო გაგებით, იგი განცდისა და დამოკიდებულების, პოზიციის გრძნობისმიერი ასპექტის აღმნიშვნელი სიტყვაა (Pethas 2001: 129). ძალიან მნიშვნელოვანია ის, რომ ემოცია მჭიდრო კავშირშია მეხსიერებასთან.

თავდაპირველად გმირებს აგონდებათ არა ფაქტი, არამედ შეგრძნება, ემოცია, რომელიც ამ ფაქტმა გამოიწვია და მხოლოდ შემდეგ იხსენებენ ამა თუ იმ ამბავს. აქედან გამომდინარე, მათ გახსენების მომენტშიც ისეთივე ძლიერი განცდა ეუფლებათ, როგორც წარსულში, როცა ეს ამბავი მართლა მოხდა. ცხადია, განცდა ძლიერი იყო, რადგაც სხვაგვარად ასოციაციური აზროვნების დროს ეს მოვლენა არ ამოტივტივდებოდა. ასოციაციური კავშირის დასამყარებლადაც ემოციის, განცდის ჩართვაა საჭირო (ნათაძე 1963: 26-54).

ზოგადად, ემოცია და მეხსიერება ერთმანეთისგან დამოუკიდებლად თითქმის არ არსებობს. მოვლენის ემოციასთან კავშირი განსაზღვრავს მის ადგილს ინდივიდის მეხსიერებაში, წარსული ფაქტების ამოტივტივების ინტენსიურობითა და თანმიმდევრობით ვხვდებით, რაზე ფიქრობს პერსონაჟი ყველაზე ხშირად, რა უფრო აწესებს (ნათაძე 1963: 30). მაგალითად, სტივენ დედალოსს ასოციაციურად ხშირად აგგონდება დედის სიკვდილის სცენა, ის არაერთხელ ამოტივტივდება ქვეცნობიერი აზროვნების დროს, რის შედეგადაც გასაგები ხდება, რამდენად განიცდიდა სტივენი იმას, რომ მომაკვდავ დედას თხოვნა არ შეუსრულა, მისთვის არ ილოცა და ამით დედის სიკვდილი დააჩქარა. ოთარ ჭილაძის რომანში “მარტის მამალი” ავადმყოფი ნიკოს ფიქრებში ყველაზე ხშირად ჩანს მამის ხატი, აგონდება ის ხან ჯანმრთელი, ხან საწოლს მიჯაჭვული, ხანაც სხვებში ხედავს მამის ანარეკლს. ნიკოს გმირის ამოსახსნელად ეს უდაოდ მნიშვნელოვანი ფაქტია. ჩანს, რომ ემოცია ეხმარება გმირებს მეხსიერების გააქტიურებაში.

ამგვარი ემოციების რეცეფცია მკითხველმაც უნდა შეძლოს, თუმცა მათი აქტუალიზება გმირის დახმარებით მოხდება. ეს შესაძლებელია, რადგან პერსონაჟი, ხშირად, იხსენებს არა მხოლოდ კონკრეტულ ემოციასა და მისგან გამომდინარე მოვლენას, არამედ ფიზიკურ შეგრძნებებსაც კი, ვთქვათ, სუნს, ხმას, ამინდს, ტკივილს (ინგარდენი 2011: 113-134). მაგალითად, რომანის, “გოდორის”, პერსონაჟი ელიზბარი, რომელიც აფხაზეთის ომშია, იგონებს, შეიგრძნობს და შედეგად აცოცხლებს წარსულის მოვლენებს. მკითხველს დროებით ავიწყდება, რომ ის

ომშია და მიჰყვება მის მოგონებას: “ელიზბარი დატუქსულ მოწაფესავით დგას კარს იქით... რაღა ეს უნდოდა, არ შეარჩენს დაუმახსოვრებს და ხალხში წამოაძახებს, ხალხს გააცინებს, თითქოს ელიზბარი მწერალი კი არა, გუოგრაფიის მასწავლებელი იყოს. მაგრამ მაინც ვერ მშვიდდება, ადგილს ვერ პოულობს. წვიმამ ერთიანად ჩამოიტანა ალბათ ცაცხვის ხეებიდან ჭრიჭინების გაუჩუმარი, დაუქანცავი ორკესტრი. ზაფხულის პეტი. ელიზბარისთვის საერთოდ ადარ არსებობს სიმშვიდე, როგორც ჩანს, არც სამარეში. ... მისმა სიძემ მისი შვილის გულისთვის თუ არა, მისი შვილის გამო, საკუთარი მამა მოკლა, ის კი იმას განიცდის, ხვალ ცაცხვების ხეივანი დამხრჩალი, ფრთებდაფლეთილი ჭრიჭინებით იქნება მოფენილიო. უსვინდისო თვალთმაქცი. ეს წუთია, აფხაზეთში იყო თითქოს, ახლა ქვიშხეთშია” (ჭილაძე 2006: 315). ასეთ შემთხვევებში მკითხველიც ამყარებს კვაზი-უშუალო კონტაქტს მოცემულ სამყაროსთან, შედეგად მასაც შეიძლება მოაგონდეს, მაგალითად, წვიმის სუნი, ცაცხვის ფერი, გაიგონოს ჭრიჭინების ხმა, ანუ მოახდინოს სიტუაციის კონკრეტიზაცია (წარმოდგენა). გმირის მეხსიერება გავლენას ახდენს მკითხველის მეხსიერებაზეც. რაც უფრო ემოციურია პერსონაჟის მიერ მოწოდებული ინფორმაცია, მით უფრო მეტად იწვევს ის მკითხველის მეხსიერების “გადიზიანებასაც” (Jauss 1979: 126-162, Schöttker 2008: 539-545).

აღსანიშნავია, ოთარ ჭილაძის თავდაპირველ ნაწარმოებებში “ცნობიერების ნაკადის” ტექნიკა ძალიან მცირე, თითქმის შეუმჩნეველ ადგილს იკავებს, მაგრამ თანდათანობით ძლიერდება, იძენს სხვადასხვა ფუნქციას, დაბოლოს, მწვერვალს აღწევს რომანში “გოდორი”, ამიტომ სწორედ ამ ბოლო რომანში გვხვდება წარსულის რეპროდუქციის სხვადასხვა სახეებიც – წარსული ფაქტის, ემოციის, შეგრძნების რესტავრაცია, მაგრამ ყველაზე მთავარია ის, რომ ჭილაძის თითქმის ყველა რომანში და განსაკუთრებით, “გოდორში”, განმსაზღვრელი როლი მაინც აწმუოს ეკისრება.

მეხსიერება ძირითადად წარსულს მოიცავს, მაგრამ ამასთანავე ის ყოველთვის აწმუო დროა (იხსენებ რაიმეს, მაგრამ ამ წამს). წარსულისა და მომავლის მოვლენებიც არსებობს მხოლოდ ახლა, მეხსიერებაში. მომავალიც კი აწმუოა, რადგან გმირის ცნობიერებაში აწმუოში იქმნება მომავლის წარმოდგენებიც. ის, რისი დამახსოვრებაც უნდა მოხდეს, ჯერ აწმუოში აღიქმება, შემდეგ აღქმული მოვლენა შეინახება, დაბოლოს, წარსულში მოღებული ცოდნა

მომავალში გახდება საჭირო. ანუ მესიერება არ მხოლოდ წარსულის შენახვას, არამედ მომავალში მისი გამოყენების შეასძლებლობასაც გულისხმობს. ამდენად, მესიერება პირობითად შეიძლება წარმოვიდგინოთ, როგორც პროცესთა სამი ეტაპი, რომელთაგან თითოეული განსხვავდება თავისი ფსიქოლოგიური სტრუქტურითა და კონკრეტული ამოცანით. ეს ეტაპებია: ინფორმაციის აღბეჭდვა (კოდირება), შენახვა და აღდგენა (ფარჯანაძე 2008: 4).

სწორედ წარსულის, აწმყოსა და მომავლის ამგვარ ურთიერთობას გულისხმობს ჯეიმს ჯონსის ტერმინი “მარადიული ახლა” (“entral now”), სადაც ამწყო ყოვლისმომცველია. საინტერესოა უილიამ ფოლკნერისეული დროის კონცეფციაც, რადგან აწმყო მისთვისაც მარადიულია, არსებობს მხოლოდ აწმყო და სხვა არაფერი. წარსული და მომავალი კი მისი ნაწილია. წარსული არის ის, რაც ადამიანს ჰქონდა, მომავალი კი იმ ყველაფრის ჯამია, რაც ახლა გააჩნია. ფოლკნერი თავის რომანებში ყოველთვის დასრულებულ მოქმედებებს გვიჩვენებს. “ხმაურსა და მძინვარებაში” ყველაფერი, “რაც ხდება”, უკვე მოხდა. ეს გამოიხატება რომანის ერთ-ერთი გმირის უცნაურ ფორმულაშიც – “I am not is, I was” (მე არ ვარ ის რაც არის, მე ვარ ის, რაც იყო –თ.გ.). ფოლკნერის პერსონაჟები გამუდმებით წარსულისკენ იხედებიან, წარსულს იმხელა ადგილი უჭირავენ, რომ თითქმის ნიღბავს ახლანდელ დროს. ამიტომ ფოლკნერის პროზაში აწმყო დრო აჩრდილს ჰგავს (Sartre 1963: 225-232).

ამ კონცეფციას ემორჩილება ჭილაძის რომანებიც. ნარაციის დროს მისი გმირები აქტიურად არ მოქმედებენ, არამედ იგონებენ წარსულ ქმედებებს (აქცენტი ყოველთვის წარსულზეა, ისინი მიჯაჭვულნი არიან წარსულს) ან განსაზღვრავენ მომავალ ქმედებებს (ან სულაც უარყოფენ მომავალს), აწმყოს მოვალეობა კი მხოლოდ ამ ყველაფერის გაერთიანებაა (აწმყო პასიურია). თუმცა ასე, ალბათ, იმიტომ ხდება, წარსულიც იმიტომ განსაზღვრავს გმირების აზროვნებასა და ყოფას, რომ აწმყო უფუნქციოა, უინტერესო და მას ყოველთვის გაურბიან. “მარადიული ახლა”, რომელიც თავის თავში იტევს წარსულ და, შესაძლოა, მომავალ სივრცესაც, სინამდვილეში პერსონაჟების ტრაგიკულობის, კრიზისული მდგომარეობის მაჩვენებელია.

შეიძლება ითქვას, რომ „ცნობიერების ნაკადი“, როგორც ლიტერატურული მეთოდი, ან მეორე შემთხვევაში, როგორც ეფექტური მხატვრული ხერხი, ლიტერატურაში სწორედ ინდივიდუალური მეხსიერების გააქტიურების შედეგად არსებობს, რადგან მეხსიერება პერსონაჟის შინაგანი სამყაროთი, კონკრეტულად კი მისი მოგონებებითა და ასოციაციური აზროვნებით ინტერესდება, რაც მწერალს საშუალებას აძლევს, სააშკარაოზე გამოიტანოს გმირის არაცნობიერი სურვილები და პრობლემები. ეს კი „ცნობიერების ნაკადის“ მეთოდის მთავარი მიზანია. ინდივიდუალურ მეხსიერებაზე ორიენტირება ამ ტიპის ლიტერატურის ავტორისთვის ერთგვარი მხატვრული ხერხია, რომლის საშუალებითაც ის „ცნობიერების ნაკადის“ ლიტერატურული მეთოდისა თუ ტექნიკის კონცეფციას წარმოაჩენს. ინდივიდუალური მეხსიერების აქტივობა კარგად ჩანს „ცნობიერების ნაკადის“ ტექნიკით შესრულებულ ნაწარმოებებში, დაწყებული ჯეიმს ჯოისისა თუ ვირჯინია ვულფის შემოქმედებიდან, დასრულებული უილიამ ფოლკერისა და, კიდევ უფრო გვიანდელი, სილვია პლატის რომანებით, სადაც მეხსიერების როლი განმსაზღვრელია ტექსტების გაანალიზებისას. იგივე ითქმის ოთარ ჭილაძის პროზაზეც. მწერალი ძალიან ხშირად მიმართავს წარსულის რეპროდუქციას, ამიტომ ზოგიერთი რომანის ტექსტი, ფაქტობრივად, მოგონებებითაა აწყობილი და აშკარად იგრძნობა წარსულის უპირატესობა აწმყო დროსთან შედარებით, რასაც პერსონაჟის მიერ წარსულ ფატებთან ემოციური კავშირის დამყარებაც უწყობს ხელს.

4. ოთარ ჭილაძის პროზის მიმართება უილიამ ფოლკნერის

პროზასთან

“ცნობიერების ნაკადის” ლიტერატურული მეთოდისა და, განსაკუთრებით, მისი ტექნიკის განხილვისას, აუცილებელია უილიამ ფოლკნერის შემოქმედებაზე საუბარი, რომელმაც უარყო “ცნობიერების ნაკადის” შინაარსობრივი მხარე – არაცნობიერის წარმოჩენა - და გამოიყენა მხოლოდ მისი ტექნიკა, გამომსახველობითი ფორმა, როგორც ეფექტური მხატვრული ხერხი. შედეგად, ფოლკნერმა “ცნობიერების ნაკადის” ტექნიკა ახალ სიმაღლეზე აიყვანა.

“ცნობიერების ნაკადის” ტექნიკა ჯოისის შემდეგ ამერიკულ ლიტერატურაშიც გავრცელდა და ეწ. ამერიკული მოდერნიზმის ნაწილიც გახდა. ისეთმა ავტორებმა, როგორებიცაა ტ. ველფი, ჯ. დოს-ჰასოსი და სკ. ფიცჯერალი, მას აქტიურად მიმართეს. როგორც ზევით აღვნიშნეთ, ამგვარი გამომსახველობითო ფორმა ყველა მწერლას აძლევდა საშუალებას, ავტორის მიზნებისა და ტექსტის შინაარსის შესაბამისად, თავისებურად გამოვეუბინა ის. მაგრამ უილიამ ფოლკნერი ამ მხრივ განსხვავებული აღმოჩნდა, რადგან მან, მიუხედავად იმისა, რომ მწერალი გაემიჯნა ჯოისსა და მისულ კონცეფციას, კიდევ უფრო “დახვეწა” “ცნობიერების ნაკადის” ტექნიკა თავის რომანებში – “ხმაური და მძვინვარება” და “მომაკვდავი რომ ვესვენე”, შემდეგ კი მისგან უკან დაიხია და 30-იანი წლების მერყეობის ბოლო პერიოდის რომანებში, მინიმუმადე დაიყვანა (თოფურიძე 1988: 86-102). თუკი ჯოისის შემთხვევაში ავტორის მიზანი გმირის ცნობიერისა და არაცნობიერის წარმოჩენა იყო, ფოლკნერისთვის მნიშვნელოვანია პერსონაჟის ხასიათის, ტიპის ჩვენება, მისი სულიერი ბრძოლისა და დრამის წარმოჩენა. ფოლკნერის პერსონაჟების უმეტესობა, ვერაფრით ურიგდებიან ბედს, ვერ კულტიურული მასების სამხრეთ ამერიკის დამარცხებას, ტრადიციული, სოციალური თუ მორალურ-ზნეობრივი პრინციპების ცვლას, ამიტომ აღელვებულები და ემოციურები, სულიერ კრიზისში არიან. რომანებში მწერლის ძირითად თემას სწორედ ფერმერული სამხრეთის პატრიარქალური ტრადიციების რღვევა წარმოადგენს, რისი მზეზიც ავტორისავე აზრით, წარსულში დაშვებული შეცდომა – მონობის დაკანონებაა. წარმავალ “სამხრეთულ ცივილიზაციასთან” ერთად იღებებიან პლანტაციონული სამყაროს შთამომავლებიც (Кабанова 2006). კომასონები, სნოუჸსები თუ სხვა

ოჯახის წარმომადგენლები გელარ ახერხებენ ბურუუაზიულ სამყაროსთან ადაპტაციას და ეს უველივე მათ ინდივიდუალურ სულიერ დრამაში გადაიზრდება. ამგარი შინაგანი მდგომარეობის გამოსახატავდ შინაგანი მონოლოგი, ალოგიკურად დაკაგმირებული ფიქრებითა და გაუფორმებული სინტაქსით, ავტორისთვის გამოსახვის საუკეთესო საშუალებაა.

როგორც უკვე აღვნიშნე, უილიამ ფოლკნერის შემდეგ არაერთმა ავტორმა მიმართა “ცნობიერების ნაკადის” ტექნიკას, რომელმაც მე-20 საუკუნის მეორე ნახევარშიც შეინარჩუნა თვითმყოფადობა. ის დარჩა გამოსახვის ფორმად, რომელიც საშუალებას იძლევა, გამოხატოს პერსონაჟების შინაგანი სულიერი მდგომარეობა და მოერგოს ნებისმიერი უანრისა თუ მიმდინარეობის ლიტერატურულ ნაწარმოებს. ამიტომ გასაკვირი არ არის, რომ ოთარ ჭილაძემ, რომელიც კარგად იცნობდა მე-20 საუკუნის ლიტერატურულ ტენდენციებს და თავის რომანებში ითვალისწინებდა კიდევ, პერსონაჟების დაძაბული და შინაგანად არეული მდგომარეობის გამოსახატად, სწორედ “ცნობიერების ნაკადის” ტექნიკა აირჩია. შინაგანმა მონოლოგებმა და ასოციაციათა ჯაჭვმა მწერალს საშუალება მისცა, უკეთ გაეხსნა გმრების ხასიათი. თანაც, როგორც ადრე აღვნიშნეთ, ჭილაძემ ამ ხერხს მხოლოდ პერიოდულად მიმართა. ფოლკნერთან შედარებით, ჭილაძე გაცილებით ნაკლებად იყენებს “ცნობიერების ნაკადის” ტექნიკას, მაგრამ მის წერის მანერას მაინც ბევრი საერთო აქვს ფოლკნერისეულ “ცნობიერების ნაკადის” ტექნიკის ინტერპეტაციასთან. ამ მხრივ საინტერესოა ჭილაძის რომანის, “გოდორის” მიმართება ფოლკნერის რომანთან “ხმაური და მძვინვარება”.

“ხმაური და მძვინვარება” კომპსონების ოჯახის თავგადასავალია, რომელიც სამი ქმის – ბენჯის, კვენტინისა და ჯეისონის მიერაა ნაამბობი. სამი სრულიად განსხვავებული თვალთახედვა სხვადასხვა კუთხით წარმოჩენს ერთსა და იმავე ისტორიას. ნაწარმოების მთავარი ნიშანსვეტი მათი და – კედია, რომელიც ბენჯისა და კენტინისთვის სათაყვანებელია, ჯეისონისთვის კი - სიძულვლის საგანი. კედის, რომელიც ქმებისთვის ოჯახის სახეს წარმოადგენს, ვინმე დოლტონ ეიმსი შეაცდენს და დააფეხმდიმებს, რის შედეგადაც, ოჯახი მას სასწრაფოდ მიათხოვებს პირველივე მთხოვნელს. მაგრამ ქმარი შეიტყობს კედის ფეხმდიმობის ამბავს, მიატოვებს და ამით საბოლოოდ შეარცხვენს კომპსონების ოჯახის სახელს. ეს ფაქტი სხვადაგვარად აისახება სამივე ქმის ფსიქიკასა და მომავალზე. ბენჯი,

უფროსი ძმა, რომელიც ჰქუასუსტი და ყრუ-მუნჯია, და ამიტომ ერთ-ერთი ყველაზე ნიშანდობლივი სახე რომანში, კედის წასვლის შემდეგ იტანჯება და ამას ტირილითა და ზმუილით გამოხატავს. აღსანიშნავია, რომ ბენჯისეული სამყაროს აღქმა მარტივია, რაც პირდაპირ აირეკლავს კომპსონების ოჯახის წევრების ხასიათებს. კვენტინი სიცოცხლეს თვითმკვლელობით ასრულებს, ჯეისონის ცხოვრებას კი უკვე მისი კედის ქალიშვილისადმი დამოკიდებულება განსაზღვრავს.

აღსანიშნავია, რომ ფოლკნერის ზემოთხსენებული რომანში, თემატიკის თვალსაზრისით, ერთნაირად აქტუალურია როგორც სოციალურ-კულტურული, ისე ზოგადადამიანური პრობლემები (Наваль 2003). როგორც სოციალური მდგომარეობის ფონზე ვითარდება დაძაბული სიუჟეტი, რომელიც ადამიანის სუბიექტური სამყაროს წამოჩენას ემსახურება. ამ ყველაფრის ხორცშესხმა კი “ცნობიერების ნაკადის” ტექნიკის მეშვეობით ხდება. პერსონაჟის გონებასა და გრძნობებში ჩაღრმავება, მრავალსუბიექტიანობა და შინაგანი მონოლოგების სიმრავლე ამ რომანის მთავარი მახასიათებლებია.

“სმაურსა და მძვინვარებას” ჭილაძის სხვა, ადრინდელი ნაწარმოები - “ყოველმან ჩემმან მპოვნელმან” – ჯერ კიდევ გურამ ასათიანმა შეადარა, (სტატიებში “მწერლის ახალი რომანი” და “რომანის დედაზრი”), თუმცა კრიტიკოსმა აქ ყურადღება როგორც ტექნიკურ, ასევე შინაარსობრივ მხარეზე გაამახვილა. მისი აზრით, ორივე რომანი მსგავსი “თანამედროვე” ტექნიკითაა შესრულებული (ანუ “ცნობიერების ნაკადის” ტექნიკით), რომანებში აღინიშნება “მრავალსუბიექტიანობა”, რაც იმით გამოიხატება, რომ მოვლენები, რეალობა, არა ერთი, არამედ მრავალი პერსონაჟის თვალთახედვით არის წარმოდგენილი და სშირად ერთსა და იმავე მოვლენას რამდენიმე გმირი ჰყვება (ასათიანი 1977: 23).

გარდა ამისა, კრიტიკოსი რომანებს შორის ტიპოლოგიურ მსგავსებას უსვამს ხაზს და ერთმანეთს ადარებს ნაწარმოებების საკვანძო ფიგურებს – კვენტინ კომპსონსა და ალექსანდრე მაკაბელს. როდესაც რომელიმე ოჯახში რაღაც არსებითი რიგზე არ არის, იგი მისი წიაღიდან გამოყოფს საკუთარ ანტიპოდს, უარმყოფელს. ასე გამოყო კომპსონების იჯახმა კვენტინი, ხოლო მაკაბელების ოჯახმა - ალექსანდრე. მაგრამ ეს ორი გმირი ძალიან განსხვავდება ერთმანეთისგან, რადგან კვენტინ კომპსონის ცნობიერება ჩიხშია მოქცეული და მისთვის ერთადერთი გამოსავლი თვითმკვლელობაა (ამის მიზეზი მხოლოდ

ოჯახური მდგომარეობა – კვენტინის დის, კედის, დაცემა არ არის. არამედ ზოგადად კომპსონების საგვარეულოს, ამ ფენის, ამერიკის სამხრეთ ნაწილის დაცემა და განადგურება). ალექსანდრე მაკაბელი კი სხვა სამყაროს ნაწილია, მან თავისი მოდგმა უნდა გადაარჩინოს და თავადაც გადარჩეს: “ალექსანდრეს არ აქვს იმის უფლება რისკენაც ის მიიღების, რა მიმართულებითაც გამუდმებით მოძრაობს. ის უნდა აუცილებლად გადარჩეს. გადარჩენს ამ სიტყვის სრული მნიშვნელობით,... როგორც ალექსანდრე – ახალი ადამიანი, ახალი მოდგმის მამამთავარი. მან უნდა მისცეს დასაბამი ახალ ცხოვრებას, არსებობის ახალ, უფრო უკეთეს ფორმას” (ასათიანი 1977: 2).

გვიქრობ, საქმე ისაა, რომ კვენტინი უკვე წარსულია, იგი განადგურებული საზოგადოების ნაწილია, რადგან კვენტინი სუსტია და უნებისყოფო, სასტიკ რეალობაში კი მისნაირი რომანტიკოსი ბუნების ადამიანები იღუპებიან. ალექსანდრე კი ქვასავით მაგარია, რადგან მას სიძულვილი ამოძრავებს - პაპისადმი, სახლისადმი, საქუთარი ფესვებისადმი. ეს გრძნობა კი ისეთი ძლიერია, რომ ალექსანდრეს უკიდურესი შეჭირვების, დაღმასვლის უმსაც გააძლებინებს. ნელ-ნელა, ძმისა და წარმოსახული ძმის შვილის დახმარებით, მისი ცნობიერება ნელ-ნელა მიდის იმ აზრამდე, რომ სიცოცხლე ფასეულია. მოგვიანებით კი ისეთივე ძლიერი გრძნობით, სიყვარულით, ახერხებს სიძულვილის დათრგუნვას და ცხოვრების საზრისხსაც პოულობს –პატარა მართას, რომელსაც უნდა მოუაროს და უპატრონოს.

გურამ ასათიანი კიდევ ერთ საინტერესო საკითხს სვამს – მისი აზრით, რომანის “ყოველმან ჩემმან მპოვნელმან” ერთ-ერთი გმირი - დუსას ჭკუასუსტი შვილი, აქ ზედმეტი პერსონაჟია და ამიტომ მას ფოლკნერის ასევე ჭკუასუსტ ბენჯი კომპსონს ადარებს. ფოლკნერის გმირს ნაწარმოებში მნიშვნელოვანი ფუნქცია აქვს - იგი ხედავს იმას, რასაც სხვები ვერ ამჩნევენ, ბავშვური გულუბრყვილობით აღიქვამს რეალობას და ამიტომ მკითხველის თანაგრძნობას იწვევს. ხოლო ჭილაძის გმირი, კრიტიკოსის აზრით, უფრენქციოა და თანაც მკითხველში მხოლოდ ზიზდს იწვევს. ეს გაუმართლებელია არა მხოლოდ ესთეტიკურად, არამედ ეთიკურადაც (ასათიანი 1977: 23). ბენჯი კომპსონი მრავალფუნქციური პერსონაჟია და მისი მეშვეობით სხვა გმირების ხასიათებიც უფრო ადვილად იხსნება - ნებისმიერი პერსონაჟის დამოკიდებულება ბენჯისადმი,

განსაზღვრავს იმ პერსონაჟს. ბენჯი, ეს დიდი ბავშვი, არასდროს ცდება, გულწრფელობით საუბრობს ნებისმირ მოვლენაზე და დაუფარავად გამოხატავს ემოციებს. ჭილაძის გმირის შემთხვევაში კი შესაძლებელია, დაგეთანხმოთ კრიტიკოსს, რადგან დუსას შვილის მიმართ მართლაც მხოლოდ ზიზდს ვგრძნობთ, მისი ერთადერთი დანიშნულება ისაა, რომ ანეტას სახლიდან წასასვლის კიდევ ერთ საბაბი მისცეს. ის არც დუსას, არც პეტრესა და არც ანეტას ხასიათს არაფერს მატებს და თუნდაც მკაცრი, სასტიკი დამოკიდებულება მისდამი მკითხველში თანაგრძნობას არ იწვევს, მაგ: ანეტას სულაც არ აკნინებს ის, რომ ეს ბავშვი ეზიზდება, რადგან, ამ გმირის სიყვარული ან, საერთოდ მიღება, შეუძლებელია.

ამრიგად, გურამ ასათიანის მოსაზრებით, რასაც ნაწილობრივ ჩვენც ვეთანხმებით, ოთარ ჭილაძის რომანი “ყოველმან ჩემმან მპოვნელმან” და უილიამ ფოლკნერის “ხმაური და მძვინვარება” როგორც ტექნიკურად, ასევე ტიპოლოგიურად ერთმანეთთან ახლოს დგას. თუმცა უნდა აღინიშნოს, რომ ჭილაძის ზემოთხსენებულ რომანში, მის სხვა ნაწარმოებებთან შედარებით, “ცნობიერების ნაკადის” ტექნიკა ყველაზე ნაკლებად გამოვლინდა და ამ შემთხვევაში მხოლოდ ამ ტექნიკისადმი მიმართებასა და ელემენტებზე შეიძლება საუბარი, როგორიცაა, მაგალითად, მრავალსუბიექტიანობა და გმირის ხასიათის გასახსნელად მის სულიერ სფეროში ჩაღრმავება. მოგვიანებით ოთარ ჭილაძის რომანებში “ცნობიერების ნაკადის” ტექნიკა უფრო სრულყოფილ სახეს იღებს, ფაქტობრივად, ხდება მწერლის ერთ-ერთი სტილისტური იარაღი და კულმინაციას აღწევს რომანში “გოდორი”.

ამდენად, ჩვენთვის საინტერესოა უილიამ ფოლკნერის “ხმაურსა და მძვინვარებას” და ოთარ ჭილაძის “გოდორს” შორის, ტექნიკის კუთხით, საერთო მახასიათებლების გამოვლენა და ამ კუთხით ამ ორი ნაწარმოების შედარება.

როგორც უკვე აღვნიშნეთ, თემატური თუ ტიპოლოგიური თვალსაზრისით, რომანებს შორის რამდენიმე საერთო შტრიხი არსებობს: ორივე ნაწარმოებში სიუჟეტი ერთი ოჯახის გარშემო ტრიალებს და მის ისტორიას პევება. ეს ოჯახური ურთიერთობები თუ პარმონია ნელ-ნელა ირლვევა, რასაც საბოლოოდ ნათესაური კავშირების სრულ უარყოფამდე მივყავართ. აქვე უნდა ითქვას, რომ ფოლკნერთან

გმირების ტრაგიკული ხასიათის, ბედის და მათი ურთიერთობების ნგრევის მიზეზი არა მხოლოდ სულიერი, არამედ სოციალური და ზნეობრივი ფონია. ჭილაძის რომანებშიც ასევე გამოკვეთილია ამგვარი სოციალური და მორალური პლანი. ამ შემთხვევაშიც პერსონაჟების შინაგანი ბრძოლა, მათი ოჯახებისა და იდეალების რდგევა, პირდაპირ კავშირშია ქვეყნის მორალურ გადაგვარებასთან (რის წარმოჩენასაც ცდილობს მწერალი), რაც, თავის მხრივ, რუსეთის გავლენის ქვეშ მოქცევას უკავშირდება.

რაც შეეხება ტექნიკას, ამ მხრივ ზემოთხსენებულ რომანებს შორის რამდენიმე მსგავსება და განსხვავება იკვეთება: “გოდორში” ოთარ ჭილაძემ “ცნობიერების ნაკადის” ტექნიკა დაახლოებით ისეთივე ფორმით გამოიყენა, როგორც ფოლკნერმა “ხმაურსა და მძვინვარებაში” – როგორც მხატვრული ხერხი, რომელიც პერსონაჟების სუბიექტური სამყაროს საიდუმლოებების ამოსახსნელად დასჭირდა. მაგრამ არა იმავე დოზით, რადგან ფოლკნერმა, ფაქტობრივად, მთელი ნაწარმოები ამ ტექნიკით შეასრულა (თუ არ ჩავთვლით ჯეისონისა და დილზის მონოლოგებს), ჭილაძემ კი ამგვარ ტექნიკას მხოლოდ დროდადრო მიმართა.

ოთარ ჭილაძემ ისევე, როგორც უილიამ ფოლკნერმა, “ცნობიერების ნაკადის” ტექნიკა თავის მხატვრულ მიზნებს დაუქვემდებარა და მიმართა მას მხოლოდ მაშინ, როცა პერსონაჟების დაძაბულობამ, სულიერმა კრიზიკმა, უკიდურეს ზღვარს მიაღწია. ამ ტექნიკით შეასრულებს ფოლკნერი კვენტინის თვითმკვლელობის წინა შინაგან მონოლოგს და ჭილაძე ანტონის შინაგან მონოლოგს მას შემდეგ, როცა სამზარეულოში მამასა და ცოლს შეუსწრებს. კვენტინის ფიქრები: “გინდათ ჯოჯოხეთი იყოს, ოდონდ ყველაფერი გათავდეს. მორჩეს. განა შეიძლება რამე ადვილად გათავდეს? ნეტავ შეგვძლებოდა ჩაგვედინა რამე შემზარავი და ჩვენ გარდა აღარავინ დარჩენილიყო ჯოჯოხეთს. სისხლის აღმრევი მე ვარ-მეთქი, მე ვუთხარი მამას და არა ის, დოლტონ ეიმზი... და როცა დოლტონ ეიმზა, დოლტონ ეიმზა, დოლტონ ეიმზა ჩამიდო პისტოლეტი ხელში, თითიც არ გამინძრევია. თითიც არ გამინძრევია იმიტომ, რომ მაშინ ისიც შთავარდებოდა იქ ჩვენთან ერთად. დოლტონ ეიმზი. დოლტონ ეიმზი. დოლტონ ეიმზი. ნეტავ კი შეგვეძლოს ქმნა რამე შემზარავისა. მამამ თქვა, სამწუხარო ისაა, რომ კაცი ვერ იქმს რამე შემზარავს” (ფოლკნერი 2010: 67).

ანგონის ფიქრები: “ცელის ხმა ახლოვდება, ძლიერდება – დამამშვიდებელი, სასიამოვნო, მარტივი და მაინც ძნელი მისაბაძი. ტყუილად დაიტანჯები, სულ სხვანაირი პირის ღრუა საჭირო ამგვარი ხმის გამოსაცემად. ს და შე ენაცვლება ერთმანეთს განუწყვეტლივ... შეშეშ... სშეშ... ორი თანხმოვანი... შეშეშ... სშეშ... ვერც ენას იმორჩილებ, ვერც ტუჩებს უყრი თავს. მაგრამ ბედნიერებისგან მაინც გელიმება. აუზის ფსკერიდან, როგორც მწვანედ მოლივლივე სათიბიდან, თანდათან ამოდიან მთიბავები, ჯერ მხრებამდე, მერე წელამდე, მერე მუხლამდე... ერთად, ერთხმად იქნევენ (შენს დასანახად) მზეზე ალაპლაპებულ ცელებს. ირიბად, გვერდულად, თითქმის შეუმნევლად მოიწევენ წინ (შენსკენ). რაკი მაყურებელი ჰყავთ, უფრო მონდომებით შრომობენ... თითქოს ზამთარში პირუტყვის გამოსაკვებად კი არ ირჯებიან, არამედ კაშელების ერთი უსაქმური ბავშვის ცნობისმოყვარეობის დასაკმაყოფილებლად” (ჭილაძე 2006: 176-177).

ისეთ მონაკვეთებში კი, სადაც დამაბულობა კლებულობს, ან ავტორები არაემოციური, გაწონასწორებული, ნეიტრალური პერსონაჟების პირით საუბრობენ, “ცნობიერების ნაკადის” ტექნიკა მინიმუმამდე დადის ან საერთოდ ქრება. მაგალითად, ფოლკნერი არ მიმართავს მას, როცა ჯეისონის ან დილზის შინაგან მონოლოგებს წერს. შინაგანად უკონფლიქტო გმირებს ფოლკნერი ყოვლისმცოდნე ავტორის პოზიციიდან აღწერს (თოფურიძე 1988: 93). იგივე ითქმის ჭილაძის პროზაზეც - რაჟდენ კაშელის ფიქრების აღწერისას, მწერალი არ იყენებს “ცნობიერების ნაკადის” ტექნიკას და ავტორისეულ აღწერებს მიმართავს. მაგალითად, ჯეისონ კომპსონის ფიქრები (პირველ პირში): “კახა მუდამ კახაა. მისი გაკვეთილების გაცდენის მეტი თუ არაფერი იცით და ამის მეტი არაფერი გაწუხებთ, ბედნიერი ქალი ყოფილხართ-მეთქი. სამზარეულოში უნდა ტრიალებდეს ახლა და არა მაღლა, თავის ოთახში იჯდეს და ითხუპნებოდეს. ექვსი ზანგი თუ არ მოემსახურა, ისე არ იქნება, ეს თხრები კი, განა არ ვიცით, ვიდრე მუცელს პურითა და ხორცით არ ამოიყორავენ, თითხაც არ გაანძრევენ-მეთქი. – მაგრამ სკოლაში რომ არ იფიქრონ, ბავშვს ვეღარ იმორჩილებსო, მე უნდა... – კარგით ერთი, – ასე მივუგე, – აბა რა შეგიძლიათ? არც არასდროს გიცდიათ მაგ გოგოს მოთოკვა. ხოდა, ახლა ჩვიდმეტი წლისას რას მოუხერხებთ? დედა ერთხანს ფიქრებს მიეცა (ფოლკნერი 2010: 163).

რაჟდენ კაშელის ფიქრები ლიზიკოზე (მესამე პირში): “მთელი მისი არსება გარდაუგალი, უკვე კარს მომდგარი დღესასწაულის შეგრძნებით იყო სავსე, დღესასწაულისა, რომელსაც ბავშვური მოუთმენლობით ელოდები და რომლისთვისაც ჭირნახული კაცივით წინასწარ იჭერ თადარიგს. დიახ, ამ ხნის განმავლობაში ამ დღისთვის იჭერდა თურმე თადარიგს. ამ ენით უთქმელი მდელვარების განსაცდელად ემზადებოდა მთელი ცხოვრება. შეიძლება, შეუგნებლად, მაგრამ მხოლოდ ამის გამო მიიწევდა განუწყვეტლივ წინ კარიერის მოლიპულ გზაზე. ... ამის გამო იცვლიდა ზნეს, სახეს, მრწამსს, ამის გამო იტანდა ფეფეს... ამის გამო ემლიქნებოდა უფროსებს და ამის გამო თრგუნავდა ხელქვეითებს, მასზე დაბლა მდგომთ... რათა ერთ მშვენიერ დღეს, შეამიანი მუმლის კორიანტელში, სულის შემსუთავ სიცხეში, სააგარაკო ფაცა-ფუცში, მოულოდნელად ახელოდა თვალი იმის დასანახად, რისი დასანახი თვალიც ყველა ნორმალურ ადამიანს შეგნებულად აქვს დაბრმავებული. ... ახალი დანიშნულებაც შეიძინა უცებ: მაინცდამაინც, საკუთარი რძლის დამორჩილება, საკუთარი რძლის გაბახება...” (ჭილაძე 2006: 88-89).

ამ შემთხვევაში ორივე პერსონაჟი მშვიდად ფიქრობს, ლოგიკურად აზროვნებს და შესაბამის დასკვნებსაც აკუთებს. ამრიგად, შეიძლება ითქვას, რომ გამოიყენებენ თუ არა ავტორები “ცნობიერების ნაკადის” ტექნიკას, გმირის ხასიათსა და განწყობაზეა დამოკიდებული.

ზემოთხსენებულ რომანებს შორის კიდევ ერთი საერთო შტრიხი აღინიშნება - ორივე ნაწარმოებში, უშუალოდ “ცნობიერების ნაკადის” რომანებისგან განსხვავებით (“ულისე”, “ტალღები”), დიდი მნიშვნელობა ენიჭება სიუჟეტს და მის განვითარებას, მაგრამ ფოლკნერი ცდილობს სიუჟეტით შინაგანი მონოლოგები დატვირთოს (თოფურიძე 1988: 100), ჭილაძე კი, რადგან “ცნობიერების ნაკადის” ტექნიკას ისეთივე დოზით არ იყენებს, იმ მომენტებში, როცა მას მიმართავს, ამჯობინებს, სიუჟეტი შეძლებისდაგვარად გამოთიშოს და მხოლოდ გმირის განცდებსა და ემოციებს დაუთმოს ადგილი (სიუჟეტს მხოლოდ ნაწილობრივ რთავს). ამიტომ ასეთ შემთხვევებში სიუჟეტზე მეტად, ასოციაციურად დაკავშირებულ მოგონებებს წამოსწევს წინ. მაგალითად, ბენჯის შინაგანი მონოლოგიდან არაერთ ამბავსა და ოჯახური ცხოვრების დეტალს ვიგებთ, სიუჟეტი ვითარდება და ნელ-ნელა მიდის კულმინაციისკენ. “გოდორში” კი, თუკი

ანტონის შინაგანი მონოლოგი (მას შემდეგ, რაც მამასა და ცოლს შეუსწრებს) მოგონებებითაა დატვირთული და იმავდროულად სიუჟეტიც ვითარდება (დამით ანტონი მიღის ბარში, ამტკიცებს, რომ მკვლელია, შემდეგ კი მას სცემენ და ფანჯრიდან გადმოაგდებენ), ლიზიკოს ბოლო შინაგან მონოლოგში სიუჟეტი საერთოდ იკარგება, ადგილი ეთმობა მოგონებებსა და ემოციებს და ვგებულობთ მხოლოდ იმას, რომ ის ფსიქიატრიულ საავადმყოფოში წევს.

ამრიგად, უილაიმ ფოლკნერისა და ოთარ ჭილაძის რომანებს, “ხმაურსა და მძვინვარებასა” და “გოდორს” შორის, რამდენიმე მსგავსება შეინიშნება, რითიც ქართველი ავტორი ამერიკელ მოდერნისტს მიემართება: 1. ოთარ ჭილაზე ისევე, როგორც ფოკლნერი, “ცნობიერების ნაკადის” ტექნიკას იყენებს, როგორც მხატვრულ ხერხს, 2. საკუთარი მხატვრული მიზნებიდან გამომდინარე, ორივე მწერალი ამ ტექნიკას მიმართავს მაშინ, როცა პერსონაჟი ემოციურად დაძაბულია და სულიერ კრიზისში იმყოფება, 3. როცა დაძაბულობა კლებულობს ან ავტორები არაემოციურ პერსონაჟებს აღწერენ, “ცნობიერების ნაკადის” ტექნიკა მინიმუმამდე დადის, 4. ფოლკნერის მსგავსად, პერიოდულად ოთარ ჭილაძეც შინაგან მონოლოგებს სიუჟეტით ავსებს, თუმცა ზოგიერთ მონოლოგში მხოლოდ მოგონებებს ეყრდნობა.

ფოლკნერთან ამ ყველაფრის მიზეზი ტრადიციული შინაგანი მონოლოგის ფორმის მოდერნისტულ ფორმასთან შერწყმაა. იგივე ითქმის ჭილაძეზეც, ოდონდ ორივე ავტორი ამას სხვადასხვაგვარად აკეთებს და გამოყენებულ ტექნიკას თავის მწერლურ კონცეფციას, ნაწარმოების შინაარსსა და მისი თანამედროვეობის მოთხოვნებს უმორჩილებს. აღსანიშნავია, რომ უილიამ ფოლკნერის შემთხვევაში, “ცნობიერების ნაკადის” ტექნიკის ამგვარი ინტერპრეტაცია სიახლეს წარმოადგენს (მე-20 საუკუნის 30-იანი წლები), ოთარ ჭილაძის მოღვაწეობის პერიოდში კი ტექნიკის ამ ფორმით გამოყენება უკვე ნაცადი ხერხია და ფართოდ გავრცელებული არა მხოლოდ ინგლისურენოვან, არამედ მსოფლიო ლიტერატურაში. ამიტომ მისი მიმართება თუ ტიპოლოგიური მსგავსება ამ ნოვატორი მოდერნისტის მწერლობასთან, სავსებით ბუნებრივია. მაგრამ უნდა აღინიშნოს ის ფაქტი, რომ მისი თანამედროვეობიდან და შემოქმედებითი აზროვნებიდან გამომდინარე, ოთარ ჭილაძეც “ცნობიერების ნაკადის” კიდევ ახალ, თავისებურ ინტერპრეტაცის გვთავაზობს (როგორც ნებისმიერი ავტორი, რომელიც

ამ ტექნიკას მიმართავს) და ზედმიწევნით ახერხებს პერსონაჟების ხასიათებისა და სულიერი სფეროს გახსნას, რაც, ფაქტობრივად, ამ ხერხის მთავარი მიზანია.

ა) მთხობელის ფუნქცია ფოლკლერისა და ჭილაძის ომანებში

ერთ-ერთი მთავარი საკითხი ფოლკლერისა და ჭილაძის არა მხოლოდ ზემოთ დასახელებულ, არამედ სხვა რომანებშიც, მთხობელის ფუნქციის საკითხია, რადგან კლასიკურ “ცნობიერების ნაკადის” ნაწარმოებებში, ანუ შინაგან მონოლოგში, მთხობელი, ფაქტობრივად, ქრება და აღგილს პერსონაჟს უთმობს (საყვარელიძე 1974: 163), ის მხოლოდ განსაკუთრებულ შემთხვევებში ან რემარკებში ჩანს, იმ მწერლებთან კი, რომლებმაც მხოლოდ “ცნობიერების ნაკადის” ტექნიკას მიმართეს, მთხობელის როლი სირთულეს ქმნის. ფოლკლერთანაც და ჭილაძესთანაც მთხობელი ვრცელ შესავლებს აკეთებს, პერიოდულად ერთვება პერსონაჟების შინაგან მონოლოგებშიც, ხან კი შესამჩნევია მისი იმპერსონალიზაცია.

მთხობელის საკითხი ზოგადად საინტერესოა მოდერნისტულ ლიტერატურაში (მაგალითად, ფოლკლერის პროზაში) და მით უფრო მე-20 მეორე ნახევრისა და მე-20 და 21-ე საუკუნეების მიჯნაზე არსებულ ტექსტებში, როგორიცაა, მაგალითად, ოთარ ჭილაძის პროზა. აუცილებელია აღინიშნოს, რომ მთხობელის სახე, იქნება ეს ნაწარმოებში შემოყვანილი კონკრეტული სუბიექტი თუ ფიქტიური პერსონაჟი, ნაწარმოების ავტორთან – შემქმნელთან, არაიდენტურია და მას საკუთარი, შესაძლოა, ავტორისგან განსხვავებული თვალთახედვაც გააჩნდეს (Wielpert 1989). ავტორი-შემქმნელი, ნაწარმოების ტექსტში არ შემოდის, მისი თვალთახედვა ჩანს სხვადასხვა მოვლენიდან თუ პერსონაჟის დამოკიდებულებიდან, მაგრამ ის არ არის სუბიექტი. შესაბამისად, ავტორი უფრო მდიდარი ცნებაა, ვიდრე მთხობელი, რადგან ავტორისთვის ყველაზე ახლო მდგომ კონკრეტულ პოზიციასაც კი არ შეუძლია ავტორი-შემქმნელის თვალთახედვის სრულად წარმოჩენა. ის მხოლოდ კომპლექსურად – სუბიექტური და ობიექტური გარემოებებიდან ჩანს. მთხობელი კი ნაწარმოებში ხშირად ჩნდება, ის ჩანს თხობის მანერაში, ინტონაციაში, ეპითეტებსა თუ შედარებისას. შეიძლება ითქვას, რომ მთხობელი მეტნაკლებად

დამოუკიდებელი სახეა, რომელიც თხრობის პროცესში იმ შემთხვევაში ერთვება, როდესაც ნაწარმოები საჭიროებს კონკრეტულ ინფორმაციას რაიმე მოქმედებების ან ადამიანების შესახებ და აუცილებელია ამგვარი მოვლენებისადმი ემოციების გამომჟღავნება. შესაბამისად, პერსონაჟსა და მკითხველს სწორედ მთხრობელი აკავშირებს (Падучева 1995).

ამრიგად, არსებობს თხრობის სამგვარი ფორმა და, შესაბამისად, სამგვარი მთხრობელი:

1. თხრობა I პირში, როცა მთხრობელი თავად პერსონაჟია, ძირითადად, მთავარი გმირი. მთხრობელი ტექსტის ნაწილია და ის მოქმედებებშიც მონაწილეობს. ასეთი თხობის მაგალითია მემუარები, წერილის ფორმით შესრულებული რომანები და, ზოგადად, მე-18 საუკუნის ჟანრები.

2. მეორე ფორმა ეს არის თხრობა I პირის გარეშე, ე.წ. ტრადიციული ნარატივი. ამ შემთხვევაში ეგზეგეტიკური მთხრობელის, რომელიც არ ეპუთვნის ნაწარმოებს, მიზანია, ობიექტური ყოფის სურათის შექმნა და ნაწარმოების რეალობის აღწერა. ტრადიციული ნარატივი მწვერვალს აღწევს მე-19 საუკუნის რეალისტურ რომანებში.

3. შემდეგი ფორმა კი არის ე.წ. არასაკუთრივ-პირდაპირი დისკურსი, სადაც მთხრობელი თხრობას, თხრობის აქტს პერსონაჟს უთმობს. აქ ჩნდება საინტერესო ლიტერატურული ფიგურა – III პირში მოსაუბრე პერსონაჟი, რომელიც, ფაქტობრივად, იგივე მთხრობელია (Падучева 1995). ამგვარი თხრობა მე-20 საუკუნის მოდერნისტულ რომანებს ახასიათებს. განსაკუთრებით ეს ითქმის “ცნობიერების ნაკადის” ლიტერატურაზე, სადაც მთხობელის როლი, ფაქტობრივად, მთლიანად პერსონაჟს აქვს აღებული საკუთარ თავზე, როგორც ეს ხდება ჯეიმს ჯოისისა და ვირჯინია ვულფის რომანებში, და შემდგომ მეტნაკლებად გრძელდება “ცნობიერების ნაკადის” ტექნიკით შესრულებულ ნაწარმოებებში.

ცნობილი ავსტრიელი ლინგვისტი შტანცელი კი გამოყოფს თხრობის ორ ტიპს:

1. საავტორო თხრობას და, შესაბამისად, საავტორო რომანს (authorial situation, authorial novel). აქ იგულისხმება თხრობა, რომელიც მესამე პირში მიმდინარეობს. მწერალსა და მის მიერ შექმნილ სამყაროს შორის შუამავალი ავტორი-მთხრობელია.
2. პერსონალურ თხრობას და პერსონალურ რომანს (figural situation, figural novel), სადაც მთხრობელი პერსონაჟია, მკითხველი კი ორიენტირებულია ცენტრალური გმირის ცნობიერზე, რომელიც სინამდვილეს შეიცავს. აქ მოვლენები მხოლოდ ისეა წარმოდგენილი, როგორც მას პერსონაჟი აღიქვამს.
3. თხრობის ამ ტიპებს შორის შტანცელი გამოყოფს თხრობის კიდევ ერთ ტიპს, კიდევ ერთ რომანს - “first-person novel” – რომანი პირველი პირისგან, რომელიც იმის მიხედვით, მთხრობელი დამკვირვებელია თუ მოქმედების მონაწილე, უახლოვდება რომანის ან პირველ, ან მეორე ტიპს (Stanzel 1971: 24-63).

რაც შეეხება უილიამ ფოლკნერის რომანს “ხმაური და მძვინვარება”, აქ, ჯოისისა თუ ვულფისგან განსხვავებით, თხრობა I პირში მიმდინარეობს, მაგრამ ამერიკელი მწერლის თხრობას არაფერი აქვს საერთო ავტობიოგრაფიულ, მემუარულ თუ სხვა მსგავს ჟანრთან, მთხრობელი აქაც პერსონაჟის პირით მეტყველებს.

ოთარ ჭილაძის იმ რომანებში, სადაც “ცნობიერების ნაკადის” ტექნიკა იჩენს თავს, თხრობა, ძირითადად, III პირშია – პერსონაჟი უღრმავდება საკუთარ ფიქრებს თუ იგონებს წარსულის მოვლენებს, ის საკუთარ თავზე მესამე პირში ჰყვება, რადგან ერთდროულად პერსონაჟიცაა და მთხრობელიც, რომელიც ცდილობს, გარდა იმისა, რომ გმირის სულიერ სამყაროს ჩაუდრმავდეს, მის მიერ აღქმული სუბიექტური რეალობაც აღწეროს. ის ერთდროულად პერსონაჟიცაა და “ყოვლისმცოდნე ავტორიც” (იკვეთება არასაკუთრივ-პირდაპირი დისკურსი). ასეთი კომბინაციის დროს მთხრობელის პლანის ვალდებულება რეალობის აღწერაა, ხოლო გმირის პლანისა – შინაგანი, არარეალური სამყაროს წარმოჩენა. მაგალითად მოგვყავს ნაწყვეტი რომანიდან “გოდორი”: “და მაინც... მამის მკალელობაზე მნიშვნელოვანი, საინტერესო და, რაც მთავარია, საჭირო, არაფერი

გაუკეთებია ანტონს, არაფერი ჩაუდენია და არაფერი მოუმოქმედებია მთელი თავისი ოცდასამწლიანი სიცოცხლის მანძილზე. ოცდასამი წელი უაზროდ, უმიზნოდ, უინტერესოდ, ანუ უწყლოდ და უმირაჟოდ მიუყვებოდა მწირსა და ხრიოკ უდაბნოს, პაერის გაბერილი ბუშტივით, მამის გვამი კი (სულერთია, იპოვიან თუ არ იპოვიან), იგივე ბალსტი აღმოჩნდა მისთვის. ... “მთლად ნუ გადაგვივლი ახლა” – იცინის თამადა. “მეც მათქმევინე, შეჩემა, ერთი სადღეგრძელო... როდემდე ვუსმინოთ ამ ნესოსტაიავში უბიიცას” – ბრაზდება ბუსთვალება” (ჭილაძე 2006: 196). აქ ანტონის ფიქრებია აღწერილი, მაგრამ ის ამავდროულად, მისი თვალით დანახულ რეალობასაც აღწერს, სადაც სხვა პერსონაჟებიც ერთვებიან, თუმცა ეს რეალობა მაინც სუბიექტურია, რადგან მიუხედავად იმისა, რომ ანტონი მთხოვობელის როლშიც გამოდის, მოქმედება მის გონიერების ხდება.

იგივე შეიძლება ითქვას რომანზე “მარტის მამალი”, სადაც ნიკო მთხოვობელიცაა და პერსონაჟიც. ამ რომანში კიდევ უფრო მეტად იქმნება იმის შთაბეჭდილება, რომ ამბავს მთხოვობელი ყვება, რადგან მონაკვეთები, სადაც არის აღწერები და ვრცელი დიალოგები, წააგავს ყოვლისმცოდნე ავტორის ტექსტს, მაგრამ შემდეგ მკითხველს ახსენდება, რომ მოქმედება ნიკოს ცნობიერში ხდება და მიუხედავად წარსულის ზუსტი აღწერისა თუ რაიმე ფაქტის ზედმიწევნით წარმოდგენისა, ეს რეალობაც კი სუბიექტურია: “მატარებელი კი მიპქროდა. მატარებელი მოპქროდა და ნიკოს თავისი უკეთესი ცხოვრება ახსენდებოდა ისევ, ჯერ კიდევ ომამდელი, როცა დედას, ხან კი ორივეს, დედასაც და მამასაც, მიჰყავდა იგი სიღნაღში, გადასარჩენად კი არა, როგორც ახლა, დასასვენებლად, პაერის გამოსაცვლელად, სათამაშოდ, ბებიასთან და პაპასთან, მხოლოდ და მხოლოდ, ერთი ზაფხულით” (ჭილაძე 1987: 31). “ვანო მასწავლებელი ამბობს, ყველანი ამირანის შვილები ვართო, მაგრამ ხომ შეიძლებოდა, ნამდვილად თავისი, სისხლხორციელად თავისი შვილიც ყოლოდა ამირანს?! რატომაც არა! რომელი ქალი იტყოდა უარს ამირანის შვილის გაჩენაზე?! მით უფრო – კამარი! კახა! იმიტომ რომ, უყვარდა. იმიტომ რომ, სიყვარულს ანაცვალა ყველა და ყველაფერი (ჭილაძე 1987: 26).

თუმცა აქვე უნდა აღინიშნოს, რომ ოთარ ჭილაძის ზემოთხსენებული რომანების გარკვეულ მონაკვეთებში შემოდის ტრადიციული მთხოვობელი (ე.წ. ნარატიული თხორბა), რომელიც ხან ვრცელ, ხან კი მოკლე შესავალს აკეთებს,

პერსონაჟების შინაგან მონოლოგებს შორის კავშირს ამყარებს ან გმირის შინაგან მონოლოგში ერთვება. განსაკუთრებით ეს ითქმის შესავალ სიტყვებზე, რადგან ასეთ დროს ოთარ ჭილაძე ისევე, როგორც რეალისტი ავტორი, ყვება და აანალიზებს ამა თუ იმ მოვლენას საკუთარი პოზიციიდან, არ ერიდება ვრცელ ლოგიკურ მსჯელობებსა, მკითხველის ტექსტში ჩართვასაც და ირგებს ტრადიციული ავტორი-ნარატორის როლს. ამის საუკეთესო მაგალითია რომან „გოდორის“ შესავალი ნაწილი, სადაც მთხოვბელი ტრადიციული მანერით მოგვითხობს საქართველოსა და შემდგომ კაშელების ოჯახის ისტორიას თითქმის 45 გვერდზე: „მას მერე ინგრეოდა, ნადგურდებოდა, თვალსა და ახელს შუა ქრებოდა წინაპართა სისხლითა და ოფლით, ხმლითა და წიგნით, წვითა და დაგვით ნაშენები ქვეყანა. წყალს მიჰქონდა ნაფოტივით, ქარს მიჰქონდა თივის ბუმბულივით, ორი მეფის, ოთხი მთავრის, ერთი ათაბაგისა და უთვალავი თავადაზნაურის უკუდო ამპარტავნობას გადაყოლილი, მათ სიხარბესა და ვერაგობას ვერგაწვდენილი...“ (ჭილაძე 2006: 31). ან: „იქიდან იწყება კაშელების სისხლიანი დინასტიის წელთაღრიცხვაც: რაუდენ კაშელი და მისი მეუღლე კლავა ერთ-ერთი პირველები ჩაეწერნენ მოხალისეებად ეგრეთწოდებულ მეთერთმეტე არმიაში და შვილიც 21-ში გაუჩნდათ, ზუსტად თბილისის აღების დღეს, უფრო ზუსტად, თბილისის დაცემისთანავე, თითქოს მხოლოდ იმიტომ დაეცა თბილისი, კლავას რომ მშვიდად მოემშობიარებინა“ (ჭილაძე 2006: 33). პერსონაჟების სუბიექტური თვალთახედვა კი რომანში ნელ-ნელა შემოდის და სიუჟეტის გამძაფრებასთან ერთად უფრო იკვეთება.

რომანის მეორე ნაწილში კი ანტონის შინაგან მონოლოგს, რომელიც ერთ-ერთი საკვანძო მონოლოგია ნაწარმოებში, რადგან აქ გმირის დრამა კულმინაციას აღწევს, წინ უძღვის მთხოვბელის (და არა ანტონის) მიერ დამის სურათის პოეტური აღწერა: „ჯერ დამეა. ერთადერთი ჩიტი უსტვენს მხოლოდ. ისიც გაუბედავად. ხანგამოშვებით. მაგრამ მისი ხმა – ფოლადივით მტკიცე, მახვილივით ბასრი, ანდაზასავით მკაფიო – მაინც შლის, მაინც არღვევს წყვდიადს და ჯიუტად, თანდათანობით გამოჰყავს იქიდან ცვარ-ნამით გალუმპული, მოულოდნელად განთავისუფლებული პატიმარივით დაბნეული ქვეყანა, ... და ბოლოს, ვერის ბაღის აუზის კიდეზე მუცლით გადაწოლილი ანტონი, მართალია, ბუნდოვნად, მაგრამ

მაინც არჩევს საკუთარ სახეს საკუთარი სისხლით კიდევ უფრო უარესად ამღვრეულ წყალში... ესე იგი, ცოცხალია!” (ჭილაძე 2006: 171-173).

ამ ყველფრიდან გამომდინარე შეიძლება ითქვას, რომ მთხოვობელს ოთარ ჭილაძის “ცნობიერების ნაკადის” ტექნიკით შესრულებულ რომანებში, ისევე, როგორც უილიამ ფოლკნერის პროზაში, მრავალმხრივი ფუნქცია აქვს – ის ხან ტრადიციული ნარატივის ფარგლებში ყოვლისმცოდნე ავტორის როლში გამოდის, ხანაც თხრობის აქტს პერსონაჟს უთმობს და ხდება მისი პერსონაჟთან იდენტიფიცირება. ასეთ შემთხვევებში პერსონაჟი იგივე მთხოვობელია. ჭილაძის პროზაში, თხრობა, როგორც წესი (შინაგან მონოლოგებშიც), მესამე პირში მიმდინარეობს.

დასკვნები

“ცნობიერების ნაკადის” ლიტერატურული მეთოდი მე-20 საუკუნის ინგლისურ მოდერნისტულ ლიტერატურაში აღმოცენდა. ამ მეთოდით შესრულებულ კლასიკურ ნაწარმოებად ჯეიმს ჯოისის “ულისე” ითვლება, სადაც ჯოისმა, ბერგსონის მოძღვრებასა და ფროიდის კლასიკური ფსიქოანალიზის თეორიაზე დაყრდნობით, ფაქტობრივად, შეიმუშავა “ცნობიერების ნაკადის” პროზის კონცეფცია. სხვა თეორიული გამყარება მათოდს არ აქვს.

“ცნობიერების ნაკადის” პროზა შინაგან მონოლოგებს ეყრდნობა, რომელთა მიზანი, რეალისტური ნაწარმოების შინაგანი მონოლოგებისგან განსხვავებით, არა სწორხაზოვნად ერთი თემის განვითარება, არამედ გმირის სულიერ სამყაროში ჩაღრმავება, ხშირ შემთხვევაში კი, პერსონაჟის არაცნობიერის წვდომის მცდელობაცაა. ამგვარი შინაგანი მონოლოგები, თავის მხრივ, ასოციაციურ აზროვნებას ემყარება, რაც ერთმანეთთან ალოგიკურად, მხოლოდ ასოციაციურად დაკავშირებულ ფიქრებსა და მოგონებებს გულისხმობს.

აღსანიშნავია, რომ “ცნობიერების ნაკადის” ტექნიკა - გამომსახველობითი ფორმები, ოსტატურად გამოიყენა უილიამ ფოლკნერმა თავის რამდენიმე რომანში, რის შედეგადაც, უარი თქვა ამ მეთოდის შინაარსობრივ მხარეზე – არაცნობიერის წინ წამოწევაზე და მიმართა მხოლოდ მის ტექნიკას, როგორც მხატვრულ ხერხს. ფოლკნერის შემდგომ, ანუ მე-20 საუკუნის 30-იანი წლებიდან, “ცნობიერების ნაკადის” ტექნიკით არაერთი მხატვრული ნაწარმოები შესრულდა. მათ შორის შეიძლება დავასახელოთ პენრი მიულერის, სილვია პლათის, ტომას პინჩონისა და სხვათა რომანები. წინამდებარე ნაშრომის განხილვის თემა კი ქართველი მწერლის, ოთარ ჭილაძის პროზაში გამოყენებული “ცნობიერების ნაკადის” ტექნიკის კვლევაა.

შემოქმედებითი საქმიანობის საწყის ეტაპზე ოთარ ჭილაძე “ცნობიერების ნაკადის” ტექნიკას მცირე დოზით იყენებს, მაგრამ მოგვიანო პერიოდის რომანებში მწერალი ცდილობს, ჩაუღრმავდეს პერსონაჟების შინაგან სამყაროს და გმირების სულიერი დრამა, დაძაბული და კრიზისული მდგომარეობა, სწორედ “ცნობიერების ნაკადის” ტექნიკის დახმარებით, შინაგანი მონოლოგებისა და ასოციაციურად დაკავშირებული ფიქრებით გადმოსცეს. მწერლის ამგვარი მიდგომა ლოგიკურადაც

გამართლებულია, რადგან როულ ცხოვრებისეულ სიტუაციაში მყოფი გმირების ფიქრები ქაოტური და გაუფორმებელია.

კვლევის შედეგად გამოჩნდა, რომ გარკვეულ ეტაპზე, შედარებით გვიანდელ ნაწარმოებებში, ოთარ ჭილაძისთვის “ცნობიერების ნაკადის” ტექნიკა მთავარი სტილისტური იარაღი ხდება. მაგრამ მწერალი მას მხოლოდ მაშინ მიმართავს, როდესაც გმირების სულიერი მდგომარეობა უკიდურესად გამწვავებულია, ხოლო იქ, სადაც შინაგანად უკონფლიქტო პერსონაჟებს წარმოაჩენს, “ცნობიერების ნაკადის” ტექნიკას, ფაქტობრივად, არც იყენებს.

“ცნობიერების ნაკადის” მეთოდითა თუ ტექნიკით შესრულებულ ნაწარმოებებში, მნიშვნელოვან როლს თამაშობს ინდივიდუალური მეხსიერება, რომელიც კულტურის კვლევებში, ფილოსოფიასა თუ ფსიქოლოგიაში, მრავალმხრივ საინტერესო ფენომენია. როგორც წესი, ამ ტიპის ნაწარმოებებში მოქმედება პერსონაჟის გონებაში, წარსულის მოვლენების დროს მიმდინარეობს და გმირების ასოციაციებსა და აწმყო ემოციებით გამოხმობილ წარსულ ფაქტებს უნებურად გადავყავართ მეხსიერების წიაღში. თხრობის დროს ჭილაძის გმირები აქტიურად არ მოქმედებს, არამედ იგონებენ წარსულს და მიჯაჭვულნი არიან მას. ამიტომ ლოგიკურია იმის მტკიცება, რომ ლიტერატურაში “ცნობიერების ნაკადი” ინდივიდუალური მეხსიერების გააქტიურების შედეგად არსებობს.

ნაშრომში ასევე საუბარია უილიამ ფოლკნერის, როგორც “ცნობიერების ნაკადის” ავტორის რომანებისა და ოთარ ჭილაძის პროზის საერთო მახასიათებლებზე. ფოლკნერმა, რომელიც გაემიჯნა “ცნობიერების ნაკადის” ჯოისისეულ კონცეფციას, გამოიყება მხოლოდ მისი ტექნიკა რომანებში “ხმაური და მძვინვარება” და “მომაკვდავი რომ ვესვენე”, შემდეგ კი ტექნიკისგანაც უკან დაიხია და 30-იანი წლების მერე დაწერილ რომანებში, მინიმუმამდე დაიყვანა (თოფურიძე 1988: 86-102).

ფოლკნერისა და ჭილაძის რომანები ერთმანეთს ჯერ კიდევ გურამ ასათიანმა შეადარა 1977 წელს, როდესაც რომანების - “ყოველმან ჩემმან მპოვნელმან” და “ხმაური და მძვინვარება” - ტიპოლოგიურ მსგავსებაზე ალაპარაკდა. თუმცა, ვფიქრობ, როგორც ტიპოლოგიურად, ასევე ტექნიკის თვალსაზრისით, მსგავსება მეტია რომანებს შორის “გოდორი” და “ხმაური და მძვინვარება”, სადაც ორივე ავტორი პოლიტიკური და ზნეობრივი პრობლემების ნიადაგზე კრიზისში მყოფი

პერსონაჟების შინაგან სამყაროს, “ცნობიერების ნაკადის” ტექნიკის დახმარებით აღწერს.

ოთარ ჭილაძისთვის, ისევე, როგორც უილიამ ფოლკნერისთვის, მნიშვნელოვანია არა პერსონაჟის ცნობიერისა და არაცნობიერის წარმოჩენა, არამედ გმირის ხასიათის ჩვენება. ამიტომ გამოიყენებენ თუ არა ეს ავტორები “ცნობიერების ნაკადის” ტექნიკას, სწორედ პერსონაჟის ხასიათსა და შინაგან მდგომარეობაზეა დამოკიდებული.

დასპანები

კვლევის შედეგად, რომელიც მოიცავდა როგორც ოთარ ჭილაძის რომანების თეორიული საფუძვლების, ასევე მისი სტილისა და ტექნიკის კვლევას და ტექსტის მხატვრულ ანალიზს, დადასტურდა, რომ ჭილაძე როგორც თემატურად, ასევე სტილისტურად, მრავალხრივი და მრავალფეროვანი ავტორია. იგი მე-20 საუკუნის მეორე ნახევრის ქართული ლიტერატურის ერთ-ერთი ყველაზე საყურადღებო და გამორჩეული ფიგურაა.

მწერლის პროზა გამოირჩევა სუბიექტურობითა და ფსიქოლოგიზმის მომძლავრებით, რადგან თავის რომანებში ჭილაძე პერსონაჟების შინაგან სამყაროს, ცნობიერს უდრმავდება და ზოგჯერ არაცნობიერის წვდომასაც ცდილობს. ტერმინი “სუბიექტური თხრობაც” თავის თავში სწორედ სუბიექტურ პერსპექტივას გულისხმობს და ის სხვადასხვა სტილისა თუ ჟანრის ნაწარმოებებს მიესადაგება. სუბიექტურ რომანებში ყველაზე მნიშვნელოვანი ელემენტი გმირის სულიერი სფეროა, რადგან აქ ნამდვილი რეალობა ისაა, რაც პერსონაჟის ცნობიერებაში ხდება და არა ემპირიული ფაქტები. ოთარ ჭილაძის მთხოვნელი ყოველთვის ცდილობს ერთი კონკრეტულ გმირის პოზიცია დაიკავოს და მისი შინაგანი სამყაროს მეშვეობით აღწეროს ობიექტური გარემო თუ მოვლენები, ან სულაც, ერთი და იგივე მოვლენა რამდენიმე განსხვავებული პერსპექტივით წარმოაჩინოს. ეს ართულებს ნაწარმოებების სიუჟეტის გაგებას და ზოგიერთ მოვლენას აბუნდოვნებს, მაგალითად, როგორც რაჟდენ კაშელის მკვლელობის სცენას რომანში “გოდორი”, რომელსაც რამდენიმე პერსონაჟი ყვება. თითოეულს ამ მკვლელობის განსხვავებული ვერსია აქვს და ავტორის მიერ აქცენტირებული არაა, რომელია “სწორი”. ასეთ შემთხვევაში ნაწარმოების სწორი ესთეტიკური აღქმა, განუსაზღვრელი ადგილის შევსება თუ განუსაზღვრელადვე დატოვება მკითხველზეა დამოკიდებული.

მე-20 საუკუნისთვის დამახასიათებელმა ტენდენციამ – პროზაში სუბიექტური საწყისების მომრავლებამ, აშკარად იჩინა თავი ოთარ ჭილაძის რომანებში, რადგან

მის ნაწარმოებებში ობიექტური რეალობა, თითქმის ყოველთვის, სუბიექტური პერსპექტივიდანაა წარმოდგენილი. მწერალი, იმის მიხედვით, თუ რომელი პერსონაჟის თვალთახედვა და პოზიციაა მისთვის მისაღები კონკრეტულ სიტუაციაში, ცვლის რომანის რეალობისადმი დამოკიდებულებას და წარმოადგენს “სუბიექტურ რეალობას”, რომლის არსებობაც ჭილაძის ნაწარმოებებში ყოველთვის გამართლებულია, რადგან მწერალი პერსონაჟების “შიგნიდან” გახსნას, მათ ცნობიერსა თუ ქვეცნობიერში ჩაღრმავებას ცდილობს.

ადსანიშნავია, რომ ამგვარმა სუბიექტურობამ თთარ ჭილაძის პროზის ფსიქოლოგიზმიც განაპირობა, რაც, უპირველეს ყოვლისა, სწორედ ადამიანის შინაგანი სამყაროს წვდომას გულისხმობს.

მხატვრული ფსიქოლოგიზმი ჯერ კიდევ მე-19 საუკუნის პროზაში იჩენს თავს და მის სათავეებთან ფრანგი გუსტავ ფლობერი და რუსი ავტორები – ლევ ტოლსტოი და ფიოდორ დოსტოევსკი დგანან. ზოგიერთი მკვლევარის აზრით, სწორედ ამ ავტორების მეშვეობით შეიქმნა მე-19 საუკუნის რეალისტური პროზის ფსიქოლოგიზმის საფუძველი. ადსანიშნავია, რომ ადამიანის სულიერი სამყაროს პვლევა ჯერ კიდევ რომანტიზმა დაიწყო, მაგრამ ის უფრო სულიერ ძიებებსა და ფასეულობებზე იყო ორიენტირებული. ხოლო მე-19 საუკუნიდან ფსიქოლოგიზმს საფუძვლად დაედო წარმოდგენა ადამიანის სულის, როგორც მრავალშრიანი სისტემის შესახებ. ხოლო მე-19 საუკუნიდან ფსიქოლოგიზმს საფუძვლად დაედო წარმოდგენა ადამიანის შინაგანი სამყაროს, როგორც მრავალშრიანი სისტემის შესახებ. ლიტერატურის ამგვარმა ფსიქოლოგიზაციამ ეს საუკუნე ფსიქოლოგიზმის, როგორც პოეტიკური პრინციპის ფორმირებამდე მიიყვანა (Проскурини 2008).

რაც შეეხება მე-20 საუკუნეს, აქ ფსიქოლოგიის, ფილოსოფიისა და ლიტერატურის მიღწევების შედეგად, მხატვრული ფსიქოლოგიზმი ახალ საფეხურზე გადავიდა და სხვა დისციპლინების სფეროშიც შეიჭრა, უფრო ზუტად კი, გამოიყენა ფსიქოლოგიური ოეორიები თავისი პრობლემატიკის უკეთ წარმოსაჩენად. ლიტერატურაში ფსიქოლოგიზმი საჭიროა ხდება იმისთვის, რომ მწერალმა პერსონაჟის სულიერი მდგომარეობისა ადეკვატური ასახვა შეძლოს. ეს, თავის მხრივ, ითხოვს გამოსახვის ახალ ფორმებს – ახალი ლიტერატურულ მეთოდებსა და ხერხებს, როგორიცაა, მაგალითად, “ცნობიერების ნაკადი”, ითხოვს

ასევე განსხვავებულ პოეტიკას. ოთარ ჭილაძე სწორედ ფსიქოლოგიური და სუბიექტური მიღებობის შედეგად აყალიბებს თავისი პერსონაჟების ხასიათებს. მწერლის რა ტიპის ნაწარმოებთანაც არ უნდა გვქონდეს საქმე, მწერალი ხასიათებს “შიგნიდან” ხატავს. ჭილაძის გმირები ღრმა, რთული და ხშირად ტრაგიკული შინაგანი ბუნების მქონე პიროვნებები არიან და, როგორც წესი, მათი პრობლემები მათივე შინაგანი კონფლიქტიდან იღებს სათავეს.

შეიძლება ითქვას, რომ ოთარ ჭილაძის რომანების მხატვრული ფსიქოლოგიზმი, რომელიც გმირების შინაგანი სამყაროს წარმოჩენასა და ცნობიერში ჩაღრმავებას ისახავს მიზნად, ფროიდისა და იუნგის თეორიებს ეყრდნობა.

ფროიდის კალსიკურმა ფსიქოანალიზმა არაერთი მწერლის შემოქმედებაზე მოახდნა გავლენა, რადგან ეს თეორია ზუტად მოერგო მე-20 საუკუნის ლიტერატურის მოთხოვნას – მხატვრულ ნაწარმოებში წარმოჩენილიყო პერსონაჟის შინაგანი სამყარო, მისი ცნობიერი თუ არაცნობიერი სურვილები და ამ გზით აღმოჩენილიყო და გადაჭრილიყო გმირის პრობლემები. ამიტომ ფსიქოანალიტიკური თემატიკა აქტუალური აღმოჩნდა ისეთი მწერლებისთვის, როგორებიც იყვნენ პერმან პესე, თომას მანი, ვლადიმერ ნაბოკოვი, ფრანც კაფკა და სხვები. იმ დროს, როცა ასპარეზზე გამოდის ოთარ ჭილაძე, ფსიქოანალიზი სიახლეს აღარ წარმოადგენს და, შეიძლება ითქვას, აქცენტი უკვე სხვა ფსიქოლოგიურ თეორიებზეა გადატანილი, მაგრამ ფროიდი მაინც რჩება წამყვან ფიგურად არაცნობიერის კვლევის დარგში. ამიტომ, როდესაც ოთარ ჭილაძე თავის რომანებში ცდილობს, მოგონებების, წამოცდენებისა თუ ასოციაციების საშუალებით გააანალიზოს თავისი გმირების საქციელი, გაარკვიოს ურთიერთობა მამებსა და შვილებს შორის ან რომელიმე პერსონაჟის ცხოვრების წარმართველ ფაქტორად დაასახელოს სექსუალური ენერგია, აქ, ცხადია, აშკარად იგრძნობა კლასიკური ფსიქოანალიზის გავლენა. მაგრამ ის პრობლემები, რომლებიც ფროიდის თეორიის გავლენის შედეგადაა დასმული, ყოველთვის მრავალფუნქციური და მნიშვნელოვანია, ამიტომ განსაკუთრებულ როლს თამაშობს რომანის სიუჟეტისა თუ პერსონაჟის შინაგანი სამყაროს განვითარებისას.

ამ კუთხით სადისერტაციო ნაშრომში განვიხილე სამი რომანი: “ყოველმან ჩემმან მპოვნელმან”, “მარტის მამალი” და “გოდორი”.

ფროიდის მტკიცებით, რეალობასა და სიამოვნებას შორის დაპირისპირება, ცვლის ადამიანის ბუნებას და აყალიბებს მან ან პედანტურ, შეზღუდულ პიროვნებად, ან, აგრესიულ და თავშეუკავებალ ტიპად. ამის კარგი მაგალითია ალექსანდრე მაკაბელის პიროვნება რომანიდან “ყოველმან ჩემმან მპოვნელმან”, რომლის ხასიათი და მომავალიც პაპის, ქაიხოსროს საქციელმა განსაზღვა, როდესაც მან ალექსანდრესა და მის ძმას სწორედ მაშინ სცემა, როდესაც ისინი ქალთან ურთიერთობის დამყარებას აპირებდნენ. ამ საქციელმა ალექსანდრეს პიროვნებაში წარმოშვა სრული აღვირასსნილობა, თავშეუკავებლობა, აგრესია და სიძულვილი. ამ ყველაფრის გამომჟღავნებაში მას მაროსთან ურთიერთობაც უწყობს ხელს, რომელიც ასევე ფროიდის გავლენით შექმნილი პერსონაჟია. თხუთმეტი წლის ჭკუასუსტი მარო მესაფლავემ საფლავში გააუპატიურა, ამიტომ ის სქესობრივ და სიკვდილის ინსტინქტს შორის არსებობს – ურთიერთობას ამყარებს დაჭრილებთან და ავადმყოფებთან, რომლებიც მონასტერში მოყავთ და სასაფლაოზე დასტირის უცნობ მიცვალებულებს. შესაბამისად, მაროსთვის არ არსებობს კონფლიქტი საზოგადოებრივ მორალსა და სქესობრივ ინსტინქტს შორის.

მეორე საკითხი, რომელიც ჭილაძესთან ფროიდის თეორიის გავლენითაა წამოჩენილი, არის მამისა და მის ურთიერთობა, რომელსაც, ფსიქოლოგის თანახმად, შვილის დედაზე ეჭვიანობა განაპირობებს. განსაკუთრებით ეს ეხება რომანს “მარტის მამალი” და “გოდორი”.

“მარტის მამალში” საინტერესოდაა წარმოდგელილი მთავარი პერსონაჟის, ნიკოსა და მისი მამის, რომელიც რომანში სულ რამდენჯერმე გამოჩნდება, ურთიერთობა. თუმცა ეს დამოკიდებულება ნაწარმოების ერთ-ერთი მთავარი დერძია. დედამ ნიკო მშობლებთან სიღნაღში გამოგზავნა, რასაც ნიკო ქვეცნობიერად მამას აბრალებს, თვლის, რომ დედამ შვილს ქმარი არჩია და ამიტომ ერთნაირად ბრაზობს როგორც დედაზე, ასევე მამაზე. ეს არის რომანში კონფლიქტის საფუძველიც. ნიკო თავის თავს უდრმავდება (ერთი თვის განმავლობაში ავადმყოფობს) და მხოლოდ მაშინ ახერხებს გამოჯანმრთელებას, როცა შეძლებს მამის დანიშნულების (როგორც მისი წინამორბედის) გააზრებას და მის “პატიებას”.

მეორე რომანში “გოდორი” კი წარმოდგენილია მამის მკვლელობის თემა, რომელსაც ფროიდი ასევე განსაკუთრებულ მნიშვნელობას ანიჭებდა. თუმცა ამ შემთხვევაში, როცა ანტონი კლავს მამას, მკვლელობის მოტივი (რომელიც რეალობაში არც განხორციელებულა) დედა კი არა, ანტონის ცოლია. ამგვარ ჩახლართულ ურთიერთობებში, მამა-შვილის დაპირისპირებასა და მამათილის რძლისადმი ლტოლვაში, აშკარად იგრძნობა ფროიდის მოსაზრებების კვალი.

საბოლოოდ შეიძლება ითქვას, რომ ოთარ ჭილაძემ თავის რომანებში ფროიდის მოძღვრების გათვალისწინებით რამდენიმე საკითხი წამოჭრა: 1. სქესობრივი ინსტინქტის მნიშვნელობა ადამიანის განვითარებისას, რაც გამოიხატა ალექსანდრესა და მაროს პიროვნებების ფორმირებისას, 2. ადრეულ ასაკში მიღებული სექსუალური შთაბეჭდილებების მნიშვნელობა - რაც საფუძვლად დაედო რომანს “გოდორი” და მიმართულება მისცა სიუჟეტის განვითარებას და 3. მამა-შვილის (ძირითადად არაცნობიერი) დაპირისპირების საკითხი, რომელიც, ცხადია, სახეცვლილია, მაგრამ სათავეს ფროიდის ნაშრომებში იღებს. ამგვარი თემატიკის გამოყენებით ოთარ ჭილაძემ გაამდიდრა და გაამრავალფეროვნა თავისი პროზა და უკეთ წარმოაჩინა ადამიანის სულიერი სამყაროს ფარული შრეები.

ფსიქოლოგიზმის მეორე გამოხატულება ჭილაძის პროზაულ ნაწარმოებებში სიზმრის ფუნქცია და, შეასაბამისად, კარლ გუსტავ იუნგის ანალიტიკურ ფსიქოლოგიასთან მიმართებაა, სადაც ყველაზე უკეთ გამოჩნდა სიზმრის როლი ადამიანის ინდივიდუალიზაციის პროცესში. იუნგის აზრით, პირადი თუ კოლექტიური არაცნობიერის წვდომის ერთ-ერთ უმთავრეს წყაროს სწორედ სიზმრების ანალიზი წარმოადგენს. სიზმარი წარმოაჩენს ცნობიერისა და არცნობიერის ურთიერთობას, მათ პარმონიას თუ დაპირისპირებას. სიზმრის არსი კი დამოკიდებულია იმაზე, თუ რამდენად საჭიროებს ადამიანის ცნობიერი კომპენსირებას.

ნაშრომში განხილულია ოთხი სიზმარი: მთხოვნელის, აველუმისა და სონიას საერთო სიზმარი რომანიდან “აველუმი”, ელიზბარის სიზმარი რომანიდან “გოდორი” და ნიკოს სიზმრები რომანიდან “მარტის მამალი”. შეძლებისდაგავარად წარმოდგენილია მათი ინტერპრეტაცია პერსონაჟების ინდივიდუალური განცდების, სიზმრის არქეტიპული სახეებისა და რეალური კონტექსტის ფონზე.

რომანში “აველუმი” მთავარი პერსონაჟის, აველუმის სიზმარს კონკრეტული ფუნქცია აქვს – ის არ შეიცავს სასიცოცხლო მნიშვნელობის ინფორმაციას, რომელიც გმირებს ან მკითხველს რაიმეს ახლებურად დანახვას შეუწყობს ხელს, მაგრამ თავად პერსონაჟებსა და მკითხველს აველუმისა და სონიას ურთიერთობის დეტალებს ახსენებს, ხსნის მათი დამოკიდებულებისა და ურთიერთობის განვითერების მიზეზებს და კიდევ ერთხელ უსვამს ხაზს ნაწარმოების მთავარ საკითხს – აველუმის მარტოობასა და მიუსაფრობას.

გაცილებით მნიშვნელოვანი ფუნქცია აქვს ელიზბარის სიზმარს რომანში “გოდორი”. სიზმარი ნათლად ახასიათებს ელიზბარის პიროვნებას და მისი მივიწყებული და განდევნილი სურვილებიდან კარგად ჩანს ამ პერსონაჟის ხასიათი. ელიზბარი ცდილობს, დაივიწყოს მისი შვილის უბედურება, მაგრამ სიზმრიდან კარგად ჩანს, რომ ის თავს დამნაშავედ გრძნობს კაშელების ოჯახში დატრიალებულ ტრაგედიაში, რადგან შვილს კარგი მამაობა ვერ გაუწია. სწორედ ამას ახსენებს არაცნობიერი მის ცნობიერს. ეს ელიზბარის მთავარი პრობლემაა, მაგრამ ამავდროულად სიზმარში ის განუხორციელებელი სურვილების კომპენსირებასაც ცდილობს – ტურნირზე, სადაც ის სახალხო გმირია, ელიზბარი ამარცხებს ბოროტ ტახს – რაუდენს და ამით ლიზიკოს სიყვარულსა და თავისუფლებას მოიპოვებს. საქმე ისაა, რომ ელიზბარი ამას ვერ შეძლებს ნაწარმოების რეალურ პლანში, ამიტომ თვითრეალიზებას მხოლოდ სიზმრის მეშვეობით ახერხებს. შესაბამისად, სიზმარი მნიშვნელოვან ეტაპად იქცევა მის ცხოვრებაში.

რაც შეეხება ნიკოს სიზმარს რომანში “მარტის მამალი”, აქ სიზმარი რომანის ერთ-ერთი ყველაზე მნიშვნელოვანი მონაკვეთია, რადგან სიზმარში კვანძი იხსნება და ნაწარმოები თავის კულმინაციას აღწევს. გაანალიზებულია ყველა პრობლემა, რომელიც რომანში დგას და ყველა საკითხი, რომელიც მთავარ გმირს აწუხებს. სიზმარი რთულია არა მხოლოდ როგორც არქეტიპული სახე-ხატებით სავსე რამდენიმე ეპიზოდიანი არაცნობიერის გზაგნილი, არამედ როგორც ავტორის დასკვნა ნიკოს პიროვნებასთან, ცხოვრებასთან, სიმართლესთან თუ დანაშაულთან მიმართებაში. სიზმარი, ფაქტობრივად, ამ რომანის დასკვინითი ნაწილიცაა, რადგან რაც ხდება სიზმრის შემდეგ, ანუ ნაწარმოების რეალური პლანი, აღარაფერია იმასთან შედარებით, რაც უკვე მოხდა ნიკოს შინაგან სამყაროში. რაკი ავტორი

მთელი რომანის განვითარების მანძილზე გვახედებს ნიკოს სულიერ სფეროში და გვაცნობს მას შიგნიდან, მან ნიკოს პრობლემებიც შიგნიდან ამოხსნა, ანუ არაცნობიერისა და ცნობიერის, სიზმრისა თუ წარმოსახვის, ფიქრის, ოცნების მეშვეობით და მკითხველიც ამ პროცესის უშუალო მონაწილე გახადა.

საბოლოოდ შეიძლება ითქვას, რომ სიზმარს ოთარ ჭილაძის რომანებში მნიშვნელოვანი ფუნქცია აქვს, ისეთივე მნიშვნელოვანი, როგორც იუნგის თეორიის მიხედვით, რეალურ ცხოვრებაში. თუკი ნაწარმოებში არის სიზმარი, სწორედ მასშია გამოხატული რომანის მთავარი აზრი, ხდება კულმინაცია ად ავტორი იძლევა დასკვნებს. ამ სიზმრებში, რომლებიც დატვირთულია როგორც სუბიექტური, ასევე არქეტიპული სახე-ხატებით, ყოველთვის იგრძნობა ავტორის ჩართულობაც, რადგან გვხვდება კონკრეტული დასკვნები, პარალელები, შეუფარავად გაკეთებული მინიშნებები ზღაპრის გმირებსა თუ მითოლოგებებზე. ეს კი ავტორის ხელწერისა და მისი ინდივიდუალური მიღების შედეგია.

— — —

“ცნობიერების ნაკადის” ტექნიკას ოთარ ჭილაძის პროზაში მნიშვნელოვანი და საინტერესო ადგილი უჭირავს. იგი ავტორს რომანებში სტილის გამრავალფეროვნებასა და პერსონაჟების ხასიათების უკეთ წარმოჩენაში ეხმარება. მწერლის თავდაპირველ რომანებში “ცნობიერების ნაკადის” ტექნიკას ნაკლებად შევხვდებით, მაგრამ დროთა განმავლობაში ჭილაძე გამომსახველობით ფორმათაგან უპირატესობას ანიჭებს შინაგან მონოლოგს და მალე ეს მისი პროზის მხატვრული თავისებურება ხდება. ოთარ ჭილაძე ოსტატურად ახერხებს ტრადიციული და “ცნობიერების ნაკადისეული” შინაგანი მონოლოგების შერწყმას და შედეგად ვღებულობთ ავტორის თავისებურ ინტერპრეტაციას – ტრადიციულ შინაგან მონოლოგებში ჩართული “ცნობიერების ნაკადის” ტექნიკა, რომელიც თავის მხრივ ასოციაციურად დაკავშირებულ ფიქრებსა და მოგონებებს ეყრდნობა, ცალკეული პერსონაჟების სიღრმისეული პრობლემებისა და სამყაროს წარმოჩენას უწყობს ხელს.

რომანში “მარტის მამალი”, ტექნიკის გარდა, “ცნობიერების ნაკადის” შინაარსობრივი მხარეცაა აქცენტირებული – შინაგანი მონოლოგების საშუალებით, რომლებიც მთელს რომანს მოიცავს, წარმოჩენილია პერსონაჟის სულიერი სამყარო, მისი გაცნობიერებული თუ გაუცნობიერებული სურვილები, ეს ყველაფერი კი ნაწილობრივ გმირის არაცნობიერის წვდომას ემსახურება, რათა შესაძლებელი გახდეს მის მიერ პრობლემების გააზრება და მისი პირობითი “განკურნება”.

“ცნობიერების ნაკადის” ლიტერატურულ ნაწარმოებს “მარტის მამალი” რამდენიმე მიზეზით ემსგავსება: 1. რომანი წარმოადგენს ერთ დიდ მონოლოგს, სადაც შერწყმულია სუბიექტური და ობიექტური პლანი, მაგრამ სუბიექტურს აშკარა უპირატესობა ენიჭება; 2. ნაწარმოებში არ გვხვდება მკვეთრად ჩამოყალიბებული სიუჟეტი და რეალურ პლანს ქმნის ლოგინად ჩავარდნილი ნიკო და მის გარეშემო მოტრიალე ადამიანები. 3. რომანი ძირითადად ეყრდნობა ასოციაციურად დაკავშირებულ ფაქტებს და, შესაბამისად, მოგონებებს, წარსულს. 4. ეს ყოველივე ემსახურება მთავარი პერსონაჟის შინაგანი სამყაროს ამოხსნას, შესაძლოა, ნაწილობრივ მისი არაცნობიერის წვდომასაც, რაც საბოლოოდ გამოიხატა ნიკოს სიზმარში, რომელიც ნაწარმოების კულმინაციური მომენტია და რომელიც სწორედ არაცნობიერის გზავნილია.

რომანი “გოდორი”, ფაქტობრივად, მთლიანად “ცნობიერების ნაკადის” ტექნიკითაა შესრულებული, რადგან აქ ერთმანეთს ენაცვლება სხვადასხვა პერსონაჟის შინაგანი მონოლოგი და გმირებისყველა მოგონება სშირად ასოციაციურად, ალოგიკურადაა ერთმანეთთან დაკავშირებული. რომანის პირველ ნაწილში ჭარბობს ტრადიციული თხრობის სტილი, განსაკუთრებით მაშინ, როდესაც ავტორი მონოლოგებს სიუჟეტით ტვირთავს, მაგრამ მეორე ნაწილში, სადაც სიუჟეტი იძაბება, გმირების სულიერი დრამა კი მძაფრდება, მატულობს და კულმინაციას აღწევს “ცნობიერების ნაკადის” ტექნიკის ჭილაძისეული ინტერპრეტაცია. თუკი “მარტის მამალში” ავტორი ამგვარ ტექნიკას შედარებით ნაკლებად მიმართავს და აქცენტს მის შინაარსობრივ მხარეზე აკეთებს – (პერსონაჟის არაცნობიერის წვდომა), რადგან იქ გმირის, ნიკოს სულიერი მდგომარეობა სწორხაზოვანია და ნაკლებად მძაფრდება, “გოდორში “ცნობიერების ნაკადის” ტექნიკის გააქტიურება სწორედ პერსონაჟის შინაგან მდგომარეობასა და ხასიათზეა დამოკიდებული. და რაც უფრო დაძაბული და აღელვებულია გმირი,

მით უფრო აქტიურდება “ცნობიერების ნაკადის” ტექნიკაც. ამით ოთარ ჭილაძე უილიამ ფოლკნერს ემსგავსება, რადგან იყენებს ამგვარ ტექნიკას, როგორც ეფექტურ მხატვრულ ხერხს მხოლოდ მაშინ, როცა ამას სიუჟეტი, კონკრეტულად კი, გმირის უკიდურესად დაძაბული სულიერი მდგომარეობა მოითხოვს.

“გოდორში” : 1. ტრადიციულ შინაგან მონოლოგებში პერიოდულად ერთვება “ცნობიერების ნაკადის” ტექნიკა, შესაბამისად აქ გვხვდება ტრადიციულიც და “ცნობიერების ნაკადისეული” შინაგანი მონოლოგებიც, 2. ამ ტექნიკას მწერალი იყენებს მხატვრული ეფექტისთვის (როგორც უილიამ ფოლკნერი), როცა მისი გმირები კრიზისში არიან და მათი განწყობის გამოსახატავად ასოციაციური აზროვნება საუკეთესო საშუალებაა. 3. ავტორი შინაგან მონოლოგებს სიუჟეტით არ ტვირთავს, ამიტომ შიგადაშიგ ახერხებს არაცნობიერის წვდომას და შედეგად ჯოისისეულ კონცეფციასაც უახლოვდება. 4. ხშირად თხრობა III პირში მიმდინარეობს, მაგრამ შინაგანი მონოლოგი მაინც ინარჩუნებს “ცნობიერების ნაკადისეულ” ფორმას. ეს ყველაფერი ერთად წარმოადგენს “ცნობიერების ნაკადის” ტექნიკის ოთარ ჭილაძისეულ ინტერპრეტაციას.

საინტერესოა ასევე “ცნობიერების ნაკადის” ლიტერატურაში ინდივიდუალური მექანიზმებისა და მოგონების როლი, რადგან ამგვარი ლიტერატურა სწორედ მოგონებისა და წარსულის რეტროსპექციის ხარჯზე არსებობს. ინდივიდუალური მექანიზმების ფსიქოლოგიის, ფილოსოფიისა თუ კულტურის პალეობის შესწავლის საგანი გახდა, მაგრამ აღსანიშნავია, რომ ის ლიტერატურაშიც მნიშვნელოვან როლს თამაშობს. „ცნობიერების ნაკადის“ ტექნიკით შესრულებულ ნაწარმოებებში განსაკუთრებით კარგად არის გამოკვეთილი ინდივიდუალური მექანიზმების მნიშვნელობა და ფორმები, რადგან ამ ტიპის რომანები, კონკრეტული პერსონაჟების კონკრეტულ მოგონებებს ეყრდნობა. შესაბამისად, გმირების გონებაში, ცნობიერებაში, გამუდმებით ხდება წარსული მოვლენების რეპროდუქცია ასოციაციებისა და, თითქოს, ლოგიკურად დაუკავშირებელი ფიქრების მეშვეობით.

მექანიზმება ძირითადად წარსულს მოიცავს, მაგრამ ამასთანავე ის ყოველთვის აწმყო დროა (იხსენებ რაიმეს, მაგრამ ამ წამს). წარსულისა და მომავლის მოვლენებიც არსებობს მხოლოდ ახლა, მექანიზმებაში. მომავალიც კი აწმყოა, რადგან გმირის ცნობიერებაში აწმყოში იქმნება მომავლის წარმოდგენებიც. ის,

რისი დამახსოვრებაც უნდა მოხდეს, ჯერ აწყოში აღიქმება, შემდეგ აღქმული მოვლენა შეინახება, დაბოლოს, წარსულში მოღებული ცოდნა მომავალში გახდება საჭირო. ანუ მეხსიერება არ მხოლოდ წარსულის შენახვას, არამედ მომავალში მისი გამოყენების შეასძლებლობასაც გულისხმობს.

ამ კონცეფციას ემორჩილება ჭილაძის რომანებიც. ნარაციის დროს მისი გმირები აქტიურად არ მოქმედებენ, არამედ იგონებენ წარსულ ქმედებებს (აქცენტი ყოველთვის წარსულზეა, ისინი მიჯაჭვული არიან წარსულს) ან განსაზღვრავენ მომავალ ქმედებებს (ან სულაც უარყოფენ მომავალს), აწყოს მოვალეობა კი მხოლოდ ამ ყველაფერის გაერთიანებაა (აწყო პასიურია). თუმცა ასე, ალბათ, იმიტომ ხდება, წარსულიც იმიტომ განსაზღვრავს გმირების აზროვნებასა და ყოფას, რომ აწყო უფუნქციოა, უინტერესო და მას ყოველთვის გაურბიან. “მარადიული ახლა”, რომელიც თავის თავში იტევს წარსულ და, შესაძლოა, მომავალ სივრცესაც, სინამდვილეში პერსონაჟების ტრაგიკულობის, კრიზისული მდგომარეობის მაჩვენებელია.

შეიძლება ითქვას, რომ „ცნობიერების ნაკადი“, როგორც ლიტერატურული მეთოდი, ან მეორე შემთხვევაში, როგორც ეფექტური მხატვრული ხერხი, ლიტერატურაში სწორედ ინდივიდუალური მეხსიერების გააქტიურების შედეგად არსებობს, რადგან მეხსიერება პერსონაჟის შინაგანი სამყაროთი, კონკრეტულად კი მისი მოგონებებითა და ასოციაციური აზროვნებით ინტერესდება, რაც მწერალს საშუალებას აძლევს, სააშკარაოზე გამოიტანოს გმირის არაცნობიერი სურვილები და პრობლემები. ეს კი „ცნობიერების ნაკადის“ მეთოდის მთავარი მიზანია. ოთარ ჭილაძეც ხშირად მიმართავს წარსულის რეპროდუქციას, ამიტომ ზოგიერთი რომანის ტექსტი, ფაქტობრივად, მოგონებებითაა აწყობილი და აშკარად იგრძნობა წარსულის უპირატესობა აწყო დროსთან შედარებით, რასაც პერსონაჟის მიერ წარსულ ფატებთან ემოციური კავშირის დამყარებაც უწყობს ხელს.

ერთ-ერთი ავტორი, რომელმაც თავისი საუკეთესო ნაწარმოებები სწორედ „ცნობიერების ნაკადის“ ტექნიკაზე დაყრდნობით შექმნა, უილიამ ფოლკნერია. აღინიშნება ტიპოლოგიური მსგავსება ფოლკნერისა და ჭილაძის პროზას შორის. მათი რომანები ახლოს დგას წერის ტექნიკის კუთხითაც. ფოლკნერთან შედარებით, ჭილაძე გაცილებით ნაკლებად იყენებს „ცნობიერების ნაკადის“ ტექნიკას, მაგრამ მის წერის მანერას მაინც ბევრი საერთო აქვს ფოლკნერისეულ

“ცნობიერების ნაკადის” ტექნიკის ინტერპრეტაციასთან. ამ მხრივ საინტერესოა ჭილაძის რომანის, “გოდორის” მიმართება ფოლკნერის რომანთან “ხმაური და მძვინვარება”.

თემატური თუ ტიპოლოგიური თვალსაზრისით, რომანებს შორის რამდენიმე საერთო შტრიხი არსებობს: ორივე ნაწარმოებში სიუჟეტი ერთი ოჯახის გარშემო ტრიალებს და მის ისტორიას ჰყვება. ეს ოჯახური ურთიერთობები თუ პარმონია ნელ-ნელა ირდვევა, რასაც საბოლოოდ ნათესაური კავშირების სრულ უარყოფამდე მივყავართ. აქვე უნდა ითქვას, რომ ფოლკნერთან გმირების ტრაგიკული ხასიათის, ბედის და მათი ურთიერთობების ნგრევის მიზეზი არა მხოლოდ სულიერი, არამედ სოციალური და ზნეობრივი ფონია. ჭილაძის რომანებშიც ასევე გამოკვეთილია ამგვარი სოციალური და მორალური პლანი. ამ შემთხვევაშიც პერსონაჟების შინაგანი ბრძოლა, მათი ოჯახებისა და იდეალების რღვევა, პირდაპირ კავშირშია ქვეყნის მორალურ გადაგვარებასთან (რის წარმოჩენასაც ცდილობს მწერალი), რაც, თავის მხრივ, რუსეთის გავლენის ქვეშ მოქცევას უკავშირდება.

რაც შეეხება ტექნიკას, ამ მხრივ ზემოთხსენებულ რომანებს შორის რამდენიმე მსგავსება და განსხვავება იკვეთება: “გოდორში” ოთარ ჭილაძემ “ცნობიერების ნაკადის” ტექნიკა დაახლოებით ისეთივე ფორმით გამოიყენა, როგორც ფოლკნერმა “ხმაურსა და მძვინვარებაში” – როგორც მხატვრული ხერხი, რომელიც პერსონაჟების სუბიექტური სამყაროს საიდუმლოებების ამოსახსნელად დასჭირდა. მაგრამ არა იმავე დოზით, რადგან ფოლკნერმა, ფაქტობრივად, მთელი ნაწარმოები ამ ტექნიკით შეასრულა (თუ არ ჩავთვლით ჯეისონისა და დილზის მონოლოგებს), ჭილაძემ კი ამგვარ ტექნიკას მხოლოდ დროდადრო მიმართა.

ოთარ ჭილაძის პროზის მხატვრული ფსიქოლოგიზმი პიროვნების სულიერი მდგომარეობის წარმოჩენას, მისი შინაგანი პრობლემების გადაჭრას ისახავს მიზნად. ოთარ ჭილაძე სწორედ ის მწერალია, რომელიც ისე უდგება თითოეულ პერსონაჟს, როგორც ფსიქოლოგი და მისი სულიერი მოძრაობის დეტალებს “შიგნიდან”, ხანგრძლივი კვლევისა და ძიების შედეგად ხსნის. ამ პროცესში კი მწერალს როგორც ლიტერატურაში, ასევე ფსიქოლოგიაში არსებული თეორიული გამოცდილება ეხმარება.

როგორც ვხედავთ, წარმოდგენილმა ნაშრომმა დასვა და შეძლებისდაგვარად განიხილა რამდენიმე მნიშვნელოვანი საკითხი ოთარ ჭილაძის პროზასთან მიმართებაში, თუმცა ეს არ ნიშნავს, რომ ამ საკითხების კვლევა ამოწურულია, პირიქით, სამომავლოდ კიდევ უფრო საინტერესო იქნება ქართველ მწერალთა შემოქმედების, ამ შემთხვევაში კი ოთარ ჭილაძის პროზის, მსოფლიო ლიტერატურული ტენდენციებისა და თეორიების ჭრილში კვლევა, რაც კიდევ უფრო თვალსაჩინოს გახდის ჩვენი ეროვნული ლიტერატურის მიღწევებს.

პიპლიობრაზი:

1. არჩვაძე ლ., ოთარ ჭილაძის ახალი რომანი “აველუმი”, კრიტიკა, 1997, 28 თებერვალი,
2. ასათიანი გ., მწერლის ახალი რომანი, კრიტიკა, 1977, №2,
3. ასათიანი გ., რომანის დედააზრი, ლიტერატურული საქართველო, 1977, 18 მარტი
4. ბენდელიანი ც., ილია ჭავჭავაძე ქართულ რომანში, ცისკარი, 1999, №11
5. ბერაძე გ., მამა და ქართულ რომანში “ყოველმან ჩემმან მპოვნელმან”, ქართველური მემკვიდრეობა, 2005, №9
6. ბერგსონი ა., ცნობიერების უშუალო მონაცემები, თბილისის დამოუკიდებელი უნივერსიტეტი, 1993
7. ბრეგაძე ლ., ფსიქოანალიზი და მხატვრული შემოქმედება, ლიტერატურის თეორია, ლიტერატურის ინსტიტუტის გამომცემლობა, თბ., 2008
8. გენძეხაძე ც., წრეში მოქცეული დრო და სივრცე, მნათობი, 2003, №3-4,
9. გვერწითელი გ., კომუნისტი, 1983, 25 მარტი
10. გვერწითელი გ., მითი და რეალობა, ლიტერატურული საქართველო, 1979, 24 აგვისტო
11. გოგია ზ., საუკუნეთა გზასაყარზე, თბ. 2006
12. დოიაშვილი თ., მიხ. ჯავახიშვილი და ფსიქოანალიზი, კრებული ლელგარი, შემდგ. რედ. ი. ორჯონიკიძე, თბ., ლიტ. მატიანე, 2005
13. ვულფი ვ., ესეები, თბილისი, 1988
14. თევზაძე თ., ოთარ ჭილაძის, როგორც რომანისტის, ზოგიერთი თავისებურების შესახებ, ლიტერატურული ძიებანი, 1989, გ 3(18)
15. თოფურიძე ე., ცნობიერების ნაკადის ტექნიკა ჯოისისა და ფოლკნერის შემოქმედებაში, დასავლეთ ევროპის ლიტერატურა, XX საუკუნე, თბ., თბილ. უნ-ტის გამ-ბა, 1988
16. თოფურიძე ე., უილიამ ფოლკნერის რომანის პოეტიკა, თბილისი, 1984
17. იმედაშვილი კ., ოჭილაძის მარტის მამალი, ცისკარი, 1988, №11
18. იმედაშვილი კ., ეპოქა ადამიანის თვალებით იცქირება, ლიტერატურული საქართველო, 1983, 11 თებ.

19. იმედაძე ი., XX საუკუნის ფსიქოლოგიის ძირითადი მიმდინარეობები, გამომცემლობა “ენა და კულტურა”, 2004
20. ინგარდენი რ., კონკრეტიზაცია და რეკონსტრუქცია, სჯანი, 2011, №12, მთარგმნ. ლევან ბრეგაძე
21. კალანდარიშვილი ე., გამქრალი საქართველოს ძიებაში (ოთარ ჭილაძის “გოდორი”), ლიტერატურა და სხვა, 2004
22. კვაჭანტირაძე მ., მარტის მამალი” - დრო და სივრცე, ცისკრი, , 1992, №2
23. კვაჭანტირაძე მ., ტრავმული მეხსიერება პოსტსაბჭოთა ქართულ ნარატივში, კრიტიკა, 2010
24. კიკვიძე ზ., “ცნობიერების ნაკადის” ტექნიკა ოჭილაძის რომანში “გოდორი”, ჰუმანიტარულ მეცნიერებათა ფაკულტეტის შრომები, ტომი VII (II), 2005
25. კიკნაძე ზ., ქართული ხალხური ეპოსი, ლოგოს-პრესი, თბილისი, 2001
26. მაისურაძე ლ., ტკივილიანი რომანი, მნათობი, 1998, №5-6
27. მამაცაშვილი ნ., მითოსური ნაკადი ო. ჭილაძის რომანში, მნათობი, 1981, №4
28. მითოლოგიური ენციკლოპედია ყმაწვილთათვის, ქართული მითოლოგია, ბაკმი, 2006
29. მილორავა ი., ოთარ ჭილაძის “რკინის თეატრის” მხატვრული სივრცე, კრიტიკა, 2010
30. ნათაძე რ., მეხსიერება, თბილისი, 1963
31. ნემსაძე ა., სამთა ერთიანობის პრინციპი ოთარ ჭილაძის მხატვრულ სიტემაში, კრიტიკა, 2010
32. საყვარელიძე ნ., შინაგანი მეტყველების პირობითი ტრანსფორმაცია მხატვრულ ლიტერატურაში, მაცნე, ენისა და ლიერატურის სერია, 1974, №4
33. სიდოროვი ე., “ლიტერატურნაია გაზება”, 1991, 24 აპრ., დამოწმ. კრიტიკა, 10მაისი, 1991
34. ტურავა მ., მამის ძიება ოთარ ჭილაძის პროზაში (“მარტის მამალი”), კულტურათშორისი კომუნიკაციები, 2008, №4
35. ფარჯანაძე დ., მეხსიერების ფსიქოლოგია, თბ. 2008
36. ფოლკნერი უ., ბაკურ სულაკაურის გამომცემლობა, თბილისი, 2010
37. ქეცბა-ხუნდაძე ლ., ენისადა ემოციების ინტერდისციპლინარული კვლევისთვის, თსუ-ს კულტურის მეცნიერებათა ინსტიტუტის საერთაშორისო გამოცემა “ცივილიზაციური ძიებანი”, №6, 2008

38. ყარალაშვილი რ., ადსარებითი პროზის ტრადიცია და თანამედროვე ცენტრისკენული რომანი, დასავლეთ ევროპის ლიტერატურა, XX საუკუნე, თბ., თბილ. უნ-ტის გამ-ბა, 1988
39. ყამბეგაშვილი ქ., თანამედროვე ქართული რომანისერთი ნიშანი: [დროის განმსაზღვრელი როლი მე-20 საუკუნის 70-იანი წლების ქართულ რომანში ო. ჭილაძისა და თ, ბიბილურის პროზის მაგალითზე], ნობათი, 1986, №5-6
40. ყიასაშვილი ნ., ჯეიმს ჯოისის “ულისეს” წინასიტყვაობა, თბილისი, 1983
41. შარია პ., ფროიდიზმის ესთეტიკური და ლიტერატურული კონცეფციის მოკლე კრიტიკული მომიხილვა. კრებულში: ლიტერატურის თეორიისა და ესთეტიკის საკითხები, თბ., “მეცნიერება”, 1970
42. ჩიხლაძე თამარ, სუბ. თხრობა დაციტირებული მეტყველება, ისტორია, თეორია და პრაქტიკა, (XX ს-ის დასავლეთევროპული რომანის მიხედვით) სჯანი, 2007, VIII
43. ცანავა ა., რაც ერთხელ ცხოვლად სულს დააჩნდების, მნათობი, 1986, №9
44. ცანავა ნ., ისტორია უძალლოდ დარჩენილი დაკარგული ქვეყნისა და უქვეყნოდ დარჩენილი დაკარგული ძაღლისა, მნათობი, 2004, № 12
45. ცოფურაშვილი თ., კოლექტიური ფსიქოანალიზის „ლიტერატურული ანშლაგი”, 24 საათი, 2004, 22 ივნისი
46. ძიგუა მ., ლიტერატურული წერილები, “ცნობიერების ნაკადი” ჭოლა ლომთათიძის შემოქმედებაში, თბ. 2005
47. წიფურია ბ., პოსტმოდერნიზმი, ლიტერატურის თეორია, ლიტერატურის ინსტიტუტის გამომცემლობა, თბ., 2008
48. ჭილაძე ო., ყოველმან ჩემმან მპოვნელმან, რჩეული თხზ., ტომი II, თბ., 1986
49. ჭილაძე ო., გოდორ, არეტქ, 2006
50. ჭილაძე ო., მარტის მამალი, მერანი, თბ. 1987
51. ჭილაძე ო., აველუმი, არეტქ, 2007
52. ხელაია ნ., მარადიული დუელი, ლიტერატურა და ხელოვნება, 2007, №7
53. ჯალიაშვილი მ., დაკარგული ქვეყნის ძიება თთარ ჭილაძის “გოდორის” მიხედვით, კრიტიკა, 2010
54. ჯალიაშვილი მ., წიგნი-საუკუნის ხატი, ცისკარი, 1997, №8

55. Андреев А. Н., Целостный анализ литературного произведения: учеб. пособие для студ. вузов/ НМ центр, 1995
56. Бахтин М. Проблемы поэтики Достоевского, Москва, «Художественная литература», 1972
57. Гинзбург Лидия, О психологической прозе, Сов. писатель ленинградское отделение, 1974
58. Джеймс У. поток сознания, Психология. М.: Педагогика, 1991
59. Гудонене В., искусство психологического повествования (от Тургенева к Бынины), Вильнюс: изд. Вильн. гос. ун-та, 1998
60. Забабурова Н.В. Французский психологический роман (эпоха Просвещения и романтизм), изд. Ростовск. ун-та, 1992
61. Золотухина О. Б., «Психологизм в литературе», Гродно 2009
62. Затонский Д., Искусство романа и XX века, М.: Худож.лит., 1973 (фото)
63. Фрейд З., Введение в психоанализ, <http://www.klex.ru/19d>
64. Фрейд З., О психоанализе, http://www.koob.ru/freud_zigmind/about_psychanalis
65. Кабанова С., Особенности романа У. Фолкнера "Шум и ярость", 18 декабря 2006 года
<http://www.habit.ru/20/104.html>
66. Калина Н.Ф., И.Г. Тимощук, Основы юнгианского анализа сновидений, Серия Актуальная психология. М.-К. Релф-бук - Ваклер 1997
http://www.koob.ru/kalina_n_f/fundamentals_dreams
67. Карвасарский Б. Д., Психотерапевтическая энциклопедия. — С.-Пб.: Питер. . 2000
68. Каринберг В. К., Фрейд и Кафка, <http://www.sunhome.ru/psychology/16224/p1>
69. Карельский А.В. от героя к человеку (развитие реалистического психологизма в европейском романе 30-60-х годов XIX в.), Вопросы лит., 1983, №9
70. Лейтес, Н. С. Конечное и бесконечное. Размышление о литературе XX в. : мировидение и поэтика, Перм, 1993
71. Матвеева Н. И., Нarrативная структура англоязычного художественного дискурса :На материале романов "потока сознания" начала XX века, Москва, 2003

- (სადისერტაციო მატება) <http://www.dissercat.com/content/narrativnaya-struktura-angloyazychnogo-khudozhestvennogo-diskursa-na-materiale-romanov-potok#ixzz2I5IFgcwd>,
72. Лотман Ю.М. Культура и взрыв. — М.: "Гнозис", 1992. (დამოუკავშირი ნათელი და განვითარებული სამეცნიერო მუნიციპალიტეტის სამსახურის მიერ გამოცემა)
- Тимощук, "Основы юнгианского анализа сновидений", Серия Актуальная психология .М.-К. Релф-бук - Ваклер 1997 http://www.koob.ru/kalina_n_f/fundamentals_dreams
73. Наваль М., Роман Уильяма Фолкнера "Шум и ярость" в контексте литературных исследований XX в., Воронеж, 2003 (სადისერტაციო მატება)
- <http://www.dissercat.com/content/roman-uilyama-folknera-shum-i-yarost-v-kontekste-literaturnykh-iskanii-xx-v#ixzz2HxVmp0z5>
74. Нуркова В. В., Общая психология, Память, том 3, ACADEMIA, 2006
75. Павлищева Я.А., Виды потока сознания в трилогии Г. Миллера «тропик рака», «чёрная весна» и «тропик казерога», филология, 2008
- http://www.nbuv.gov.ua/portal/natural/Vsntu/2008_2009/89-SevNTU/89-34.pdf
76. Падучева Е. В., Серия литературы и языка, Том 54, 1995
77. Переходцева, Вестник Пермского университета, концепции памяти в современном западном литературоведении, 2012
78. Проскурин Б. М., Художественный психологизм до и после Фрейда (русский и зарубежный опыт), 2008, <http://philologicalstudies.org/dokumenti/2008/vol1/3/5.pdf>
79. Реизов. Б.Г. Гюстав Флобер. Изд-во Академии наук СССР:Москва,1958: (дамовм. Проскурин)
80. современный словарь-справочник по литературе, 1999
81. Теперник Т. ф, литературное сновидение, терминологический аспект, Литература XX века: итоги и перспективы изучения Материалы Пятых Андреевских чтений. Под редакцией Н.Н. Андреевой, Н.А. Литвиненко и Н. Т. Пахсарьян. М., 2007. С
82. Холл К. С., Линдсей Г., Теории личности. Москва: «КСП+», 1997
83. Холл Дж. А., Санкт-Петербург, «юнгианско толкование сновидений», 1996
84. Юнг К. Г. Психологические типы, М. 1967
85. Erll A., Nunning A., Where Literature and Memory Meet: Towards a Systematic Approach to the Concepts of Memory used in Literary Studies//Literature, Literary History and Cultural Memory/ed. by Herbert Grabes. Nar: Tübingen, Vol. 2005

86. Fromm W., Scherer Ch., Der Traum, die Künste und die Wissenschaften, Einführung zum Schwerpunkt, Nr. 4, April 2004
http://www.literaturkritik.de/public/rezension.php?rez_id=7019&ausgabe=200404
87. Genette G., Nouveau discours du récit, 1983, (დამოღ. Матвеева Н. И.)
88. Gessner-Utsch, Subjektiver Roman: Studien zum Verhältnis von fiktionalen Subjektivitäts- und Wirklichkeitskonzeptionen in England vom 18. Jahrhundert bis zum Modernismus, Frankfurt/M., Berlin, Bern, New York, Paris, Wien, 1994. XI (დამოღ. Mauter Eva Maria , Subjective Perspectives in Ian McEwan's Narrations, GRIN Verlag, 2009)
89. Glauser L., Die erlebte Rede im englischen Roman des 19. Jahrhunderts, Bern, 1948, (დამოღ. საყვარელიძე ნ., შინაგანი მეტყველების პირობითი ტრანსფორმაცია მხატვრულ ლიტერატურაში, მაცნე, ენისა და ლიერატურის სერია, 1974, №4
90. Humphrey R. "Stream of consciousness in modern novel", university of California Press, 1968.
91. Jauss H.R., Literaturgeschichte als Provokation der Literaturwissenschaft (aus: Reiner Warning [Hg.], Rezeptionsästhetik, München: Fink, 1979
92. Lavenne François-Xavier ... 1-3Virginie Renard, François Tollet, Fiction between inner life and collective Memory, a methodological reflection.
<http://www.bc.edu/publications/newarcadia/meta-elements/pdf/3/fiction.pdf>
93. Mauter Eva Maria , Subjective Perspectives in Ian McEwan's Narrations
GRIN Verlag, 2009
94. Nye. R.D., Three Psychologies: Perspectives from Freud, Skinner and Rogers, 6th ed. Australia, Canada:Wandsworth: Thomson Learning, 1975
95. Parsons D., "Theorists of the Modernist Novel: James Joyce, Dorothy Richardson and Virginia Woolf", 2007
96. Pethas., Ruchatz J., Gedächtnis und Erinnerung. Ein interdisziplinäres Lexikon. Rowohlt's enzyklopädie im Rowohlt Taschenbuch Verlag, 2001 Reinbeck bei Hamburg.
97. Ricoeur P., Memory, History, Forgetting, transl. Kathleen Blamey and David Pellauer, Chicago and London: University of Chicago Press, 2004

98. Rühling L., Psychologische Zugänge, herausgegeben von Arnold H. L., Detering H., “Grundzüge der Literaturwissenschaft”, Deutscher Taschenbuch Verlag, Originalausgabe 1996, Auflage - 2008
99. Sartre J.P., William Faulkner, Three decades of criticism, edited by Frederick J. Hoffman and Olga W. Vickery, ,Time in Faulkner:The Sound and the fury, Harcourt, Brace & World, inc., 1963, Digitized 2008
100. Schöttker D., Theorien der literarischen Rezeption, herausgegeben von Arnold H. L., Detering H., “Grundzüge der Literaturwissenschaft”, Deutscher Taschenbuch Verlag, Originalausgabe 1996, Auflage – 2008
101. Stanzel f., The Narative situation in the Novel, Indiana University Press, 1971
102. Wielpert G., Sachworterbuch der Literatur,Kröners Taschenausgabe, Stuttgard, 1989